

宿雨清幾句


朝陽展帝城

望奔人樂業

瓊上踏歌行



全唐詩 三



中华古典精华文库

全 唐 诗

(第三部)

第八十一卷

卷 81_1 【长信宫中树】

乔知之

婀娜当轩树，葳蕤倚兰殿。叶艳九春华，香摇五明扇。
馀花鸟弄尽，新叶虫书遍。零落心自知，芳菲君不见。

卷 81_13 【下山逢故夫】

乔知之

妾身本薄命，轻弃城南隅。庭前厌芍药，山上采蘼芜。
春风冒紈袖，零露湿罗襦。羞将憔悴日，提笼逢故夫。

卷 81_14 【巫山高】

乔知之

巫山十二峰，参差互隐见。浔阳几千里，周览忽已遍。

想像神女姿，摘芳共珍荐。楚云何逶迤，红树日葱蒨。
楚云没湘源，红树断荆门。郢路不可见，况复夜闻猿。

卷 81_15 【弃妾篇】

乔知之

妾本丛台右，君在雁门陲。悠悠淇水曲，彩燕入桑枝。
不因媒结好，本以容相知。容谢君应去，情移会有离。
还君结绶带，归妾织成诗。此物虽轻贱，不用使人嗤。

卷 81_16 【苦寒行】

乔知之

胡天夜清迥，孤云独飘飏。遥裔出雁关，逶迤含晶光。
阴陵久裴回，幽都无多阳。初寒冻巨海，杀气流大荒。
朔马饮寒冰，行子履胡霜。路有从役倦，卧死黄沙场。
羁旅因相依，恸之泪沾裳。由来从军行，赏存不赏亡。
亡者诚已矣，徒令存者伤。

卷 81_17【从军行（一作秋闺）】

乔知之

南庭结白露，北风扫黄叶。此时鸿雁来，惊鸣催思妾。
曲房理针线，平砧捣文练。鸳绮裁易成，龙乡信难见。
窈窕九重闺，寂寞十年啼。纱窗白云宿，罗幌月光栖。
云月隐微微，夜上流黄机。玉霜冻珠履，金吹薄罗衣。
汉家已得地，君去将何事。宛转结蚕书，寂寥无雁使。
生平荷恩信，本为荣华进。况复落红颜，蝉声催绿鬓。

卷 81_18【拟古赠陈子昂】

乔知之

惻惻孤形影，悄悄独游心。以此从王事，常与子同衾。
别离三河间，征战二庭深。胡天夜雨霜，胡雁晨南翔。
节物感离居，同衾违故乡。南归日将远，北方尚蓬飘。
孟秋七月时，相送出外郊。海风吹凉木，边声响稍稍。
勤役千万里，将临五十年。心事为谁道，抽琴歌坐筵。
一弹再三叹，宾御泪潺湲。送君竟此曲，从兹长绝弦。

卷 81_19 【定情篇】

乔知之

共君结新婚，岁寒心未卜。相与游春园，各随情所逐。
君爱菖蒲花，妾感苦寒竹。菖花多艳姿，寒竹有贞叶。
此时妾比君，君心不如妾。簪玉步河堤，妖韶援绿萼。
凫雁将子游，莺燕从双栖。君念春光好，妾向春光啼。
君时不得意，弃妾还金闺。结言本同心，悲欢何未齐。
怨咽前致辞，愿得申所悲。人间丈夫易，世路妇难为。
始如经天月，终若流星驰。天月相终始，流星无定期。
长信佳丽人，失意非蛾眉。庐江小吏妇，非关织作迟。
本愿长相对，今已长相思。复有游宦子，结援从梁陈。
燕居崇三朝，去来历九春。誓心妾终始，蚕桑奉所亲。
归愿未克从，黄金赠路人。洁妇怀明义，从泛河之津。
于今千万年，谁当问水滨。更忆娼家楼，夫婿事封侯。
去时恩灼灼，去罢心悠悠。不怜妾岁晏，十载陇西头。
以兹常惕惕，百虑恒盈积。由来共结褵，几人同匪石。
故岁雕梁燕，双去今来只。今日玉庭梅，朝红暮成碧。
碧荣始芬敷，黄叶已淅沥。何用念芳春，芳春有流易。
何用重欢娱，欢娱俄戚戚。家本巫山阳，归去路何长。
叙言情未尽，采芣已盈筐。桑榆日及景，物色盈高冈。
下有碧流水，上有丹桂香。桂花不须折，碧流清且洁。
赠君此芳菲，爱惠常不歇。赠君比潺湲，相思无断绝。
妾有秦家镜，宝匣装珠玑。鉴来年二八，不记易阴晖。
妾无光寂寂，委照影依依。今日持为赠，相识莫相违。

卷 81_20 【绿珠篇】

乔知之

石家金谷重新声，明珠十斛买娉婷。此日可怜君自许，
此时可喜得人情。君家闺阁不曾难，常将歌舞借人看。
意气雄豪非分理，骄矜势力横相干。辞君去君终不忍，
徒劳掩袂伤铅粉。百年离别在高楼，一旦红颜为君尽。

卷 81_21 【和李侍郎古意（一作古意和李侍郎峤）】

乔知之

妾家巫山隔汉川，君度南庭向胡苑。高楼迢递想金天，
河汉昭回更怆然。夜如何其夜未央，闲花照月愁洞房。
自矜夫婿胜王昌，三十曾作侍中郎。一从流落戍渔阳，
怀哉万恨结中肠。南山幂幂兔丝花，北陵青青女萝树。
由来花叶同一根，今日枝条分两处。三星差池光照灼，
北斗西指秋云薄。茎枯花谢枝憔悴，香销色尽花零落。
美人长叹艳容萎，含情收取摧折枝。调丝独弹声未移，
感君行坐星岁迟。闺中宛转今若斯，谁能为报征人知。

卷 81_22 【倡女行】

乔知之

石榴酒，葡萄浆。兰桂芳，茱萸香。愿君驻金鞍，
暂此共年芳。愿君解罗襦，一醉同匡床。文君正新寡，
结念在歌倡。昨宵绮帐迎韩寿，今朝罗袖引潘郎。
莫吹羌笛惊邻里，不用琵琶喧洞房。且歌新夜曲，
莫弄楚明光。此曲怨且艳，哀音断人肠。

卷 81_23 【羸骏篇】

乔知之

喷玉长鸣西北来，自言当代是龙媒。万里铁关行入贡，
九重金阙为君开，蹀躞朝驰过上苑，
蹉跎暝走发章台。玉勒金鞍荷装饰，路傍观者无穷极。
小山桂树比权奇，上林桃花况颜色。忽闻天将出龙沙，
汉主持将驾鼓车。去去山川劳日夜，遥遥关塞断烟霞。
山川关塞十年征，汗血流离赴月营。肌肤销远道，
臂力尽长城。长城日夕苦风霜，中有连年百战场。
摇珂啮勒金羸尽，争锋足顿铁菱伤。垂耳罢轻赍，
弃置在寒谿。大宛蒲海北，滇壑隼崖西。沙平留缓步，
路远闇频嘶。从来力尽君须弃，何必寻途我已迷。
岁岁年年奔远道，朝朝暮暮催疲老。扣冰晨饮黄河源，
拂雪夜食天山草。

楚水澶溪征战事，吴塞乌江辛苦地。持来报主不辞劳，
宿昔立功非重利。丹心素节本无求，长鸣向君君不留。
只应澶漫归田里，万里低昂任生死。君王倘若不见遗，
白骨黄金犹可市。

卷 81_33 【铜雀妓】

乔知之

金阁惜分香，铅华不重妆。空馀歌舞地，犹是为君王。
哀弦调已绝，艳曲不须长。共看西陵暮，秋烟起白杨。

卷 81_34 【侍宴应制得分字】

乔知之

紫禁肃晴氛，朱楼落晓云。豫游龙驾转，天乐凤箫闻。
竹外仙亭出，花间辇路分。微臣一何幸，词赋奉明君。

卷 81_35 【梨园亭子侍宴】

乔知之

年光陌上发，香辇禁中游。草绿鸳鸯殿，花红翡翠楼。

天杯承露酌，仙管杂风流。今日陪欢豫，皇恩不可酬。

卷 81_36 【和苏员外寓直】

乔知之

自昔重为郎，伊人练国章。三旬登建礼，五夜直明光。
墨草尚书奏，衣飘侍御香。开轩竹气静，拂簟蕙风凉。
晓漏离闾阖，鸣钟出未央。从来宿台上，天子贵文强。

卷 81_37 【哭故人】

乔知之

生死久离居，凄凉历旧庐。叹兹三径断，不践十年馀。
古木巢禽合，荒庭爱客疏。匣留弹罢剑，床积读残书。
玉没终无像，兰言强问虚。平生不得意，泉路复何如。

卷 81_38 【折杨柳】

乔知之

可怜濯濯春杨柳，攀折将来就纤手。
妾容与此同盛衰，何必君恩能独久。

卷 81_39 【人日登高】

乔侃

仆本多悲者，年来不悟春。登高一游目，始觉柳条新。
杜陵犹识汉，桃源不辨秦。暂若升云雾，还似出嚣尘。
赖得烟霞气，淹留攀桂人。

卷 81_40 【出塞】

乔备

沙场三万里，猛将五千兵。旌断冰溪戍，笳吹铁关城。
阴云暮下雪，寒日昼无晶。直为怀恩苦，谁知边塞情。

卷 81_41 【长门怨】

乔备

秋入长门殿，木落洞房虚。妾思宵徒静，君恩日更疏。
坠露清金阁，流萤点玉除。还将闺里恨，遥问马相如。

第八十二卷

卷 82_1 【将军行】

刘希夷

将军辟辕门，耿介当风立。诸将欲言事，逡巡不敢入。
剑气射云天，鼓声振原隰。黄尘塞路起，走马追兵急。
弯弓从此去，飞箭如雨集。截围一百里，斩首五千级。
代马流血死，胡人抱鞍泣。古来养甲兵，有事常讨袭。
乘我庙堂运，坐使干戈戢。献凯归京师，军容何翕习。

卷 82_2 【从军行】

刘希夷

秋天风飒飒，群胡马行疾。严城昼不开，伏兵暗相失。
天子庙堂拜，将军凶门出。纷纷伊洛道，戎马几万匹。
军门压黄河，兵气冲白日。平生怀仗剑，慷慨即投笔。
南登汉月孤，北走代云密。近取韩彭计，早知孙吴术。
丈夫清万里，谁能扫一室。

卷 82_3 【春女行】

刘希夷

春女颜如玉，怨歌阳春曲。巫山春树红，沅湘春草绿。
自怜妖艳姿，妆成独见时。愁心伴杨柳，春尽乱如丝。
目极千馀里，悠悠春江水。频想玉关人，愁卧金闺里。
尚言春花落，不知秋风起。娇爱犹未终，悲凉从此始。
忆昔楚王宫，玉楼妆粉红。纤腰弄明月，长袖舞春风。
容华委西山，光阴不可还。桑林变东海，富贵今何在。
寄言桃李容，胡为闺阁重。但看楚王墓，唯有数株松。

卷 82_4 【孤松篇】

刘希夷

蚕月桑叶青，莺时柳花白。澹艳烟雨姿，敷芬阳春陌。
如何秋风起，零落从此始。独有南涧松，不叹东流水。
玄阴天地冥，皓雪朝夜零。岂不罹寒暑，为君留青青。
青青好颜色，落落任孤直。群树遥相望，众草不敢逼。
灵龟卜真隐，仙鸟宜栖息。耻受秦帝封，愿言唐侯食。
寒山夜月明，山冷气清清。凄兮归凤集，吹之作琴声。
松子卧仙岑，寂听疑野心。清冷有真曲，樵采无知音。
美人何时来，幽径委绿苔。吁嗟深涧底，弃捐广厦材。

卷 82_5 【嵩岳闻笙】

刘希夷

月出嵩山东，月明山益空。山人爱清景，散发卧秋风。
风止夜何清，独夜草虫鸣。仙人不可见，乘月近吹笙。
绛唇吸灵气，玉指调真声。真声是何曲，三山鸾鹤情。
昔去落尘俗，愿言闻此曲。今来卧嵩岑，何幸承幽音。
神仙乐吾事，笙歌铭夙心。

卷 82_6 【秋日题汝阳潭壁】

刘希夷

独坐秋阴生，悲来从所适。行见汝阳潭，飞萝蒙水石。
悬瓢木叶上，风吹何历历。幽人不耐烦，振衣步闲寂。
回流清见底，金沙覆银砾。错落非一文，空胧几千尺。
鱼鳞可怜紫，鸭毛自然碧。吟咏秋水篇，渺然忘损益。
秋水随形影，清浊混心迹。岁暮归去来，东山余宿昔。

卷 82_7 【采桑】

刘希夷

杨柳送行人，青青西入秦。谁家采桑女，楼上不胜春。
盈盈灞水曲，步步春芳绿。红脸耀明珠，绛唇含白玉。
回首渭桥东，遥怜春色同。青丝娇落日，缃绮弄春风。
携笼长叹息，逶迟恋春色。看花若有情，倚树疑无力。
薄暮思悠悠，使君南陌头。相逢不相识，归去梦青楼。

卷 82_8 【谒汉世祖庙】

刘希夷

春陵气初发，渐台首未传。列营百万众，持国十八年。
运开朱旗后，道合赤符先。宛城剑鸣匣，昆阳箠应弦。
犷兽血涂地，巨人声沸天。长驱过北赵，短兵出南燕。
太守迎门外，王郎死道边。升坛九城陌，端拱千秋年。
朝廷方雀跃，剑珮几联翩。至德刑四海，神仪翳九泉。
宗子行旧邑，恭闻清庙篇。君容穆而圣，臣像俨犹贤。
攒木承危柱，疏萝挂朽椽。祠庭巢鸟啄，祭器网虫缘。
怀古江山在，惟新历数迁。空馀今夜月，长似旧时悬。

卷 82_9 【巫山怀古】

刘希夷

巫山幽阴地，神女艳阳年。襄王伺容色，落日望悠然。
归来高唐夜，金釭焰青烟。颓想卧瑶席，梦魂何翩翩。

摇落殊未已，荣华倏徂迁。愁思潇湘浦，悲凉云梦田。
猿啼秋风夜，雁飞明月天。巴歌不可听，听此益潺湲。

卷 82_10 【归山】

刘希夷

归去嵩山道，烟花覆青草。草绿山无尘，山青杨柳春。
日暮松声合，空歌思杀人。

卷 82_11 【代闺人春日】

刘希夷

珠帘的晓光，玉颜艳春彩。林间鸟鸣唤，户外花相待。
花鸟惜芳菲，鸟鸣花乱飞。人今伴花鸟，日暮不能归。
池月怜歌扇，山云爱舞衣。佳期杨柳陌，携手莫相违。

卷 82_12 【蜀城怀古】

刘希夷

蜀土绕水竹，吴天积风霜。穷览通表里，气色何苍苍。
旧国有年代，青楼思艳妆。古人无岁月，白骨冥丘荒。

寂历弹琴地，幽流读书堂。玄龟埋卜室，彩凤灭词场。
阵图一一在，柏树双双行。鬼神清汉庙，鸟雀参秦仓。
叹世已多感，怀心益自伤。赖蒙灵丘境，时当明月光。

卷 82_13 【洛川怀古】

刘希夷

萋萋春草绿，悲歌牧征马。行见白头翁，坐泣青竹下。
感叹前问之，赠予辛苦词。岁月移今古，山河更盛衰。
晋家都洛滨，朝廷多近臣。词赋归潘岳，繁华称季伦。
梓泽春草菲，河阳乱华飞。绿珠不可夺，白首同所归。
高楼倏冥灭，茂林久摧折。昔时歌舞台，今成狐兔穴。
人事互消亡，世路多悲伤。北邙是吾宅，东岳为吾乡。
君看北邙道，髑髅萦蔓草。芳□□□□，□□□□□。
碑茔或半存，荆棘敛幽魂。挥涕弃之去，不忍闻此言。

卷 82_14 【春日行歌】

刘希夷

山树落梅花，飞落野人家。野人何所有，满盃阳春酒。
携酒上春台，行歌伴落梅。醉罢卧明月，乘梦游天台。

卷 82_15 【江南曲八首】

刘希夷

暮宿南洲草，晨行北岸林。日悬沧海阔，水隔洞庭深。
烟景无留意，风波有异浔。岁游难极目，春戏易为心。
朝夕无荣遇，芳菲已满襟。

艳唱潮初落，江花露未晞。春洲惊翡翠，朱服弄芳菲。
画舫烟中浅，青阳日际微。锦帆冲浪湿，罗袖拂行衣。
含情罢所采，相叹惜流晖。

君为陇西客，妾遇江南春。朝游含灵果，夕采弄风蘋。
果气时不歇，蘋花日自新。以此江南物，持赠陇西人。
空盈万里怀，欲赠竟无因。

皓如楚江月，霭若吴岫云。波中自皎镜，山上亦氤氲。
明月留照妾，轻云持赠君。山川各离散，光气乃殊分。
天涯一为别，江北不相闻。

舫舟乘潮去，风帆振早凉。潮平见楚甸，天际望维扬。
洄溯经千里，烟波接两乡。云明江屿出，日照海流长。
此中逢岁晏，浦树落花芳。

暮春三月晴，维扬吴楚城。城临大江汜，回映洞浦清。
晴云曲金阁，珠楼碧烟里。月明芳树群鸟飞，

风过长林杂花起。可怜离别谁家子，于此一至情何已。

北堂红草盛葶苈，南湖碧水照芙蓉。朝游暮起金花尽，
渐觉罗裳珠露浓。自惜妍华三五岁，已叹关山千万重。
人情一去无还日，欲赠怀芳怨不逢。

忆昔江南年盛时，平生怨在长洲曲。冠盖星繁江水上，
冲风飘落洞庭绿。落花两袖红纷纷，朝霞高阁洗晴云。
谁言此处婵娟子，珠玉为心以奉君。

卷 82_11 【捣衣篇】

刘希夷

秋天瑟瑟夜漫漫，夜白风清玉露漙。燕山游子衣裳薄，
秦地佳人闺阁寒。欲向楼中萦楚练，还来机上裂齐纨。
揽红袖兮愁徙倚，盼青砧兮怅盘桓。盘桓徙倚夜已久，
萤火双飞入帘牖。西北风来吹细腰，东南月上浮纤手。
此时秋月可怜明，此时秋风别有情。君看月下参差影，
为听莎间断续声。绛河转兮青云晓，飞鸟鸣兮行人少。
攒眉缉缕思纷纷，对影穿针魂悄悄。闻道还家未有期，
谁怜登陇不胜悲。梦见形容亦旧日，为许裁缝改昔时。
缄书远寄交河曲，须及明年春草绿。莫言衣上有斑斑，
只为思君泪相续。

卷 82_12 【公子行】

刘希夷

天津桥下阳春水，天津桥上繁华子。马声回合青云外，
人影动摇绿波里。绿波荡漾玉为砂，青云离披锦作霞。
可怜杨柳伤心树，可怜桃李断肠花。此日遨游邀美女，
此时歌舞入倡家。倡家美女郁金香，飞来飞去公子傍。
的的珠帘白日映，娥娥玉颜红粉妆。花际裴回双蛱蝶，
池边顾步两鸳鸯。倾国倾城汉武帝，为云为雨楚襄王。
古来容光人所羨，况复今日遥相见。愿作轻罗著细腰，
愿为明镜分娇面。与君相向转相亲，与君双栖共一身。
愿作贞松千岁古，谁论芳槿一朝新。百年同谢西山日，
千秋万古北邙尘。

卷 82_13 【代悲白头翁（一作白头吟）】

刘希夷

洛阳城东桃李花，飞来飞去落谁家。洛阳女儿好颜色，
坐见落花长叹息。今年花落颜色改，明年花开复谁在。
已见松柏摧为薪，更闻桑田变成海。古人无复洛城东，
今人还对落花风。年年岁岁花相似，岁岁年年人不同。
寄言全盛红颜子，应怜半死白头翁。此翁白头真可怜，
伊昔红颜美少年。公子王孙芳树下，清歌妙舞落花前。

光禄池台开锦绣，将军楼阁画神仙。一朝卧病无相识，
三春行乐在谁边。宛转蛾眉能几时，须臾鹤发乱如丝。
但看古来歌舞地，惟有黄昏鸟雀悲。

卷 82_14 【代秦女赠行人】

刘希夷

鸾镜晓含春，蛾眉向影颦。开□衣裳破，那堪粉黛新。
春还洛阳道，为忆春阶草。杨叶未能攀，梅花待君扫。
今朝喜鹊傍人飞，应是狂夫走马归。遥想行歌共游乐，
迎前含笑著春衣。

卷 82_15 【洛中晴月送殷四入关】

刘希夷

清洛浮桥南渡头，天晶万里散华洲。晴看石濑光无数，
晓入寒潭浸不流。微云一点曙烟起，南陌憧憧遍行子。
欲将此意与君论，复道秦关尚千里。

卷 82_16 【入塞】

刘希夷

将军陷虏围，边务息戎机。霜雪交河尽，旌旗入塞飞。
晓光随马度，春色伴人归。课绩朝明主，临轩拜武威。

卷 82_17 【览镜】

刘希夷

青楼挂明镜，临照不胜悲。白发今如此，人生能几时。
秋风下山路，明月上春期。叹息君恩尽，容颜不可思。

卷 82_18 【晚春】

刘希夷

佳人眠洞房，回首见垂杨。寒尽鸳鸯被，春生玳瑁床。
庭阴幕青霭，帘影散红芳。寄语同心伴，迎春且薄妆。

卷 82_19 【送友人之新丰】

刘希夷

日暮秋风起，关山断别情。泪随黄叶下，愁向绿樽生。
野路归骖转，河洲宿鸟惊。宾游宽旅宴，王事促严程。

卷 82_20 【饯李秀才赴举】

刘希夷

鸿鹄振羽翮，翻飞入帝乡。朝鸣集银树，暝宿下金塘。
日月天门近，风烟夜路长。自怜穷浦雁，岁岁不随阳。

卷 82_21 【夜集张諲所居】

刘希夷

江南成久客，门馆日萧条。惟有图书在，多伤鬓发凋。
诸生陪讲诵，稚子给渔樵。隐室寒灯净，空阶落叶飘。
沧洲自有趣，谁道隐须招。

卷 82_22 【故园置酒】

刘希夷

酒熟人须饮，春还鬓已秋。愿逢千日醉，得缓百年忧。
旧里多青草，新知尽白头。风前灯易灭，川上月难留。
卒卒周姬旦，栖栖鲁孔丘。平生能几日，不及且遨游。

卷 82_23 【晚憩南旅阳馆】

刘希夷

旅馆何年废，征夫此日过。途穷人自哭，春至鸟还歌。
行路新知少，荒田古径多。池篁覆丹谷，坟树绕清波。
日照蓬阴转，风微野气和。伤心不可去，回首怨如何。

第八十三卷

卷 83_1【庆云章】

陈子昂

昆仑元气，实生庆云。大人作矣，五色氤氲。昔在帝妣，
南风既薰。丛芳烂熳，郁郁纷纷。旷矣千祀，庆云来止，
玉叶金柯，祚我天子。非我天子，庆云谁昌。非我圣母，
庆云谁光。庆云光矣，周道昌矣。九万八千，天授皇年。

卷 83_2【感遇诗三十八首】

陈子昂

微月生西海，幽阳始代升。圆光正东满，阴魄已朝凝。
太极生天地，三元更废兴。至精谅斯在，三五谁能征。

兰若生春夏，芊蔚何青青。幽独空林色，朱蕤冒紫茎。
迟迟白日晚，袅袅秋风生。岁华尽摇落，芳意竟何成。

苍苍丁零塞，今古缅荒途。亭堠何摧兀，暴骨无全躯。
黄沙幕南起，白日隐西隅。汉甲三十万，曾以事匈奴。

但见沙场死，谁怜塞上孤。

乐羊为魏将，食子殉军功。骨肉且相薄，他人安得忠。
吾闻中山相，乃属放麋翁。孤兽犹不忍，况以奉君终。

市人矜巧智，于道若童蒙。倾夺相夸侈，不知身所终。
曷见玄真子，观世玉壶中。窅然遗天地，乘化入无穷。

吾观龙变化，乃知至阳精。石林何冥密，幽洞无留行。
古之得仙道，信与元化并。玄感非象识，谁能测沉冥。
世人拘目见，酣酒笑丹经。昆仑有瑶树，安得采其英。

白日每不归，青阳时暮矣。茫茫吾何思，林卧观无始。
众芳委时晦，鶗鴂鸣悲耳。鸿荒古已颓，谁识巢居子。

吾观昆仑化，日月沦洞冥。精魄相交会，天壤以罗生。
仲尼推太极，老聃贵窈冥。西方金仙子，崇义乃无明。
空色皆寂灭，缘业定何成。名教信纷藉，死生俱未停。

圣人秘元命，惧世乱其真。如何嵩公辈，诋譎误时人。
先天诚为美，阶乱祸谁因。长城备胡寇，嬴祸发其亲。
赤精既迷汉，子年何救秦。去去桃李花，多言死如麻。

深居观造化，怫然争朵颐。谗说相啖食，利害纷纍纍。
便便夸毗子，荣耀更相持。务光让天下，商贾竞刀锥。
已矣行采芝，万世同一时。知

吾爱鬼谷子，青溪无垢氛。囊括经世道，遗身在白云。
七雄方龙斗，天下久无君。浮荣不足贵，遵养晦时文。
舒可弥宇宙，卷之不盈分。岂徒山木寿，空与麋鹿群。

呦呦南山鹿，罹罟以媒和。招摇青桂树，幽蠹亦成科。
世情甘近习，荣耀纷如何。怨憎未相复，亲爱生祸罗。
瑶台倾巧笑，玉杯殒双蛾。谁见枯城蘖，青青成斧柯。

林居病时久，水木澹孤清。闲卧观物化，悠悠念无生。
青春始萌达，朱火已满盈。徂落方自此，感叹何时平。

临岐泣世道，天命良悠悠。昔日殷王子，玉马遂朝周。
宝鼎沦伊谷，瑶台成古丘。西山伤遗老，东陵有故侯。

贵人难得意，赏爱在须臾。莫以心如玉，探他明月珠。
昔称天桃子，今为春市徒。鸱鸢悲东国，麋鹿泣姑苏。
谁见鸱夷子，扁舟去五湖。

圣人去已久，公道缅良难。蚩蚩夸毗子，尧禹以为谩。
骄荣贵工巧，势利迭相干。燕王尊乐毅，分国愿同欢。
鲁连让齐爵，遗组去邯郸。伊人信往矣，感激为谁叹。

幽居观天运，悠悠念群生。终古代兴没，豪圣莫能争。
三季沦周赧，七雄灭秦嬴。复闻赤精子，提剑入咸京。
炎光既无象，晋虏复纵横。尧禹道已昧，昏虐势方行。
岂无当世雄，天道与胡兵。咄咄安可言，时醉而未醒。
仲尼溺东鲁，伯阳遁西溟。大运自古来，旅人胡叹哉。

透迤势已久，骨鯁道斯穷。岂无感激者，时俗颓此风。
灌园何其鄙，皎皎於陵中。世道不相容，嗟嗟张长公。

圣人不利己，忧济在元元。黄屋非尧意，瑶台安可论。
吾闻西方化，清净道弥敦。奈何穷金玉，雕刻以为尊。
云构山林尽，瑶图珠翠烦。鬼工尚未可，人力安能存。
夸愚适增累，矜智道逾昏。

玄天幽且默，群议曷嗟嗟。圣人教犹在，世运久陵夷。
一绳将何系，忧醉不能持。去去行采芝，勿为尘所欺。

蜻蛉游天地，与世本无患。飞飞未能止，黄雀来相干。
穰侯富秦宠，金石比交欢。出入咸阳里，诸侯莫敢言。
宁知山东客，激怒秦王肝。布衣取丞相，千载为辛酸。

微霜知岁晏，斧柯始青青。况乃金天夕，浩露沾群英。
登山望宇宙，白日已西暝。云海方荡潏，孤鳞安得宁。

翡翠巢南海，雄雌珠树林。何知美人意，骄爱比黄金。
杀身炎州里，委羽玉堂阴。旖旎光首饰，葳蕤烂锦衾。
岂不在遐远，虞罗忽见寻。多材信为累，叹息此珍禽。

挈瓶者谁子，皎服当青春。三五明月满，盈盈不自珍。
高堂委金玉，微缕悬千钧。如何负公鼎，被夺笑时人。

玄蝉号白露，兹岁已蹉跎。群物从大化，孤英将奈何。
瑶台有青鸟，远食玉山禾。昆仑见玄凤，岂复虞云罗。

荒哉穆天子，好与白云期。宫女多怨旷，层城闭蛾眉。
日耽瑶池乐，岂伤桃李时。青苔空萎绝，白发生罗帷。

朝发宜都渚，浩然思故乡。故乡不可见，路隔巫山阳。
巫山彩云没，高丘正微茫。伫立望已久，涕落沾衣裳。
岂兹越乡感，忆昔楚襄王。朝云无处所，荆国亦沦亡。

昔日章华宴，荆王乐荒淫。霓旌翠羽盖，射兕云梦林。
竭来高唐观，怅望云阳岑。雄图今何在，黄雀空哀吟。

丁亥岁云暮，西山事甲兵。赢粮匝邛道，荷戟争羌城。
严冬阴风劲，穷岫泄云生。昏噎无昼夜，羽檄复相惊。
拳踞竞万仞，崩危走九冥。籍籍峰壑里，哀哀冰雪行。
圣人御宇宙，闻道泰阶平。肉食谋何失，藜藿缅纵横。

可怜瑶台树，灼灼佳人姿。碧华映朱实，攀折青春时。
岂不盛光宠，荣君白玉墀。但恨红芳歇，雕伤感所思。

竭来豪游子，势利祸之门。如何兰膏叹，感激自生冤。
众趋明所避，时弃道犹存。云渊既已失，罗网与谁论。
箕山有高节，湘水有清源。唯应白鸥鸟，可为洗心言。

索居犹几日，炎夏忽然衰。阳彩皆阴翳，亲友尽睽违。
登山望不见，涕泣久涟洏。宿梦感颜色，若与白云期。
马上骄豪子，驱逐正蚩蚩。蜀山与楚水，携手在何时。

金鼎合神丹，世人将见欺。飞飞骑羊子，胡乃在峨眉。

变化固幽类，芳菲能几时。疲痾苦沦世，忧瘁日侵淄。
眷然顾幽褐，白云空涕洟。

朔风吹海树，萧条边已秋。亭上谁家子，哀哀明月楼。
自言幽燕客，结发事远游。赤丸杀公吏，白刃报私仇。
避仇至海上，被役此边州。故乡三千里，辽水复悠悠。
每愤胡兵入，常为汉国羞。何知七十战，白首未封侯。

本为贵公子，平生实爱才。感时思报国，拔剑起蒿莱。
西驰丁零塞，北上单于台。登山见千里，怀古心悠哉。
谁言未忘祸，磨灭成尘埃。

浩然坐何慕，吾蜀有峨眉。念与楚狂子，悠悠白云期。
时哉悲不会，涕泣久涟洏。梦登绥山穴，南采巫山芝。
探元观群化，遗世从云螭。婉变时永矣，感悟不见之。

朝入云中郡，北望单于台。胡秦何密迩，沙朔气雄哉。
藉藉天骄子，猖狂已复来。塞垣无名将，亭堠空崔嵬。
咄嗟吾何叹，边人涂草莱。

仲尼探元化，幽鸿顺阳和。大运自盈缩，春秋递来过。
盲飙忽号怒，万物相纷剿。溟海皆震荡，孤凤其如何。

卷 83_3 【观荆玉篇】

陈子昂

鸕夷双白玉，此玉有缁磷。悬之千金价，举世莫知真。
丹青非异色，轻重有殊伦。勿信玉工言，徒悲荆国人。

卷 83_4 【鸳鸯篇】

陈子昂

飞飞鸳鸯鸟，举翼相蔽亏。俱来绿潭里，共向白云涯。
音容相眷恋，羽翮两逶迤。蘋萍戏春渚，霜霰绕寒池。
浦沙连岸净，汀树拂潭垂。年年此游玩，岁岁来追随。
凤凰起丹穴，独向梧桐枝。鸿雁来紫塞，空忆稻粱肥。
鸟啼倦依托，鹤鸣伤别离。岂若此双禽，飞翻不异林。
刷尾青江浦，交颈紫山岑。文章负奇色，和鸣多好音。
闻有鸳鸯绮，复有鸳鸯衾。持为美人赠，勸此故交心。

卷 83_5 【与东方左史虬修竹篇】

陈子昂

龙种生南岳，孤翠郁亭亭。峰岭上崇岑，烟雨下微冥。

夜闻鼯鼠叫，昼聒泉壑声。春风正淡荡，白露已清冷。
哀响激金奏，密色滋玉英。岁寒霜雪苦，含彩独青青。
岂不厌凝冽，羞比春木荣。春木有荣歇，此节无凋零。
始愿与金石，终古保坚贞。不意伶伦子，吹之学凤鸣。
遂偶云和瑟，张乐奏天庭。妙曲方千变，箫韶亦九成。
信蒙雕斫美，常愿事仙灵。驱驰翠虬驾，伊郁紫鸾笙。
结交嬴台女，吟弄升天行。携手登白日，远游戏赤城。
低昂玄鹤舞，断续彩云生。永随众仙逝，三山游玉京。

卷 83_6 【蓟丘览古赠卢居士藏用七首·轩辕台】

陈子昂

北登蓟丘望，求古轩辕台。应龙已不见，牧马空黄埃。
尚想广成子，遗迹白云隈。

卷 83_7 【蓟丘览古赠卢居士藏用七首·燕昭王】

陈子昂

南登碣石坂，遥望黄金台。丘陵尽乔木，昭王安在哉。
霸图怅已矣，驱马复归来。

卷 83_8 【蓟丘览古赠卢居士藏用七首·乐生】

陈子昂

王道已沦昧，战国竞贪兵。乐生何感激，仗义下齐城。
雄图竟中天，遗叹寄阿衡。

卷 83_9 【蓟丘览古赠卢居士藏用七首·燕太子】

陈子昂

秦王日无道，太子怨亦深。一闻田光义，匕首赠千金。
其事虽不立，千载为伤心。

卷 83_10 【蓟丘览古赠卢居士藏用七首·田光先生】

陈子昂

自古皆有死，徇义良独稀。奈何燕太子，尚使田生疑。
伏剑诚已矣，感我涕沾衣。

卷 83_11 【蓟丘览古赠卢居士藏用七首·邹衍】

陈子昂

大运沦三代，天人罕有窥。邹子何寥廓，漫说九瀛垂。
兴亡已千载，今也则无推。

卷 83_12 【蓟丘览古赠卢居士藏用七首·郭隗】

陈子昂

逢时独为贵，历代非无才。隗君亦何幸，遂起黄金台。
(未缺)

卷 83_13 【西还至散关答乔补阙知之】

陈子昂

葳蕤苍梧凤，嘹唳白露蝉。羽翰本非匹，结交何独全。
昔君事胡马，余得奉戎旃。携手向沙塞，关河缅幽燕。
芳岁几阳止，白日屡徂迁。功业云台薄，平生玉佩捐。
叹此南归日，犹闻北戍边。代水不可涉，巴江亦潺湲。
揽衣度函谷，衔涕望秦川。蜀门自兹始，云山方浩然。

卷 83_14 【度峡口山赠乔补阙知之王二无竞】

陈子昂

峡口大漠南，横绝界中国。丛石何纷纠，赤山复翕赭。
远望多众容，逼之无异色。崔嵬乍孤断，逶迤屡回直。
信关胡马冲，亦距汉边塞。岂依河山险，将顺休明德。
物壮诚有衰，势雄良易极。迢迢忽而尽，泱泱平不息。
之子黄金躯，如何此荒域。云台盛多士，待君丹墀侧。

卷 83_15 【题居延古城赠乔十二知之】

陈子昂

闻君东山意，宿昔紫芝荣。沧洲今何在，华发旅边城。
还汉功既薄，逐胡策未行。徒嗟白日暮，坐对黄云生。
桂枝芳欲晚，薏苡谤谁明。无为空自老，含叹负生平。

卷 83_16 【赠赵六贞固二首】

陈子昂

回中烽火入，塞上追兵起。此时边朔寒，登陇思君子。
东顾望汉京，南山云雾里。

赤螭媚其彩，婉娈苍梧泉。昔者琅琊子，躬耕亦慨然。
美人岂遐旷，之子乃前贤。良辰在何许，白日屡颓迁。
道心固微密，神用无留连。舒可弥宇宙，揽之不盈拳。
蓬莱久芜没，金石徒精坚。良宝委短褐，闲琴独婵娟。

卷 83_17 【答韩使同在边】

陈子昂

汉家失中策，胡马屡南驱。闻诏安边使，曾是故人谟。
废书怅怀古，负剑许良图。出关岁方晏，乘障日多虞。
虏入白登道，烽交紫塞途。连兵屯北地，清野备东胡。
边城方晏闭，斥堠始昭苏。复闻韩长孺，辛苦事匈奴。
雨雪容颜改，纵横才位孤。空怀老臣策，未获赵军租。
但蒙魏侯重，不受谤书诬。当取金人祭，还歌凯入都。

卷 83_18 【征东至淇门答宋十一参军之问】

陈子昂

南星中大火，将子涉清淇。西林改微月，征旆空自持。
碧潭去已远，瑶华折遗谁。若问辽阳戍，悠悠天际旗。

卷 83_19 【答洛阳主人】

陈子昂

平生白云志，早爱赤松游。事亲恨未立，从宦此中州。
主人亦何问，旅客非悠悠。方谒明天子，清宴奉良筹。
再取连城璧，三陟平津侯。不然拂衣去，归从海上鸥。
宁随当代子，倾侧且沉浮。

卷 83_20 【酬晖上人秋夜山亭有赠】

陈子昂

皎皎白林秋，微微翠山静。禅居感物变，独坐开轩屏。
风泉夜声杂，月露宵光冷。多谢忘机人，尘忧未能整。

卷 83_21 【酬李参军崇嗣旅馆见赠】

陈子昂

昨夜银河畔，星文犯遥汉。今朝紫气新，物色果逢真。
言从天上落，乃是地仙人。白璧疑冤楚，乌裘似入秦。
摧藏多古意，历览备艰辛。乐广云虽睹，夷吾风未春。
凤歌空有问，龙性讵能驯。宝剑终应出，骊珠会见珍。

未及冯公老，何惊孺子贫。青云傥可致，北海忆孙宾。

卷 83_22 【酬晖上人夏日林泉】

陈子昂

闻道白云居，窈窕青莲宇。岩泉万丈流，树石千年古。
林卧对轩窗，山阴满庭户。方释尘事劳，从君袭兰杜。

卷 83_23 【同宋参军之问梦赵六赠卢陈二子之作】

陈子昂

晓霁望嵩丘，白云半岩足。氛氲涵翠微，宛如嬴台曲。
故人昔所尚，幽琴歌断续。变化竟无常，人琴遂两亡。
白云失处所，梦想暖容光。畴昔疑缘业，儒道两相妨。
前期许幽报，迨此尚茫茫。晤言既已失，感叹情何一。
始忆携手期，云台与峨眉。达兼济天下，穷独善其时。
诸君推管乐，之子慕巢夷。奈何苍生望，卒为黄绶欺。
铭鼎功未立，山林事亦微。抚孤一流恻，怀旧日睽违。
卢子尚高节，终南卧松雪。宋侯逢圣君，骖驭游青云。
而我独蹭蹬，语默道犹屯。征戍在辽阳，蹉跎草再黄。
丹丘恨不及，白露已苍苍。远闻山阳赋，感涕下沾裳。

卷 83_24 【送别出塞】

陈子昂

平生闻高义，书剑百夫雄。言登青云去，非此白头翁。
胡兵屯塞下，汉骑属云中。君为白马将，腰佩騂角弓。
单于不敢射，天子伫深功。蜀山余方隐，良会何时同。

卷 83_25 【登蓟丘楼送贾兵曹入都】

陈子昂

东山宿昔意，北征非我心。孤负平生愿，感涕下沾襟。
暮登蓟楼上，永望燕山岑。辽海方漫漫，胡沙飞且深。
峨眉杳如梦，仙子曷由寻。击剑起叹息，白日忽西沉。
闻君洛阳使，因子寄南音。

卷 83_26 【夏日晖上人房别李参军崇嗣】

陈子昂

四十九变化，一十三死生。翕忽玄黄里，驱驰风雨情。
是非纷妄作，宠辱坐相惊。至人独幽鉴，窈窕随昏明。
咫尺山河道，轩窗日月庭。别离焉足问，悲乐固能并。

我辈何为尔，栖皇犹未平。金台可攀陟，宝界绝将迎。
户牖观天地，阶基上杳冥。自超三界乐，安知万里征。
中国要荒内，人寰宇宙荣。弦望如朝夕，宁嗟蜀道行。

卷 83_27 【秋园卧病呈晖上人】

陈子昂

幽寂旷日遥，林园转清密。疲疴澹无豫，独坐泛瑶瑟。
怀挟万古情，忧虞百年疾。绵绵多滞念，忽忽每如失。
缅想赤松游，高寻白云逸。荣吝始都丧，幽人遂贞吉。
图书纷满床，山水蔼盈室。宿昔心所尚，平生自兹毕。
愿言谁见知，梵筵有同术。八月高秋晚，凉风正萧瑟。

卷 83_28 【登泽州城北楼宴】

陈子昂

平生倦游者，观化久无穷。复来登此国，临望与君同。
坐见秦兵垒，遥闻赵将雄。武安君何在，长平事已空。
且歌玄云曲，御酒舞薰风。勿使青衿子，嗟尔白头翁。

卷 83_29 【山水粉图】

陈子昂

山图之白云兮，若巫山之高丘。纷群翠之鸿溶，
又似蓬瀛海水之周流。信夫人之好道，爱云山以幽求。

卷 83_30 【彩树歌】

陈子昂

嘉锦筵之珍树兮，错众彩之氛氲。状瑶台之微月，
点巫山之朝云。青春兮不可逢，况蕙色之增芬。
结芳意而谁赏，怨绝世之无闻。红荣碧艳坐看歇，
素华流年不待君。故吾思昆仑之琪树，厌桃李之缤纷。

卷 83_31 【春台引】

陈子昂

感阳春兮生碧草之油油。怀宇宙以伤远，登高台而写忧。
迟美人兮不见，恐青岁之遂遒。从毕公以酣饮，
寄林塘而一留。采芳荪于北渚，忆桂树于南州。
何云木之美丽，而池馆之崇幽。星台秀士，月旦诸子。
嘉青鸟之辰，迎火龙之始。挟宝书与瑶瑟，

芳蕙华而兰靡。乃掩白蘋，藉绿芷。酒既醉，乐未已。
击青钟，歌绿水。怨青春之萎绝，赠瑶台之旖旎。
愿一见而道意，结众芳之绸缪。曷余情之荡漾，
矚青云以增愁。怅三山之飞鹤，忆海上之白鸥。重曰：
群仙去兮青春颓，岁华歇兮黄鸟哀。富贵荣乐几时兮，
朱宫碧堂生青苔，白云兮归来。

卷 83_32 【登幽州台歌】

陈子昂

前不见古人，后不见来者。
念天地之悠悠，独怆然而涕下。

卷 83_33 【喜马参军相遇醉歌】

陈子昂

独幽默以三月兮，深林潜居。时岁忽兮，孤愤遐吟。
谁知我心？孺子孺子，其可与理分。

第八十四卷

卷 84_1 【度荆门望楚】

陈子昂

遥遥去巫峡，望望下章台。巴国山川尽，荆门烟雾开。
城分苍野外，树断白云隈。今日狂歌客，谁知入楚来。

卷 84_2 【晚次乐乡县】

陈子昂

故乡杳无际，日暮且孤征。川原迷旧国，道路入边城。
野戍荒烟断，深山古木平。如何此时恨，噉噉夜猿鸣。

卷 84_3 【同王员外雨后登开元寺南楼，因酬晖上人独坐山亭有赠】

陈子昂

钟梵经行罢，香林坐入禅。岩庭交杂树，石濑泻鸣泉。

水月心方寂，云霞思独玄。宁知人世里，疲病得攀缘。

卷 84_4 【东征答朝臣相送】

陈子昂

平生白云意，疲荼愧为雄。君王谬殊宠，旌节此从戎。
授绳当系虏，单马岂邀功。孤剑将何托，长谣塞上风。

卷 84_5 【咏主人壁上画鹤，寄乔主簿崔著作】

陈子昂

古壁仙人画，丹青尚有文。独舞纷如雪，孤飞暖似云。
自矜彩色重，宁忆故池群。江海联翩翼，长鸣谁复闻。

卷 84_6 【居延海树闻莺同作】

陈子昂

边地无芳树，莺声忽听新。间关如有意，愁绝若怀人。
明妃失汉宠，蔡女没胡尘。坐闻应落泪，况忆故园春。

卷 84_7 【题李三书斋（崇嗣）】

陈子昂

灼灼青春仲，悠悠白日升。声容何足恃，荣吝坐相矜。
愿与金庭会，将待玉书征。还丹应有术，烟驾共君乘。

卷 84_8 【送魏大从军】

陈子昂

匈奴犹未灭，魏绛复从戎。怅别三河道，言追六郡雄。
雁山横代北，狐塞接云中。勿使燕然上，惟留汉将功。

卷 84_9 【送殷大入蜀】

陈子昂

禺山金碧路，此地饶英灵。送君一为别，栖断故乡情。
片云生极浦，斜日隐离亭。坐看征骑没，惟见远山青。

卷 84_10 【落第西还别刘祭酒高明府】

陈子昂

别馆分周国，归骖入汉京。地连函谷塞，川接广阳城。
望迥楼台出，途遥烟雾生。莫言长落羽，贫贱一交情。

卷 84_11 【落第西还别魏四懔】

陈子昂

转蓬方不定，落羽自惊弦。山水一为别，欢娱复几年。
离亭暗风雨，征路入云烟。还因北山径，归守东陂田。

卷 84_12 【送客】

陈子昂

故人洞庭去，杨柳春风生。相送河洲晚，苍茫别思盈。
白蘋已堪把，绿芷复含荣。江南多桂树，归客赠生平。

卷 84_13 【春夜别友人二首】

陈子昂

银烛吐青烟，金樽对绮筵。离堂思琴瑟，别路绕山川。
明月隐高树，长河没晓天。悠悠洛阳道，此会在何年。

紫塞白云断，青春明月初。对此芳樽夜，离忧怅有馀。
清冷花露满，滴沥檐字虚。怀君欲何赠，愿上大臣书。

卷 84_14 【遂州南江别乡曲故人】

陈子昂

楚江复为客，征棹方悠悠。故人悯追送，置酒此南洲。
平生亦何恨，夙昔在林丘。违此乡山别，长谣去国愁。

卷 84_15 【送东莱王学士无竞】

陈子昂

宝剑千金买，平生未许人。怀君万里别，持赠结交亲。
孤松宜晚岁，众木爱芳春。已矣将何道，无令白首新。

卷 84_16 【送梁李二明府】

陈子昂

负书犹在汉，怀策未闻秦。复此穷秋日，芳樽别故人。
黄金装屐尽，白首契逾新。空羡双凫舄，俱飞向玉轮。

卷 84_17 【送魏兵曹使隼州得登字】

陈子昂

阳山淫雾雨，之子慎攀登。羌笮多珍宝，人言有爱憎。
欲酬明主惠，当尽使臣能。勿以王阳道，迢递畏崢嶸。

卷 84_18 【送著作佐郎崔融等从梁王东征】

陈子昂

金天方肃杀，白露始专征。王师非乐战，之子慎佳兵。
海气侵南部，边风扫北平。莫卖卢龙塞，归邀麟阁名。

卷 84_19 【春晦饯陶七于江南同用风字】

陈子昂

黄鹤烟云去，青江琴酒同。离帆方楚越，沟水复西东。
芙蓉生夏浦，杨柳送春风。明日相思处，应对菊花丛。

卷 84_20 【喜遇冀侍御珪崔司议泰之二使】

陈子昂

谢病南山下，幽卧不知春。使星入东井，云是故交亲。
惠风吹宝瑟，微月忆清真。凭轩一留醉，江海寄情人。

卷 84_21 【登蓟城西北楼送崔著作融入都】

陈子昂

蓟楼望燕国，负剑喜兹登。清规子方奏，单戟我无能。
仲冬边风急，云汉复霜棱。慷慨竟何道，西南恨失朋。

卷 84_22 【月夜有怀】

陈子昂

美人挟赵瑟，微月在西轩。寂寞夜何久，殷勤玉指繁。
清光委衾枕，遥思属湘沅。空帘隔星汉，犹梦感精魂。

卷 84_23 【夏日游晖上人房】

陈子昂

山水开精舍，琴歌列梵筵。人疑白楼赏，地似竹林禅。
对户池光乱，交轩岩翠连。色空今已寂，乘月弄澄泉。

卷 84_24 【春日登金华观】

陈子昂

白玉仙台古，丹丘别望遥。山川乱云日，楼榭入烟霄。
鹤舞千年树，虹飞百尺桥。还疑赤松子，天路坐相邀。

卷 84_25 【群公集毕氏林亭】

陈子昂

金门有遗世，鼎实恣和邦。默语谁能识，琴樽寄北窗。
子牟恋魏阙，渔父爱沧江。良时信同此，岁晚迹难双。

卷 84_26 【宴胡楚真禁所】

陈子昂

人生固有命，天道信无言。青蝇一相点，白璧遂成冤。
请室闲逾邃，幽庭春未暄。寄谢韩安国，何惊狱吏尊。

卷 84_27 【魏氏园林人赋一物得秋亭萱草】

陈子昂

昔时幽径里，荣耀杂春丛。今来玉墀上，销歇畏秋风。
细叶犹含绿，鲜花未吐红。忘忧谁见赏，空此北堂中。

卷 84_28【晦日宴高氏林亭（见《岁时杂咏》）】

陈子昂

寻春游上路，追宴入山家。主第簪缨满，皇州景望华。
玉池初吐溜，珠树始开花。欢娱方未极，林阁散馀霞。

卷 84_29【晦日重宴高氏林亭（见《岁时杂咏》）】

陈子昂

公子好追随，爱客不知疲。象筵开玉馔，翠羽饰金卮。
此时高宴所，讵减习家池。循涯倦短翮，何处俪长离。

卷 84_30【上元夜效小庾体（见《岁时杂咏》）】

陈子昂

三五月华新，遨游逐上春。相邀洛城曲，追宴小平津。
楼上看珠妓，车中见玉人。芳宵殊未极，随意守灯轮。

卷 84_31 【洛城观酺应制】

陈子昂

圣人信恭己，天命允昭回。苍极神功被，青云秘篆开。
垂衣受金册，张乐宴瑶台。云凤休征满，鱼龙杂戏来。
崇恩逾五日，惠泽畅三才。玉帛群臣醉，徽章缛礼该。
方睹升中禅，言观拜洛回。微臣固多幸，敢上万年杯。

卷 84_32 【奉和皇帝上礼抚事述怀应制】

陈子昂

大君忘自我，应运居紫宸。揖让期明辟，讴歌且顺人。
轩宫帝图盛，皇极礼容申。南面朝万国，东堂会百神。
云陛旂常满，天庭玉帛陈。钟石和睿思，雷雨被深仁。
承平信娱乐，王业本艰辛。愿罢瑶池宴，来观农扈春。
卑宫昭夏德，尊老睦尧亲。微臣敢拜手，歌舞颂维新。

卷 84_33 【酬田逸人游岩见寻不遇题隐居里壁】

陈子昂

游人献书去，薄暮返灵台。传道寻仙友，青囊卖卜来。

闻莺忽相访，题凤久裴回。石髓空盈握，金经秘不开。
还疑缝掖子，复似洛阳才。

卷 84_34 【白帝城怀古】

陈子昂

日落沧江晚，停桡问土风。城临巴子国，台没汉王宫。
荒服仍周甸，深山尚禹功。岩悬青壁断，地险碧流通。
古木生云际，孤帆出雾中。川途去无限，客思坐何穷。

卷 84_35 【岷山怀古】

陈子昂

秣马临荒甸，登高览旧都。犹悲堕泪碣，尚想卧龙图。
城邑遥分楚，山川半入吴。丘陵徒自出，贤圣几凋枯。
野树苍烟断，津楼晚气孤。谁知万里客，怀古正踌蹰。

卷 84_36 【宿空舂峡青树村浦】

陈子昂

的的明月水，啾啾寒夜猿。客思浩方乱，洲浦寂无喧。

忆作千金子，宁知九逝魂。虚闻事朱阙，结绶鹜华轩。
委别高堂爱，窥觐明主恩。今成转蓬去，叹息复何言。

卷 84_37 【宿襄河驿浦】

陈子昂

沿流辞北渚，结缆宿南洲。合岸昏初夕，回塘暗不流。
卧闻塞鸿断，坐听峡猿愁。沙浦明如月，汀葭晦若秋。
不及能鸣雁，徒思海上鸥。天河殊未晓，沧海信悠悠。

卷 84_38 【赠严仓曹乞推命录】

陈子昂

少学纵横术，游楚复游燕。栖遑长委命，富贵未知天。
闻道沉冥客，青囊有秘篇。九宫探万象，三算极重玄。
愿奉唐生诀，将知跃马年。非同墨翟问，空滞杀龙川。

卷 84_39 【和陆明府赠将军重出塞】

陈子昂

忽闻天上将，关塞重横行。始返楼兰国，还向朔方城。

黄金装战马，白羽集神兵。星月开天阵，山川列地营。
晚风吹画角，春色耀飞旌。宁知班定远，犹是一书生。

卷 84_40 【江上暂别萧四米刘三旋欣相遇】

陈子昂

昨夜沧江别，言乖天汉游。宁期此相遇，尚接武陵洲。
结绶还逢育，衔杯且对刘。波潭一弥弥，临望几悠悠。
山水丹青杂，烟云紫翠浮。终愧神仙友，来接野人舟。

卷 84_41 【秋日遇荆州府崔兵曹使宴】

陈子昂

轸轩凤凰使，林藪鸛鸡冠。江湖一相许，云雾坐交欢。
兴尽崔亭伯，言忘释道安。林光稍欲暮，岁物已将阑。
古树苍烟断，虚亭白露寒。瑶琴山水曲，今日为君弹。

卷 84_42 【卧病家园】

陈子昂

世上无名子，人间岁月赊。纵横策已弃，寂寞道为家。

卧病谁能问，闲居空物华。犹忆灵台友，栖真隐太霞。
还丹奔日御，却老饵云芽。宁知白社客，不厌青门瓜。

卷 84_43 【于长史山池三日曲水宴】

陈子昂

摘兰藉芳月，祓宴坐回汀。泛滟清流满，葳蕤白芷生。
金弦挥赵瑟，玉指弄秦筝。岩榭风光媚，郊园春树平。
烟花飞御道，罗绮照昆明。日落红尘合，车马乱纵横。

卷 84_44 【合州津口别舍弟至东阳峡，步趁不及，眷然有忆，作以示之】

陈子昂

江潭共为客，洲浦独迷津。思积芳庭树，心断白眉人。
同衾成楚越，别岛类胡秦。林岸随天转，云峰逐望新。
遥遥终不见，默默坐含嚬。念别疑三月，经游未一句。
孤舟多逸兴，谁共尔为邻。

卷 84_45 【万州晓发放舟乘涨，还寄蜀中亲朋】

陈子昂

空濛岩雨霁，烂熳晓云归。啸旅乘明发，奔桡鹜断矶。
苍茫林岫转，络绎涨涛飞。远岸孤烟出，遥峰曙日微。
前瞻未能朐，坐望日相依。曲直多今古，经过失是非。
还期方浩浩，征思日騑騑。寄谢千金子，江海事多违。

卷 84_46 【入峭峡安居溪伐木，溪源幽邃，林岭相映，有奇致焉】

陈子昂

肃徒歌伐木，鹜楫漾轻舟。靡迤随回水，潺湲溯浅流。
烟沙分两岸，露岛夹双洲。古树连云密，交峰入浪浮。
岩潭相映媚，溪谷屡环周。路迴光逾逼，山深与转幽。
麋麕寒思晚，猿鸟暮声秋。暂息兰台策，将从桂树游。
因书谢亲爱，千岁觅蓬丘。

卷 84_47 【入东阳峡与李明府舟前后不相及】

陈子昂

东岩初解缆，南浦遂离群。出没同洲岛，沿洄异渚濱。

风烟犹可望，歌笑浩难闻。路转青山合，峰回白日曛。
奔涛上漫漫，积水下沄沄。倏忽犹疑及，差池复两分。
离离间远树，蔼蔼没遥氛。地上巴陵道，星连牛斗文。
孤猿啼寒月，哀鸿叫断云。仙舟不可见，摇思坐氛氲。

卷 84_48 【同旻上人伤寿安傅少府】

陈子昂

生涯良浩浩，天命固谆谆。闻道神仙尉，怀德遂为邻。
畴昔逢尧日，衣冠仕汉辰。交游纷若凤，词翰宛如麟。
太息功黄绶，长思谒紫宸。金兰徒有契，玉树已埋尘。
把臂虽无托，平生固亦亲。援琴一流涕，旧馆几沾巾。
杳杳泉中夜，悠悠世上春。幽明长隔此，歌哭为何人。

卷 84_49 【南山家园林木交映，盛夏五月幽然清，独坐思
远率成十韵】

陈子昂

寂寥守寒巷，幽独卧空林。松竹生虚白，阶庭横古今。
郁蒸炎夏晚，栋宇閟清阴。轩窗交紫霭，檐户对苍岑。
凤蕴仙人箓，鸾歌素女琴。忘机委人代，闭牖察天心。
蛺蝶怜红药，蜻蜓爱碧浔。坐观万象化，方见百年侵。
扰扰将何息，青青长苦吟。愿随白云驾，龙鹤相招寻。

卷 84_50 【还至张掖古城，闻东军告捷，赠韦五虚已】

陈子昂

孟秋首归路，仲月旅边亭。闻道兰山战，相邀在井陘。
屡斗关月满，三捷虏云平。汉军追北地，胡骑走南庭。
君为幕中士，畴昔好言兵。白虎锋应出，青龙阵几成。
披图见丞相，按节入咸京。宁知玉门道，翻作陇西行。
北海朱旄落，东归白露生。纵横未得意，寂寞寡相迎。
负剑空叹息，苍茫登古城。

卷 84_51 【题祀山烽树赠乔十二侍御】

陈子昂

汉庭荣巧宦，云阁薄边功。可怜骢马使，白首为谁雄。

卷 84_52 【初入峡苦风寄故乡亲友】

陈子昂

故乡今日友，欢会坐应同。宁知巴峡路，辛苦石尤风。

卷 84_53 【题田洗马游岩桔槔】

陈子昂

望苑长为客，商山遂不归。谁怜北陵井，未息汉阴机。

卷 84_54 【古意题徐令壁】

陈子昂

白云苍梧来，氛氲万里色。闻君太平世，栖泊灵台侧。

卷 84_55 【赠别冀侍御崔司议】

陈子昂

有道君匡国，无闷余在林。白云峨眉上，岁晚来相寻。

卷 84_56 【三月三日宴王明府山亭（见《岁时杂咏》）】

陈子昂

暮春嘉月，上巳芳辰。群公禊饮，于洛之滨。

· 全唐诗 ·

奕奕车骑，粲粲都人。连帷竞野，絃服缙津。
青郊树密，翠渚萍新。今我不乐，含意□申。

第八十五卷

卷 85_1【唐封泰山乐章·豫和六首】

张说

挹泰坛，紫泰清。受天命，报天成。
竦皇心，荐乐声。志上达，歌下迎。

亿上帝，临下庭。骑日月，陪列星。
嘉视信，大糝馨。澹神心，醉皇灵。

相百辟，贡八荒。九歌叙，万舞翔。
肃振振，铿皇皇。帝欣欣，福穰穰。

高在上，道光明。物资始，德难名。
承眷命，牧苍生。寰宇谧，泰阶平。

天道无亲，至诚与邻。山川遍礼，宫徵惟新。
玉帛非盛，聪明会真。正斯一德，通乎百神。

享帝享亲，维孝维圣。缉熙懿德，敷扬成命。
华夷志同，笙镛礼盛。明灵降止，感此诚敬。

卷 85_2 【唐封泰山乐章 · 太和】

张说

孝敬中发，和容外彰。腾华照宇，如升太阳。
贞璧就奠，玄灵垂光。礼乐具举，济济洋洋。

卷 85_3 【唐封泰山乐章 · 肃和】

张说

奠祖配天，承天享帝。百灵咸秩，四海来祭。
植我苍璧，布我玄制。华日裴回，神烟容裔。

卷 85_4 【唐封泰山乐章 · 雍和】

张说

俎豆有馥，粢盛洁丰。亦有和羹，既戒既平。
鼓钟管磬，肃唱和鸣。皇皇我祖，来我思成。

卷 85_5 【唐封泰山乐章 · 寿和】

张说

烝烝我后，享献惟寅。躬酌郁鬯，跪奠明神。
孝莫孝乎，配上帝亲。敬莫敬乎，教天下臣。

卷 85_6 【唐封泰山乐章 · 寿和】

张说

皇祖严配，配享皇天。皇皇降嘏，天子万年。

卷 85_7 【唐封泰山乐章 · 舒和】

张说

六钟翕协六变成，八佾徜徉八风生。
乐九韶兮人神感，美七德兮天地清。

卷 85_8 【唐封泰山乐章 · 凯和】

张说

烈祖顺三灵，文宗威四海。黄钺诛群盗，朱旗扫多罪。

戢兵天下安，约法人心改。大哉干羽意，常见风云在。

卷 85_9【唐封泰山乐章·豫和】

张说

礼乐终，烟燎上。怀灵惠，结皇想。
归风疾，回风爽。百神来，众神往。

卷 85_10【唐享太庙乐章·永和三首】

张说

肃九室，谐八音。歌皇慕，动神心。
礼宿设，乐妙寻。声明备，裸奠临。

律迺气，音入玄。依玉几，御黼筵。
聆忉息，僭周旋。九韶遍，百福传。

信工祝，永颂声。来祖考，听和平。
相百辟，贡九瀛。神休委，帝孝成。

卷 85_11 【唐享太庙乐章·太和】

张说

时文圣后，清庙肃邕。致诚勤荐，在貌思恭。
玉节肆夏，金锵五钟。绳绳云步，穆穆天容。

卷 85_12 【唐享太庙乐章·肃和】

张说

天子享孝，工歌溥将。射裸郁鬯，乃焚膋芗。
臭以达旨，声以求阳。奉时烝尝，永代不忘。

卷 85_13 【唐享太庙乐章·雍和二首】

张说

在涤嘉豢，丽碑敬牲。角握之牝，色纯之騂。
火传阳燧，水溉阴精。太公胖俎，传说和羹。

俎豆有馥，齐盛洁丰。亦有和羹，既戒既平。
鼓钟管磬，肃唱和鸣。皇皇后祖，来我思成。

卷 85_14 【唐享太庙乐章·文舞】

张说

圣谟九德，真言五千。庆集昌胄，符开帝先。高文杖钺，
克配彼天。三宗握镜，六合涣然。帝其承祀，率礼罔愆。
图书雾出，日月清悬。舞形德类，咏谥功传。黄龙蜿蟺，
彩云蹁跹。五行气顺，八佾风宣。介此百禄，於皇万年。

卷 85_15 【唐享太庙乐章·光大舞】

张说

肃肃艺祖，滔滔浚源。有雄玉剑，作镇金门。
玄王贻绪，后稷谋孙。肇禋九庙，四海来尊。

卷 85_16 【唐享太庙乐章·长发舞】

张说

具礼崇德，备乐承风。魏推幢主，周赠司空。
不行而至，无成有终。神兴王业，天归帝功。

卷 85_17 【唐享太庙乐章·大政舞】

张说

於赫元命，权舆帝文。天齐八柱，地半三分。
宗庙观德，笙镛乐勋。封唐之兆，成天下君。

卷 85_18 【唐享太庙乐章·大成舞】

张说

帝舞季历，龙圣生昌。后歌有蟠，胎炎孕黄。
天地合德，日月齐光。肃雍孝享，祚我万方。

卷 85_19 【唐享太庙乐章·大明舞】

张说

赤精乱德，四海困穷。黄旗举义，三灵会同。
早望春雨，云披大风。溥天来祭，高祖之功。

卷 85_20 【唐享太庙乐章·崇德舞】

张说

皇合一德，朝宗百神。削平天地，大拯生人。
上帝配食，单于入臣。戎歌陈武，晔晔震震。

卷 85_21 【唐享太庙乐章·钧天舞】

张说

高皇迈道，端拱无为。化怀獯鬻，兵戢句骊。
礼尊封禅，乐盘来仪。合位娲后，同称伏羲。

卷 85_22 【唐享太庙乐章·大和舞】

张说

退居江水，郁起丹陵。礼物还旧，朝章中兴。
龙图友及，骏命恭膺。鸣球香瓚，大糴是承。

卷 85_23 【唐享太庙乐章·景云舞】

张说

景云霏烂，告我帝符。噫帝冲德，与天为徒。
笙镛遥远，俎豆虚无。春秋孝献，回复此都。

卷 85_24 【唐享太庙乐章·福和】

张说

备礼用乐，崇亲致尊。诚通慈降，敬彻爱存。献怀称寿，
啐感承恩。皇帝孝德，子孙千亿。大包天域，长亘不极。

卷 85_25 【唐享太庙乐章·舒和】

张说

六钟翕协六变成，八佾徜徉八风生。
乐九韶兮人神感，美七德兮天地清。

卷 85_26 【唐享太庙乐章·凯安三首】

张说

瑟彼瑶爵，亚维上公。室如屏气，门不容躬。礼殷其本，
乐执其中。圣皇永慕，天地幽通。

礼匝三献，乐遍九成。降循轩陛，仰歆皇情。福与仁合，
德因孝明。百年神畏，四海风行。

总总干戚，填填鼓钟。奋扬增气，坐作为容。
离若鸷鸟，合如战龙。万方观德，肃肃邕邕。

卷 85_27 【唐享太庙乐章·登歌】

张说

止笙磬，撤豆笾。廓无响，窅入玄。主在室，神在天。
情馀慕，礼罔愆。喜黍稷，屡丰年。

卷 85_28 【唐享太庙乐章·永和】

张说

眇嘉乐，授灵爽。感若来，思如往。休气散，回风上。
返寂寞，还惚恍。怀灵驾，结空想。

第八十六卷

卷 86_1 【奉和圣制赐诸州刺史应制以题坐右】

张说

文明遍禹迹，鰥寡达尧心。正在亲人守，能令王泽深。
朝廷多秀士，熔炼比精金。犀节同分命，熊轩各外临。
圣主赋新诗，穆若听薰琴。先言教为本，次言则是钦。
三时农不夺，午夜犬无侵。愿使天宇内，品物遂浮沉。
寄情群飞鹤，千里一扬音。共蹑华胥梦，龚黄安足寻。

卷 86_2 【奉和圣制送宇文融安辑户口应制】

张说

至德临天下，劳情遍九围。念兹人去本，蓬转将何依。
外避征戍数，内伤亲党稀。嗟不逢明盛，胡能照隐微。
柏台简行李，兰殿锡朝衣。别曲动秋风，恩令生春辉。
使出四海安，诏下万心归。忤非夔龙佐，徒歌鸿雁飞。

卷 86_3 【奉和圣制过晋阳宫应制】

张说

太原俗尚武，高皇初奋庸。星轩三晋躔，土乐二尧封。
北风遂举鹏，西河亦上龙。至德起王业，继明赖人雍。
六合启昌期，再兴广圣踪。传呼大驾来，文物如云从。
连营火百里，纵观人千重。翠华渡汾水，白日耸罕峰。
粉榆恩赏洽，桑梓旧情恭。往运感不追，清时惜难逢。
诗发尊祖心，颂刊盛德容。愿君及春事，回輿绥万邦。

卷 86_4 【奉和圣制行次成皋应制】

张说

夏氏阶隋乱，自言河朔雄。王师进谷水，兵气临山东。
前扫成皋阵，却下洛阳宫。义合帝图起，威加天宇同。
轩台百年外，虞典一巡中。战龙思王业，倚马赋神功。

卷 86_5 【奉和圣制温汤对雪应制】

张说

瑞雪带寒风，寒风入阴琯。阴琯方凝闭，寒风复凄断。

宫似瑶林匝，庭如月结满。正赓挟纊词，非近温泉暖。

卷 86_6 【奉和圣制义成校猎喜雪应制】

张说

文教资武功，郊畋阅邦政。不知仁育久，徒看禽兽盛。
夜霰氛埃灭，朝日山川净。绰仗飞走繁，抨弦筋角劲。
帝射参神道，龙驰合人性。五豝连一发，百中皆先命。
勇爵均万夫，雄图罗七圣。星为吉符老，雪作丰年庆。
喜听行猎诗，威神入军令。

卷 86_7 【清明日诏宴宁王山池赋得飞字】

张说

今日清明宴，佳境惜芳菲。摇扬花杂下，娇嘒莺乱飞。
绿渚传歌榜，红桥度舞旂。和风偏应律，细雨不沾衣。
承恩如改火，春去春来归。

卷 86_8 【四月十三日诏宴宁王亭子赋得好字】

张说

何许承恩宴，山亭风日好。绿嫩鸣鹤洲，阴秣斗鸡道。

果思夏来茂，花嫌春去早。行乐无限时，皇情及芳草。

卷 86_9 【药园宴武辂沙将军赋得洛字】

张说

东第乘馀兴，南园宴清洛。文学引邹枚，歌钟陈卫霍。
风高大夫树，露下将军药。待闻出塞还，丹青上麟阁。

卷 86_10 【修书院学士奉敕宴梁王宅赋得树字】

张说

虎殿成鸿业，猿岩题凤赋。既荷大君恩，还蒙小山遇。
秋吹迎弦管，凉云生竹树。共惜朱邸欢，无辞洛城暮。

卷 86_11 【夕宴房主簿舍】

张说

岁晏关雍空，风急河渭冰。薄游羁物役，微尚惬远凭。
旅馆月宿永，闭扃云思兴。伊人美修夜，朋酒惠来称。
交谈既清雅，琴吹亦凄凝。不逢君蹇涸，幽意长郁蒸。

卷 86_12 【行从方秀川与刘评事文同宿】

张说

方秀美盘游，频年降天罕。水共伊川接，山将阙门断。
捧日照恩华，攀云引疲散。野宿霜入帐，孤衾寒不暖。
静闻宫漏疏，卧视庭月满。开炉命温酎，中夜发清管。
风送关山长，气迥星岁短。寓言情思惬，适兴真意坦。
寰中病羈挂，方外嫌纵诞。愿君乐盛时，无嗟带纒缓。

卷 86_13 【送郭大夫元振再使吐蕃】

张说

犬戎废东献，汉使驰西极。长策问酋渠，猜阻自夷殛。
容发徂边岁，旌裘敝海色。五年一见家，妻子不相识。
武库兵犹动，金方事未息。远图待才智，苦节输筋力。
脱刀赠分手，书带加餐食。知君万里侯，立功在异域。

卷 86_14 【送李侍郎迥秀薛长史季昶同赋得水字】

张说

汉郡接胡庭，幽并对烽垒。旌旗按部曲，文武惟卿士。

薛公善筹画，李相威边鄙。中冀分两河，长城各万里。
藉马黄花塞，蒐兵白狼水。胜敌在安人，为君汗青史。

卷 86_15 【别平一师】

张说

王子不事俗，高驾眇难追。茅土非屑盼，倾城无乐资。
宴坐深林中，三世同一时。皎皎独往心，不为尘网欺。
竭来已复去，今去何来思。回首谢同行，勤会安请期。

卷 86_16 【送王光庭】

张说

同居洛阳陌，经日懒相求。及尔江湖去，言别怅悠悠。
楚云眇羁翼，海月倦行舟。爱而不可见，徒嗟芳岁流。

卷 86_17 【新都南亭送郭元振卢崇道（一作卢崇道诗）】

张说

竹径女萝蹊，莲洲文石堤。静深人俗断，寻玩往还迷。
碧潭秀初月，素林惊夕栖。褰幌纳蟾影，理琴听猿啼。

佳辰改宿昔，胜寄坐睽携。长怀赏心爱，如玉复如珪。

卷 86_18 【赠崔公】

张说

我闻西汉日，四老南山幽。长歌紫芝秀，高卧白云浮。
朝野光尘绝，榛芜年貌秋。一朝驱驷马，连辔入龙楼。
昔遁高皇去，今从太子游。行藏惟圣节，福祸在人谋。
卒能匡惠帝，岂不赖留侯。事随年代远，名与图籍留。
平生钦厚德，慷慨景前修。蚌蛤同阴兔，蛟龙望斗牛。
无嗟异飞伏，同气幸相求。

卷 86_19 【赠赵公】

张说

湘东股肱守，心与帝乡期。舟楫中途蹇，风波复来思。
嘉我常联翼，金貂侍玉墀。迹参前马圣，名缀鬻熊师。
寒暑一何速，山川远间之。宁知洞庭上，独得平生时。
精意微绝简，从权讨妙棋。林壑为予请，纷霏发华滋。
流赏忽已散，惊帆杳难追。送君在南浦，侘傺投此词。

卷 86_20 【赠赵侍御】

张说

禄放迹异端，偏荒事同蹇。苟忘风波累，俱会云壑践。
险式压西湖，侨庐对南岘。夜楼江月入，朝幌山云卷。
山势远涛连，江途斜汉转。坐啸予多暇，行吟子独善。
并辔躐郊郭，方舟玩游演。虚声万籁分，水色千里辨。
不知岸阴谢，再见春露泫。绿壤发欣颜，华年助虫篆。
上世时难接，古人情可选。泊渚烦为媒，多才怨成褊。
长沙鵬作赋，任道可知浅。请从三已心，荣辱两都遣。

卷 86_21 【答李伯鱼桐竹】

张说

结庐桐竹下，室迳人相深。接垣分竹径，隔户共桐阴。
落花朝满岸，明月夜披林。竹有龙鸣管，桐留凤舞琴。
奇声与高节，非吾谁赏心。

卷 86_22 【寄姚司马】

张说

共君春种瓜，本期清夏暑。瓜成人已去，失望将谁语。

裊露摘香园，感味怀心许。偶逢西风便，因之寄鄂渚。

卷 86_23 【代书答姜七崔九】

张说

婀娜金闺树，离披野田草。虽殊两地荣，幸共三春好。
花殊鸟飞处，叶镂虫行道。真心独感人，惆怅令人老。

卷 86_24 【代书寄吉十一】

张说

一雁雪上飞，值我衡阳道。口衔离别字，远寄当归草。
目想春来迟，心惊寒去早。忆乡乘羽翮，慕侣盈怀抱。
零落答故人，将随江树老。

卷 86_25 【代书寄薛四】

张说

孤雁东飞来，寄我纹与素。纹足经三象，素当综群务。
远见故人心，一言重千金。答之彩毛翰，继以瑶华音。
岁寒众木改，松柏心常在。

卷 86_26 【过蜀道山】

张说

我行春三月，山中百花开。披林入峭蒨，攀登陟崔嵬。
白云半峰起，清江出峡来。谁知高深意，缅邈心幽哉。

卷 86_27 【蜀路二首】

张说

云埃夜澄廓，山日晓晴鲜。叶落苍江岸，鸿飞白露天。
磷磷含水石，幂幂覆林烟。客心久无绪，秋风殊未然。

徭蜀时未改，别家乡念盈。忆昨出门日，春风发鲜荣。
及兹旋辕地，秋风满路生。昏晓思魏阙，梦寐还秦京。
秦京开朱第，魏阙垂紫缨。幽独玄虚阁，不闻人马声。
艺业为君重，名位为君轻。玉琴知调苦，宝镜对胆清。
鹰饥常啄腥，凤饥亦待琼。于君自有属，物外岂能轻。

卷 86_28 【再使蜀道】

张说

眇眇葭萌道，苍苍褒斜谷。烟壑争晦深，云山共重复。

古来风尘子，同眩望乡目。芸阁有儒生，轺车倦驰逐。
青春客岷岭，白露摇江服。岁月镇羁孤，山川俄反覆。
鱼游恋深水，鸟迁恋乔木。如何别亲爱，坐去文章国。
蟋蟀鸣户庭，蟪蛄网琴筑。

卷 86_29 【江路忆郡】

张说

雾敛江早明，星翻汉将没。卧闻峡猿响，起视榜人发。
倚棹攀岸筱，凭船弄波月。水宿压洲渚，晨光屡挥忽。
林泽来不穷，烟波去无歇。结思笙竽里，摇情游侠窟。
年貌不暂留，欢愉及玄发。云涓恋山海，禽马怀燕越。
自非行役人，安知慕城阙。

卷 86_30 【过汉南城叹古坟】

张说

旧国多陵墓，荒凉无岁年。汹涌蔽平冈，汨若波涛连。
上世千金字，潜卧九重泉。松柏剪无馀，碑记灭罔传。
葬于不毛地，咸谓楚先贤。事尽情可识，使人心怅然。

卷 86_31 【至尉氏】

张说

夕次阮公台，啸歌临爽垲。高名安足赖，故物今皆改。
吾兄昔兹邑，遗爱称贤宰。桑中雉未飞，屋上乌犹在。
途逢旧叟吏，城有同僚案。望尘远见迎，拂馆来欣待。
慈惠留千室，友于存四海。始知鲁卫间，优劣相悬倍。

卷 86_32 【襄州景空寺题融上人兰若】

张说

高名出汉阴，禅阁跨香岑。众山既围绕，长川复回临。
云峰晓灵变，风木夜虚吟。碧湫龙池满，苍松虎径深。
旧知青岩意，偏入杳冥心。何由侣飞锡，从此脱朝簪。

卷 86_33 【巡边在河北作】

张说

抚剑空馀勇，弯弧遂无力。老去事如何，据鞍长叹息。
故交索将尽，后进稀相识。独怜半死心，尚有寒松直。

卷 86_34 【入海二首】

张说

乘桴入南海，海旷不可临。茫茫失方面，混混如凝阴。
云山相出没，天地互浮沉。万里无涯际，云何测广深。
潮波自盈缩，安得会虚心。

海上三神山，逍遥集众仙。灵心岂不同，变化无常全。
龙伯如人类，一钓两鳌连。金台此沦没，玉真时播迁。
问子劳何事，江上泣经年。隰中生红草，所美非美然。

卷 86_35 【相州山池作】

张说

尝怀谢公咏，山水陶嘉月。及此年事衰，徒看众花发。
观鱼乐何在，听鸟情都歇。星汉流不停，蓬莱去难越。
邺中秋麦秀，淇上春云沿。日见尘物空，如何静心阙。

卷 86_36 【岳州作】

张说

夜梦云阙间，从容簪履列。朝游洞庭上，缅望京华绝。

潦收江未清，火退山更热。重欷视欲醉，憎满气如噎。
器留鱼鳖腥，衣点蚊虻血。发白思益壮，心玄用弥拙。
冠剑日苔藓，琴书坐废撤。唯有报恩字，刻意长不灭。

卷 86_37 【岳州行郡竹篱】

张说

山郡不沟郭，荒居无翳壅。爱人忠主利，善守闭为勇。
苟非小勤瘁，安得期逸宠。版筑恐土疏，襄城嫌役重。
藩栅聊可固，筠篁近易奉。差池截浦沙，缭绕缘隈垄。
矗似长云亘，森如高戟耸。预绝豺狼忧，知免牛羊恐。
闾里宽矫步，榛丛恣踏踵。始果游处心，终日成闲拱。

卷 86_38 【游洞庭湖湘】

张说

缅邈洞庭岫，葱蒙水雾色。宛在太湖中，可望不可即。
剖竹守穷渚，开门对奇域。城池自絜笼，纓绶为徽纆。
靡日不思往，经时始愿克。飞棹越溟波，维舟恣攀陟。
窈窕入云步，崎岖倚松息。岩坛有鹤过，壁字无人识。
滴石香乳溜，垂崖灵草植。玩幽轻雾阻，讨异忘曛逼。
寒沙际水平，霜树笼烟直。空宫闻莫睹，地道窥难测。
此处学金丹，何人生羽翼。谁传九光要，几拜三仙职。

紫气徒想像，清潭长眇默。霓裳若有来，觐我云峰侧。

卷 86_39 【灊湖山寺】

张说

楚老游山寺，提携观画壁。扬袂指辟支，睺眄相斗阅。
险哉透撞儿，千金赌一掷。成败身自受，傍人那叹息。

卷 86_40 【出湖寄赵冬曦】

张说

西泛平湖尽，参差入乱山。东瞻岳阳郡，汗漫太虚间。
窘步同行乐，逾文互屡看。山戍上云桂，江亭临水关。
川途倏忽间，风景依如昨。湘浦未赐环，荆门犹主诺。
何时与美人，载酒游宛洛。

卷 86_41 【岳阳早霁南楼】

张说

山水佳新霁，南楼玩初旭。夜来枝半红，雨后洲全绿。
四运相终始，万形纷代续。适临青草湖，再变黄莺曲。

地穴穿东武，江流下西蜀。歌闻枉渚澶，舞见长沙促。
心阻意徒驰，神和生自足。白发悲上春，知常谢先欲。

卷 86_42【岳阳石门墨山二山相连，有禅堂观天下绝境】

张说

困轮江上山，近在华容县。常涉巴丘首，天晴遥可见。
佳游屡前诺，芳月愆幽眷。及此符守移，欢言临道便。
既携赏心客，复有送行掾。竹径入阴窞，松萝上空蒨。
草共林一色，云与峰万变。探窥石门断，缘越沙涧转。
两山势争雄，峰巘相顾眄。药妙灵仙宝，境华岩壑选。
清都西渊绝，金地东敞宴。池果接园畦，风烟迳台殿。
高寻去石顶，旷览天宇遍。千山纷满目，百川豁对面。
骑来云气迎，人去鸟声恋。长揖桃源士，举世同企羡。

卷 86_43【和尹懋秋夜游澗湖】

张说

坐啸人事闲，佳游野情发。山门送落照，湖口升微月。
林寻猿狖居，水戏鼉鼉穴。朔风吹飞雁，芳草亦云歇。

卷 86_44 【五君咏五首 · 魏齐公元忠】

张说

齐公生人表，迥天闻鹤唳。清论早揣摩，玄心晚超诣。
入相廊庙静，出军沙漠霁。见深吕禄忧，举后陈平计。
甘心除君恶，足以报先帝。

卷 86_45 【五君咏五首 · 苏许公环】

张说

许公信国桢，克美具瞻情。百事资朝问，三章广世程。
处高心不有，临节自为名。朱户传新戟，青松拱旧茔。
凄凉丞相府，馀庆在玄成。

卷 86_46 【五君咏五首 · 李赵公峤】

张说

李公实神敏，才华乃天授。睦亲何用心，处贵不忘旧。
故事遵台阁，新诗冠宇宙。在人忠所奉，恶我诚将宥。
南浦去莫归，嗟嗟蔑孙秀。

卷 86_47【五君咏五首·郭代公元振】

张说

代公举鹏翼，悬飞摩海雾。志康天地屯，适与云雷遇。
兴丧一言决，安危万心注。大勋书王府，舛命沦江路。
势倾北夏门，哀靡东平树。

卷 86_48【五君咏五首·赵耿公彦昭】

张说

耿公山岳秀，才杰心亦妙。鸷鸟峻标立，哀玉扣清调。
协赞休明后，恩华日月照。何意瑶台云，风吹落江徼。
湘流下浔阳，洒泪一投吊。

卷 86_49【游龙山静胜寺】

张说

每上襄阳楼，遥望龙山树。郁茆吐冈岭，微蒙在烟雾。
下车岁已成，饰马闲馀步。苦霜裹野草，爰日扬江煦。
云对石上塔，风吹松下路。禅室宴三空，神祠同六趣。
儿童共戏谑，猿鸟相惊顾。南识桓公台，北望先贤墓。

世上人何在，时闻心不住。但传无尽灯，可使有情悟。

卷 86_50 【一柱观】

张说

旧说江陵观，初疑神化来。空山结云阁，绮靡随风回。
奈何任一柱，斯焉容众材。奇功非长世，今馀草露台。

卷 86_51 【登九里台是樊姬墓】

张说

楚国所以霸，樊姬有力焉。不怀沈尹禄，谁谄叔敖贤。
万化茫无在，孤坟独岿然。北分阳台陌，南识郢城阡。
漠漠渚宫树，苍苍云梦田。登高形胜出，访古令名传。
自我来符守，因君树蕙荃。诗书将变俗，絺纁忽弥年。
志阐三折后，愁值二毛前。伫立帝京路，遥心寄此篇。

卷 86_52 【过怀王墓】

张说

咿嚟不可信，以此败怀王。客死峽关路，返葬岐江阳。

啼猿抱山月，饥狐猎野霜。一闻怀沙事，千载尽悲凉。

卷 86_53 【闻雨】

张说

多雨绝尘事，寥寥入太玄。城阴疏复合，檐滴断还连。
念我劳造化，从来五十年。误将心徇物，近得还自然。
闲居草木侍，虚室鬼神怜。有时进美酒，有时泛清弦。
声真不世识，心醉岂言诠。

卷 86_54 【夜坐】

张说

怀哉四壁时，未有五都价。百金谁见许，斗酒难为赏。
落花生芳春，孤月皎清夜。复逢利交客，题户遥相谢。

卷 86_55 【山夜闻钟】

张说

夜卧闻夜钟，夜静山更响。霜风吹寒月，窈窕虚中上。
前声既春容，后声复晃荡。听之如可见，寻之定无像。

信知本际空，徒挂生灭想。

卷 86_56 【冬日见牧牛人担青草归】

张说

塞上绵应折，江南草可结。欲持梅岭花，远竞榆关雪。
日月无他照，山川何顿别。苟齐两地心，天问将安说。

卷 86_57 【咏镜】

张说

宝镜如明月，出自秦宫样。隐起双蟠龙，衔珠俨相向。
常恐君不察，匣中委清量。积翳掩菱花，虚心蔽尘状。
倘蒙罗袖拂，光生玉台上。

卷 86_58 【咏瓢】

张说

美酒酌悬瓢，真淳好相映。蜗房卷堕首，鹤颈抽长柄。
雅色素而黄，虚心轻且劲。岂无雕刻者，贵此成天性。

卷 86_59 【杂诗四首】

张说

抱薰心常焦，举旆心常摇。天长地自久，欢乐能几朝。
君看西陵树，歌舞为谁娇。

山闲苦积雨，木落悲时遽。赏心凡几人，良辰在何处。
触石满堂侈，洒我终夕虑。客鸟怀主人，衔花未能去。
剖珠贵分明，琢玉思坚贞。要君意如此，终始莫相轻。

问子青霞意，何事留朱轩。自言心远俗，未始迹辞喧。
过蒙良时幸，侧息吏途烦。簪纓非宿好，文史弃前言。
夕卧北窗下，梦归南山园。白云惭幽谷，清风愧泉源。
十年兹赏废，佳期今复存。挂冠谢朝侣，星驾别君门。

默念群疑起，玄通百虑清。初心灭阳艳，复见湛虚明。
悟灭心非尽，求虚见后生。应将无住法，修到不成名。

卷 86_60 【和张监游终南】

张说

宿怀终南意，及此语云峰。夜闻竹涧静，晓望林岭重。
春烟生古石，时鸟戏幽松。岂无山中赏，但畏心莫从。

卷 86_61 【古泉驿】

张说

昔闻陈仲子，守义辞三公。身赁妻织屦，乐亦在其中。
岂无穷贱苦，羞与倾巧同。长白临河上，於陵入济东。
我行吊遗迹，感叹古泉空。

卷 86_62 【河上公】

张说

尊师厌尘去，精魄知何明。形气不复生，弟子空伤情。
济北神如在，淮南药未成。共期终莫遂，寥落两无成。

卷 86_63 【奉和圣制初入秦川路寒食应制】

张说

上阳柳色唤春归，临渭桃花拂水飞。总为朝廷巡幸去，
顿教京洛少光辉。昨从分陕山南口，驰道依依渐花柳。
入关正投寒食前，还京遂落清明后。路上天心重豫游，
御前恩赐特风流。便幕那能镂鸡子，行宫善巧帖毛球。
渭桥南渡花如扑，麦陇青青断人目。汉家行树直新丰，

秦地骊山抱温谷。香池春溜水初平，预欢浴日照京城。
今岁随宜过寒食，明年陪宴作清明。

卷 86_64 【时乐鸟篇】

张说

旧传南海出灵禽，时乐名闻不可寻。形貌乍同鹦鹉类，
精神别禀凤凰心。千年待圣方轻举，万里呈才无伴侣。
红茸糅绣好毛衣，清冷讴鸦好言语。内人试取御衣牵，
啄手暝声不许前。心愿阳乌恒保日，志嫌阴鹤欲凌天。
天情玩讶良无已，察图果见祥经里。本持符瑞验明王，
还用文章比君子。自怜弱羽讵堪珍，喜共华篇来示人。
人见嚶嚶报恩鸟，多惭碌碌具官臣。

卷 86_65 【安乐郡主花烛行】

张说

青宫朱邸翊皇闱，玉叶琼蕤发紫微。姬姜本来舅甥国，
卜筮俱道凤凰飞。星昴殷冬献吉日，夭桃秾李遥相匹。
鸾车凤传王子来，龙楼月殿天孙出。平台火树连上阳，
紫炬红轮十二行。丹炉飞铁驰炎焰，炎霞烁电吐明光。
绿鞵绀幘纷如雾，节鼓清笳前启路。城隅靡靡稍东还，
桥上鳞鳞转南渡。五方观者聚中京，四合尘烟涨洛城。

商女香车珠结网，天人宝马玉繁缨。百壶渌酒千斤肉，
大道连延障锦轴。先祝圣人寿万年，复祷宜家承百禄。
珊瑚刻盘青玉尊，因之假道入梁园。梁园山竹凝云汉，
仰望高楼在天半。翠幕兰堂苏合薰，珠帘挂户水波纹。
别起芙蓉织成帐，金缕鸳鸯两相向。罽茵饰地承雕履，
花烛分阶移锦帐。织女西垂隐烛台，双童连缕合欢杯。
蔼蔼绮庭嫔从列，娥娥红粉扇中开。黄金两印双花绶，
富贵婚姻古无有。清歌棠棣美王姬，流化邦人正夫妇。

卷 86_66 【离会曲】

张说

何处送客洛桥头，洛水泛泛中行舟。可怜河树叶萎蕤，
关关河鸟声相思。街鼓喧喧日将夕，去棹归轩两相迫。
何人送客故人情，故人今夜何处客。

卷 86_67 【邺都引】

张说

君不见魏武草创争天禄，群雄睚眦相驰逐。
昼携壮士破坚阵，夜接词人赋华屋。都呈繚绕西山阳，
桑榆汗漫漳河曲。城郭为虚人代改，但有西园明月在。
邺傍高冢多贵臣，娥眉曼睩共灰尘。

试上铜台歌舞处，唯有秋风愁杀人。

卷 86_68 【城南亭作】

张说

珂马朝归连万石，稍门洞启亲迎客。北堂珍重琥珀酒，
庭前列肆茱萸席。长袖迟回意绪多，清商缓转目腾波。
旧传比翼侯家舞，新出将雏主第歌。汉家绛灌馀兵气，
晋代浮虚安足贵。正逢天下金镜清，偏加日饮醇醪意。
谁复遨游不复归，闲庭莫畏不芳菲。会待城南春色至，
竟将花柳拂罗衣。

卷 86_69 【同赵侍御乾湖作】

张说

江南湖水咽山川，春江溢入共湖连。气色纷沦横罩海，
波涛鼓怒上漫天。鳞宗壳族嬉为府，弋叟罟师利焉聚。
欹帆侧柁弄风口，赴险临深绕湾浦。一湾一浦恁迢回，
千曲千澁悦迷哉，乍见灵妃含笑往。复闻游女怨歌来。
暑来寒往运沍沍，潭生水落移陵谷。云间坠翮散泥沙，
波上浮查栖树木，昨暮飞霜下北津，今朝行雁度南滨。
处处沟洫清源竭，年年旧苇白头新。天地盈虚尚难保，
人间倚伏何须道。秋月晶晶泛澄澜，冬景青青步纤草。

念君宿昔观物变，安得踟蹰不衰老。

卷 86_70 【巡边在河北作】

张说

去年六月西河西，今年六月北河北。沙场碛路何为尔，
重气轻生知许国。人生在世能几时，壮年征战发如丝。
会待安边报明主，作颂封山也未迟。

卷 86_71 【赠崔二安平公乐世词】

张说

十五红妆侍绮楼，朝承握槊夜藏钩。君臣一意金门宠，
兄弟双飞玉殿游。宁知宿昔恩华乐，变作潇湘离别愁。
地湿莓苔生舞袖，江声怨叹入箜篌。自怜京兆双眉妩，
会待南来五马留。

卷 86_72 【送尹补阙元凯琴歌】

张说

凤哉凤哉，啄琅玕，饮瑶池，栖昆仑之山哉。

中国有圣人，感和气，飞来飞来。自歌自舞，先王册府，
麒麟之台，羈雌众雏故山曲。其鸣喈喈，其鸣喈喈，
欲往衔之歟去来，去别鸾凤心徘徊。
明年阿阁梧桐花叶开，群飞凤归来，群飞凤归来。

卷 86_73 【送考功武员外学士使嵩山署舍利塔】

张说

怀玉泉，恋仁者，寂灭真心不可见，空留影塔嵩岩下。
宝王四海转千轮，金昙百粒送分身。山中二月娑罗会，
虚呗遥遥愁思人。我念过去微尘劫，与子禅门同正法。
虽在神仙兰省间，常持清净莲花叶。来亦好，去亦好，
了观车行马不移，当见菩提离烦恼。

卷 86_74 【遥同蔡起居偃松篇】

张说

清都众木总荣芬，传道孤松最出群。名接天庭长景色，
气连宫阙借氛氲。悬池的的停华露，偃盖重重拂瑞云。
不借流膏助仙鼎，愿将桢干捧明君。莫比冥灵楚南树，
朽老江边代不闻。

第八十七卷

卷 87_1 【奉和圣制登骊山瞩眺应制】

张说

寒山上半空，临眺尽寰中。是日巡游处，晴光远近同。
川明分渭水，树暗辨新丰。岩壑清音暮，天歌起大风。

卷 87_2 【奉和圣制幸白鹿观应制】

张说

洞府寒山曲，天游日旰回。披云看石镜，拂雪上金台。
竹径龙骖下，松庭鹤辔来。双童还献药，五色耀仙材。

卷 87_3 【奉和圣制送金城公主适西蕃应制】

张说

青海和亲日，潢星出降时。戎王子婿宠，汉国舅家慈。

春野开离宴，云天起别词。空弹马上曲，讵减凤楼思。

卷 87_4 【奉和同皇太子过慈恩寺应制二首】

张说

翼翼宸恩永，煌煌福地开。离光升宝殿，震气绕香台。
上界幡花合，中天伎乐来。愿君无量寿，仙乐屡徘徊。

朗朗神居峻，轩轩瑞象威。圣君成愿果，太子拂天衣。
至乐三灵会，深仁四皓归。还闻涡水曲，更绕白云飞。

卷 87_5 【侍宴武三思山第应制赋得风字】

张说

梁王池馆好，晓日凤楼通。竹町罗千卫，兰筵降两宫。
清歌芳树下，妙舞落花中。臣觉筵中听，还如大国风。

卷 87_6 【奉和圣制过宁王宅应制】

张说

进酒忘忧观，箫韶喜降临。帝尧敦族礼，王季友兄心。
竹院龙鸣笛，梧宫凤绕林。大风将小雅，一字尽千金。

卷 87_7 【奉和圣制同玉真公主过大哥山池题石壁应制】

张说

绿竹初成苑，丹砂欲化金。乘龙与骖凤，歌吹满山林。
爽气凝情迥，寒光映浦深。忘忧题此观，为乐赏同心。

卷 87_8 【奉和圣制赐王公千秋镜应制】

张说

宝镜颁神节，凝规写圣情。千秋题作字，长寿带为名。
月向天边下，花从日里生。不承悬象意，谁辨照心明。

卷 87_9 【奉和圣制经邹鲁祭孔子应制】

张说

孔圣家邹鲁，儒风蔼典坟。龙骖回旧宅，凤德咏馀芬。
入室神如在，升堂乐似闻。悬知一王法，今日待明君。

卷 87_10 【侍宴萼荷亭应制】

张说

回銮青岳观，帐殿紫烟峰。仙路迎三鸟，云衢驻两龙。
园林看化塔，坛墠识馀封。山外闻箫管，还如天上逢。

卷 87_11 【侍宴浐水赋得浓字】

张说

千行发御柳，一叶下仙筇。青浦宸游至，朱城佳气浓。
云霞交暮色，草树喜春容。蔼蔼天旗转，清笳入九重。

卷 87_12 【奉和圣制同刘晃喜雨应制】

张说

青气含春雨，知从岱岳来。行云避师出，洒雨待车回。
厌浥尘清道，空濛柳映台。最宜三五夜，晴月九重开。

卷 87_13 【奉和圣制观拔河俗戏应制】

张说

今岁好拖钩，横街敞御楼。长绳系日住，贯索挽河流。
斗力频催鼓，争都更上筹。春来百种戏，天意在宜秋。

卷 87_14 【奉和圣制途次陕州应制】

张说

周召尝分陕，诗书空复传。何如万乘眷，追赏二南篇。
郡带洪河侧，宫临大道边。洛城将日近，佳气满山川。

卷 87_15 【奉和圣制野次喜雪应制】

张说

寒更玉漏催，晓色御前开。泱泱云阴积，氤氲风雪回。
山知银作瓮，宫见璧成台。欲验丰年象，飘摇仙藻来。

卷 87_16 【奉和圣制温泉言志应制】

张说

温谷媚新丰，骊山横半空。汤池薰水殿，翠木暖烟宫。
起疾逾仙药，无私合圣功。始知尧舜德，心与万人同。

卷 87_17 【皇帝降诞日集贤殿赐宴】

张说

仲秋金帝起，五日土行昭。瑞表壬寅露，光传甲子宵。
阴风吹大泽，梦日照昌朝。不独华封老，千年喜祝尧。

卷 87_18 【晦日诏宴永穆公主亭子赋得流字】

张说

堂邑山林美，朝恩晦日游。园亭含淑气，竹树绕春流。
舞席千花妓，歌船五彩楼。群欢与王泽，岁岁满皇州。

卷 87_19 【恩制赐食于丽正殿书院宴赋得林字】

张说

东壁图书府，西园翰墨林。诵诗闻国政，讲易见天心。
位窃和羹重，恩叨醉酒深。缓歌春兴曲，情竭为知音。

卷 87_20 【羽林恩召观御书王太尉碑】

张说

陇首名公石，来承圣札归。鱼龙生意态，钩剑动铓辉。
字得神明保，词惭少女徽。谁家羽林将，又逐凤书飞。

卷 87_21 【东都酺宴四首】

张说

重华升宝历，轩帝眇闲居。政成天子孝，俗返上皇初。
忘味因观乐，欢心寄合酺。自怜疲马意，恋恋主恩馀。

朱城尘噎灭，翠幕景情开。震震灵輴起，翔翔舞凤来。
雕盘装草树，绮乘结楼台。共喜光华日，酣歌捧玉杯。

晓月调金阙，朝暾对玉盘。争驰群鸟散，斗伎百花团。
遇圣人知幸，承恩物自欢。洛桥将举烛，醉舞拂归鞍。

恺宴惟今席，馀欢殊未穷。入云歌袅袅，向日伎丛丛。
驶管催酣兴，留关待曲终。长安若为乐，应与万方同。

卷 87_22 【道家四首奉敕撰】

张说

金坛启曙闱，真气肃微微。落月衔仙竇，初霞拂羽衣。
香随龙节下，云逐凤箫飞。暂住蓬莱戏，千年始一归。

窈窕流精观，深沉紫翠庭。金奁调上药，宝案读仙经。
作赋看神雨，乘槎辨客星。只应谢人俗，轻举托云耕。

金炉承道诀，玉牒启玄机。云逐笙歌度，星流宫殿飞。
乘风嬉浩荡，窥月弄光辉。唯有三山鹤，应同千载归。

道记开中箓，真官表上清。焚香三鸟至，炼药九仙成。
天上灵书下，空中妙伎迎。迎来出烟雾，渺渺戏蓬瀛。

卷 87_23 【凤楼寻胜地】

张说

西掖持醇酒，东山就白云。开轩绿池映，命席紫兰芬。
舞度花为伴，莺来管作群。太平多乐事，春物共氛氲。

卷 87_24 【幽州夜饮】

张说

凉风吹夜雨，萧瑟动寒林。正有高堂宴，能忘迟暮心。
军中宜剑舞，塞上重笳音。不作边城将，谁知恩遇深。

卷 87_25 【崔礼部园亭得深字】

张说

窈窕留清馆，虚徐步晚阴。水连伊阙近，树接夏阳深。
柳蔓怜垂拂，藤梢爱上寻。讶君轩盖侣，非复俗人心。

卷 87_26 【送郑大夫惟忠从公主入蕃】

张说

凤吹遥将断，龙旗送欲还。倾都邀节使，传酌缓离颜。
春碛沙连海，秋城月对关。和戎因赏魏，定远莫辞班。

卷 87_27 【送崔二长史日知赴潞州】

张说

东山怀卧理，南省怅悲翁。共见前途促，何知后会同。
莫轻一筵宴，明日半成空。况尔新离阙，思归迷梦中。

卷 87_28 【同贺八送兗公赴荆州】

张说

畴昔同声友，骞飞出凤池。风云一荡薄，日月屡参差。
此别黄叶下，前期安可知。谁怜楚南树，不为岁寒移。

卷 87_29 【饯唐州高使君】

张说

常时好闲独，朋旧少相过。及尔宣风去，方嗟别日多。
淮流春碗晚，江海路蹉跎。百岁屡分散，欢言复几何。

卷 87_30 【送王峻自羽林赴永昌令】

张说

将星移北洛，神雨避东京。为负刚肠誉，还追强项名。
白云向伊阙，黄叶散昆明。多谢弦歌宰，稀闻桴鼓声。

卷 87_31 【同王仆射山亭饯岑广武羲得言字】

张说

闻道长岑令，奋翼宰旅门。长安东陌上，送客满朱轩。
琴爵留佳境，山池借好园。兹游恨不见，别后缀离言。

卷 87_32 【送任御史江南发粮以赈河北百姓】

张说

河朔人无岁，荆南义廩开。将兴泛舟役，必仗济川才。
夜月临江浦，春云历楚台。调饥坐相望，绣服几时回。

卷 87_33 【送王尚一严嶷二侍御赴司马都督军】

张说

汉掖通沙塞，边兵护草腓。将行司马令，助以铁冠威。
白露鹰初下，黄尘骑欲飞。明年春酒熟，留酌二星归。

卷 87_34 【送李问政河北简兵】

张说

斗酒贻朋爱，踟蹰出御沟。依然四牡别，更想八龙游。
密亲仕燕冀，连年迩寇雠。因君阅河朔，垂泪语幽州。

卷 87_35 【送薛植入京】

张说

青组言从史，鸿都忽见求。款言人向老，饮别岁方秋。
仿佛长安陌，平生是旧游。何时复相遇，宛在水中流。

卷 87_36 【相州前池别许郑二判官景先神力】

张说

数步圆塘水，双鸿戢羽仪。一飞乔木上，一返故林垂。
澹泊含秋景，虚明抱夜规。无因留绝翰，云海意差池。

卷 87_37 【岳州宴别潭州王熊二首】

张说

丝管清且哀，一曲倾一杯。气将然诺重，心向友朋开。
古木无生意，寒云若死灰。赠君芳杜草，为植建章台。

缙云连省阁，沟水遽西东。然诺心犹在，荣华岁不同。
孤城临楚塞，远树入秦宫。谁念三千里，江潭一老翁。

卷 87_38 【广州萧都督入朝过岳州宴饯得冬字】

张说

孤城抱大江，节使往朝宗。果是台中旧，依然水上逢。
京华遥比日，疲老飒如冬。窃美能言鸟，衔恩向九重。

卷 87_39 【岳州别姚司马绍之制许归侍】

张说

和玉悲无已，长沙宦不成。天从扇枕愿，人遂倚门情。
方外怀司马，江东忆步兵。问君栖泊处，空岭夜猿惊。

卷 87_40 【送岳州李十从军桂州】

张说

送客之江上，其人美且才。风波万里阔，故旧十年来。
剑拔蛟随断，弓张鸟自摧。阳桥书落落，驿马定先回。

卷 87_41 【岳州别赵国公王十一琚入朝】

张说

昔滥貂蝉长，同承雨露霏。今参鱼鳖守，望美洞庭归。
浦树悬秋影，江云烧落辉。离魂似征帆，恒往帝乡飞。

卷 87_42 【岳州别子均】

张说

离筵非燕喜，别酒正销魂。念汝犹童孺，嗟予隔远藩。
津亭拔心草，江路断肠猿。他日将何见，愁来独倚门。

卷 87_43 【端州别高六戡】

张说

异壤同羁鞅，途中喜共过。愁多时举酒，劳罢或长歌。
南海风潮壮，西江瘴疠多。於焉复分手，此别伤如何。

卷 87_44 【南中别蒋五岑向青州】

张说

老亲依北海，贱子弃南荒。有泪皆成血，无声不断肠。
此中逢故友，彼地送还乡。愿作枫林叶，随君度洛阳。

卷 87_45 【南中别陈七李十】

张说

二年共游处，一旦各西东。请君聊驻马，看我转征蓬。
画益愁南海，离驹思北风。何时似春雁，双入上林中。

卷 87_46 【南中别王陵成崇】

张说

握手与君别，歧路赠一言。曹卿礼公子，楚媪馈王孙。
倏尔生六翮，翻飞戾九门。常怀客鸟意，会答主人恩。

卷 87_47 【岭南送使】

张说

秋雁逢春返，流人何日归。将余去国泪，洒子入乡衣。
饥狖啼相聚，愁猿喘更飞。南中不可问，书此示京畿。

卷 87_48 【幽州别阴长河行先】

张说

惠好交情重，辛勤世事多。荆南久为别，蓟北远来过。
寄目云中鸟，留欢酒上歌。影移春复间，迟暮两如何。

卷 87_49 【和朱使欣道峡似巫山之作】

张说

江如晓天净，石似暮霞张。征帆一流览，宛若巫山阳。
楚客思归路，秦人谪异乡。猿鸣孤月夜，再使泪沾裳。

卷 87_50 【和朱使欣二首】

张说

南土多为寇，西江尽畏途。山行阻篁竹，水宿碍菰蒲。
使越才应有，征蛮力岂无。空传人赠剑，不见虎衔珠。

江势连山远，天涯此夜愁。霜空极天静，寒月带江流。
思起南征棹，文高北望楼。自怜如坠叶，泛泛侣仙舟。

卷 87_51 【过庾信宅】

张说

兰成追宋玉，旧宅偶词人。笔涌江山气，文骄云雨神。
包胥非救楚，随会反留秦。独有东阳守，来嗟古树春。

卷 87_52 【卢巴驿闻张御史张判官欲到不得待留赠之】

张说

旅辔南方远，传闻北使来。旧庭知玉树，合浦识珠胎。
白发因愁改，丹心托梦回。皇恩若再造，为忆不然灰。

卷 87_53 【南中赠高六戡】

张说

北极辞明代，南溟宅放臣。丹诚由义尽，白发带愁新。
鸟坠炎洲气，花飞洛水春。平生歌舞席，谁忆不归人。

卷 87_54 【岳州山城】

张说

山城丰日暇，闭户见天心。东旷迎朝色，西楼引夕阴。
书观千载近，学静二毛深。忽有南风至，吹君堂上琴。

卷 87_55 【和尹懋秋夜游澠湖】

张说

澠湖佳可游，既近复能幽。林里栖精舍，山间转去舟。
雁飞江月冷，猿啸野风秋。不是迷乡客，寻奇处处留。

卷 87_56 【与赵冬曦君懋子均登南楼】

张说

危楼泻洞湖，积水照城隅。命驾邀渔火，通家引凤雏。
山晴红蕊匝，洲晓绿苗铺。举目思乡县，春光定不殊。

卷 87_57 【游灊湖上寺】

张说

湖上奇峰积，山中芳树春。何知绝世境，来遇赏心人。
清旧岩前乐，呦嚶鸟兽驯。静言观听里，万法自成轮。

卷 87_58 【晦日】

张说

晦日嫌春浅，江浦看湔衣。道傍花欲合，枝上鸟犹稀。
共忆浮桥晚，无人不醉归。寄书题此日，雁过洛阳飞。

卷 87_59【湘州九日城北亭子】

张说

西楚茱萸节，南淮戏马台。宁知沅水上，复有菊花杯。
亭帐凭高出，亲朋自远来。短歌将急景，同使兴情催。

卷 87_60【翻著葛巾呈赵尹】

张说

昔日接_畷倒，今我葛巾翻。宿酒何时醒，形骸不复存。
忽闻有嘉客，骊步出闲门。桃花春径满，误识武陵源。

卷 87_7【戏题草树】

张说

忽惊石榴树，远出渡江来。戏问芭蕉叶，何愁心不开。
微霜拂宫桂，凄吹扫庭槐。荣盛更如此，惭君独见哀。

卷 87_8 【岳州赠广平公宋大夫】

张说

亚相本时英，归来复国桢。朝推长孺直，野慕隐之清。
传节还闽嶂，皇华入汉京。宁思江上老，岁晏独无成。

卷 87_9 【和魏仆射还乡】

张说

富贵还乡国，光华满旧林。秋风树不静，君子叹何深。
故老空悬剑，邻交日散金。众芳摇落尽，独有岁寒心。

卷 87_10 【和张监观赦】

张说

日御临双阙，天街俨百神。雷兹作解气，岁复建寅春。
喜候开星驿，欢声发市人。金环能作赋，来入管弦声。

卷 87_11 【寄天台司马道士】

张说

世上求真客，天台去不还。传闻有仙要，梦寐在兹山。
朱阙青霞断，瑶堂紫月闲。何时枉飞鹤，笙吹接人间。

卷 87_12 【下江南向夔州】

张说

天明江雾歇，洲浦棹歌来。绿水逶迤去，青山相向开。
城临蜀帝祀，云接楚王台。旧知巫山上，游子共徘徊。

卷 87_13 【还至端州驿前与高六别处】

张说

旧馆分江日，凄然望落晖。相逢传旅食，临别换征衣。
昔记山川是，今伤人代非。往来皆此路，生死不同归。

卷 87_14 【四月一日过江赴荆州】

张说

春色沅湘尽，三年客始回。夏云随北帆，同日过江来。
水漫荆门出，山平郢路开。比肩羊叔子，千载岂无才。

卷 87_15 【湘州北亭】

张说

人务南亭少，风烟北院多。山花迷径路，池水拂藤萝。
萍散鱼时跃，林幽鸟任歌。悠然白云意，乘兴抱琴过。

卷 87_16 【荆州亭入朝】

张说

巫山云雨峡，湘水洞庭波。九辨人犹殡，三秋雁始过。
旒裘吴地尽，髻荐楚言多。不果朝宗愿，其如江汉何。

卷 87_17 【岳州守岁】

张说

除夜清樽满，寒庭燎火多。舞衣连臂拂，醉坐合声歌。
至乐都忘我，冥心自委和。今年只如此，来岁知如何。

卷 87_18 【咏尘】

张说

仙浦生罗袜，神京染素衣。裊山期益峻，照日幸增辉。
夕伴龙媒合，朝游凤辇归。独怜范甑下，思绕画梁飞。

卷 87_19 【阙题】

张说

婚礼知无贺，承家叹有辉。亲迎驷子跃，吉兆凤雏飞。
温席开华扇，梁门换褰衣。遥思桃李日，应赋采蘋归。

卷 87_20 【深渡驿】

张说

旅泊青山夜，荒庭白露秋。洞房悬月影，高枕听江流。
猿响寒岩树，萤飞古驿楼。他乡对摇落，并觉起离忧。

卷 87_21 【惠文太子挽歌二首】

张说

碣馆英灵在，瑶山美谥尊。剪桐悲曩戏，攻玉怆新恩。
宫仗传驰道，朝衣送国门。千秋谷门外，明月照西园。

梁国深文雅，淮王爱道仙。帝欢同宴日，神夺上宾年。
旒旒飞行树，帷宫宿野烟。指言君爱弟，挥泪满山川。

卷 87_22 【节义太子杨妃挽歌二首】

张说

西华三公族，东闾五可才。玉环初受庆，金玦反逢灾。
桂殿花空落，桐园月自开。朝云将暮雨，长绕望思台。

昔日三朝路，逶迤四望车。绣腰长命绮，隐髻连枝花。
今春戾园树，索然无岁华。共伤千载后，惟号一王家。

卷 87_23 【韦谯公挽歌二首】

张说

五瑞分王国，双珠映后家。文飞书上凤，武结笥中蛇。
出豫荣前马，回鸾丧后车。衮衣将锡命，泉路有光华。

国骋双骐驎，庭仪两凤凰。将星连相位，玉树伴金乡。
歌舞侯家艳，轩裘戚里光。安知杜陵下，碑版已相望。

卷 87_24 【右丞相苏公挽歌二首】

张说

王宰丹青化，春卿礼乐才。缙衣传旧职，华衮赠新哀。
路泣群官送，山嘶驷马回。佳辰无白日，宾阁有青苔。

门歌出野田，冠带寝穷泉。万事皆身外，平生尚目前。
西垣紫泥綬，东岳白云篇。自惜同声处，从今遂绝弦。

卷 87_25 【崔尚书挽词】

张说

相宅隆坤宝，承家占海封。庭中男执雁，门外女乘龙。
鸣玉游三省，搢金侍九重。一朝宾客散，留剑在青松。

卷 87_26 【右侍郎集贤院学士徐公挽词二首】

张说

才美临淄北，名高淮海东。羽仪三省遍，渔猎五车通。
玉殿孤新榜，珠英落旧丛。徒悬一宝剑，何处访徐公。
叹息书林友，才华天下选。并赋三阳宫，集诗集贤殿。
具物衣如在，咄嗟长不见。既哀薤露词，岂忘平生眷。

卷 87_27 【崔司业挽歌二首】

张说

海岱英灵气，胶庠礼乐资。风流满天下，人物擅京师。
疾起扬雄赋，魂游谢客诗。从今好文主，遗恨不同时。

象设存华馆，威仪下墓田。凤池伤旧草，麟史泣遗编。

帷盖墟烟没，干旌陇日悬。古来埋玉树，流恨满山川。

卷 87_28 【李工部挽歌三首】

张说

锦帐为郎日，金门待诏时。杨宫先上赋，柏殿几连诗。
瞬息琴歌断，凄凉箫挽悲。那堪霸陵岸，回首望京师。

宅兆西陵上，平生雅志从。城临丹阙近，山望白云重。
会葬知元伯，看碑识蔡邕。无由接神理，挥涕向青松。

常时好宾客，永日对弦歌。是日归泉下，伤心无奈何。
墓庭人已散，祭处鸟来处。碑石生苔藓，荣名岂复多。

卷 87_29 【赠工部尚书冯公挽歌三首】

张说

忠鯁难为事，平生尽畏途。如弦心自直，秀木势恒孤。
诏葬南陵道，神游北斗枢。贵门传万石，馀庆在双珠。

爵位题龙旆，威仪出凤城。路傍人泣送，门外马嘶迎。
万事非吾有，千悲是世情。昔焉称夏日，今也谥冬卿。

窅然长夜台，举世可哀哉。泉户一朝闭，松风四面来。
石碑填駁藓，珠服聚尘埃。谁言辽东鹤，千年往复回。

卷 87_30 【徐高御挽歌】

张说

蒲密遥千载，鸣琴始一追。公卿传世范，仁义续灵基。
不待南游禄，何先北帝期。玉棺从此闭，金鼎代相欺。

卷 87_31 【奉和圣制春日幸望春宫应制】

张说

别馆芳菲上苑东，飞花澹荡御筵红。城临渭水天河静，
阙对南山雨露通。绕殿流莺凡几树，当蹊乱蝶许多丛。
春园既醉心和乐，共识皇恩造化同。

卷 87_32 【侍宴隆庆池应制】

张说

灵池月满直城隈，黻帐天临御路开。东沼初阳疑吐出，
南山晓翠若浮来。鱼龙百戏纷容与，鳧鹄双舟较溯洄。

愿似金堤青草馥，长承瑶水白云杯。

卷 87_33 【奉和圣制春日出苑应制（一作瞩目应令，一作明皇诗）】

张说

禁林艳裔发青阳，春望逍遥出画堂。雨洗亭皋千亩绿，
风吹梅李一园香。鹤飞不去随青管，鱼跃翻来入彩航。
睿赏欢承天保定，遁文更睹日重光。

卷 87_34 【扈从温泉宫献诗】

张说

温泉后蛰气氛氲，渭浦归鸿日数群。骑仗联联环北极，
鸣笳步步引南熏。松间彩殿笼佳气，山上朱旗绕瑞云。
不知远梦华胥国，何如亲奉帝尧君。

卷 87_35 【三月三日诏宴定昆池宫庄赋得筵字】

张说

凤凰楼下对天泉，鹦鹉洲中匝管弦。旧识平阳佳丽地，

今逢上巳盛明年。舟将水动千寻日，幕共林横两岸烟。
不降玉人观禊饮，谁令醉舞拂宾筵。

卷 87_36 【先天应令】

张说

三阳丽景早芳辰，四序嘉园物候新。梅花百般障行路，
垂柳千条暗回津。鸟惊直为飞风叶，鱼跃都由怯岸人。
唯愿圣主南山寿，何愁不赏万年春。

卷 87_37 【舞马千秋万岁乐府词三首】

张说

金天诞圣千秋节，玉醴还分万寿觞。试听紫骝歌乐府，
何如騄骥舞华冈。连騫势出鱼龙变，躩蹀骄生鸟兽行。
岁岁相传指树日，翩翩来伴庆云翔。

圣皇至德与天齐，天马来仪自海西。腕足徐行拜两膝，
繁骄不进踏千蹄。髯髯奋鬣时蹲踏，鼓怒骧身忽上跻。
更有衔杯终宴曲，垂头掉尾醉如泥。

远听明君爱逸才，玉鞭金翅引龙媒。不因兹白人间有，
定是飞黄天上来。影弄日华相照耀，喷含云色且裴徊。

莫言阙下桃花舞，别有河中兰叶开。

卷 87_38 【同赵侍御巴陵早春作】

张说

江上春来早可观，巧将春物妒馀寒。水苔共绕留鸟石，
花鸟争开斗鸭栏。佩胜芳辰日渐暖，然灯美夜月初圆。
意随北雁云飞去，直待南州蕙草残。

卷 87_39 【灊湖山寺】

张说

空山寂历道心生，虚谷迢迢野鸟声。禅室从来尘外赏，
香台岂是世中情。云间东岭千寻出，树里南湖一片明。
若使巢由知此意，不将萝薜易簪缨。

卷 87_40 【幽州新岁作】

张说

去岁荆南梅似雪，今年蓟北雪如梅。共知人事何常定，
且喜年华去复来。边镇戍歌连夜动，京城燎火彻明开。
遥遥西向长安日，愿上南山寿一杯。

第八十八卷

卷 88_1 【扈从幸韦嗣立山庄应制】

张说

寒灰飞玉琯，汤井驻金輿。既得方明相，还寻大隗居。
悬泉珠贯下，列帐锦屏舒。骑远林逾密，笳繁谷自虚。
门旗堑复磴，殿幕裹通渠。舞凤迎公主，雕龙赋婕妤。
地幽天赏洽，酒乐御筵初。菲才叨侍从，连藻愧应徐。

卷 88_2 【奉和圣制喜雪应制】

张说

圣德与天同，封峦欲报功。诏书期日下，灵感应时通。
触石云呈瑞，含花雪告丰。积如沙照月，散似面从风。
舞集仙台上，歌流帝乐中。遥知百神喜，洒路待行宫。

卷 88_3 【奉和圣制寒食作应制】

张说

寒食春过半，花秣鸟复娇。从来禁火日，会接清明朝。
斗敌鸡殊胜，争球马绝调。晴空数云点，香树百风摇。
改木迎新燧，封田表旧烧。皇情爱嘉节，传曲与箫韶。

卷 88_4 【奉和圣制赐崔日知往潞州应制】

张说

圣情留曩镇，佳气翊兴王。增戟雄都府，高车转太常。
川横八练阔，山带五龙长。连帅初恩命，天人旧纪纲。
饯涂飞御藻，阖境自生光。明主征循吏，何年下凤凰。

卷 88_5 【春晚侍宴丽正殿探得开字】

张说

圣政惟稽古，宾门引上才。坊因购书立，殿为集贤开。
髦彦星辰下，仙章日月回。字如龙负出，韵是凤衔来。
庭柳馀春驻，宫莺早夏催。喜承芸阁宴，幸奉柏梁杯。

卷 88_6 【奉和圣制花萼楼下宴应制】

张说

万心翹乐宴，三舍缓昌时。山接夏云险，台留春日迟。
节移芳未歇，兴隔赏仍追。醉后传嘉惠，楼前舞圣慈。
皇恩与时合，天意若人期。故发前旬雨，新垂湛露诗。

卷 88_7 【奉和圣制度蒲关应制】

张说

蒲坂横临晋，华芝晓望秦。关城雄地险，桥路扼天津。
楼映行宫日，堤含宫树春。黄云随宝鼎，紫气逐真人。
东咏唐虞迹，西观周汉尘。山河非国宝，明主爱忠臣。

卷 88_8 【奉和圣制途经华岳应制】

张说

西岳镇皇京，中峰入太清。玉銮重岭应，缙骑薄云迎。
霁日悬高掌，寒空类削成。轩游会神处，汉幸望仙情。
旧庙青林古，新碑绿字生。群臣原封岱，还驾勒鸿名。

卷 88_9 【奉和圣制过王濬墓应制】

张说

牛斗三分国，龙骧一统年。智高宁受制，风急肯回船。
有策擒吴貉，无言让范宣。援孤因势屈，功重为谗偏。
旧迹灰尘散，枯坟故老传。百代逢明主，何辞死道边。

卷 88_10 【奉和圣制经河上公庙应制】

张说

河上无名老，知非汉代人。先探道德要，留待圣明辰。
玄妙为天下，清虚用谷神。化将和气一，风与太初邻。
灵庙观遗像，仙歌入至真。皇心齐万物，何处不同尘。

卷 88_11 【奉和圣制幸凤汤泉应制】

张说

周狩闻岐礼，秦都辨雍名。献禽天子孝，存老圣皇情。
温润宜冬幸，游畋乐岁成。汤云出水殿，暖气入山营。
坎意无私洁，乾心称物平。帝歌流乐府，溪谷也增荣。

卷 88_12 【恩赐乐游园宴】

张说

汉苑佳游地，轩庭近侍臣。共持荣幸日，来赏艳阳春。
饌玉颁王筐，摐金下帝钧。池台草色遍，宫观柳条新。
花绶光连榻，朱颜畅饮醇。圣朝多乐事，天意每随人。

卷 88_13 【三月二十日诏宴乐游园赋得风字】

张说

乐游形胜地，表里望郊宫。北阙连天顶，南山对掌中。
皇恩贷芳月，旬宴美成功。鱼戏芙蓉水，莺啼杨柳风。
春光看欲暮，天泽恋无穷。长袖招斜日，留光待曲终。

卷 88_14 【赴集贤院学士上赐宴应制得辉字】

张说

侍帝金华讲，千龄道固稀。位将贤士设，书共学徒归。
首命深燕隗，通经浅汉韦。列筵荣赐食，送客愧儒衣。
贺燕窥檐下，迁莺入殿飞。欲知朝野庆，文教日光辉。

卷 88_15 【端午三殿侍宴应制探得鱼字】

张说

小暑夏弦应，徽音商管初。愿赉长命缕，来续大恩馀。
三殿褰珠箔，群官上玉除。助阳尝麦麴，顺节进龟鱼。
甘露垂天酒，芝花捧御书。合丹同蚯蚓，灰骨共蟾蜍。
今日伤蛇意，衔珠遂阙如。

卷 88_16 【奉和圣制春中兴庆宫酺宴应制】

张说

千龄逢启圣，万域共来威。庆接郊禋后，酺承农事稀。
御楼横广路，天乐下重闱。鸾凤调歌曲，虹霓动舞衣。
合声云上聚，连步月中归。物睹恩无外，神和道入微。
镐京陪乐饮，柏殿奉文飞。徒竭秋云影，何资春日晖。

卷 88_17 【奉和圣制千秋节宴应制】

张说

五德生王者，千龄启圣人。赤光来照夜，黄云上覆晨。
海县衔恩久，朝章献舞新。高居帝座出，夹道众官陈。

槊杖洗清景，磬管凝秋旻。珠囊含瑞露，金镜抱仙轮。
何岁无乡饮，何田不报神。薰歌与名节，传代幸群臣。

卷 88_18 【奉和圣制太行山中言志应制】

张说

六龙鸣玉銮，九折步云端。河络南浮近，山经北上难。
羽仪映松雪，戈甲带春寒。百谷晨笳动，千岩晓仗攒。
皇心感韶节，敷藻念人安。既立省方馆，复建礼神坛。
扈跸参天老，承荣忝夏官。长勤百年意，思见一胜残。

卷 88_19 【奉和御制与宋璟源乾曜同日上官命宴东堂赐诗应制】

张说

大块熔群品，经生偶圣诗。猥承三事命，虚忝百僚师。
右揆谋华硕，前星傅重资。连骞求旧礼，滥典乐贤诗。
赐釜同荣拜，搢金宴宰司。菊花吹御酒，兰叶捧天词。
宝历休明盛，颓年晷漏衰。少留青史笔，未敢赤松期。

卷 88_20 【奉和圣制暇日与兄弟同游兴庆宫作应制】

张说

汉武横汾日，周王宴镐年。何如造区夏，复此睦亲贤。
巢凤新成阁，飞龙旧跃泉。棣华歌尚在，桐叶戏仍传。
禁籞氛埃隔，平台景物连。圣慈良有裕，王道固无偏。
问俗兆人阜，观风五教宣。献图开益地，张乐奏钧天。
侍酒衢樽满，询刍谏鼓悬。永言形友爱，万国共周旋。

卷 88_21 【奉和圣制送王峻巡边应制】

张说

六月歌周雅，三边遣夏卿。欲施攻战法，先作简稽行。
礼乐知谋帅，春秋识用兵。一劳堪定国，万里即长城。
策有和戎利，威传破虏名。军前雨洒道，楼上月临营。
别藻瑶华降，同衣锦褱荣。关山由义近，戎马为恩轻。
丝竹路傍散，风云马上生。朝廷谓吉甫，邦国望君平。

卷 88_22 【将赴朔方军应制】

张说

礼乐逢明主，韬铃用老臣。恭凭神武策，远御鬼方人。

供帐荣恩饯，山川喜诏巡。天文日月丽，朝赋管弦新。
幼志传三略，衰材谢六钧。胆由忠作伴，心固道为邻。
汉保河南地，胡清塞北尘。连年大军后，不日小康辰。
剑舞轻离别，歌酣忘苦辛。从来思博望，许国不谋身。

卷 88_23 【奉和圣制爰因巡省途次旧居应制】

张说

葱郁兴王郡，殷忧启圣图。周成会西土，汉武幸南都。
岁卜崑舆迈，农祠雁政敷。武威棱外域，文教靡中区。
警蹕干戈捧，朝宗万玉趋。旧藩人事革，新化国容殊。
壁有真龙画，庭馀鸣凤梧。丛觞祝尧寿，合鼎献汤厨。
阳乐寒初变，春恩蛰更苏。三耆颁命服，五稔复田输。
君赋大风起，人歌湛露濡。从臣观玉叶，方愿纪灵符。

卷 88_24 【宿直温泉宫羽林献诗】

张说

冬狩美秦正，新丰乐汉行。星陈玄武阁，月对羽林营。
寒木罗霜仗，空山响夜更。恩深灵液暖，节劲古松贞。
文武皆王事，轮心不为名。

卷 88_25 【玄武门侍射】

张说

射观通玄阙，兵栏辟御筵。雕弧月半上，画的晕重圆。
羿后神幽赞，灵王法暗传。贯心精四返，饮羽妙三联。
雪鹤来衔箭，星麟下集弦。一逢军宴洽，万庆武功宣。

卷 88_26 【扈从南出雀鼠谷】

张说

豫动三灵赞，时巡四海威。陕关凌曙出，平路半春归。
霍镇迎云罕，汾河送羽旂。山南柳半密，谷北草全稀。
迟日宜华盖，和风入袷衣。上林千里近，应见百花飞。

卷 88_27 【洛桥北亭诏饯诸刺史】

张说

离亭拂御沟，别曲舞船楼。诏饯朝廷牧，符分海县忧。
股肱还入郡，父母更临州。扇逐仁风转，车随霖雨流。
恩光水上溢，荣色柳间浮。预待群方最，三公不远求。

卷 88_28 【东都酺宴】

张说

尧舜传天下，同心致太平。吾君内举圣，远合至公情。
锡命承丕业，崇亲享大名。二天资广运，两曜益齐明。
道畅昆虫乐，恩深朽蠹荣。皇舆久西幸，留镇在东京。
合宴千官入，分曹百戏呈。乐来嫌景遽，酒著讶寒轻。
喜气连云阁，欢呼动洛城。人间知几代，今日见河清。

卷 88_29 【奉酬韦祭酒嗣立，偶游龙门北溪，忽怀骊山别业呈诸留守之作】

张说

石涧泉虚落，松崖路曲回。闻君北溪下，想像南山隈。
近念鼎湖别，遥思云嶂陪。不同奇觐往，空睹斯文来。
岁后寒初变，春前芳未开。黄蕤袅岸柳，紫萼折村梅。
尽室兹游玩，盈门几乐哉。嗟留洛阳陌，梦诣建章台。
野失巢由性，朝非元凯才。布怀钦远迹，幽意日尘埃。

卷 88_30 【奉酬韦祭酒自汤还都经龙门北溪庄见贻之作】

张说

闻君汤井至，潇洒憩郊林。拂曙携清赏，披云翫绿岑。
欢言游览意，款曲望归心。是日期佳客，同山忽异寻。
桃花迂路转，杨柳间门深。泛舟伊水涨，系马香树阴。
繁弦弄水族，娇吹狎沙禽。春满汀色媚，景斜岚气侵。
怀仁殊未远，重德匪专临。来藻敷幽思，连词报所钦。

卷 88_31 【酬崔光禄冬日述怀赠答】

张说

徐陈尝并作，枚马亦同时。各负当朝誉，俱承明主私。
夫君迈前侣，观国骋奇姿。山似鸣威凤，泉如出宝龟。
才雄子云笔，学广仲舒帷。紫绶拂三寺，朱门临九逵。
昔我含香日，联尔缙云司。朝携兰省步，夕退竹林期。
中路一分手，数载来何迟。求友还相得，群英复在兹。
留台少人务，方驾递寻追。涉玩怀同赏，沾芳忆共持。
迎宾南涧饮，载妓东城嬉。春郊绿亩秀，秋涧白云滋。
名画披人物，良书讨滞疑。兴来光不惜，欢往迹如遗。
岁晏罢行乐，层城间所思。夜魂灯处厌，朝发镜前衰。
忽枉崔駰什，兼流韦孟词。曲高弥寡和，主善代为师。
齐戒观华玉，留连叹色丝。终惭起予者，何足与言诗。

卷 88_32 【同刘给事城南宴集】

张说

水竹幽闲地，簪纓近侍臣。雍容乘暇日，潇洒出嚣尘。
树对思朋鸟，池深入养鳞。管弦高逐吹，歌舞妙含春。
老子叨专席，欢邀隔缙绅。此中情不浅，遥寄赏心人。

卷 88_33 【温泉冯刘二监客舍观妓】

张说

温谷寒林薄，群游乐事多。佳人蹀骏马，乘月夜相过。
秀色然红黛，娇香发绮罗。镜前鸾对舞，琴里凤传歌。
妒宠倾新意，衔恩奈老何。为君留上客，欢笑敛双蛾。

卷 88_34 【寄许八】

张说

万类春皆乐，徂颜独不怡。年来人更老，花发意先衰。
乳鹊穿坛画，巢蜂触网丝。平生美容色，宿昔影中疑。
远道何由梦，同心在者谁。西风欲谁语，惘默遂无词。

卷 88_35 【送苏合宫颢】

张说

都邑群方首，商泉旧俗讹。变风须恺悌，成化伫弦歌。
畴昔珪璋友，雍容文雅多。振缨游省闼，锵玉宰京河。
别曲鸾初下，行轩雉尚过。百壶非饯意，流咏在人和。

卷 88_36 【送乔安邑备】

张说

书阁移年岁，文明难复辞。欢言冬雪满，恨别夏云滋。
外尹方为政，高明自不欺。老人骖驭往，童子狎雏嬉。
日茂西河俗，寂寥东观期。遥怀秀才令，京洛见新诗。

卷 88_37 【送赵二尚书彦昭北伐】

张说

虏地河冰合，边城备此时。兵连紫塞路，将举白云司。
提剑荣中贵，衔珠盛出师。日华光组练，风色焰旌旗。
投笔尊前起，横戈马上辞。梅花吹别引，杨柳赋归诗。

卷 88_38 【石门别杨六钦望】

张说

燕人同窜越，万里自相哀。影响无期会，江山此地来。
暮年伤泛梗，累日慰寒灰。潮水东南落，浮云西北回。
俱看石门远，倚棹两悲哉。

卷 88_39 【南中送北使二首】

张说

传闻合蒲叶，曾向洛阳飞。何日南风至，还随北使归。
红颜渡岭歇，白首对秋衰。高歌何由见，层堂不可违。
谁怜炎海曲，泪尽血沾衣。

待罪居重译，穷愁暮雨秋。山临鬼门路，城绕瘴江流。
人事今如此，生涯尚可求。逢君入乡县，传我念京周。
别恨归途远，离言暮景遒。夷歌翻下泪，芦酒未消愁。
闻有胡兵急，深怀汉国羞。和亲先是诈，款塞果为雠。
释系应分爵，蠲徒几复侯。廉颇诚未老，孙叔且无谋。
若道冯唐事，皇恩尚可收。

卷 88_40 【送赵顺直郎中赴安西副大都督】

张说

绝镇功难立，悬军命匪轻。复承迁相后，弥重任贤情。
将起神仙地，才称礼乐英。长心堪系虏，短语足论兵。
日授休门法，星教置阵名。龙泉恩已著，燕颔相终成。
月窟穷天远，河源入塞清。老夫操别翰，承旨颂升平。

卷 88_41 【送宋休远之蜀任】

张说

求友殊损益，行道异穷申。缀我平生气，吐赠薄游人。
结恩事明主，忍爱远辞亲。色丽成都俗，膏腴蜀水滨。
如何从宦子，坚白共缁磷。日月千龄旦，河山万族春。
怀铅书瑞府，横草事边尘。不及安人吏，能令王化淳。

卷 88_42 【岳州别梁六入朝】

张说

远莅长沙渚，欣逢贾谊才。江山疲应接，风日复晴开。
江树云间断，湘山水上来。近洲朝鹭集，古戍夜猿哀。

岸杼含苍捫，河蒲秀紫台。月馀偏地赏，心尽故人杯。
自我违京洛，嗟君此溯洄。容华因别老，交旧与年颓。
梦见长安陌，朝宗实盛哉。

卷 88_43 【相州冬日早衙】

张说

城外宵钟敛，闺中曙火残。朝光曜庭雪，宿冻聚池寒。
正色临厅事，疑词定笔端。除苛圉圉息，伐枳吏人宽。
河内功犹浅，淮阳疾未安。镜中星发变，顿使世情阑。

卷 88_44 【岳州西城】

张说

水国何辽旷，风波遂极天。西江三纪合，南浦二湖连。
危堞临清境，烦忧暂豁然。九围观掌内，万象阅眸前。
日去长沙渚，山横云梦田。汀葭变秋色，津树入寒烟。
潜穴探灵诡，浮生揖圣仙。至今人不见，迹灭事空传。

卷 88_45 【岳州观竞渡】

张说

画作飞凫艇，双双竞拂流。低装山色变，急棹水华浮。
土尚三闾俗，江传二女游。齐歌迎孟姥，独舞送阳侯。
鼓发南湖溇，标争西驿楼。并驱常诧速，非畏日光遒。

卷 88_46 【对酒行巴陵作】

张说

留侯封万户，园令寿千金。本为成王业，初由赋上林。
繁荣安足恃，霜露递相寻。鸟哭楚山外，猿啼湘水阴。
梦中城阙近，天畔海云深。空对忘忧酌，离忧不去心。

卷 88_47 【岳州宴姚绍之】

张说

杞梓滞江滨，光华向日新。难兄金作友，媚子玉为人。
山水含秋兴，池亭借善邻。檐松风送静，院竹鸟来驯。
翠斝吹黄菊，雕盘鲙紫鳞。缓歌将醉舞，为拂绣衣尘。

卷 88_48 【岳州九日宴道观西阁】

张说

摇落长年叹，蹉跎远宦心。北风嘶代马，南浦宿阳禽。
佳此黄花酌，酣馀白首吟。凉云霾楚望，濛雨蔽荆岑。
登眺思清景，谁将眷浊阴。钓歌出江雾，樵唱入山林。
鱼以嘉名采，木为美材侵。大道由中悟，逍遥匪外寻。
参佐多君子，词华妙赏音。留题洞庭观，望古意何深。

卷 88_49 【岳州作】

张说

水国生秋草，离居再及瓜。山川临洞穴，风日望长沙。
物土南州异，关河北信赊。日昏闻怪鸟，地热见修蛇。
远人梦归路，瘦马嘶去家。正有江潭月，徘徊恋九华。

卷 88_50 【游洞庭湖】

张说

平湖晓望分，仙峤气氛氲。鼓枻乘清渚，寻峰弄白云。
江寒天一色，日静水重纹。树坐参猿啸，沙行入鹭群。

缘源斑筱密，冒径绿萝纷。洞穴传虚应，枫林觉自熏。
双童有灵药，愿取献明君。

卷 88_51 【巴丘春作】

张说

日出洞庭水，春山挂断霞。江湾相映发，卉木共纷华。
湘戍南浮阔，荆关北望赊。湖阴窥魍魎，丘势辨巴蛇。
岛户巢为馆，渔人艇作家。自怜心问景，三岁客长沙。

卷 88_52 【岳州夜坐】

张说

炎洲苦三伏，永日卧孤城。赖此闲庭夜，萧条夜月明。
独歌还太息，幽感见馀声。江近鹤时叫，山深猿屡鸣。
息心观有欲，弃知返无名。五十知天命，吾其达此生。

卷 88_53 【别灊湖】

张说

念别灊湖去，浮舟更一临。千峰出浪险，万木抱烟深。

南郡延恩渥，东山恋宿心。露花香欲醉，时鸟啭馀音。
涉趣皆留赏，无奇不遍寻。莫言山水间，幽意在鸣琴。

卷 88_54 【伯奴边见归田赋因投赵侍御】

张说

尔家叹穷鸟，吾族赋归田。莫道荣枯异，同嗟世网牵。
黄陵浮汨渚，青草会湘川。去国逾三岁，兹山老二年。
寒鸦鸣舍下，昏虎卧篱前。客泪堪斑竹，离亭欲赠荃。
放言久无次，触兴感成篇。

卷 88_55 【清远江峡山寺】

张说

流落经荒处，逍遥此梵宫。云峰吐月白，石壁淡烟红。
宝塔灵仙涌，悬龕造化功。天香涵竹气，虚呗引松风。
檐牖飞花入，廊房激水通。猿鸣知谷静，鱼戏辨江空。
静默将何贵，惟应心境同。

卷 88_56 【春雨早雷】

张说

东北春风至，飘飘带雨来。拂黄先变柳，点素早惊梅。
树蔼悬书阁，烟含作赋台。河鱼未上冻，江蛰已闻雷。
美人宵梦著，金屏曙不开。无缘一启齿，空酌万年杯。

卷 88_57 【闻雨】

张说

穷冬万花匝，永夜百忧攒。危戍临江火，空斋入雨寒。
断猿知屡别，嘶雁觉虚弹。心对炉灰死，颜随庭树残。
旧恩怀未报，倾胆镜中看。

卷 88_58 【赦归在道中作】

张说

陈焦心息尽，死意不期生。何幸光华旦，流人归上京。
愁将网共解，服与代俱明。复是三阶正，还逢四海平。
谁能定礼乐，为国著功成。

卷 88_59 【喜度岭】

张说

东汉兴唐历，南河复禹谋。宁知瘴疠地，生入帝皇州。
雷雨苏虫蛰，春阳放鸟鸠。洄沿炎海畔，登降闽山陬。
岭路分中夏，川源得上流。见花便独笑，看草即忘忧。
自始居重译，天星已再周。乡关绝归望，亲戚不相求。
弃杖枯还植，穷鳞涸更浮。道消黄鹤去，运后白驹留。
江妾晨炊黍，津童夜棹舟。盛明良可遇，莫后洛城游。

第八十九卷

卷 89_1 【奉和圣制潼关口号应制】

张说

天德平无外，关门东复西。不将千里隔，何用一丸泥。

卷 89_2 【奉萧令嵩酒并诗（已下三首，俱赐宴东堂作）】

张说

乐奏天恩满，杯来秋兴高。更蒙萧相国，对席饮醇醪。

卷 89_3 【奉宇文黄门融酒】

张说

圣德垂甘露，天章下大风。又乘黄阁赏，愿作黑头公。

卷 89_4 【奉裴中书光庭酒】

张说

西掖恩华降，南宫命席阑。讵知鸡树后，更接凤池欢。

卷 89_5 【清夜酌】

张说

秋阴士多感，雨息夜无尘。清樽宜明月，复有平生人。

卷 89_6 【醉中作】

张说

醉后乐无极，弥胜未醉时。动容皆是舞，出语总成诗。

卷 89_7 【送梁知微渡海东】

张说

今日此相送，明年此相待。天上客星回，知君渡东海。

卷 89_8 【寄刘道士鵙】

张说

真人降紫气，邀我丹田宫。远寄双飞鵙，飞飞不碍空。

卷 89_9 【书香能和尚塔】

张说

大师捐世去，空馀法力在。远寄无碍香，心随到南海。

卷 89_10 【被使在蜀】

张说

即今三伏尽，尚自在临邛。归途千里外，秋月定相逢。

卷 89_11 【正朝摘梅】

张说

蜀地寒犹暖，正朝发早梅。偏惊万里客，已复一年来。

卷 89_12 【蜀道后期】

张说

客心争日月，来往预期程。秋风不相待，先至洛阳城。

卷 89_13 【广州江中作】

张说

去国年方晏，愁心转不堪。离人与江水，终日向西南。

卷 89_14 【江中诵经】

张说

实相归悬解，虚心暗在通。澄江明月内，应是色成空。

卷 89_15 【江中遇黄领子刘隆】

张说

危石江中起，孤云岭上还。相逢皆得意，何处是乡关。

卷 89_16 【钦州守岁】

张说

故岁今宵尽，新年明旦来。愁心随斗柄，东北望春回。

卷 89_17 【岳州守岁二首】

张说

夜风吹醉舞，庭户对酣歌。愁逐前年少，欢迎今岁多。

桃枝堪辟恶，爆竹好惊眠。歌舞留今夕，犹言惜旧年。

卷 89_18 【元朝（一作幽州元日）】

张说

今岁元日乐，不谢往年春。知向来心道，谁为昨夜人。

卷 89_19 【耗磨日饮二首】

张说

耗磨传兹日，纵横道未宜。但令不忌醉，翻是乐无为。

上月今朝减，流传耗磨辰。还将不事事，同醉俗中人。

卷 89_20 【又（一本此首同前第一首为二首）】

张说

春来半月度，俗忌一时闲。不酌他乡酒，惟堪对楚山。

卷 89_21 【九日进茱萸山诗五首】

张说

家居洛阳下，举目见嵩山。刻作茱萸节，情生造化间。

黄花宜泛酒，青岳好登高。稽首明廷内，心为天下劳。

菊酒携山客，萸囊系牧童。路疑随大隗，心似问鸿蒙。

九日重阳数，三秋万实成。时来谒轩后，罢去坐蓬瀛。

晚节欢重九，高山上五千。醉中知遇圣，梦里见寻仙。

卷 89_22 【岳州看黄叶】

张说

白首看黄叶，徂颜复几何。空惭棠树下，不见政成歌。

卷 89_23 【岭南送使二首】

张说

狱中生白发，岭外罢红颜。古来相送处，凡得几人还。

万里投荒裔，来时不见亲。一朝成白首，看取报家人。

卷 89_24 【伤妓人董氏四首】

张说

董氏娇娆性，多为窈窕名。人随秋月落，韵入捣衣声。

粉蕊粘妆簏，金花竭翠条。夜台无戏伴，魂影向谁娇。

旧亭红粉阁，宿处白云关。春日双飞去，秋风独不还。

舞席沾残粉，歌梁委旧尘。独伤窗里月，不见帐中人。

卷 89_25 【三月闺怨】

张说

三月时将尽，空房妾独居。蛾眉愁自结，鬓发没情梳。

卷 89_26 【破陈乐词二首】

张说

汉兵出顿金微，照日光明铁衣。百里火幡焰焰，
千行云骑霏霏。蹙踏辽河自竭，鼓噪燕山可飞。
正属四方朝贺，端知万舞皇威。

少年胆气凌云，共许骁雄出群。匹马城西挑战，
单刀蓟北从军。一鼓鲜卑送款，五饵单于解纷。
誓欲成名报国，羞将开阁论勋。

卷 89_27 【舞马词六首】

张说

万玉朝宗凤展，千金率领龙媒。昞鼓凝骄躩蹀，
听歌弄影徘徊。（圣代升平乐）

天鹿遥征卫叔，日龙上借羲和。将共两骖争舞，
来随八骏齐歌。（圣代升平乐）

彩旄八佾成行，时龙五色因方。屈膝衔杯赴节，
倾心献寿无疆。（四海和平乐）

帝皂龙驹沛艾，星兰骥子权奇。腾倚骧洋应节，
繁骄接迹不移。（四海和平乐）

二圣先天合德，群灵率土可封。击石骖驔紫燕，
撝金顾步苍龙。（四海和平乐）

圣君出震应策，神马浮河献图。足踏天庭鼓舞，
心将帝乐踟蹰。（四海和平乐）

卷 89_28 【奉和三日祓禊渭滨应制】

张说

青郊上巳艳阳年，紫禁皇游祓渭川。
幸得欢娱承湛露，心同草树乐春天。

卷 89_29 【桃花园马上应制】

张说

林间艳色骄天马，苑里秾华伴丽人。
愿逐南风飞帝席，年年含笑舞青春。

卷 89_30 【奉和圣制幸韦嗣立山庄应制】

张说

西京上相出扶阳，东郊别业好池塘。
自非仁智符天赏，安能日月共回光。

卷 89_31 【奉和圣制同玉真公主游大哥山池题石壁】

张说

池如明镜月华开，山学香炉云气来。
神藻飞为鹄鹄赋，仙声飏出凤凰台。

卷 89_32 【十五日夜御前口号踏歌词二首】

张说

花萼楼前雨露新，长安城里太平人。
龙衔火树千重焰，鸡踏莲花万岁春。

帝宫三五戏春台，行雨流风莫妒来。
西域灯轮千影合，东华金阙万重开。

卷 89_33 【苏摩遮五首（亿岁乐）】

张说

摩遮本出海西胡，琉璃宝服紫髯胡。
闻道皇恩遍宇宙，来将歌舞助欢娱。
绣装帕额宝花冠，夷歌骑舞借人看。

自能激水成阴气，不虑今年寒不寒。

腊月凝阴积帝台，豪歌急鼓送寒来。
油囊取得天河水，将添上寿万年杯。

寒气宜人最可怜，故将寒水散庭前。
惟愿圣君无限寿，长取新年续旧年。

昭成皇后帝家亲，荣乐诸人不比伦。
往日霜前花委地，今年雪后树逢春。

卷 89_34 【三月三日定昆池奉和萧令得潭字韵】

张说

暮春三月日重三，春水桃花满禊潭。
广乐逶迤天上下，仙舟摇衍镜中酣。

卷 89_35 【和尹从事懋泛洞庭】

张说

平湖一望上连天，林景千寻下洞泉。
忽惊水上光华满，疑是乘舟到日边。

卷 89_36 【送梁六自洞庭山作】

张说

巴陵一望洞庭秋，日见孤峰水上浮。
闻道神仙不可接，心随湖水共悠悠。

卷 89_37 【同赵侍御望归舟】

张说

山庭迢迢面长川，江树重重极远烟。
形影相追高翥鸟，心肠并断北风船。

卷 89_38 【襄阳路逢寒食】

张说

去年寒食洞庭波，今年寒食襄阳路。
不辞著处寻山水，只畏还家落春暮。

第九十卷

卷 90_1 【和尹懋登南楼】

张均

客来已两春，更瞻韶光早。花鸟既环合，江山复骈抱。
楼形写北潭，堞势凌青岛。白云谢归雁，驰怀洛阳道。

卷 90_2 【江上逢春】

张均

离忧耿未和，春虑忽蹉跎。择木猿知去，寻泥燕独过。
惊花翻霁日，垂柳拂烟波。激意屡怡赏，无如乡念何。

卷 90_3 【九日巴丘登高】

张均

客心惊暮序，宾雁下沧洲。共赏重阳节，言寻戏马游。

湖风扶戍柳，江雨暗山楼。且酌东篱酒，聊祛南国忧。

卷 90_4 【和尹懋秋夜游澱湖二首】

张均

远水沉西日，寒沙聚夜鸥。平湖乘月满，飞棹接星流。
黄叶鸣凄吹，苍葭扫暗洲。愿移沧浦赏，归待颍川游。

湾潭幽意深，杳霭涌寒岑。石痕秋水落，岚气夕阳沉。
澄彻天为底，渊玄月作心。青溪非大隐，归弄白云寻。

卷 90_5 【岳阳晚景（一作父说诗）】

张均

晚景寒鸦集，秋风旅雁归。水光浮日出，霞彩映江飞。
洲白芦花吐，园红柿叶稀。长沙卑湿地，九月未成衣。

卷 90_6 【流合浦岭外作】

张均

瘴江西去火为山，炎徼南穷鬼作关。

从此更投入境外，生涯应在有无间。

卷 90_7 【奉和岳州山城（一作张均诗）】

张洎

郡馆临清赏，开扃坐白云。讼虚棠户曙，观静竹檐曛。
悬榻迎宾下，趋庭学礼闻。风传琴上意，遥向日华纷。

第九十一卷

卷 91_1 【偶游龙门北溪，忽怀骊山别业因以言志示弟淑
奉呈诸大僚】

韦嗣立

幽谷杜陵边，风烟别几年。偶来伊水曲，溪嶂觉依然。
傍浦怜芳树，寻崖爱绿泉。岭云随马足，山鸟向人前。
地合心俱静，言因理自玄。短才叨重寄，尸禄愧妨贤。
每挹挂冠侣，思从初服旋。稻粱仍欲报，岁月坐空捐。
助岳无纤块，输溟谢末涓。还悟北辕失，方求南涧田。

卷 91_2 【奉和九日幸临渭亭登高应制得深字】

韦嗣立

层观远沈沈，鸾旗九日临。帷宫压水岸，步辇入烟岑。
枝上萸新采，樽中菊始斟。愿陪欢乐事，长与岁时深。

卷 91_3 【奉和张岳州王潭州别诗二首】

韦嗣立

茂先王佐才，作牧楚江隈。登楼正欲赋，复遇仲宣来。
黄鹄飞将远，雕龙文为开。宁知昔联事，听曲有馀哀。

昔时陪二贤，纓冕会神仙。一去驰江海，相逢共播迁。
无因千里驾，忽睹四愁篇。览讽欢何已，欢终徒怆然。

卷 91_4 【奉和初春幸太平公主南庄应制】

韦嗣立

主第岩扃架鹊桥，天门阊阖降鸾镳。历乱旌旗转云树，
参差台榭入烟霄。林间花杂平阳舞，谷里莺和弄玉箫。
已陪沁水追欢日，行奉茅山访道朝。

卷 91_5 【自汤还都经龙门北溪，赠张左丞崔礼部崔光禄】

韦嗣立

栖闲有愚谷，好事枉朝轩。树接前驱拥，岩传后骑喧。
褰帘出野院，植杖候柴门。既拂林下席，仍携池上樽。

深期契幽赏，实谓展欢言。未眷诚未易，佳游时更敦。
俄看啸俦侣，各已共飞翫。延睇尽朝日，长怀通夜魂。
空闻岸竹动，徒见浦花繁。多愧春莺曲，相求意独存。

卷 91_6 【酬崔光禄冬日述怀赠答】

韦嗣立

亭伯负高名，羽仪称上京。魏珠能烛乘，秦璧许连城。
六月飞将远，三冬学已精。洛阳推贾谊，江夏贵黄琼。
推演中都术，旋参河尹声。累迁登御府，移拜践名卿。
庭聚歌钟丽，门罗棨戟荣。鹦杯飞广席，兽火列前楹。
散诞林园意，殷勤敬爱情。无容抱衰疾，良宴每招迎。
契得心逾重，言忘道益真。相勸忠义节，共谈词赋英。
雕虫曾靡弃，白凤已先鸣。光接神愈骇，音来味不成。
短歌甘自思，鸿藻弥难清。东里方希润，西河敢窃明。
厚诬空见迫，丧德岂无诚。端守宫闈地，寒烟朝暮平。
顾才无术浅，怀器识忧盈。月下对云阙，风前闻夜更。
昌年虽共偶，欢会此难并。为怜漳浦曲，沉痾有刘桢。

卷 91_7 【上巳日祓禊渭滨应制】

韦嗣立

乘春祓禊逐风光，扈跸陪銮渭渚傍。

还笑当时水滨老，衰年八十待文王。

卷 91_8 【奉酬韦祭酒偶游龙门北溪，忽怀骊山别业，因以言志示弟淑奉呈诸大僚之作】

魏奉古

有美朝为贵，幽寻地自偏。践临伊水汭，想望灞池边。
是遇皆新赏，兹游若旧年。藤萝隐路接，杨柳御沟联。
道惬神情王，机忘俗理捐。遂初诚已重，兼济实为贤。
迹是东山恋，心惟北阙悬。顾惭经拾紫，多谢赋思玄。
未躡中林步，空承丽藻传。阳春和已寡，扣寂竟徒然。

卷 91_9 【奉酬韦祭酒偶游龙门北溪，忽怀骊山别山，因以言志，示弟淑并呈大僚之作】

崔日知

夙龄秉微尚，中年忽有邻。以兹山水癖，遂得狎通人。
迨我咸京道，闻君别业新。岩前窥石镜，河畔踏芳茵。
既怜伊浦绿，复忆灞池春。连词谢家子，同欢冀野宾。
趣闲鱼共乐，情洽鸟来驯。讵念昔游者，只命独留秦。
萧条颖阳恋，冲漠汉阴真。无由陪胜躅，空此玩书筠。

卷 91_10 【冬日述怀奉呈韦祭酒张左丞兰台名贤】

崔日知

弱龄好经籍，披卷即怡然。覃精四十载，驰骋数千言。
孔壁采遗篆，周韦考绝编。袁公论剑术，孙子叙兵篇。
鲁史君臣道，姬书日月悬。从师改炎燠，负笈遍山川。
上异西河夏，中非北海玄。光荣拾青紫，名价接通贤。
既重万钟乐，宁思二顷田。长戟同分虎，高冠亚附蝉。
晚怀重虚旷，养志息雕镌。登高惭思拙，匠物谢情妍。
不慕张平子，宁希王仲宣。谁谓登龙日，翻成刻鹄年。
循循劳善诱，轧轧思微牵。琢磨才既竭，钻仰德弥坚。
朽木诚为谕，扞心徒自怜。终期吞鸟梦，振翼上云烟。
赋成先掷地，词高直掞天。更执枢衣礼，仍开函丈筵。
雾披槐市蔼，水静璧池圆。愿逐从风叶，飞舞翰林前。

卷 91_11 【奉酬韦嗣立祭酒偶游龙门北溪，忽怀骊山别业，因以言志示弟淑奉呈诸大僚之作】

崔泰之

关塞临伊水，骊山枕灞川。俱临隐路侧，同在帝城边。
谢公兼出处，携妓玩林泉。鸣驺喷梅雪，飞盖曳松烟。
闻琴幽谷里，看弈古岩前。落日低帟帐，归云绕管弦。
叨荣惭北阙，微尚爱东田。寂寞灰心尽，萧条尘事捐。

朝思登崭绝，夜梦弄潺湲。宿怀南涧意，况睹北溪篇。

卷 91_12 【同光禄弟冬日述怀】

崔泰之

吾族白眉良，才华动洛阳。观光初入仕，应宿始为郎。
飞萤玩书籍，白凤吐文章。海卿逾往雅，河尹冠前张。
择才绥鄢郢，殊化被江湘。高楼临广陌，甲第敞通庄。
列馆邙山下，疏亭洛水傍。昌年赏丰陌，暇日悦林塘。
衣冠皆秀彦，罗绮尽名倡。隔岸闻歌度，临池见舞行。
门庭寒变色，桀戟日生光。穷阴方叆叇，杀气正苍茫。
感时兴盛作，晚岁共多伤。积德韦丞相，通神张子房。
吟草遍簪绂，逸韵合宫商。功名守留省，滥迹在文昌。
家园遥可见，台寺近相望。无庸乘侍谒，有暇共翱翔。
棣华依雁序，竹叶拂鸾觞。水坐怜秋月，山行弄晚芳。
恩华惭服冕，友爱勖垂堂。无由报天德，相顾咏时康。

卷 91_13 【奉和圣制送张尚书巡边】

崔泰之

南庭胡运尽，北斗将星飞。旗鼓临沙漠，旌旄出洛畿。
关山绕玉塞，烽火映金微。屡献帷谋策，频承庙胜威。
蹀躞临河骑，逶迤度陇旂。地脉平千古，天声振九围。

车马生边气，戈鋌驻落晖。夏近蓬犹转，秋深草木腓。
饯送纡天什，恩荣赐御衣。伫勒燕然颂，鸣驺计日归。

卷 91_14 【春夜寓直凤阁怀群公（一本题上有和中书侍郎
杨再思）】

魏知古

拜门传漏晚，寓直索居时。昔重安仁赋，今称伯玉诗。
鸳池满不溢，鸡树久逾滋。夙夜怀山甫，清风咏所思。

卷 91_15 【奉和春日途中喜雨应诏】

魏知古

皇舆向洛城，时雨应天行。丽日登岩送，阴云出野迎。
濯枝林杏发，润叶渚蒲生。丝入纶言喜，花依锦字明。
微臣忝东观，载笔伫西成。

卷 91_16 【从猎渭川献诗】

魏知古

尝闻夏太康，五弟训禽荒。我后来冬狩，三驱盛礼张。

顺时鹰隼击，讲事武功扬。奔走未及去，翺飞岂暇翔。
非熊从渭水，瑞翟想陈仓。此欲诚难纵，兹游不可常。
子云陈羽猎，僖伯谏渔棠。得失鉴齐楚，仁思念禹汤。
雍熙亮在宥，亭毒匪多伤。辛甲今为史，虞箴遂孔彰。

卷 91_17 【玄元观寻李先生不遇】

魏知古

羽客今何在，空寻伊洛间。忽闻归苦县，复想入函关。
未作千年别，犹应七日还。神仙不可见，寂寞返蓬山。

第九十二卷

卷 92_1 【招谕有怀赠同行人（一作李义府诗）】

李义

远游冒艰阻，深入劳存谕。春去辞国门，秋还在边戍。
轩车行未返，节序催难驻。陌上悲转蓬，园中想芳树。
蜀山自纷纠，岷水恒奔注。临泛多苦怀，登攀寡欢趣。
永夕飞淫雨，崇朝蒸毒雾。不求绥岭桃，宁美邛乡蒟。
白浪行欲静，骢马何尝驱。愿接貂旆尘，联翩东北鹜。

卷 92_2 【春日侍宴芙蓉园应制】

李义

水殿临丹簾，山楼绕翠微。昔游人托乘，今幸帝垂衣。
涧簾缘峰合，岩花逗浦飞。朝来江曲地，无处不光辉。

卷 92_3 【奉和登骊山高顶寓目应制】

李义

崖巘万寻悬，居高敞御筵。行戈疑驻日，步辇若登天。
城阙雾中近，关河云外连。谬陪登岱驾，欣奉济汾篇。

卷 92_4 【奉和七夕两仪殿会宴应制】

李义

桂宫明月夜，兰殿起秋风。云汉弥年阻，星筵此夕同。
倏来疑有处，旋去已成空。睿作钧天响，魂飞在梦中。

卷 92_5 【奉和春日游苑喜雨应诏】

李义

仙跸九成台，香筵万寿杯。一旬初降雨，二月早闻雷。
叶向朝霏密，花含宿润开。幸承天泽豫，无使日光催。

卷 92_6 【奉和人日清晖阁宴群臣遇雪应制】

李义

上日登楼赏，中天御辇飞。后庭联舞唱，前席仰恩辉。
睿作风云起，农祥雨雪霏。幸陪人胜节，长愿奉垂衣。

卷 92_7 【陪幸临渭亭遇雪应制】

李义

青阳御紫微，白雪下彤闱。浹壤流天霏，绵区洒帝辉。
水如银度烛，云似玉披衣。为得因风起，还来就日飞。

卷 92_8 【奉和九日侍宴应制得浓字】

李义

望幸纡千乘，登高自九重。台疑临戏马，殿似接疏龙。
捧篋萸香遍，称觞菊气浓。更看仙鹤舞，来此庆时雍。

卷 92_9 【送沙门弘景道俊玄奘还荆州应制】

李义

初日承归旨，秋风起赠言。汉珠留道味，江璧返真源。
地出南关远，天回北斗尊。宁知一柱观，却后四禅门。

卷 92_10 【奉和九月九日登慈恩寺浮图应制】

李义

涌塔临玄地，高层瞰紫微。鸣銮陪帝出，攀橑翊天飞。
庆洽重阳寿，文含列象辉。小臣叨载笔，欣此倾巍巍。

卷 92_11 【闰九月九日幸总持寺登浮图应制】

李义

清跸幸禅楼，前驱历御沟。还疑九日豫，更想六年游。
圣藻辉纓络，仙花缀冕旒。所欣延亿载，寄祗庆重秋。

卷 92_12 【侍宴长宁公主东庄应制】

李义

紫禁乘宵动，青门访水嬉。贵游鱣序集，仙女凤楼期。
合宴簪绅满，承恩雨露滋。北辰还捧日，东馆幸逢时。

卷 92_13 【幸白鹿观应制】

李义

制跸乘骊阜，回輿指凤京。南山四皓谒，西岳两童迎。
云幄临悬圃，霞杯荐赤城。神明近兹地，何必往蓬瀛。

卷 92_14 【次苏州】

李义

洛渚问吴潮，吴门想洛桥。夕烟杨柳岸，春水木兰桡。
城邑南楼近，星辰北斗遥。无因生羽翼，轻举托还飙。

卷 92_15 【寄胡皓时在南中】

李义

徭役苦流滞，风波限溯洄。江流通地骨，山道绕天台。
有鸟图南去，无人见北来。闭门沧海曲，云雾待君开。

卷 92_16 【饯许州宋司马赴任】

李义

展骥旌时杰，谈鸡美代贤。暂离仙掖务，追送近郊筵。
地惨金商节，人康璧假田。从来昆友事，咸以佩刀传。

卷 92_17 【饯唐州高使君赴任】

李义

淮源之水清，可以濯君缨。彼美称才杰，亲人伫政声。
岁寒畴曩意，春晚别离情。终叹临岐远，行看拥传荣。

卷 92_18 【哭仆射鄂公杨再思】

李义

端揆凝邦绩，台阶闡国猷。方崇大厦栋，忽逝巨川舟。
白日铭安在，清风颂独留。死生恩命毕，零落掩山丘。

卷 92_19 【故赵王属赠黄门侍郎上官公挽词】

李义

暮归泉壤隔，朝发城池恋。汉旆结愁阴，秦陵下悲霰。
駉駉百驷驰，悯悯群龙饯。石马徒自施，玉人终不见。

卷 92_20 【淮阳公主挽歌】

李义

玉颜生汉渚，汤沐荣天女。金缕化邛尘，哀荣感路人。
凤凰曾作伴，蝼蚁忽为亲。畴日成蹊处，秣华不复春。

卷 92_21 【故西台侍郎上官公挽歌】

李义

宇内文儒重，朝端礼命优。立言多启沃，论道盛谋猷。
顾日琴安在，术星剑不留。徒怀东武櫓，更掩北原丘。

卷 92_22 【高安公主挽歌二首】

李义

汤沐三千赋，楼台十二重。银炉称贵幸，玉辇盛过逢。
嫔则留中馈，娥辉没下春。平阳百岁后，歌舞为谁容。

宾卫俨相依，横门启曙扉。灵阴蟾兔缺，仙影凤凰飞。
一水秋难渡，三泉夜不归。况临青女节，瑶草更前衰。

卷 92_23 【奉和初春幸太平公主南庄应制】

李义

平阳馆外有仙家，沁水园中好物华。地出东郊回日御，
城临南斗度云车。风泉韵绕幽林竹，雨霰光摇杂树花。
已庆时来千亿寿，还言日暮九重赊。

卷 92_24 【兴庆池侍宴应制】

李义

神池泛滥水盈科，仙跸纡徐步辇过。纵棹洄沿萍溜合，
开轩眺赏麦风和。潭鱼在藻供游咏，谷鸟含樱入赋歌。
寄语乘槎溟海客，回头来此问天河。

卷 92_25 【侍宴安乐公主山庄应制】

李义

金舆玉辇背三条，水阁山楼望九霄。野外初迷七圣道，
河边忽睹二灵桥。悬冰滴滴依虬箭，清吹冷冷杂凤箫。
回晚平阳歌舞合，前溪更转木兰桡。

卷 92_26 【奉和春日幸望春宫应制】

李义

东城结宇敞千寻，北阙回舆具四临。丽日祥烟承罕毕，
轻黄弱草籍衣簪。秦商重沓云岩近，河渭萦纡雾壑深。
谬接鹓鸿陪赏乐，还欣鱼鸟遂飞沉。

卷 92_27 【人日重宴大明宫恩赐彩缕人胜应制】

李义

诘旦行春上苑中，凭高却下大明宫。千年执象寰瀛泰，
七日为人庆赏隆。铁凤曾镌摇瑞雪，铜乌细转入祥风。
此时朝野欢无算，此岁云天乐未穷。

卷 92_28 【享龙池乐第八章】

李义

星分邑里四人居，水洊源流万顷馀。魏国君王称象处，
晋家蕃邸化龙初。青蒲暂似游梁马，绿藻还疑宴镐鱼。
自有神灵滋液地，年年云物史官书。

卷 92_29 【奉和幸礼部尚书窦希玠宅应制（一作陪幸五王宅）】

李义

家住千门侧，亭临二水傍。贵游开北地，宸眷幸西乡。
曳履迎中谷，鸣丝出后堂。浦疑观万象，峰似驻三光。
草向琼筵乐，花承绣展香。圣情思旧重，留饮赋雕章。

卷 92_30 【奉和晦日幸昆明池应制】

李义

玉辂寻春赏，金堤重晦游。川通黑水浸，地派紫泉流。
晃朗扶桑出，绵联杞树周。乌疑填海处，人似隔河秋。
劫尽灰犹识，年移石故留。汀洲归棹晚，箫鼓杂汾讴。

卷 92_31 【奉和幸长安故城未央宫应制】

李义

凤辇乘春陌，龙山访故台。北宫才尽处，南斗独昭回。
肆览飞宸札，称觞引御杯。已观蓬海变，谁厌柏梁灾。
代挹孙通礼，朝称贾谊才。忝侪文雅地，先后各时来。

卷 92_32 【陪幸韦嗣立山庄应制（一作宋之问诗）】

李义

挹掖调梅暇，林园种槿初。入朝荣剑履，退食偶琴书。
地隐东岩室，天回北斗车。旌门临窈窕，辇道属扶疏。
云罕明丹谷，霜笳彻紫虚。水疑投石处，溪似钓璜馀。
帝泽频卮酒，人欢颂里闾。一承黄竹咏，长奉白茆居。

卷 92_33 【奉和幸望春宫送朔方军大总管张仁亶】

李义

边郊草具腓，河塞有兵机。上宰调梅寄，元戎细柳威。
武貔东道出，鹰隼北庭飞。玉匣谋中野，金舆下太微。
投醪衔饯酌，缉衮事征衣。勿谓公孙老，行闻奏凯归。

卷 92_34 【奉和幸三会寺应制】

李义

睿德总无边，神皋择胜缘。二仪齐法驾，三会礼香筵。
汉阙中黄近，秦山太白连。台疑观鸟日，池似刻鲸年。
满月临真境，秋风入御弦。小臣叨下列，持管谬窥天。

卷 92_35 【奉和幸大荐福寺（幸即中宗旧宅）】

李义

象设隆新宇，龙潜想旧居。碧楼披玉额，丹仗导金舆。
代日兴光近，周星掩曜初。空歌清沛筑，梵乐奏胡书。
帝造环三界，天文贲六虚。康哉孝理日，崇德在真如。

卷 92_36 【夏日都门送司马员外逸客孙员外侄北征】

李义

日逐滋南寇，天威抚北垂。析珪行仗节，持印且分麾。
羽檄双凫去，兵车驷马驰。虎旗悬气色，龙剑抱雄雌。
候月期戡翦，经时念别离。坐闻关陇外，无复引弓儿。

卷 92_37 【元日恩赐柏叶应制（景龙四年）】

李义

劲节凌冬劲，芳心待岁芳。能令人益寿，非止麝含香。

卷 92_38 【侍宴桃花园咏桃花应制】

李义

绮萼成蹊遍縠芳，红英扑地满筵香。
莫将秋宴传王母，来比春华奉圣皇。

卷 92_39 【奉和三日祓禊渭滨】

李义

上林花鸟暮春时，上巳陪游乐在兹。
此日欣逢临渭赏，昔年空道济汾词。

卷 92_40 【奉和幸韦嗣立山庄侍宴应制】

李义

曲榭回廊绕涧幽，飞泉喷下溢池流。
祇应感发明王梦，遂得邀迎圣帝游。

卷 92_41 【侍宴安乐公主新宅应制】

李义

牵牛南渡象昭回，学凤楼成帝女来。
平旦鹑鸪歌舞席，方宵鹦鹉献酬杯。

卷 92_42 【饯唐永昌】

李义

田郎才貌出咸京，潘子文华向洛城。
愿以深心留善政，当令强项谢高名。

第九十三卷

卷 93_1 【九日幸临渭亭登高应制得开字】

卢藏用

上月重阳满，中天万乘来。萸依佩里发，菊向酒边开。
圣泽烟云动，宸文象纬回。小臣无以答，愿奉亿千杯。

卷 93_2 【奉和九月九日登慈恩寺浮图应制】

卢藏用

化塔龙山起，中天凤辇迂。彩旒牵画刹，杂佩冒香莸。
宝叶擎千座，金英渍百盂。秋云飘圣藻，霄极捧连珠。

卷 93_3 【宋主簿鸣皋梦赵六予未及报而陈子云亡，今追 为此诗答宋兼贻平昔游旧】

卢藏用

暮川罕停波，朝云无留色。故人琴与诗，可存不可识。

识心尚可亲，琴诗非故人。鸣皋初梦赵，蜀国已悲陈。
感化伤沦灭，魂交惜未申。冥期失幽报，兹理复今晨。
前嗟成后泣，已矣将何及。旧感与新悲，虚怀酬昔时。
赵侯鸿宝气，独负青云姿。群有含妙识，众象悬清机。
雄谈尽物变，精义解人颐。在阴既独善，幽跃自为疑。
踈彼千里足，伤哉一尉欺。陈生富清理，卓荦兼文史。
思缚巫山云，调逸岷江水。铿锵哀忠义，感激怀知己。
负剑登蓟门，孤游入燕市。浩歌去京国，归守西山趾。
幽居探元化，立言见千祀。埋没经济情，良园竟云已。
坐忆平生游，十载怀嵩丘。题书满古壁，采药遍岩幽。
子微化金鼎，仙笙不可求。荣哉宋与陆，名宦美中州。
存亡一睽阻，岐路方悠悠。自予事山海，及兹人世改。
传闻当世荣，皆入古人名。无复平原赋，空馀邻笛声。
泣对西州使，悲访北邙茔。新坟蔓宿草，旧阙毁残铭。
为君成此曲，因言寄友生。默语无穷事，凋伤共此情。

卷 93_4 【饯唐州高使君赴任】

卢藏用

饯酒临丰树，褰帷出鲁阳。蕙兰春已晚，桐柏路犹长。
祖逖方城镇，安期外氏乡。从来二千石，天子命唯良。

卷 93_5 【饯许州宋司马赴任】

卢藏用

国为休征选，輿因仲举题。山川襄野隔，朋酒灞亭睽。
零雨征轩骛，秋风别骥嘶。骊歌一曲罢，愁望正凄凄。

卷 93_6 【奉和立春游苑迎春应制】

卢藏用

天游龙辇驻城闉，上苑迟光晚更新。瑶台半入黄山路，
玉槛傍临玄霸津。梅香欲待歌前落，兰气先过酒上春。
幸预柏台称献寿，愿陪千亩及农晨。

卷 93_7 【奉和幸安乐公主山庄应制】

卢藏用

皇女琼台天汉浔，星桥月宇构山林。飞萝半拂银题影，
瀑布环流玉砌阴。菊浦香随鹦鹉泛，箫楼韵逐凤凰吟。
瑶池驻跸恩方久，璧月无文兴转深。

卷 93_8 【夜宴安乐公主宅】

卢藏用

侯家主第一时新，上席华年不惜春。
珠釭缀日那知夜，玉斝流霞畏底晨。

卷 93_9 【九月九日幸临渭亭登高应制得浹字】

岑羲

重九开科历，千龄逢圣纪。爰豫瞩秦垌，升高临灞浹。
玉醴浮仙菊，琼筵荐芳芷。一闻帝舜歌，欢娱良未已。

卷 93_10 【奉和九月九日登慈恩寺浮屠应制】

岑羲

宝台耸天外，玉辇步云端。日丽重阳景，风摇季月寒。
梵堂遥集雁，帝乐近翔鸾。愿献延龄酒，长承湛露欢。

卷 93_11 【饯唐州高使君】

岑羲

苍茫南塞地，明媚上春时。目极伤千里，怀君不自持。
征车别岐路，斜日下崦嵫。一叹貂轩阻，悠悠即所思。

卷 93_12 【奉和春日幸望春宫应制】

岑羲

和风助律应韶年，清跸乘高入望仙。花笑莺歌迎帝辇，
云披日霁俯皇川。南山近压仙楼上，北斗平临御扆前。
一奏恩荣同镐宴，空知率舞听薰弦。

卷 93_13 【奉和幸安乐公主山庄应制】

岑羲

银榜重楼出雾开，金舆步辇向天来。泉声迥入吹箫曲，
山势遥临献寿杯。帝女含笑流飞电，乾文动色象昭回。
诚愿北极拱尧日，微臣抃舞咏康哉。

卷 93_14 【夜宴安乐公主新宅】

岑羲

金榜重楼开夜扉，琼筵爱客未言归。
衔欢不觉银河曙，尽醉那知玉漏稀。

卷 93_15 【仪坤庙乐章二首】

薛稷

阳灵配德，阴魄昭升。尧坛凤下，汉室龙兴。伫天作对，
前旒是凝。化行南国，道盛西陵。造舟集灌，无德而称。
我粢既洁，我醴既澄。阴阴灵庙，光灵若凭。德馨惟飨，
孝思烝烝。
乾道既亨，坤元以贞。肃雍攸在，辅佐斯成。
外睦九族，内光一庭。克生睿哲，祚我休明。钦若徽范，
悠哉淑灵。建兹清宫，于彼上京。缩茅以献，絜粢惟馨。
实受其福，斯乎亿龄。

卷 93_16 【九日幸临渭亭登高应制得历字】

薛稷

暮节乘原野，宣游俯崖壁。秋登华实满，气严鹰隼击。

仙菊含霜泛，圣藻临云锡。愿陪九九辰，长奉千千历。

卷 93_17 【慈恩寺九日应制】

薛稷

宝宫星宿劫，香塔鬼神功。王游盛尘外，睿览出区中。
日宇开初景，天词掩大风。微臣谢时菊，薄采入芳丛。

卷 93_18 【早春鱼亭山】

薛稷

春气动百草，纷荣时断续。白云自高妙，裴回空山曲。
阳林花已红，寒涧苔未绿。伊余息人事，萧寂无营欲。
客行虽云远，玩之聊自足。

卷 93_19 【秋日还京陕西十里作】

薛稷

驱车越陕郊，北顾临大河。隔河望乡邑，秋风水增波。
西登咸阳途，日暮忧思多。傅岩既纡郁，首山亦嵯峨。
操筑无昔老，采薇有遗歌。客游节回换，人生知几何。

卷 93_20 【奉和送金城公主适西蕃应制】

薛稷

天道宁殊俗，慈仁乃戢兵。怀荒寄赤子，忍爱鞠苍生。
月下琼娥去，星分宝婺行。关山马上曲，相送不胜情。

卷 93_21 【春日登楼野望】

薛稷

凭轩聊一望，春色几芬菲。野外烟初合，楼前花正飞。
娇莺弄新响，斜日散馀晖。谁忍孤游客，言念独依依。

卷 93_22 【饯许州宋司马赴任】

薛稷

令弟与名兄，高才振两京。别序闻鸿雁，离章动鹳鶩。
远朋驰翰墨，胜地写丹青。风月相思夜，劳望颍川星。

卷 93_23 【奉和圣制春日幸望春宫应制】

薛稷

九春风景足林泉，四面云霞敞御筵。花镂黄山绣作苑，
草图玄灞锦为川。飞觴竞醉心回日，走马争先眼著鞭。
喜奉仙游归路远，直言行乐不言旋。

卷 93_24 【奉和幸安乐公主山庄应制】

薛稷

主家园囿极新规，帝郊游豫奉天仪。欢宴瑶台镐京集，
赏赐铜山蜀道移。曲阁交映金精板，飞花乱下珊瑚枝。
借问今朝八龙驾，何如昔日望仙池。

卷 93_25 【秋朝览镜】

薛稷

客心惊落木，夜坐听秋风。朝日看容鬓，生涯在镜中。

卷 93_26 【夜宴安乐公主新宅】

薛稷

秦楼宴喜月裴回，妓筵银烛满庭开。
坐中香气排花出，扇后歌声逐酒来。

卷 93_27 【饯唐永昌】

薛稷

河洛风烟壮市朝，送君飞凫去渐遥。
更思明年桃李月，花红柳绿宴浮桥。

卷 93_28 【九日幸临渭亭登高应制得酒字】

马怀素

睿赏叶通三，宸游契重九。兰将叶布席，菊用香浮酒。
落日下桑榆，秋风歇杨柳。幸齐东户庆，希荐南山寿。

卷 93_29 【奉和九月九日登慈恩寺浮图应制】

马怀素

季月后重阳，金舆陟宝坊。御旗横日道，仙塔俨云庄。
帝跸千官从，乾词七曜光。顾惭文墨职，无以颂时康。

卷 93_30 【奉和送金城公主适西蕃应制】

马怀素

帝子今何去，重姻适异方。离情怆宸掖，别路绕关梁。
望绝园中柳，悲缠陌上桑。空馀愿黄鹤，东顾忆回翔。

卷 93_31 【饯许州宋司马赴任】

马怀素

颍川开郡邑，角宿分疆野。君非仲举才，谁是题舆者。
悯悯琴上鹤，萧萧路傍马。严程若可留，别袂希再把。

卷 93_32 【饯唐州高使君赴任】

马怀素

外牧资贤守，斯人奉帝俞。淮南膺建隼，渭北暂分符。
坐叹烟波隔，行嗟物候殊。何年升美课，回首北城隅。

卷 93_33 【奉和立春游苑迎春应制】

马怀素

玄籥飞灰出洞房，青郊迎气肇初阳。仙輿暂下宜春苑，
御醴行开荐寿觞。映水轻苔犹隐绿，缘堤弱柳未舒黄。
唯有裁花饰簪鬓，恒随圣藻狎年光。

卷 93_34 【奉和圣制春日幸望春宫应制】

马怀素

彩仗雕輿俯碧浔，行春御气发皇心。摇风细柳萦驰道，
映日轻花出禁林。遍野园亭开帟幕，连堤草树狎衣簪。
谬参西掖沾尧酒，愿沐南薰解舜琴。

卷 93_35 【奉和人日宴大明宫恩赐彩缕人胜应制】

马怀素

日宇千门平旦开，天容万象列昭回。三阳候节金为胜，
百福迎祥玉作杯。就暖风光偏著柳，辞寒雪影半藏梅。
何幸得参词赋职，自怜终乏马卿才。

卷 93_36 【奉和幸安乐公主山庄应制】

马怀素

主家台沼胜平阳，帝幸欢娱乐未央。掩映雕窗交极浦，
参差绣户绕回塘。泉声百处传歌曲，树影千重对舞行。
圣酒一沾何以报，唯欣颂德奉时康。

卷 93_37 【兴庆池侍宴应制】

马怀素

积水逶迤绕直城，含虚皎镜有馀清。图云曲榭连缇幕，
映日中塘间彩旌。赏洽犹闻箫管沸，欢留更睹木兰轻。
无劳海上寻仙客，即此蓬莱在帝京。

卷 93_38 【夜宴安乐公主宅】

马怀素

凤楼窈窕凌三袭，翠幌玲珑瞰九衢。
复道中宵留宴衍，弥令上客想踟蹰。

卷 93_39 【饯唐永昌】

马怀素

闻君出宰洛阳隅，宾友称觞饯路衢。
别后相思在何处，只应关下望仙凫。

第九十四卷

卷 94_1 【明冰篇】

富嘉謨

北陆苍茫河海凝，南山阑干昼夜冰，素彩峨峨明月升。
深山穷谷不自见，安知采斫备嘉荐，阴房涸沍掩寒扇。
阳春二月朝始噉，春光潭沱度千门，明冰时出御至尊。
彤庭赫赫九仪备，腰玉煌煌千官事，明冰毕赋周在位。
忆昨沙漠寒风涨，昆仑长河冰始壮，漫汗峻嶒积亭障。
啾啾鸣雁江上来，禁苑池台冰复开，摇青涵绿映楼台。
幽歌七月王风始，凿冰藏用昭物轨，四时不忒千万祀。

卷 94_2 【长门怨】

吴少微

月出映层城，孤圆上太清。君王眷爱歇，枕席凉风生。
怨咽不能寝，踟蹰步前楹。空阶白露色，百草寒虫鸣。
念昔金房里，犹嫌玉座轻。如何娇所误，长夜泣恩情。

卷 94_3 【和崔侍御日用游开化寺阁】

吴少微

左宪多才雄，故人尤鹗鹗。护赠单于使，休辒太原郭。
馆次厌烦歊，清怀寻寂寞。西缘十里馀，北上开化阁。
初入云树间，冥蒙未昭廓。渐出栏楸外，万里秋景焯。
岁晏风落山，天寒水归壑。览物颂幽景，三乘动玄钥。
但敷利解言，永用忘昏著。

卷 94_4 【哭富嘉谟】

吴少微

吾友适不死，於戏社稷臣。直禄非造利，长怀大庇人。
乃通承明籍，遽此敦牂春。药厉其可畏，皇穹故匪仁。
畴昔与夫子，孰云异天伦。同病一相失，茫茫不重陈。
子之文章在，其殆尼父新。鼓兴幹河岳，贞词毒鬼神。
可悲不可朽，车轂没荒榛。圣主贤为宝，吁兹大国贫。

卷 94_5 【过汉故城】

吴少微

大汉昔未定，强秦犹擅场。中原逐鹿罢，高祖郁龙骧。

经始谋帝座，兹焉壮未央。规模窥栋宇，表里浚城隍。
群后崇长乐，中朝增建章。句陈被兰锜，乐府奏芝房。
翡翠明珠帐，鸳鸯白玉堂。清晨宝鼎食，闲夜郁金香。
天马来东道，佳人倾北方。何其赫隆盛，自谓宝灵长。
历数有时尽，哀平嗟不昌。冰坚成巨猾，火德遂颓纲。
奥位匪虚校，贪天竟速亡。魂神吁社稷，豹虎斗岩廊。
金秋移灞岸，铜盘向洛阳。君王无处所，年代几荒凉。
宫阙谁家域，菱芜冒我裳。井田唯有草，海水变为桑。
昔在高门内，于今岐路傍。馀基不可识，古墓列成行。
狐兔惊翾翾，鸱鸟吓獠獠。空城寒日晚，平野暮云黄。
烈烈樊青棘，萧萧吹白杨。千秋并万岁，空使咏歌伤。

卷 94_6 【古意】

吴少微

洛阳芳树向春开，洛阳女儿平旦来。流车走马纷相催，
折芳瑶华向曲台。曲台自有千万行，重花累叶间垂杨。
北林朝日镜明光，南国微风苏合香。可怜窈窕女，
不作邯郸娼。妙舞轻回拂长袖，高歌浩唱发清商。
歌终舞罢欢无极，乐往悲来长叹息。阳春白日不少留，
红荣碧树无颜色。碧树风花先春度，珠帘粉泽无人顾。
如何年少忽迟暮，坐见明月与白露。明月白露夜已寒，
香衣锦带空珊珊。今日阳春一妙曲，凤凰楼上与君弹。

卷 94_7 【怨歌行】

吴少微

城南有怨妇，含情傍芳丛。自谓二八时，歌舞入汉宫。
皇恩数流眄，承幸玉堂中。绿柏黄花催夜酒，
锦衣罗袂逐春风。建章西宫焕若神，燕赵美女三千人。
君王厌德不忘新，况群艳冶纷来陈。是时别君不再见，
三十三春长信殿。长信重门昼掩关，清房晓帐幽且闲。
绮窗虫网氛尘色，文轩莺对桃李颜。天王贵宫不贮老，
浩然含泪今来还。自怜春色转晚暮，试逐佳游芳草路。
小腰丽女夺人奇，金鞍少年曾不顾。
归来谁为夫，请谢西家妇，莫辞先醉解罗襦。

卷 94_8 【陇头水】

员半千

路出金河道，山连玉塞门。旌旗云里度，杨柳曲中喧。
喋血多壮胆，裹革无怯魂。严霜敛曙色，大明辞朝暾。
尘销营卒垒，沙静都尉垣。雾卷白山出，风吹黄叶翻。
将军献凯入，万里绝河源。

卷 94_9 【陇右途中遭非语】

员半千

赵有两毛遂，鲁闻二曾参。慈母犹且惑，况在行路心。
冠冕无丑士，贿赂成知己。名利我所无，清浊谁见理。
敝服空逢春，缓带不著身。出游非怀璧，何忧乎忌人。
正须自保爱，振衣出世尘。

卷 94_10 【仪坤庙乐章】

员半千

孝享云毕，维彻有章。云感玄羽，风凄素商。
瞻望神座，祗恋匪遑。礼终乐阕，肃雍锵锵。

卷 94_11 【铜雀妓】

王適

日暮铜雀迥，秋深玉座清。萧森松柏望，委郁绮罗情。
君恩不再得，妾舞为谁轻。

卷 94_12 【蜀中言怀】

王適

独坐年将暮，常怀志不通。有时须问影，无事却书空。
弃置如天外，平生似梦中。蓬心犹是客，华发欲成翁。
迹滞魂逾窘，情乖路转穷。别离同夜月，愁思隔秋风。
老少悲颜驷，盈虚悟翟公。时来不可问，何用求童蒙。

卷 94_13 【古别离】

王適

昔岁惊杨柳，高楼悲独守。今年芳树枝，孤栖怨别离。
珠帘昼不卷，罗幔晓长垂。苦调琴先觉，愁容镜独知。
频年雁度无消息，罢却鸳文何用织。夜还罗帐空有情，
春著裙腰自无力。青轩桃李落纷纷，紫庭兰蕙日氛氲。
已能憔悴今如此，更复含情一待君。

卷 94_14 【江上有怀】

王適

湛湛江水见底清，荷花莲子傍江生。采莲将欲寄同心，

秋风落花空复情。棹歌数曲如有待，正见明月度东海。
海上云尽月苍苍，万里分辉满洛阳。洛阳闺阁夜何央，
蛾眉婵娟断人肠。寂寥金屏空自掩，青荧银烛不生光。
应怜水宿洞庭子，今夕迢遥天一方。

卷 94_15 【江滨梅】

王適

忽见寒梅树，开花汉水滨。不知春色早，疑是弄珠人。

卷 94_16 【临水亭】

丘均闻

高馆基曾山，微霁生花草。傍对野村树，下临车马道。
清朗悟心术，幽遐备瞻讨。回合峰隐云，联绵渚萦岛。
气似沧洲胜，风为青春好。相及盛年时，无令叹衰老。

卷 94_17 【长门怨】

齐浣

萋萋孤思逼，寂寂长门夜。妾妒亦知非，君恩那不借。

携琴就玉阶，调悲声未谐。将心托明月，流影入君怀。

卷 94_18【长门怨（一作刘阜诗）】

齐浣

宫殿沉沉月欲分，昭阳更漏不堪闻。
珊瑚枕上千行泪，不是思君是恨君。

卷 94_19【仪坤庙乐章】

祝钦明

闕宫实实，清庙微微。降格无象，馨香有依。
式昭纂庆，方融嗣徽。明禋是享，神保聿归。

卷 94_20【仪坤庙乐章】

刘知几

妙算申帷幄，神谋出庙廷。两阶文物备，七德武功成。
校猎长杨苑，屯军细柳营。将军献凯入，歌舞溢重城。

卷 94_21 【仪坤庙乐章】

胡雄

送文迎武递参差，一始一终光圣仪。
四海生人歌有庆，千龄孝享肃无亏。

卷 94_22 【仪坤庙乐章】

张齐贤

裸圭既濯，郁鬯既陈。画幕云举，黄流玉醇。
仪充献酌，礼盛众禋。地察惟孝，愉焉飧亲。

卷 94_23 【仪坤庙乐章】

郑善玉

酌郁既灌，取萧方爇。笾豆静器，簠簋芬飫。
鱼腊荐美，牲牷表絜。是戢是将，载迎载列。

卷 94_24 【仪坤庙乐章】

丘悦

孝哉我后，冲乎乃圣。道映重华，德辉文命。慕深视箴，
情殷抚镜。万国移命，兆人承庆。

第九十五卷

卷 95_1 【芳树（一作宋之问）】

沈佺期

何地早芳菲，宛在长门殿。夭桃色若绶，秣李光如练。
啼鸟弄花疏，游蜂饮香遍。叹息春风起，飘零君不见。

卷 95_2 【长安道（一作宋之问诗）】

沈佺期

秦地平如掌，层城入云汉。楼阁九衢春，车马千门旦。
绿槐开复合，红尘聚还散。日晚斗鸡还，经过狭斜看。

卷 95_3 【有所思（一作宋之问诗）】

沈佺期

君子事行役，再空芳岁期。美人旷延伫，万里浮云思。

园槿绽红艳，郊桑柔绿滋。坐看长夏晚，秋月照罗帏。

卷 95_4 【临高台】

沈佺期

高台临广陌，车马纷相续。回首思旧乡，云山乱心曲。
远望河流缓，周看原野绿。向夕林鸟还，忧来飞景促。

卷 95_5 【凤笙曲】

沈佺期

忆昔王子晋，凤笙游云空。挥手弄白日，安能恋青宫。
岂无婵娟子，结念罗帏中。怜寿不贵色，身世两无穷。

卷 95_6 【拟古别离】

沈佺期

白水东悠悠，中有西行舟。舟行有返棹，水去无还流。
奈何生别者，戚戚怀远游。远游谁当惜，所悲会难收。
自君阆芳躅，青阳四五遒。皓月掩兰室，光风虚蕙楼。
相思无明晦，长叹累冬秋。离居久迟暮，高驾何淹留。

卷 95_7 【辛丑岁十月上幸长安时扈从出西岳作】

沈佺期

西镇何穹崇，壮哉信灵造。诸岭皆峻秀，中峰特美好。
傍见巨掌存，势如石东倒。颇闻首阳去，开坼此河道。
磅礴压洪源，巍峨壮清昊。云泉纷乱瀑，天磴屹横抱。
子先呼其巅，宫女世不老。下有府君庙，历载传洒扫。
皇明应天游，十月戒丰镐。微末忝闲从，兼得事蘋藻。
宿心爱兹山，意欲拾灵草。阴壑已永閤，云窦绝探讨。
芳月期来过，回策思方浩。

卷 95_8 【和杜麟台元志春情】

沈佺期

嘉树满中园，氛氲罗秀色。不见仙山云，倚琴空太息。
沉思若在梦，絳怨似无忆。青春坐南移，白日忽西匿。
蛾眉返清镜，闺中不相识。

卷 95_9 【别侍御严凝】

沈佺期

七泽云梦林，三湘洞庭水。自古传剽俗，有时逋恶子。

令君出使车，行迈方靡靡。静言芟枳棘，慎勿伤兰芷。

卷 95_10 【送乔随州侃】

沈佺期

结交三十载，同游一万里。情为契阔生，心由别离死。
拜恩前后人，从宦差池起。今尔归汉东，明珠报知己。

卷 95_11 【送友人任括州】

沈佺期

青春浩无际，白日乃迟迟。胡为赏心客，叹迈此芳时。
瓯粤迫兹守，京阙从此辞。茫茫理云帆，草草念行期。
纷吾结远佩，帐饯出河湄。太息东流水，盈觴难再持。

卷 95_12 【饯远】

沈佺期

任子徇遐禄，结友开旧襟。撰酌辍行叹，指途勤远心。
秋晶澄回壑，霁色肃明林。暧然青轩暮，浩思非所任。

卷 95_13 【同工部李侍郎適访司马子微】

沈佺期

紫微降天仙，丹地投云藻。上言华顶事，中问长生道。
华顶居最高，大壑朝阳早。长生术何妙，童颜后天老。
清晨朝凤京，静夜思鸿宝。凭崖饮蕙气，过涧摘灵草。
人非冢已荒，海变田应燥。昔尝游此郡，三霜弄溟岛。
绪言霞上开，机事尘外扫。顷来迫世务，清旷未云保。
崎岖待漏恩，怵惕司言造。轩皇重斋拜，汉武爱祈祷。
顺风怀崆峒，承露在丰镐。泠然委轻驭，复得散幽抱。
柱下留伯阳，储闱登四皓。闻有参同契，何时一探讨。

卷 95_14 【自昌乐郡溯流至白石岭下行入郴州】

沈佺期

兹山界夷夏，天险横寥廓。太史漏登探，文命限开凿。
北流自南泻，群峰回众壑。驰波如电腾，激石似雷落。
崖留盘古树，涧蓄神农药。乳窦何淋漓，苔藓更彩错。
娟娟潭里虹，渺渺滩边鹤。岁杪应流火，天高云物薄。
金风吹绿梢，玉露洗红箨。溯舟始兴廨，登践桂阳郭。
匍匐缘修坂，穹窿曳长索。碍林阻往来，遇堰每前却。
救艰不遑饭，毕昏无暇泊。濯溪宁足惧，磴道谁云恶。
我行山水间，湍险皆不若。安能独见闻，书此贻京洛。

卷 95_15 【过蜀龙门】

沈佺期

龙门非禹凿，诡怪乃天功。西南出巴峡，不与众山同。
长窅亘五里，宛转复嵌空。伏湍煦潜石，瀑水生轮风。
流水无昼夜，喷薄龙门中。潭河势不测，藻葩垂彩虹。
我行当季月，烟景共春融。江关勤亦甚，巘嶂意难穷。
势将息机事，炼药此山东。

卷 95_16 【入卫作】

沈佺期

淇上风日好，纷纷沿岸多。绿芳幸未歇，泛滥此明波。
采蓂忆幽吹，理棹想荆歌。郁然怀君子，浩旷将如何。

卷 95_17 【夜泊越州逢北使】

沈佺期

天地降雷雨，放逐还国都。重以风潮事，年月戒回舻。
容颜荒外老，心想域中愚。憩泊在兹夜，炎云逐斗枢。
风音风俞綦海若，霹雳耿天吴。鳌抃群岛失，鲸吞众流输。

偶逢金华使，握手泪相濡。饥共噬齐枣，眠共席秦蒲。
既北思攸济，将南睿所图。往来固无咎，何忽憚前桴。

卷 95_18 【绍隆寺】

沈佺期

吾从释迦久，无上师涅槃。探道三十载，得道天南端。
非胜适殊方，起喧归理难。放弃乃良缘，世虑不曾干。
香界萦北渚，花龕隐南峦。危昂阶下石，演漾窗中澜。
云盖看木秀，天空见藤盘。处俗勒宴坐，居贫业行坛。
试将有漏躯，聊作无生观。了然究诸品，弥觉静者安。

卷 95_19 【神龙初废逐南荒途出郴口北望苏耽山】

沈佺期

少曾读仙史，知有苏耽君。流望来南国，依然会昔闻。
泊舟问耆老，遥指孤山云。孤山郴郡北，不与众山群。
重崖下萦映，崿峤上纠纷。碧峰泉附落，红壁树傍分。
选地今方尔，升天因可云。不才予窜迹，羽化子遗芬。
将览成麟凤，旋惊御鬼文。此中迷出处，含思独氛氲。

卷 95_20 【初达驩州】

沈佺期

流子一十八，命予偏不偶。配远天遂穷，到迟日最后。
水行儋耳国，陆行雕题薮。魂魄游鬼门，骸骨遗鲸口。
夜则忍饥卧，朝则抱病走。搔首向南荒，拭泪看北斗。
何年赦书来，重饮洛阳酒。

卷 95_21 【被弹】

沈佺期

知人昔不易，举非贵易失。尔何按国章，无罪见呵叱。
平生守直道，遂为众所嫉。少以文作吏，手不曾开律。
一旦法相持，荒忙意如漆。幼子双囹圄，老夫一念室。
昆弟两三人，相次俱囚桎。万铄当众怒，千谤无片实。
庶以白黑谗，显此泾渭质。劾吏何咆哮，晨夜闻扑扑。
事间拾虚证，理外存枉笔。怀痛不见伸，抱冤竟难悉。
穷囚多垢腻，愁坐饶虬虱。三日唯一饭，两句不再栉。
是时盛夏中，暍赫多瘴疾。瞪目眠欲闭，暗鸣气不出。
有风自扶摇，鼓荡无伦匹。安得吹浮云，令我见白日。

卷 95_22 【枉系二首】

沈佺期

吾怜曾家子，昔有投杼疑。吾怜姬公旦，非无鸛鴒诗。
臣子竭忠孝，君亲惑谗欺。萋斐离骨肉，含愁兴此辞。

昔日公冶长，非罪遇縲紲。圣人降其子，古来叹独绝。
我无毫发瑕，苦心怀冰雪。今代多秀士，谁能继明辙。

卷 95_23 【黄鹤】

沈佺期

黄鹤佐丹凤，不能群白鹇。拂云游四海，弄影到三山。
遥忆君轩上，来下天池间。明珠世不重，知有报恩环。

卷 95_24 【伤王学士】

沈佺期

闭囚断外事，昧坐半馀期。有言颖叔子，亡来已一时。
初闻宛不信，中话涕涟洏。痛哉玄夜重，何遽青春姿。
忆汝曾旅食，屡空瀍涧湄。吾徒禄未厚，笱斗愧相贻。

原宪贫无愁，颜回乐自持。诏书择才善，君为王子师。
宠儒名可尚，论秩官犹欺。化往不复见，情来安可思。
目绝毫翰洒，耳无歌讽期。灵枢寄何处，精魂今何之。
恨予在丹棘，不得看素旗。孀妻知己叹，幼子路人悲。
感游值商日，绝弦留此词。

卷 95_25 【古镜】

沈佺期

莓苔翳清池，虾蟆蚀明月。埋落今如此，照心未尝歇。
愿垂拂拭恩，为君鉴玄发。

卷 95_26 【凤箫曲（一作古意）】

沈佺期

八月凉风动高阁，千金丽人卷绡幕。已怜池上歇芳菲，
不念君恩坐摇落。世上荣华如转蓬，朝随阡陌暮云中。
飞燕侍寝昭阳殿，班姬饮恨长信宫。长信宫，昭阳殿，
春来歌舞妾自知，秋至帘栊君不见。昔时嬴女厌世纷，
学吹凤箫乘彩云。含情转睐向箫史，千载红颜持赠君。

卷 95_27 【古歌】

沈佺期

落叶流风向玉台，夜寒秋思洞房开。水晶帘外金波下，
云母窗前银汉回。玉阶阴阴苔藓色，君王履綦难再得。
璇闺窈窕秋夜长，绣户徘徊明月光。燕姬彩帐芙蓉色，
秦女金炉兰麝香。北斗七星横夜半，清歌一曲断君肠。

卷 95_28 【七夕曝衣篇】

沈佺期

君不见昔日宜春太液边，披香画阁与天连。
灯火灼烁九微映，香气氛氲百和然。此夜星繁河正白，
人传织女牵牛客。宫中扰扰曝衣楼，天上娥娥红粉席。
曝衣何许曛半黄，宫中彩女提玉箱。珠履奔腾上兰砌，
金梯宛转出梅梁。绛河里，碧烟上，双花伏兔画屏风，
四子盘龙擎斗帐。舒罗散縠云雾开，缀玉垂珠星汉回。
朝霞散彩羞衣架，晚月分光劣镜台。上有仙人长命绶，
中看玉女迎欢绣。玳瑁帘中别作春，珊瑚窗里翻成昼。
椒房金屋宠新流，意气骄奢不自由。汉文宜惜露台费，
晋武须焚前殿裘。

卷 95_29 【入少密溪】

沈佺期

云峰苔壁绕溪斜，江路香风夹岸花。树密不言通鸟道，
鸡鸣始觉有人家。人家更在深岩口，涧水周流宅前后。
游鱼瞥瞥双钩童，伐木丁丁一樵叟。自言避喧非避秦，
薜衣耕凿帝尧人。相留且待鸡黍熟，夕卧深山萝月春。

卷 95_30 【霹雳引】

沈佺期

岁七月，火伏而金生。客有鼓琴于门者，奏霹雳之商声。
始戛羽以騞𦏧，终扣宫而砰𦏧。电耀耀兮龙跃，
雷阊阊兮雨冥。气鸣唢以会雅，态欻翕以横生。
有如驱千旗，制五兵；截荒虺，斫长鲸。孰与广陵比，
意别鹤俦精而已。俾我雄子魄动，毅夫发立。怀恩不浅，
武义双辑。视胡若芥，剪羯如拾。岂徒慷慨中筵，
备群娱之翕习哉。

第九十六卷

卷 96_1 【立春日内出彩花应制】

沈佺期

合殿春应早，开箱彩预知。花迎宸翰发，叶待御筵披。
梅讶香全少，桃惊色顿移。轻生承剪拂，长伴万年枝。

卷 96_2 【晦日浣水应制】

沈佺期

素浣接宸居，青门盛祓除。摘兰喧凤野，浮藻溢龙渠。
苑蝶飞殊懒，宫莺啖不疏。星移天上入，歌舞向储胥。

卷 96_3 【奉和洛阳玩雪应制】

沈佺期

周王甲子旦，汉后德阳宫。洒瑞天庭里，惊春御苑中。

氛氲生浩气，飒沓舞回风。宸藻我盈尺，赓歌乐岁丰。

卷 96_4 【三日梨园侍宴（一作梨园亭侍宴）】

沈佺期

九重驰道出，三巳禊堂开。画鹢中流动，青龙上苑来。
野花飘御座，河柳拂天杯。日晚迎祥处，笙镛下帝台。

卷 96_5 【幸梨园亭观打球应制】

沈佺期

今春芳苑游，接武上琼楼。宛转萦香骑，飘飘拂画球。
俯身迎未落，回辔逐傍流。只为看花鸟，时时误失筹。

卷 96_6 【九日临渭亭侍宴应制得长字】

沈佺期

御气幸金方，凭高荐羽觞。魏文颁菊蕊，汉武帝萸房。
秋变铜池色，晴添银树光。年年重九庆，日月奉天长。

卷 96_7 【岁夜安乐公主满月侍宴】

沈佺期

除夜子星回，天孙满月杯。咏歌麟趾合，箫管凤雏来。
岁炬常然桂，春盘预折梅。圣皇千万寿，垂晓御楼开。

卷 96_8 【安乐公主移入新宅】

沈佺期

初闻衡汉来，移住斗城隈。锦帐迎风转，琼筵拂雾开。
马香遗旧埽，风吹绕新台。为问沈冥子，仙槎何处回。

卷 96_9 【仙萼亭初成侍宴应制】

沈佺期

山中气色和，宸赏第中过。辇路披仙掌，帷宫拂帝萝。
泉临香涧落，峰入翠云多。无异登玄圃，东南望白河。

卷 96_10 【送金城公主适西蕃应制】

沈佺期

金榜扶丹掖，银河属紫闾。那堪将凤女，还以嫁乌孙。
玉就歌中怨，珠辞掌上恩。西戎非我匹，明主至公存。

卷 96_11 【幸白鹿观应制】

沈佺期

紫凤真人府，斑龙太上家。天流芝盖下，山转桂旗斜。
圣藻垂寒露，仙杯落晚霞。唯应问王母，桃作几时花。

卷 96_12 【洛阳道】

沈佺期

九门开洛邑，双阙对河桥。白日青春道，轩裳半下朝。
乘羊稚子看，拾翠美人娇。行乐归恒晚，香尘扑地遥。

卷 96_13 【骢马】

沈佺期

西北五花骢，来时道向东。
四蹄碧玉片，双眼黄金瞳。
鞍上留明月，嘶间动朔风。
借君驰沛艾，一战取云中。

卷 96_14 【铜雀台（一作宋之问诗）】

沈佺期

昔年分鼎地，今日望陵台。
一旦雄图尽，千秋遗令开。
绮罗君不见，歌舞妾空来。
恩共漳河水，东流无重回。

卷 96_15 【长门怨】

沈佺期

月皎风泠泠，长门次掖庭。
玉阶闻坠叶，罗幌见飞萤。
清露凝珠缀，流尘下翠屏。
妾心君未察，愁叹剧繁星。

卷 96_16 【巫山高二首（一作宋之问诗）】

沈佺期

巫山峰十二，合沓隐昭回。俯眺琵琶峡，平看云雨台。
古槎天外倚，瀑水日边来。何忍猿啼夜，荆王枕席开。

神女向高唐，巫山下夕阳。裴回作行雨，婉孌逐荆王。
电影江前落，雷声峡外长。霁云无处所，台馆晓苍苍。

卷 96_17 【巫山高】

沈佺期

巫山高不极，合沓状奇新。暗谷疑风雨，阴崖若鬼神。
月明三峡曙，潮满九江春。为问阳台客，应知入梦人。

卷 96_18 【七夕】

沈佺期

秋近雁行稀，天高鹊夜飞。妆成应懒织，今夕渡河归。
月皎宜穿线，风轻得曝衣。来时不可觉，神验有光辉。

卷 96_19 【春闺（一本连后杂诗三首作杂诗四首）】

沈佺期

铁马三军去，金闺二月还。边愁离上国，春梦失阳关。
池水琉璃净，园花玳瑁斑。岁华空自掷，忧思不胜颜。

卷 96_20 【奉和圣制同皇太子游慈恩寺应制】

沈佺期

肃肃莲花界，荧荧贝叶宫。金人来梦里，白马出城中。
涌塔初从地，焚香欲遍空。天歌应春籥，非是为春风。

卷 96_21 【和洛州康士曹庭芝望月有怀（一作康庭芝或宋之问诗）】

沈佺期

天使下西楼，光含万象秋。台前疑挂镜，帘外似悬钩。
张尹将眉学，班姬取扇俦。佳期应借问，为报在刀头。

卷 96_22 【寿阳王花烛（一作宋之问诗）】

沈佺期

仙媛乘龙夕，天孙捧雁来。可怜桃李树，更绕凤凰台。
烛送香车入，花临宝扇开。莫令银箭晓，为尽合欢杯。

卷 96_23 【陇头水】

沈佺期

陇山飞落叶，陇雁度寒天。愁见三秋水，分为两地泉。
西流入羌郡，东下向秦川。征客重回首，肝肠空自怜。

卷 96_24 【关山月】

沈佺期

汉月生辽海，朏朏出半晖。合昏玄菟郡，中夜白登围。
晕落关山迥，光含霜霰微。将军听晓角，战马欲南归。

卷 96_25 【折杨柳（一作宋之问诗）】

沈佺期

玉窗朝日映，罗帐春风吹。拭泪攀杨柳，长条踠地垂。
白花飞历乱，黄鸟思参差。妾自肝肠断，傍人那得知。

卷 96_26 【梅花落（一作宋之问诗）】

沈佺期

铁骑几时回，金闺怨早梅。雪寒花已落，风暖叶应开。
夕逐新春管，香迎小岁杯。盛时何足贵，书里报轮台。

卷 96_27 【紫骝马】

沈佺期

青玉紫骝鞍，骄多影屡盘。荷君能剪拂，躞蹀喷桑干。
踠足追奔易，长鸣遇赏难。搃金一万里，霜露不辞寒。

卷 96_28 【上之回】

沈佺期

制书下关右，天子问回中。坛墠经过远，威仪侍从雄。
黄麾摇昼日，青幟曳松风。回望甘泉道，龙山隐汉宫。

卷 96_29 【王昭君（一作宋之问诗）】

沈佺期

非君惜鸾殿，非妾妒蛾眉。薄命由骄虏，无情是画师。
嫁来胡地日，不并汉宫时。心苦无聊赖，何堪马上辞。

卷 96_30 【被试出塞】

沈佺期

十年通大漠，万里出长平。寒日生戈剑，阴云拂旆旌。
饥乌啼旧垒，疲马恋空城。辛苦皋兰北，胡霜损汉兵。

卷 96_31 【牛女（一作宋之问诗）】

沈佺期

粉席秋期缓，针楼别怨多。奔龙争度日，飞鹊乱填河。
失喜先临镜，含羞未解罗。谁能留夜色，来夕倍还梭。

卷 96_32 【杂诗三首（一本连前春闺作杂诗四首）】

沈佺期

落叶惊秋妇，高砧促暝机。蜘蛛寻月度，萤火傍人飞。
清镜红埃入，孤灯绿焰微。怨啼能至晓，独自懒缝衣。

妾家临渭北，春梦著辽西。何苦朝鲜郡，年年事鼓鼙。
燕来红壁语，莺向绿窗啼。为许长相忆，阑干玉箸齐。

闻道黄龙戍，频年不解兵。可怜闺里月，长在汉家营。
少妇今春意，良人昨夜情。谁能将旗鼓，一为取龙城。

卷 96_33 【剪彩】

沈佺期

宫女怜芳树，裁花竞早荣。寒依刀尺尽，春向绮罗生。

弱蒂盘丝发，香蕤结素成。纤枝幸不弃，长就玉阶倾。

卷 96_34 【和中书侍郎杨再思春夜宿直】

沈佺期

西禁青春满，南端皓月微。千庐宵驾合，五夜晓钟稀。
星斗横纶阁，天河度琐闱。烟光章奏里，纷向夕郎飞。

卷 96_35 【和常州崔使君寒食夜】

沈佺期

闻道清明近，春闱向夕阑。行游昼不厌，风物夜宜看。
斗柄更初转，梅香暗里残。无劳秉华烛，晴月在南端。

卷 96_36 【和崔正谏登秋日早朝】

沈佺期

鸡鸣朝谒满，露白禁门秋。爽气临旌戟，朝光映冕旒。
河宗来献宝，天子命焚裘。独负池阳议，言从建礼游。

卷 96_37【答宁处州书（一作答宁处州报赦）】

沈佺期

书报天中赦，人从海上闻。九泉开白日，六翮起青云。
质幸恩先贷，情孤枉未分。自怜泾渭别，谁与奏明君。

卷 96_38【李舍人山园送庞邵】

沈佺期

符传有光辉，喧喧出帝畿。东邻借山水，南陌驻骅骝。
握手凉风至，当歌秋日微。高檐去勿缓，人吏待霜威。

卷 96_39【送陆侍御馀庆北使】

沈佺期

古人贵将命，之子出輶轩。受委当不辱，随时敢赠言。
朔途际辽海，春思绕轘辕。安得回白日，留欢尽绿樽。

卷 96_40 【洛州萧司兵谒兄还赴洛成礼】

沈佺期

棠棣日光辉，高襟应序归。来成鸿雁聚，去作凤凰飞。
细草承轻传，惊花惨别衣。灞亭春有酒，岐路惜芬菲。

卷 96_41 【饯高唐州询】

沈佺期

弱冠相知早，中年不见多。生涯在王事，客鬓各蹉跎。
良守初分岳，嘉声即润河。还从汉阙下，倾耳听中和。

卷 96_42 【饯唐郎中洛阳令】

沈佺期

一台推往妙，三史伫来修。应宰鳧还集，辞郎雉少留。
郊筵乘落景，亭传理残秋。愿以弦歌暇，芝兰想旧游。

卷 96_43 【乐城白鹤寺】

沈佺期

碧海开龙藏，青云起雁堂。潮声迎法鼓，雨气湿天香。
树接前山暗，溪承瀑水凉。无言谪居远，清净得空王。

卷 96_44 【游少林寺】

沈佺期

长歌游宝地，徙倚对珠林。雁塔风霜古，龙池岁月深。
绀园澄夕霁，碧殿下秋阴。归路烟霞晚，山蝉处处吟。

卷 96_45 【岳馆】

沈佺期

洞壑仙人馆，孤峰玉女台。空濛朝气合，窈窕夕阳开。
流涧含轻雨，虚岩应薄雷。正逢鸾与鹤，歌舞出天来。

卷 96_46 【早发平昌（一作昌平） 岛】

沈佺期

解缆春风后，鸣榔晓涨前。阳乌出海树，云雁下江烟。
积气冲长岛，浮光溢大川。不能怀魏阙，心赏独泠然。

卷 96_47 【夜宿七盘岭】

沈佺期

独游千里外，高卧七盘西。晓月临窗近，天河入户低。
芳春平仲绿，清夜子规啼。浮客空留听，褒城闻曙鸡。

卷 96_48 【十三四时尝从巫峡过他日偶然有思】

沈佺期

小度巫山峡，荆南春欲分。使君滩上草，神女馆前云。
树悉江中见，猿多天外闻。别来如梦里，一想一氛氲。

卷 96_49 【初达驩州】

沈佺期

自昔闻铜柱，行来向一年。不知林邑地，犹隔道明天。
雨露何时及，京华若个边。思君无限泪，堪作日南泉。

卷 96_50 【岭表逢寒食】

沈佺期

岭外无寒食，春来不见饧。洛阳新甲子，何日是清明。
花柳争朝发，轩车满路迎。帝乡遥可念，肠断报亲情。

卷 96_51 【驩州南亭夜望】

沈佺期

昨夜南亭望，分明梦洛中。室家谁道别，儿女案尝同。
忽觉犹言是，沉思始悟空。肝肠馀几寸，拭泪坐春风。

卷 96_52 【少游荆湘因有是题】

沈佺期

岷北焚蛟浦，巴东射雉田。岁时宜楚俗，耆旧在襄川。
忆昨经过处，离今二十年。因君访生死，相识几人全。

卷 96_53 【咸阳览古】

沈佺期

咸阳秦帝居，千载坐盈虚。版筑林光尽，坛场霤听疏。
野桥疑望日，山火类焚书。唯有骊峰在，空闻厚葬馀。

卷 96_54 【览镜】

沈佺期

霏霏日摇蕙，骚骚风洒莲。时芳固相夺，俗态岂恒坚。
恍忽夜川里，蹉跎朝镜前。红颜与壮志，太息此流年。

卷 96_55 【题椰子树】

沈佺期

日南椰子树，香袅出风尘。丛生调木首，圆实槟榔身。
玉房九霄露，碧叶四时春。不及涂林果，移根随汉臣。

卷 96_56 【同狱者叹狱中无燕】

沈佺期

何许乘春燕，多知辨夏台。三时欲并尽，双影未尝来。
食蕊嫌丛棘，衔泥怯死灰。不如黄雀语，能雪冶长猜。

卷 96_57 【则天门赦改年】

沈佺期

圣人宥天下，幽钥动圜墙。六甲迎黄气，三元降紫泥。
笼僮上西鼓，振迅广阳鸡。歌舞将金帛，汪洋被远黎。

卷 96_58 【喜赦】

沈佺期

去岁投荒客，今春肆眚归。律通幽谷暖，盆举太阳辉。
喜气迎冤气，青衣报白衣。还将合浦叶，俱向洛城飞。

卷 96_59 【秦州薛都督挽词】

沈佺期

十里绛山幽，千年汾水流。碑传门客建，剑是故人留。
陇树烟含夕，山门月对秋。古来钟鼎盛，共尽一蒿丘。

卷 96_60 【天官崔侍郎夫人卢氏挽歌】

沈佺期

偕老言何谬，香魂事永违。潘鱼从此隔，陈凤宛然飞。
埋镜泉中暗，藏镫地下微。犹凭少君术，仿佛睹容辉。

卷 96_61 【章怀太子靖妃挽词】

沈佺期

彤史佳声载，青宫懿范留。形将鸾镜隐，魂伴凤笙游。
送马嘶残日，新萤落晚秋。不知蒿里曙，空见陇云愁。

卷 96_62 【奉和立春游苑迎春】

沈佺期

东郊暂转迎春仗，上苑初飞行庆杯。风射蛟冰千片断，
气冲鱼钥九关开。林中觅草才生蕙，殿里争花并是梅。
歌吹衔恩归路晚，栖乌半下凤城来。

卷 96_63 【人日重宴大明宫赐彩缕人胜应制】

沈佺期

拂旦鸡鸣仙卫陈，凭高龙首帝城春。千官黼帐杯前寿，
百福香奁胜里人。山鸟初来犹怯啜，林花未发已偷新。
天文正应韶光转，设报悬知用此辰。

卷 96_64 【奉和春初幸太平公主南庄应制】

沈佺期

主家山第早春归，御辇春游绕翠微。买地铺金曾作埒，
寻河取石旧支机。云间树色千花满，竹里泉声百道飞。
自有神仙鸣凤曲，并将歌舞报恩晖。

卷 96_65 【奉和春日幸望春宫应制】

沈佺期

芳郊绿野散春晴，复道离宫烟雾生。杨柳千条花欲绽，
葡萄百丈蔓初萦。林香酒气元相入，鸟啭歌声各自成。
定是风光牵宿醉，来晨复得幸昆明。

卷 96_66 【侍宴安乐公主新宅应制】

沈佺期

皇家贵主好神仙，别业初开云汉边。山出尽如鸣凤岭，
池成不让饮龙川。妆楼翠幌教春住，舞阁金铺借日悬。
敬从乘舆来此地，称觴献寿乐钧天。

卷 96_67 【龙池篇（唐享龙池乐章第三章）】

沈佺期

龙池跃龙龙已飞，龙德先天天不违。池开天汉分黄道，
龙向天门入紫微。邸第楼台多气色，君王鳧雁有光辉。
为报寰中百川水，来朝此地莫东归。

卷 96_68 【兴庆池侍宴应制】

沈佺期

碧水澄潭映远空，紫云香驾御微风。汉家城阙疑天上，
秦地山川似镜中。向浦回舟萍已绿，分林蔽殿槿初红。
古来徒美横汾赏，今日宸游圣藻雄。

卷 96_69 【从幸香山寺应制】

沈佺期

南山奕奕通丹禁，北阙峨峨连翠云。岭上楼台千地起，
城中钟鼓四天闻。旃檀晓阁金舆度，鹦鹉晴林采旆分。
愿以醍醐参圣酒，还将祇苑当秋汾。

卷 96_70 【红楼院应制（一作僧广宣诗）】

沈佺期

红楼疑见白毫光，寺逼宸居福盛唐。支遁爱山情谩切，
昙摩泛海路空长。经声夜息闻天语，炉气晨飘接御香。
谁谓此中难可到，自怜深院得徊翔。

卷 96_71 【再入道场纪事应制（一作僧广宣诗）】

沈佺期

南方归去再生天，内殿今年异昔年。见辟乾坤新定位，
看题日月更高悬。行随香辇登仙路，坐近炉烟讲法筵。
自喜恩深陪侍从，两朝长在圣人前。

卷 96_72 【嵩山石淙侍宴应制】

沈佺期

金舆旦下绿云衢，彩殿晴临碧涧隅。溪水泠泠杂行漏，
山烟片片绕香炉。仙人六膳调神鼎，玉女三浆捧帝壶。
自惜汾阳纡道驾，无如太室览真图。

卷 96_73 【古意呈补阙乔知之（一作古意，又作独不见）】

沈佺期

卢家少妇郁金香，海燕双栖玳瑁梁。九月寒砧催木叶，
十年征戍忆辽阳。白狼河北音书断，丹凤城南秋夜长。
谁谓含愁独不见，更教明月照流黄。

卷 96_74 【遥同杜员外审言过岭】

沈佺期

天长地阔岭头分，去国离家见白云。洛浦风光何所似，
崇山瘴疠不堪闻。南浮涨海人何处，北望衡阳雁几群。
两地江山万馀里，何时重谒圣明君。

卷 96_75 【和上巳连寒食有怀京洛】

沈佺期

天津御柳碧遥遥，轩骑相从半下朝。行乐光辉寒食借，
太平歌舞晚春饶。红妆楼下东回辇，青草洲边南渡桥。
坐见司空扫西第，看君侍从落花朝。

卷 96_76 【陪幸太平公主南庄诗（一作苏颋诗）】

沈佺期

主第山门起灞川，宸游风景入初年。凤凰楼下交天仗，
乌鹊桥头敞御筵。往往花间逢彩石，时时竹里见红泉。
今朝扈跸平阳馆，不羨乘槎云汉边。

卷 96_77 【守岁应制】

沈佺期

南渡轻冰解渭桥，东方树色起招摇。天子迎春取今夜，
王公献寿用明朝。殿上灯人争烈火，宫中侺子乱驱妖。
宜将岁酒调神药，圣祚千春万国朝。

第九十七卷

卷 97_1 【陪幸韦嗣立山庄】

沈佺期

台阶好赤松，别业对青峰。茆室承三顾，花源接九重。
虹旗萦秀木，凤辇拂疏筇。径直千官拥，溪长万骑容。
水堂开禹膳，山阁献尧钟。皇鉴清居远，天文睿奖浓。
岩泉他夕梦，渔钓往年逢。共荣丞相府，偏降逸人封。

卷 97_2 【扈从出长安应制】

沈佺期

汉宅规模壮，周都景命隆。西宾让东主，法驾幸天中。
太史占星应，春官奏日同。旌门起长乐，帐殿出新丰。
翕习黄山下，纡徐清渭东。金麾张画月，珠幃戴松风。
是节严阴始，寒郊散野蓬。薄霜沾上路，残雪绕离宫。
赐帛矜耆老，褰旒问小童。复除恩载洽，望秩礼新崇。
臣忝承明召，多惭献赋雄。

卷 97_3 【初冬从幸汉故青门应制】

沈佺期

汉王建都邑，渭水对青门。朝市俱东逝，坟陵共北原。
荒凉萧相阙，芜没邵平园。全盛今何在，英雄难重论。
故基仍岳立，遗堞尚云屯。当极土功壮，安知人力烦。
天游戒东首，怀昔驻龙轩。何必金汤固，无如道德藩。
微臣谅多幸，参乘偶殊恩。预此陈古事，敢奏兴亡言。

卷 97_4 【昆明池侍宴应制】

沈佺期

武帝伐昆明，穿池习五兵。水同河汉在，馆有豫章名。
我后光天德，垂衣文教成。黠兵非帝念，劳物岂皇情。
春仗过鲸沼，云旗出凤城。灵鱼衔宝跃，仙女废机迎。
柳拂旌门暗，兰依帐殿生。还如流水曲，日晚棹歌清。

卷 97_5 【白莲花亭侍宴应制】

沈佺期

九日陪天仗，三秋幸禁林。霜威变绿树，云气落青岑。

水殿黄花合，山亭绛叶深。朱旗夹小径，宝马驻清浔。
苑吏收寒果，饔人膳野禽。承欢不觉暝，遥响素秋砧。

卷 97_6 【仙萼池亭侍宴应制】

沈佺期

步辇寻丹嶂，行宫在翠微。川长看鸟灭，谷转听猿稀。
天磴扶阶迥，云泉透户飞。闲花开石竹，幽叶吐蔷薇。
径狭难留骑，亭寒欲进衣。白龟来献寿，仙吹返彤闱。

卷 97_7 【奉和晦日驾幸昆明池应制】

沈佺期

法驾乘春转，神池象汉回。双星移旧石，孤月隐残灰。
战鹄逢时去，恩鱼望幸来。山花缙绮绕，堤柳幔城开。
思逸横汾唱，欢留宴镐杯。微臣雕朽质，羞睹豫章材。

卷 97_8 【奉和圣制幸礼部尚书窦希玠宅】

沈佺期

北阙垂旒暇，南宫听履回。天临翔凤转，恩向跃龙开。

兰气薰仙帐，榴花引御杯。水从金穴吐，云是玉衣来。
池影摇歌席，林香散舞台。不知行漏晚，清跸尚裴徊。

卷 97_9 【钓竿篇】

沈佺期

朝日敛红烟，垂竿向绿川。人疑天上坐，鱼似镜中悬。
避楫时惊透，猜钩每误牵。湍危不理辖，潭静欲留船。
钓玉君徒尚，征金我未贤。为看芳饵下，贪得会无筌。

卷 97_10 【和户部岑尚书参迹枢揆】

沈佺期

大君制六合，良佐参万机。大业永开泰，臣道日光辉。
盐梅和鼎食，家声众所归。汉章题楚剑，郑武袭缁衣。
理识当朝远，文华振古希。风云神契合，舟楫道心微。
庙堂喜容与，时物递芳菲。御柳垂仙掖，公槐覆礼闱。
昔陪鹓鹭后，今望鸛鹏飞。徒御清风颂，巴歌聊自挥。

卷 97_11 【同李舍人冬日集安乐公主山池】

沈佺期

尝闻天女贵，家即帝宫连。亭插宜春果，山冲太液泉。

桥低乌鹊夜，台起凤凰年。故事犹如此，新图更可怜。
紫岩妆阁透，青嶂妓楼悬。峰夺香炉巧，池偷明镜圆。
梅花寒待雪，桂叶晚留烟。兴尽方投辖，金声还复传。

卷 97_12 【酬苏员外味道夏晚寓直省中见赠】

沈佺期

并命登仙阁，分曹直礼闱。大官供宿膳，侍史护朝衣。
卷幔天河入，开窗月露微。小池残暑退，高树早凉归。
冠剑无时释，轩车待漏飞。明朝题汉柱，三署有光辉。

卷 97_13 【和韦舍人早朝】

沈佺期

阊阖连云起，岩廊拂雾开。玉珂龙影度，珠履雁行来。
长乐宵钟尽，明光晓奏催。一经推旧德，五字擢英才。
俨若神仙去，纷从霄汉回。千春奉休历，分禁喜趋陪。

卷 97_14 【自考功员外授给事中】

沈佺期

南省推丹地，东曹拜琐闱。惠移双管笔，恩降五时衣。

出入宜真选，遭逢每滥飞。器惭公理拙，才谢子云微。
案牍遗常礼，朋僚隔等威。上台行揖让，中禁动光辉。
旭日千门起，初春八舍归。赠兰闻宿昔，谈树隐芳菲。
何幸盐梅处，唯忧对问机。省躬知任重，宁止冒荣非。

卷 97_15 【和元舍人万顷临池玩月戏为新体】

沈佺期

春风摇碧树，秋雾卷丹台。复有相宜夕，池清月正开。
玉流含吹动，金魄度云来。熠燿光如沸，翩跹景若摧。
半环投积草，碎璧聚流杯。夜久平无焕，天晴皎未隤。
镜将池作匣，珠以岸为胎。有美司言暇，高兴独悠哉。
挥翰初难拟，飞名岂易陪。夜光殊在握，了了见沉灰。

卷 97_16 【酬杨给事兼见赠台中】

沈佺期

子云推辨博，公理擅词雄。始自尚书省，旋闻给事中。
言从温室秘，籍向琐闱通。顾我叨郎署，惭无草奏功。
分曹八舍断，解袂五时空。宿昔陪馀论，平生赖击蒙。
神仙应东掖，云雾限南宫。忽枉琼瑶赠，长歌兰渚风。

卷 97_17 【九真山净居寺谒无碍上人】

沈佺期

大士生天竺，分身化日南。人中出烦恼，山下即伽蓝。
小涧香为刹，危峰石作龕。候禅青鸽乳，窥讲白猿参。
藤爱云间壁，花怜石下潭。泉行幽供好，林挂浴衣堪。
弟子哀无识，医王惜未谈。机疑闻不二，蒙昧即朝三。
欲究因缘理，聊宽放弃惭。超然虎溪夕，双树下虚岚。

卷 97_18 【夜游】

沈佺期

今夕重门后，游春得夜芳。月华连昼色，灯影杂星光。
南陌青丝骑，东邻红粉妆。管弦遥辨曲，罗绮暗闻香。
人拥行歌路，车攒斗舞场。经过犹未已，钟鼓出长杨。

卷 97_19 【登瀛州南城楼寄远】

沈佺期

层城起丽谯，凭览出重霄。兹地多形胜，中天宛寂寥。
四荣摩鹳鹤，百拱厉风飙。北际燕王馆，东连秦帝桥。
晴光七郡满，春色两河遥。傲睨非吾土，踌躇适远嚣。
离居欲有赠，春草寄长谣。

卷 97_20 【塞北二首】

沈佺期

虏障天骄起，秦城地脉分。柏坛飞五将，梅吹动三军。
锋刃奔涛色，旌旗焰火文。朔风吹汗漫，飘砾洒轸輶。
海气如秋雨，边峰似夏云。二庭无岁月，百战有功勋。
形影随鱼贯，音书在雁群。归来拜天子，凯乐助南薰。
胡骑犯边埃，风从丑上来。五原烽火急，六郡羽书催。
冰壮飞狐冷，霜浓候雁哀。将军朝授钺，战士夜衔枚。
紫塞金河里，葱山铁勒隈。莲花秋剑发，桂叶晓旗开。
秘略三军动，妖氛百战摧。何言投笔去，终作勒铭回。

卷 97_21 【李员外秦援宅观妓】

沈佺期

盈盈粉署郎，五日宴春光。选客虚前馆，徵声遍后堂。
玉钗翠羽饰，罗袖郁金香。拂黛随时广，挑鬟出意长。
啖歌遥合态，度舞暗成行。巧落梅庭里，斜光映晓妆。

卷 97_22 【送韦商州弼】

沈佺期

会府应文昌，商山镇国阳。闻君监郡史，暂罢尚书郎。

王事嗟相失，人情贵不忘。累年同画省，四海接文场。
点翰芳春色，传杯明月光。故交从此去，遥忆紫芝香。

卷 97_23 【夏日梁王席送张岐州】

沈佺期

秦鸡常下雍，周凤昔鸣岐。此地推雄抚，惟良寄在斯。
家传七豹贵，人擅八龙奇。高传生光彩，长林叹别离。
天人开祖席，朝采候征麾。翠帟当郊敞，彤幃向野披。
芃芃秋麦盛，苒苒夏条垂。奏计何时入，台阶望羽仪。

卷 97_24 【夏日都门送司马员外逸客孙员外侄北征】

沈佺期

二庭追虏骑，六月动周师。庙略天人授，军麾相国持。
复言征二妙，才命重当时。画省连征橐，横门共别词。
云迎出塞马，风卷度河旗。计日方夷寇，旋闻杖杜诗。

卷 97_25 【送卢管记仙客北伐】

沈佺期

羽檄西北飞，交城日夜围。庙堂盛征选，戎幕生光辉。

雁行度函谷，马首向金微。湛湛山川暮，萧萧凉气稀。
饑途予悯默，赴敌子英威。今日杨朱泪，无将洒铁衣。

卷 97_26 【移禁司刑】

沈佺期

畴昔参乡赋，中年忝吏途。丹唇曾学史，白首不成儒。
天子开昌箴，群生偶大炉。散材仍葺厦，弱羽遽抟扶。
宠迈乘轩鹤，荣过食稻鳬。何功游画省，何德理黄枢。
吊影惭非据，倾心事远图。盗泉宁止渴，恶木匪投躯。
任直翻多毁，安身遂少徒。一朝逢纠谬，三省竟无虞。
白简初心屈，黄纱始望孤。患平终不怒，持劾每相驱。
埋剑谁当辨，偷金以自诬。诱言虽委答，流议亦真符。
首夏方忧圉，高秋独向隅。严城看照耀，圆户对蜘蛛。
累饷唯妻子，披冤是友于。物情牵倚伏，人事限荣枯。
门客心谁在，邻交迹倘无。抚襟双涕落，危坐日忧趋。
圣旨垂明德，冤囚岂滥诛。会希恩免理，终望罪矜愚。
司寇宜哀狱，台庭幸恤辜。汉皇虚诏上，容有报恩珠。

卷 97_27 【入鬼门关】

沈佺期

昔传瘴江路，今到鬼门关。土地无人老，流移几客还。

自从别京洛，颓鬓与衰颜。夕宿含沙里，晨行冈路间。
马危千仞谷，舟险万重湾。问我投何地，西南尽百蛮。

卷 97_28 【三日独坐驩州思忆旧游】

沈佺期

两京多节物，三日最遨游。丽日风徐卷，香尘雨暂收。
红桃初下地，绿柳半垂沟。童子成春服，宫人罢射鞬。
禊堂通汉苑，解席绕秦楼。束皙言谈妙，张华史汉遒。
无亭不驻马，何浦不横舟。舞簫千门度，帷屏百道流。
金丸向鸟落，芳饵接鱼投。濯秽怜清浅，迎祥乐献酬。
灵龟陈欲弃，神药曝应休。谁念招魂节，翻为御魅囚。
朋从天外尽，心赏日南求。铜柱威丹徼，朱崖镇火陬。
炎蒸连晓夕，瘴疠满冬秋。西水何时贷，南方讵可留。
无人对炉酒，宁缓去乡忧。

卷 97_29 【从驩州廨宅移住山间水亭赠苏使君】

沈佺期

遇坎即乘流，西南到火洲。鬼门应苦夜，瘴浦不宜秋。
岁贷胸穿老，朝飞鼻饮头。死生离骨肉，荣辱间朋游。
弃置一身在，平生万事休。鹰鹯遭误逐，豺虎怯真投。
忆昨京华子，伤今边地囚。愿陪鹦鹉乐，希并鹧鸪留。

日月渝乡思，烟花换客愁。幸逢苏伯玉，回借水亭幽。
山柏张青盖，江蕉卷绿油。乘闲无火宅，因放有渔舟。
适越心当是，居夷迹可求。古来尧舜舜，何必罪驩兜。

卷 97_30 【赦到不得归题江上石】

沈佺期

家住东京里，身投南海西。风烟万里隔，朝夕几行啼。
圣主讴歌洽，贤臣法令齐。忽闻铜柱使，走马报金鸡。
弃市沾皇渥，投荒漏紫泥。魂疲山鹤路，心醉跼鸢溪。
天鉴诛元恶，宸慈恤远黎。五方思寄刃，万姓喜然脐。
自幼输丹恳，何尝玷白圭。承言窜遐魅，雪枉间深狴。
坟垄无由谒，京华岂重跻。炎方谁谓广，地尽觉天低。
百卉杂殊怪，昆虫理赖睽。闭藏元不蛰，摇落反生萋。
疴瘴因兹苦，穷愁益复迷。火云蒸毒雾，阳雨濯阴霓。
周乘安交趾，王恭辑画题。少宽穷涸鲋，犹慙触藩羝。
配宅邻州廨，斑苗接野畦。山空闻斗象，江静见游犀。
翰墨思诸季，裁缝忆老妻。小儿应离襦，幼女未攀笄。
梦蝶翻无定，蓍龟讵有倪。谁能竟此曲，曲尽气酸嘶。

卷 97_31 【答魍魅代书寄家人】

沈佺期

魍魅来相问，君何失帝乡。龙钟辞北阙，蹭蹬守南荒。
览镜怜双鬓，沾衣惜万行。抱愁那去国，将老更垂裳。

影答余他岁，恩私宦洛阳。三春给事省，五载尚书郎。
黄阁游鸾署，青缣御史香。扈巡行太液，陪宴坐明光。
渭北升高苑，河南祓禊场。烟花恒献赋，泉石每称觞。
暇日从休浣，高车映道傍。迎宾就丞相，选士谒昭王。
侍宠言犹得，承欢谓不忘。一朝贻厚谴，五宅竟同防。
凶竖曾驱策，权豪岂易当。款颜因侍从，接武在文章。
且惧威非_虎，宁知心是狼。身犹纳履误，情为覆盆伤。
可叹缘成业，非关行昧藏。喜逢今改旦，正朔复归唐。
河谿随龙马，天书逐凤凰。朝容欣旧则，宸化美初纲。
告善雕旌建，收冤锦旆张。宰臣更献纳，郡守各明扬。
礼乐移三统，舟车会八方。云沙降白遂，秦陇献烧当。
三赦重天造，千推极国详。大招思复楚，于役限维桑。
涨海缘真腊，崇山压古棠。雕题飞栋宇，儋耳间衣裳。
伏枕神馀劣，加餐力未强。空庭游翡翠，穷巷倚桃榔。
缘体分殊昔，回眸宛异常。吉凶恒委郑，年寿会询唐。
家本传清白，官移重挂床。上京无薄产，故里绝穷庄。
碧玉先时费，苍头此自将。兴言叹家口，何处待赢粮。
计吏从都出，传闻大小康。降除沾二弟，离拆已三房。
剑外悬销骨，荆南预断肠。音尘黄耳间，梦想白眉良。
复此单栖鹤，衔雏愿远翔。何堪万里外，云海已溟茫。
戚属甘胡越，声名任秕糠。由来休愤命，命也信苍苍。
独坐寻周易，清晨咏老庄。此中因悟道，无问入猖狂。

卷 97_32 【度安海入龙编】

沈佺期

我来交趾郡，南与贯胸连。四气分寒少，三光置日偏。

尉佗曾驭国，翁仲久游泉。邑屋遗甿在，鱼盐旧产传。
越人遥捧翟，汉将下看鸢。北斗崇山挂，南风涨海牵。
别离频破月，容鬓骤催年。昆弟推由命，妻孥割付缘。
梦来魂尚扰，愁委疾空缠。虚道崩城泪，明心不应天。

卷 97_33 【从崇山向越常】

沈佺期

朝发崇山下，暮坐越常阴。西从杉谷度，北上竹溪深。
竹溪道明水，杉谷古崇岑。差池将不合，缭绕复相寻。
桂叶藏金屿，藤花闭石林。天窗虚的的，云窦下沉沉。
造化功偏厚，真仙迹每临。岂徒探怪异，聊欲缓归心。

卷 97_34 【哭苏眉州崔司业二公】

沈佺期

涣汗天中发，伶俜海外旋。长沙遇太守，问旧几人全。
国宝亡双杰，天才丧两贤。大名齐弱岁，高德并中年。
礼乐羊叔子，文章王仲宣。相看尚玄鬓，相次入黄泉。
流放蛮陬阔，乡关帝里偏。亲朋云雾拥，生死岁时传。
崔昔挥宸翰，苏尝济巨川。绛衣陪下列，黄阁谬差肩。
及此俱冥昧，云谁叙播迁。隼舆怀旧辙，鳢馆想虚筵。
家爱方休杵，皇慈更撤县。铭旌西蜀路，骑吹北邙田。

陇树应秋矣，江帆故杳然。罢琴明月夜，留剑白云天。
涕泗湘潭水，凄凉衡峤烟。古来修短分，神理竟难筌。

卷 97_35 【哭道士刘无得】

沈佺期

闻有玄都客，成仙不易祈。蓬莱向清浅，桃杏欲芳菲。
缩地黄泉出，升天白日飞。少微星夜落，高掌露朝晞。
吐甲龙应出，衔符鸟自归。国人思负局，天子惜被衣。
花月留丹洞，琴笙合翠微。嗟来子桑扈，尔独返于几。

卷 97_36 【寒食】

沈佺期

普天皆灭焰，匝地尽藏烟。不知何处火，来就客心然。

卷 97_37 【回波词】

沈佺期

回波尔时佺期，流向岭外生归。
身名已蒙齿录，袍笏不复牙绯。

卷 97_38 【上巳日祓禊渭滨应制】

沈佺期

宝马香车清渭滨，红桃碧柳禊堂春。
皇情尚忆垂竿佐，天祚先呈捧剑人。

卷 97_39 【奉和幸韦嗣立山庄应制】

沈佺期

东山朝日翠屏开，北阙晴空彩仗来。
喜遇天文七曜动，少微今夜近三台。

卷 97_40 【夜宴安乐公主宅】

沈佺期

濯龙门外主家亲，鸣凤楼中天上人。
自有金杯迎甲夜，还将绮席代阳春。

卷 97_41 【苑中遇雪应制】

沈佺期

北阙彤云掩曙霞，东风吹雪舞仙家。

琼章定少千人和，银树长芳六出花。

卷 97_42 【饒唐永昌（一作饒唐郎中洛阳令）】

沈佺期

洛阳旧有神明宰，辇毂由来天地中。
餘邑政成何足贵，因君取则四方同。

卷 97_43 【獄中聞駕幸長安二首】

沈佺期

傳聞聖旨向秦京，誰念羈囚滯洛城。
扈從由來是方朔，為申冤氣在長平。

無事今朝來下獄，誰期十月是橫河。
君看鷹隼俱堪擊，為報蜘蛛收網羅。

卷 97_44 【邙山】

沈佺期

北邙山上列墳塋，萬古千秋對洛城。

· 全唐诗 ·

城中日夕歌钟起，山上唯闻松柏声。

卷 97_45 【句】

沈佺期

周原五稼起，云海百川归。愿此零陵燕，长随征旆飞。
(《春雨》。《诗式》)

第九十八卷

卷 98_1 【陪张燕公登南楼】

赵冬曦

抑郁何以欢，阴氛亦登望。孤岛轻雾里，行舟白波上。
目劳西北云，心醉东南嶂。昔日青溪子，胡然此无状。

卷 98_2 【酬燕公出湖见寄】

赵冬曦

纶綍有成命，旌麾不可攀。湘川朝目断，荆阙夕波还。
果枉东瞻唱，兴言夕放闲。携琴仙洞中，置酒澗湖上。
芳景恣行乐，谪居忽如忘。聚散本相因，离情自悲怅。
鸾翮非常戢，鹏天会昭旷。永怀宛洛游，曾是弹冠望。

卷 98_3 【奉和张燕公早霁南楼】

赵冬曦

方曙跻南楼，凭轩肆遐瞩。物华荡暄气，春景媚晴旭。

川霁湘山孤，林芳楚郊缦。列岩重叠翠，远岸逶迤绿。
风帆摩天垠，鱼艇散弯曲。鸿归鹤舞送，猿叫莺声续。
群动皆熙熙，噫予独羁束。常钦才子意，忌鵬伤踳跼。
雅尚骚人文，怀沙何迫促。未知二贤意，去矣从所欲。

卷 98_4 【邕湖作】

赵冬曦

三湖返入两山间，畜作澌湖弯复弯。暑雨奔流潭正满，
微霜及潦水初还。水还波卷溪潭涸，绿草芊芊岸崭岿。
适来飞棹共回旋，已复扬鞭恣行乐。道旁耆老步跄跄，
楚言兹事不知年。试就湖边披草径，莫疑东海变桑田。
君讶今时尽陵陆，我看明岁更沦涟。来今自昔无终始，
人事回环常若是。应思阙下声华日，谁谓江潭旅游子。
初贞正喜固当然，往蹇来誉宜可俟。盈虚用舍轮舆旋，
勿学灵均远问天。

卷 98_5 【和燕公岳州山城】

赵冬曦

为吏恩犹旧，投沙惠此蒙。江边悠尔处，洒上宛然同。
访道精言合，论经大义通。鸣琴有真气，况已沐清风。

卷 98_6 【和尹懋秋夜游澱湖二首】

赵冬曦

政理常多暇，方舟此溯洄。吹笙虚洞答，举楫便风催。
山暗云犹辨，潭幽月稍来。清溪无数曲，未尽莫先回。

烟霭夕微蒙，幽湾赏未穷。舫舟待初月，褰幌招远风。
鹤声聒前浦，渔火明暗丛。东山云壑意，不谓尔来同。

卷 98_7 【陪燕公游澱湖上寺】

赵冬曦

江外多山水，招要步马来。琴将天籁合，酒共鸟声催。
岩坐攀红药，溪行爱绿苔。所怀非此地，游望亦裴回。

卷 98_8 【答张燕公翻著葛巾见呈之作】

赵冬曦

美酒值芳春，醒馀气益真。降欢时倒履，乘兴偶翻巾。
徐榻思方建，左车理自均。傲然歌一曲，一醉濯缨人。

卷 98_9 【奉答燕公】

赵冬曦

语别意凄凄，零陵湘水西。佳人金谷返，爱子洞庭迷。
旧馆逢花发，他山值鸟啼。江天千里望，谁见绿蘋齐。

卷 98_10 【奉和圣制同二相已下群官乐游园宴】

赵冬曦

爽垲三秦地，芳华二月初。酺承奠璧罢，宴是合钱馀。
柳翠垂堪结，桃红卷欲舒。从容会鹄鹭，延曼戏龙鱼。
喜气流云物，欢声浹里闾。圣恩将报厚，请述记言书。

卷 98_11 【奉和圣制答张说扈从南出雀鼠谷】

赵冬曦

轩辕应顺动，力牧正趋陪。道合殷为砺，时行楚有材。
省方西礼设，振旅北京回。地理分中壤，天文照上台。
寒依汾谷去，春入晋郊来。窃比康衢者，长歌仰大哉。

卷 98_12 【奉和圣制送张说上集贤学士赐宴赋得莲字】

赵冬曦

浅术方观海，深恩忽见天。学开丹殿籍，名与石渠贤。
良辅膺休命，微生谬采甄。春馀仍哢鸟，夏近未舒莲。
笺札来宸禁，衣冠集诏筵。史臣知醉德，欲记升中年。

卷 98_13 【奉答燕公】

赵冬曦

谁道零陵守，东过此地游。友僚同省阁，昆弟接荆州。
我逐江潭雁，君随海上鸥。屡伤神气阻，久别鬓毛秋。
疑岭春应遍，阳台雨欲收。主人情未尽，高驾少淹留。

卷 98_14 【陪张燕公行郡竹篱】

赵冬曦

良臣乃国宝，麾守去承明。外户人无闭，浮江兽已行。
随来晋盗逸，民化蜀风清。郛郭从彝典，州闾荷德声。
小人投天涯，流落巴丘城。所赖中和作，优游凿与耕。

卷 98_15 【和燕公别灊湖】

赵冬曦

南湖美泉石，君子玩幽奇。湾澳陪临泛，岩岨共践窥。
秋风赆桂竦，春景绿杨垂。郢路委分竹，湘滨拥去麾。
枉帆怀胜赏，留景惜差池。水木且不弃，情由良可知。

卷 98_16 【奉酬燕公见归田赋垂赠之作】

赵冬曦

穷鸟婴笼缀，孤飞任播迁。鹪鹩王佐用，复此挫冲天。
楚云何掩郁，湘水亦回遄。怀哉愧木雁，忽尔枉兰荃。
愈疾同枚叔，销忧比仲宣。归途书可畏，弱操石犹坚。
覆载虽云广，涔阳直块然。

卷 98_17 【和张燕公耗磨日饮（一作张说诗）】

赵冬曦

上月今朝减，流传耗磨辰。还将不事事，同醉俗中人。
春来半月度，俗忌一朝闲。不酌他乡酒，无堪对楚山。

卷 98_18 【奉陪张燕公登南楼】

尹懋

君子每垂眷，江山共流眄。水远林外明，岩近雾中见。
终日西北望，何处是京县。屡登高春台，徒使泪如霰。

卷 98_19 【秋夜陪张丞相赵侍御游澠湖二首】

尹懋

熊轼巴陵地，鹢舟湘水浔。江山与势远，泉石自幽深。
杳霭入天壑，冥茫见道心。超然无俗事，清宴有空林。

江上饶奇山，巘罗云水间。风和树色杂，苔古石文斑。
巴俗将千滢，澠湖凡几湾。嬉游竟不尽，乘月泛舟还。

卷 98_20 【同燕公泛洞庭】

尹懋

风光淅淅草中飘，日彩荧荧水上摇。
幸奏潇湘云壑意，山旁容与动仙桡。

卷 98_21 【奉答燕公】

王琬

郡远途且艰，宜悲良自得。胡为心独尔，惠好在南国。
亦既清颜披，罔然良愿克。与君兰时会，群物如藻饰。
烟景惜欣赏，云山起翰墨。接艺奇思微，偶谈玄言直。

永日不知倦，逾旬犹谓亟。如何酌离尊，移棹巴城侧。
浦口劳长望，舟中独太息。疾风吹飞帆，倏忽南与北。
目尽不复见，怀哉无终极。唯当衡峰上，遥辨湖水色。

卷 98_22 【美女篇】

王琬

东邻美女实名倡，绝代容华无比方。浓纤得中非短长，
红素天生谁饰妆。桂楼椒阁木兰堂，绣户雕轩文杏梁。
屈曲屏风绕象床，菱蕤翠帐缀香囊。玉台龙镜洞彻光，
金炉沉烟酷烈芳。遥闻行佩音锵锵，含娇欲笑出洞房。

二八三五闺心切，褰帘卷幔迎春节。清歌始发词怨咽，
鸣琴一弄心断绝。借问哀怨何所为，盛年情多心自悲。
须臾破颜倏敛态，一悲一喜并相宜。何能见此不注心，
惜无媒氏为传音。可怜盈盈直千金，谁家君子为藁砧。

卷 98_23 【自荆湖入朝至岳阳奉别张燕公】

王琬

五载朝天子，三湘逢旧僚。扁舟方辍棹，清论遂终朝。
远树烟间没，长江地际摇。帝城驰梦想，归帆满风飙。

卷 98_24 【游灊湖上寺】

王琬

春山临远壑，水木自幽清。夙昔怀微尚，兹焉一放情。
云间听弄鸟，烟上摘初英。地僻方无闷，逾知道思精。

卷 98_25 【和张燕公湘中九日登高】

阴行先

重阳初启节，无射正飞灰。寂寞风蝉至，连翩霜雁来。
山棠红叶下，岸菊紫花开。今日桓公座，多愧孟嘉才。

卷 98_26 【奉别张岳州说二首（一作答张燕公岳州宴别）】

王熊

长沙辞旧国，洞庭逢故人。薰兰敦久要，披雾转相亲。

岁月空嗟老，江山不惜春。忽闻黄鹤曲，更作白头新。

平生共风月，倏忽间山川。不期交淡水，暂得款忘年。
兴逸方罢钓，帆开欲解船。离心若危旆，朝夕为君悬。

卷 98_27 【入朝别张燕公】

梁知微

华容佳山水，之子厌承明。符竹纡小郡，江湖被德声。
三年计吏入，路指巴丘城。鳧舟才结缆，驺驾已相迎。
别离他乡酒，委曲故人情。孤屿早烟薄，长波晚气清。
辛勤方远骛，胜赏屡难并。回瞻洞庭浦，日暮愁云生。

卷 98_28 【桐竹赠张燕公】

李伯鱼

北竹青桐北，南桐绿竹南。竹林君早爱，桐树我初贪。
凤栖桐不愧，凤食竹何惭。栖食更如此，馀非凤所堪。

卷 98_29 【正朝上左相张燕公】

杨重玄

岁去愁终在，春还命不来。长吁问丞相，东阁几时开。

卷 98_30 【道峡似巫山】

朱使欣

江如晓天静，石似暮云张。征帆一流览，宛若巫山阳。
楚客思归路，秦人谪异乡。猿鸣孤月夜，再使泪沾裳。

第九十九卷

卷 99_1 【巫山高（一作沈佺期诗）】

张循之

巫山高不极，合沓状奇新。暗谷疑风雨，阴崖若鬼神。
月明三峡晓，潮满九江春。为问阳台客，应知入梦人。

卷 99_2 【送泉州李使君之任】

张循之

傍海皆荒服，分符重汉臣。云山百越路，市井十洲人。
执玉来朝远，还珠入贡频。连年不见雪，到处即行春。

卷 99_3 【长门怨（一作张修之诗）】

张循之

长门落景尽，洞房秋月明。玉阶草露积，金屋网尘生。

妾妒今应改，君恩惜未平。寄语临邛客，何时作赋成。

卷 99_4 【巫山】

张循之

流景一何速，年华不可追。解佩安所赠，怨咽空自悲。

卷 99_5 【送王汶宰江阴】

张循之

郡北乘流去，花间竟日行。海鱼朝满市，江鸟夜喧城。
让酒非关病，援琴不在声。应缘五斗米，数日滞渊明。

卷 99_6 【婺州留别邓使君】

张循之

西掖驰名久，东阳出守时。江山婺女分，风月隐侯诗。
别恨双溪急，留欢五马迟。回舟映沙屿，未远剩相思。

卷 99_7 【祭汾阴乐章 · 太和】

王峻

於穆圣皇，六叶重光。太原刻颂，后土疏场。
宝鼎呈符，歆云孕祥。礼乐备矣，降福穰穰。

卷 99_8 【大堤曲】

张柬之

南国多佳人，莫若大堤女。玉床翠羽帐，宝袜莲花距。
魂处自目成，色授开心许。迢迢不可见，日暮空愁予。

卷 99_9 【东飞伯劳歌】

张柬之

青田白鹤丹山凤，婺女姮娥两相送。谁家绝世绮帐前，
艳粉红脂映宝钿。窈窕玉堂褰翠幕，参差绣户悬珠箔。
绝世三五爱红妆，冶袖长裙兰麝香。春去花枝俄易改，
可叹年光不相待。

卷 99_10 【出塞】

张柬之

侠客重恩光，骢马饰金装。瞥闻传羽檄，驰突救边荒。
歙野山川动，嚣天旌旆扬。吴钩明似月，楚剑利如霜。
电断冲胡塞，风飞出洛阳。转战磨笄俗，横行戴斗乡。
手擒郅支长，面缚谷蠡王。将军占太白，小妇怨流黄。
骀褭青丝骑，娉婷红粉妆。三春莺度曲，八月雁成行。
谁堪坐愁思，罗袖拂空床。

卷 99_11 【与国贤良夜歌二首】

张柬之

柳台临新堰，楼堞相重复。窈窕凤凰姝，倾城复倾国。
杏间花照灼，楼上月裴回。带娇移玉柱，含笑捧金杯。

卷 99_12 【咏屏风】

袁恕己

绮阁云霞满，芳林草树新。鸟惊疑欲曙，花笑不关春。

山对弹琴客，溪留垂钓人。请看车马客，行处有风尘。

卷 99_13 【书怀】

刘幽求

心为明时尽，君门尚不容。田园迷径路，归去欲何从。

卷 99_14 【流所赠张锡】

章玄同

黄叶因风下，甘从洛浦隈。白云何所为，还出帝乡来。

卷 99_15 【临高台】

王易从

汉主事祁连，良人在高阙。空台寂已暮，愁坐变容发。
泛艳春幌风，裴回秋户月。可怜军书断，空使流芳歇。

卷 99_16 【初出京邑有怀旧林】

卢僎

赋生期独得，素业守微班。外忝文学知，鸿渐鹓鹭间。

内倾水木趣，筑室依近山。晨趋天日晏，夕卧江海闲。

松风生坐隅，仙禽舞亭湾。曙云林下客，霁月池上颜。
虽曰坐郊园，静默非人寰。时步苍龙阙，宁异白云关。

语济岂时顾，默善忘世攀。世网余何触，天涯谪南蛮。
回首思洛阳，喟然悲贞艰。旧林日夜远，孤云何时还。

卷 99_17 【稍秋晓坐阁，遇舟东下扬州，即事寄上族父江
阳令】

卢僎

虎啸山城晚，猿鸣江树秋。红林架落照，青峡送归流。
归流赴淮海，征帆下扬州。族父江阳令，盛业继前修。

文掩崔亭伯，德齐陈太丘。时哉惜未与，千载且为俦。
忆昔山阳会，长怀东上游。称觴阮林下，赋雪谢庭幽。

道浓礼自略，气舒文转遒。高情薄云汉，酣态坐芳洲。
接席复连轡，出入陪华輶。独善与兼济，语默奉良筹。

岁月欢无已，风雨暗飕飕。掌宪时持节，为邦邈海头。
子人惠虽树，苍生望且留。微躬趋直道，神甸忝清猷。

仙台适西步，蛩微忽南浮。宇内皆安乐，天涯独远投。

忠信徒坚仗，神明岂默酬。观生海漫漫，稽命天悠悠。

云昏巴子峡，月远吴王楼。怀昔明不寐，悲令岁属周。
喟无排云翮，暂得抒离忧。空洒沾红泪，万里逐行舟。

卷 99_18 【让帝挽歌词二首】

卢僎

泰伯玄风远，延州德让行。阖棺追大节，树羽册鸿名。
地户迎天仗，皇阶失帝兄。还闻汉明主，遗剑泣东平。

朝天驰马绝，册帝□宫祖。恍惚陵庙新，萧条池馆古。
万化一朝空，哀乐此路同。西园有明月，修竹韵悲风。

卷 99_19 【十月梅花书赠】

卢僎

君不见巴乡气候与华别，年年十月梅花发。
上苑今应雪作花，宁知此地花为雪。自从迁播落黔巴，
三见江上开新花。故园风花虚洛汭，穷峡凝云度岁华。
花情纵似河阳好，客心倍伤边候早。春候飒惊楼上梅，
霜威未落江潭草。江水侵天去不还，楼花覆帘空坐攀。
一向花前看白发，几回梦里忆红颜。红颜白发云泥改，

何异桑田移碧海。却想华年故国时，唯馀一片空心在。
空心吊影向谁陈，云台仙阁旧游人。傥知巴树连冬发，
应怜南国气长春。

卷 99_20 【岁晚还京台望城阙成口号先赠交亲】

卢僎

紫陌开行树，朱城出晚霞。犹怜惯去国，疑是梦还家。
风弱知催柳，林青觉待花。交亲望归骑，几处拥年华。

卷 99_21 【送苏八给事出牧徐州用芳韵】

卢僎

金鼎属元方，琐闼连季常。畏盈聊出守，分命乃维良。
晓骑辞朝远，春帆向楚常。贤哉谦自牧，天下咏馀芳。

卷 99_22 【上幸皇太子新院应制】

卢僎

佳气晓葱葱，乾行入震宫。前星迎北极，少海被南风。
视膳铜楼下，吹笙玉座中。训深家以正，义举俗为公。
父子成钊合，君臣禹启同。仰天歌圣道，犹愧乏雕虫。

卷 99_23 【奉和李令扈从温泉宫赐游骊山韦侍郎别业】

卢僎

风后轩皇佐，云峰谢客居。承恩来翠岭，缔赏出丹除。
飞盖松溪寂，清笳玉洞虚。窥岩详雾豹，过水略泉鱼。
乡入无何有，时还上古初。伊皋羞过狭，魏丙服粗疏。
白雪缘情降，青霞落卷舒。多惭郎署在，辄继国风馀。

卷 99_24 【季冬送户部郎中使黔府选补】

卢僎

握镜均荒服，分衡得大同。征贤一台上，补吏五谿中。
雨露将天泽，文章播国风。汉庭睎直谅，楚峡望清通。
马逐霜鸿渐，帆沿晓月空。还期凤池拜，照耀列星宫。

卷 99_25 【途中口号（一作郭向诗）】

卢僎

抱玉三朝楚，怀书十上秦。年年洛阳陌，花鸟弄归人。

卷 99_26 【南望楼】

卢僎

去国三巴远，登楼万里春。伤心江上客，不是故乡人。

卷 99_27 【临川送别】

卢僎

秋郊日半隐，野树烟初映。风水正萧条，那堪动离咏。

卷 99_28 【题殿前桂叶】

卢僎

桂树生南海，芳香隔楚山。今朝天上见，疑是月中攀。

卷 99_29 【奉和受图温洛应制】

牛凤及

八神扶玉辇，六羽警瑶谿。戒道伊川北，通津涧水西。

· 全唐诗 ·

御图开洛匱，刻石与天齐。瑞日波中上，仙禽雾里低。
微臣矫羽翮，抃舞接鸾鷖。

第一百卷

卷 100_1 【雅琴篇】

司马逸客

亭亭峰阳树，落落千万寻。独抱出云节，孤生不作林。
影摇绿波水，彩绚丹霞岑。直干思有托，雅志期所任。
匠者果留盼，雕斫为雅琴。文以楚山玉，错以昆吾金。
虬凤吐奇状，商徵含清音。清音雅调感君子，
一抚一弄怀知己。不知钟期百年馀，还忆朝朝几千里。
马卿台上应芜没，阮籍帷前空已矣。山情水意君不知，
拂匣调弦为谁理。调弦拂匣倍含情，况复空山秋月明。
陇水悲风已呜咽，离鹍别鹤更凄清。将军塞外多奇操，
中散林间有正声。正声谐风雅，欲竟此曲谁知者。
自言幽隐乏先容，不道人物知音寡。谁能一奏和天地，
谁能再抚欢朝野。朝野欢娱乐未央，车马骈阗盛彩章。
岁岁汾川事箫鼓，朝朝伊水听笙簧。窈窕楼台临上路，
妖娆歌舞出平阳。弹弦本自称仁祖，吹管由来许季长。
犹怜雅歌淡无味，渌水白云谁相贵。还将逸词赏幽心，
不觉繁声论远意。传闻帝乐奏钧天，傥冀微躬备五弦。
愿持东武宫商韵，长奉南熏亿万年。

卷 100_2 【三妇艳】

王绍宗

大妇能调瑟，中妇咏新诗。小妇独无事，花庭曳履綦。
上客且安坐，春日正迟迟。

卷 100_3 【别离怨】

郑遂初

荡子戍辽东，连年信不通。尘生锦步障，花送玉屏风。
只怨红颜改，宁辞玉簪空。系书春雁足，早晚到云中。

卷 100_4 【寒食（一作沈佺期诗）】

李崇嗣

普天皆灭焰，匝地尽藏烟。不知何处火，来就客心然。

卷 100_5 【览镜（一作李嗣宗诗）】

李崇嗣

岁去红颜尽，愁来白发新。今朝开镜匣，疑是别逢人。

卷 100_6 【独愁】

李崇嗣

闻道成都酒，无钱亦可求。不知将几斗，销得此来愁。

卷 100_7 【昭君怨三首】

东方虬

汉道方全盛，朝廷足武臣。何须薄命妾，辛苦事和亲。

掩泪辞丹凤，衔悲向白龙。单于浪惊喜，无复旧时容。

胡地无花草，春来不似春。自然衣带缓，非是为腰身。

卷 100_8 【春雪】

东方虬

春雪满空来，触处似花开。不知园里树，若个是真梅。

卷 100_9 【逸人歌赠李山人】

张楚金

上有尧兮下有由，眠松阳兮漱颍流。其貌古，其心幽，

浩歌一曲兮林壑秋。道险可惊兮人莫用，
乐天知命兮守岩洞。时击磬兮嗟鸣凤，
吾欲知往古之不可追，自悠悠于凡梦。

卷 100_10 【谪南海过始兴广胜寺果上人房（一作过韶州广界寺）】

房融

零落嗟残命，萧条托胜因。方烧三界火，遽洗六情尘。
隔岭天花发，凌空月殿新。谁令乡国梦，终此学分身。

卷 100_11 【咏院中丛竹】

吕太一

擢擢当轩竹，青青重岁寒。心贞徒见赏，箨小未成竿。

卷 100_12 【和吕御史咏院中丛竹】

张纘

闻君庭竹咏，幽意岁寒多。叹息为冠小，良工将奈何。

卷 100_13 【闺怨（《搜玉集》作张炫诗）】

张纘

去年离别雁初归，今夜裁缝萤已飞。
征客近来音信断，不知何处寄寒衣。

卷 100_14 【行路难】

张纘

君不见温家玉镜台，提携抱握九重来。
君不见相如绿绮琴，一抚一拍凤凰音。
人生意气须及早，莫负当年行乐心。荆王奏曲楚妃叹，
曲尽欢终夜将半。朱楼银阁正平生，碧草青苔坐芜漫。
当春对酒不须疑，视日相看能几时。春风吹尽燕初至，
此时自为称君意。秋露萎草鸿始归，此时衰暮与君违。
人生翻覆何常定，谁保容颜无是非。

卷 100_15 【别亲朋】

郑蜀宾

畏途方万里，生涯近百年。不知将白首，何处入黄泉。

第一百零一卷

卷 101_1 【海上作】

宋务光

旷哉潮汐池，大矣乾坤力。浩浩去无际，沄沄深不测。
崩腾翕众流，泱泱环中国。鳞介错殊品，氛霞饶诡色。
天波混莫分，岛树遥难识。汉主探灵怪，秦王恣游陟。
搜奇大壑东，竦望成山北。方术徒相误，蓬莱安可得。
吾君略仙道，至化孚淳默。惊浪晏穷溟，飞航通绝域。
马韩底厥贡，龙伯修其职。粤我遘休明，匪躬期正直。
敢输鹰隼执，以间豺狼忒。海路行已殚，輶轩未皇息。
劳歌玄月暮，旅睇沧浪极。魏阙渺云端，驰心附归翼。

卷 101_2 【回波辞】

李景伯

回波尔时酒后，微臣职在箴规。
侍宴既过三爵，喧哗窃恐非仪。

卷 101_3 【秋晚度废关】

李行言

秦郊平旧险，周德眷遗黎。始闻清夜柝，俄见落封泥。
物色来无限，津途去不迷。空亭谁问马，闲戍但鸣鸡。
山月寒弥净，河风晓更凄。赠言杨伯起，非复是关西。

卷 101_4 【上元】

郭利贞

九陌连灯影，千门度月华。倾城出宝骑，匝路转香车。
烂熳惟愁晓，周游不问家。更逢清管发，处处落梅花。

卷 101_5 【赠皇甫侍御赴都八首】

元希声

东南之美，生于会稽。牛斗之气，蓄于昆溪。
有瑶者玉，连城是齐。有威者凤，非梧不栖。

猗嗟众珍，以况君子。公侯之胄，必复其始。
利器长材，温仪峻峙。

道心惟微，厥用允塞。德辉不泯，而映邦国。
静以有神，动而作则。九皋千里，其声不忒。

粤在古昔，分官厥初。刺邪矫枉，非贤勿居。
棱棱直指，烈烈方书。苍玉鸣珮，绣衣登车。

绰绰夫君，是膺柱下。准绳有望，名器无假。
宠盖伯山，气雄公雅。立朝正色，俟我能者。

载怀朋情，尝接闲宴。好洽昆弟，官联州县。
如彼松竹，春荣冬蒨。柯叶蔼然，下渝霜霰。

会合非我，关山坐违。离鸿晓引，别叶秋飞。
駉骖徐动，尊饯相依。远情超忽，岐路光辉。

金石其心，芝兰其室。言语方间，音徽自溢。
肃子风威，严子霜质。赠言岁暮，以保贞吉。

卷 101_6 【秋庭夜月有怀】

李澄之

游客三江外，单栖百虑违。山川忆处近，形影梦中归。
夜月明虚帐，秋风入捣衣。从来不惯别，况属雁南飞。

卷 101_7 【明月】

李如璧

三五月华流炯光，可怜怀归郢路长。逾江越汉津无梁，
遥遥永夜思茫茫。昭君失宠辞上官，蛾眉婵娟卧毡穹。
胡人琵琶弹北风，汉家音信绝南鸿。昭君此时怨画工，
可怜明月光朦胧。节既秋兮天向寒，沅有漪兮湘有澜，
沅湘纠合淼漫漫。洛阳才子忆长安，可怜明月复团团。
逐臣恋主心愈恪，弃妻思君情不薄。已悲芳岁徒沦落，
复恐红颜坐销铄。可怜明月方照灼，向影倾身比葵藿。

卷 101_8 【严陵祠】

洪子舆

汉主召子陵，归宿洛阳殿。客星今安在，隐迹犹可见。
水石空潺湲，松篁尚葱蒨。岸深翠阴合，川回白云遍。
幽径滋芜没，荒祠幂霜霰。垂钓想遗芳，掇蘋羞野荐。
高风激终古，语理忘荣贱。方验道可尊，山林情不变。

卷 101_9 【度涂山】

寇泚

小年弄文墨，不识戎旅难。一朝事鞞鼓，策马度涂山。

涂山横地轴，万里留荒服。悠悠正旆远，駉骖一何速。
流月挥金戈，惊风折寒木。行闻汉飞将，还向皋兰宿。

卷 101_10【永泰公主挽歌二首】

吴兢

秣华从妇道，釐降适诸侯。河汉天孙合，潇湘帝子游。
关雎方作训，鸣凤自相求。可叹凌波迹，东川遂不流。

舜华徂北渚，宸思结南阳。黻绶哀荣备，游轩宠悼彰。
三川谋远日，八水宅连冈。无复秦楼上，吹箫下凤凰。

第一百零二卷

卷 102_1 【妾薄命】

武平一

有女妖且丽，裴回湘水湄。水湄兰杜芳，采之将寄谁。
瓠犀发皓齿，双蛾颦翠眉。红脸如开莲，素肤若凝脂。
绰约多逸态，轻盈不自持。尝矜绝代色，复恃倾城姿。
子夫前入侍，飞燕复当时。正悦掌中舞，宁哀团扇诗。
洛川昔云遇，高唐今尚违。幽阁禽雀噪，闲阶草露滋。
流景一何速，年华不可追。解佩安所赠，怨咽空自悲。

卷 102_2 【奉和登骊山高顶寓目应制】

武平一

銮輿上碧天，翠帟拖晴烟。绝巘纡仙径，层岩敞御筵。
云披丹凤阙，日下黑龙川。更睹南熏奏，流声入管弦。

卷 102_3 【幸梨园观打球应制】

武平一

令节重遨游，分镳应彩球。骖驔回上苑，蹀躞绕通沟。
影就红尘没，光随赭汗流。赏阑清景暮，歌舞乐时休。

卷 102_4 【奉和幸白鹿观应制】

武平一

玉府凌三曜，金坛驻六龙。彩旒悬倒景，羽盖偃乔松。
玄圃灵芝秀，华池瑞液浓。谬因沾舜渥，长愿奉尧封。

卷 102_5 【侍宴安乐公主新宅应制】

武平一

紫汉秦楼敞，黄山鲁馆开。簪裾分上席，歌舞列平台。
马既如龙至，人疑学凤来。幸兹联棣萼，何以接邹枚。

卷 102_6 【送金城公主适西蕃】

武平一

广化三边静，通烟四海安。还将膝下爱，特副域中欢。

圣念飞玄藻，仙仪下白兰。日斜征盖没，归骑动鸣鸾。

卷 102_7 【奉和幸新丰温泉宫应制】

武平一

秦王登碣石，周后袭昆仑。何必在遐远，方称万宇尊。
我皇顺时豫，星驾动轩辕。雄戟交驰道，清笳度国门。
回舆长乐观，校猎上林园。行漏移三象，连营总八屯。
旌摇鹦鹉谷，骑转凤凰原。绝壁苍苔古，灵泉碧溜温。
参差开水殿，窈窕敞岩轩。丰邑模犹在，骊宫迹尚存。
烟松衔翠幄，雪径绕花源。侍从推玄草，文章召虎贲。
深仁浹夷夏，洪造溢乾坤。谬忝王枚列，多惭雨露恩。

卷 102_8 【奉和幸韦嗣立山庄侍宴应制】

武平一

三光回斗极，万骑肃钩陈。地若游汾水，畋疑历渭滨。
圆塘冰写镜，遥树露成春。弦奏鱼听曲，机忘鸟狎人。
筑岩思感梦，礧石想垂纶。落景摇红壁，层阴结翠筠。
素风纷可尚，玄泽蔼无垠。薄暮清笳动，天文焕紫宸。

卷 102_9 【兴庆池侍宴应制】

武平一

銮輿羽驾直城隈，帐殿旌门此地开。
皎洁灵潭图日月，参差画舸结楼台。
波摇岸影随桡转，风送荷香逐酒来。
愿奉圣情欢不极，长游云汉几昭回。

卷 102_10 【奉和立春内出彩花树应制】

武平一

銮辂青旂下帝台，东郊上苑望春来。
黄莺未解林间啭，红蕊先从殿里开。
画阁条风初变柳，银塘曲水半含苔。
欣逢睿藻光韶律，更促霞觞畏景催。

卷 102_11 【奉和正旦赐宰臣柏叶应制】

武平一

绿叶迎春绿，寒枝历岁寒。
愿持柏叶寿，长奉万年欢。

卷 102_12 【游泾川琴溪】

武平一

环潭澄晓色，叠嶂照秋影。幽致欣所逢，纷虑自兹屏。

卷 102_13 【夜宴安乐公主宅】

武平一

王孙帝女下仙台，金榜珠帘入夜开。
遽惜琼筵欢正洽，唯愁银箭晓相催。

卷 102_14 【奉和圣制幸韦嗣立山庄应制】

武平一

鸣銮赫奕下重楼，羽盖逍遥向一丘。
汉日唯闻白衣宠，唐年更睹赤松游。

卷 102_15 【饯唐永昌】

武平一

闻君墨绶出丹墀，双舄飞来伫有期。
寄谢铜街攀柳日，无忘粉署握兰时。

第一百零三卷

卷 103_1 【奉和圣制立春日侍宴内殿出剪彩花应制】

赵彦昭

剪彩迎初候，攀条故写真。花随红意发，叶就绿情新。
嫩色惊衔燕，轻香误采人。应为熏风拂，能令芳树春。

卷 103_2 【奉和人日清晖阁宴群臣遇雪应制】

赵彦昭

出震乘东陆，凭高御北辰。祥云应早岁，瑞雪候初旬。
庭树千花发，阶蓂七叶新。幸承今日宴，长寿万年春。

卷 103_3 【奉和七夕两仪殿会宴应制】

赵彦昭

青女三秋节，黄姑七日期。星桥度玉珮，云阁掩罗帷。
河气通仙掖，天文入睿词。今宵望灵汉，应得见蛾眉。

卷 103_4 【奉和九日幸临渭亭登高应制】

赵彦昭

秋豫凝仙览，宸游转翠华。呼鹰下鸟路，戏马出龙沙。

紫菊宜新寿，丹萸辟旧邪。须陪长久宴，岁岁奉吹花。

卷 103_5 【奉和九月九日登慈恩寺浮屠应制】

赵彦昭

出豫乘秋节，登高陟梵宫。皇心满尘界，佛迹现虚空。

日月宜长寿，人天得大通。喜闻题宝偈，受记莫由同。

卷 103_6 【安乐公主移入新宅侍宴应制同用开字】

赵彦昭

云物中京晓，天人外馆开。飞桥象河汉，悬榜学蓬莱。

北阙临仙槛，南山送寿杯。一窥轮奂毕，惭恶栋梁材。

卷 103_7 【奉和送金城公主适西蕃应制（一作崔日用诗）】

赵彦昭

圣后经纶远，谋臣计画多。受降追汉策，筑馆许戎和。

俗化乌孙垒，春生积石河。六龙今出饯，双鹤愿为歌。

卷 103_8 【奉和圣制登骊山高顶寓目应制】

赵彦昭

皇情遍九垓，御辇驻昭回。路若随天转，人疑近日来。

河看大禹凿，山见巨灵开。愿扈登封驾，常持荐寿杯。

卷 103_9 【奉和幸白鹿观应制】

赵彦昭

云骖驱半景，星躔坐中天。国诞玄宗圣，家寻碧落仙。

玉杯鸾荐寿，宝算鹤知年。一睹光华旦，欣承道德篇。

卷 103_10 【哭仆射鄂公杨再思】

赵彦昭

两揆光天秩，三朝奉帝熙。何言集大鸟，忽此丧元龟。
坐叹公槐落，行闻宰树悲。壑舟今已去，宁有济川期。

卷 103_11 【人日侍宴大明宫应制】

赵彦昭

宝契无为属圣人，雕輿出幸玩芳辰。平楼半入南山雾，
飞阁旁临东墅春。夹路秣花千树发，垂轩弱柳万条新。
处处风光今日好，年年愿奉属车尘。

卷 103_12 【奉和初春幸太平公主南庄应制】

赵彦昭

主第岩扃驾鹊桥，天门阊阖降鸾镳。历乱旌旗转云树，
参差台榭入烟霄。林间花杂平阳舞，谷里莺和弄玉箫。
已陪沁水追欢日，行奉茅山访道朝。

卷 103_13 【奉和幸安乐公主山庄应制】

赵彦昭

六龙齐轸御朝曦，双鹢维舟下绿池。飞观仰看云外耸，
浮桥直见海中移。灵泉巧凿天孙渚，孝笋能抽帝女枝。
幸愿一生同草树，年年岁岁乐于斯。

卷 103_14 【奉和幸大荐福寺（寺乃中宗旧宅）】

赵彦昭

宝地龙飞后，金身佛现时。千花开国界，万善累皇基。
北阙承行幸，西园属住持。天衣拂旧石，王舍起新祠。
刹凤迎雕辇，幡虹驻彩旗。洞沾小雨润，窃仰大风诗。

卷 103_15 【奉和幸长安故城未央宫应制】

赵彦昭

凤驾移天跸，凭轩览汉都。寒烟收紫禁，春色绕黄图。
旧史遗陈迹，前王失霸符。山河寸土尽，宫观尺椽无。
崇高惟在德，壮丽岂为谟。茨室留皇鉴，熏歌盛有虞。

卷 103_16 【奉和幸韦嗣立山庄侍燕应制】

赵彦昭

贤族唯题里，儒门但署乡。何如表岩洞，宸翰发辉光。
地在兹山曲，家临郤水阳。六龙驻旌罕，四牡耀旂常。

北斗临台座，东山入庙堂。天高羽翼近，主圣股肱良。
野竹池亭气，村花涧谷香。纵然怀豹隐，空愧蹶鹓行。

卷 103_17 【奉和元日赐群臣柏叶应制】

赵彦昭

器乏雕梁器，材非构厦材。但将千岁叶，常奉万年杯。

卷 103_18 【苑中人日遇雪应制】

赵彦昭

始见青云干律吕，俄逢瑞雪应阳春。
今日回看上林树，梅花柳絮一时新。

卷 103_19 【奉和圣制幸韦嗣立山庄应制】

赵彦昭

廊庙心存岩壑中，銮舆瞩在灞城东。
逍遥自在蒙庄子，汉主徒言河上公。

卷 103_20 【秋朝木芙蓉】

赵彦昭

水面芙蓉秋已衰，繁条偏是著花迟。
平明露滴垂红脸，似有朝愁暮落时。

卷 103_21 【侍宴桃花园咏桃花应制】

赵彦昭

红萼竞燃春苑曙，粉茸新吐御筵开。
长年愿奉西王母，近侍惭无东朔才。

第一百零四卷

卷 104_1 【奉和九日幸临渭亭登高应制得馀字】

萧至忠

望幸三秋暮，登高九日初。朱旗巡汉苑，翠帟俯秦墟。
宠极萸房遍，恩深菊酎馀。承欢何以答，万亿奉宸居。

卷 104_2 【奉和九月九日登慈恩寺浮图应制】

萧至忠

天辟三乘后，星舆六轡行。登高凌宝塔，极目遍王城。
神卫空中绕，仙歌云外清。重阳千万寿，率舞颂升平。

卷 104_3 【奉和幸安乐公主山庄应制】

萧至忠

西郊窈窕凤凰台，北渚平明法驾来。匝地金声初度曲，
周堂玉溜好传杯。湾路分游画舟转，岸门相向碧亭开。
微臣此时承宴乐，仿佛疑从星汉回。

卷 104_4 【送张宣赴朔方应制（一作刘宪诗）】

萧至忠

命将择耆年，图功胜必全。光辉万乘饯，威武二庭宣。
中衢横鼓角，旷野蔽旌旃。推食天厨至，投醪御酒传。
凉风过雁苑，杀气下鸡田。分阃恩何极，临岐动睿篇。

卷 104_5 【陪幸长宁公主林亭（一作刘宪诗）】

萧至忠

公主林亭地，清晨降玉舆。画桥飞渡水，仙阁迥临虚。
新晴看蛱蝶，早夏摘芙蕖。文酒娱游盛，忻叨侍从馀。

卷 104_6 【陪幸五王宅（一作刘宪诗）】

萧至忠

北斗枢机任，西京肺腑亲。畴昔王门下，今兹制幸晨。
恩来山水被，圣作管弦新。绕座薰红药，当轩暗绿筠。
摘荷才早夏，听鸟尚馀春。行漏金徒晓，风烟是观津。

卷 104_7 【三会寺应制（一作刘宪诗）】

萧至忠

岩峩仓史台，敞朗绀园开。戒旦壶人警，翻霜羽骑来。
下辇登三袭，褰旒望九垓。林披馆陶榜，水浸昆明灰。
网户飞花缀，幡竿度鸟回。豫游仙唱动，潇洒出尘埃。

卷 104_8 【荐福寺应制（一作刘宪诗）】

萧至忠

地灵传景福，天驾俨钩陈。佳哉藩邸旧，赫矣梵宫新。
香塔鱼山下，禅堂雁水滨。珠幡映白日，镜殿写青春。
甚欢延故吏，大觉拯生人。幸承歌颂末，长奉属车尘。

卷 104_9 【陪游上苑遇雪（一作刘宪诗）】

萧至忠

龙骖晓入望春宫，正逢春雪舞春风。
花光并在天文上，寒气行销御酒中。

卷 104_10 【奉和九日幸临渭亭登高应制得风字】

李迥秀

重九临商节，登高出汉宫。正逢萸实满，还对菊花丛。
霁云开就日，仙藻丽秋风。微臣预在镐，窃抃遂无穷。

卷 104_11 【奉和九月九日登慈恩寺浮图应制】

李迥秀

沙界人王塔，金绳梵帝游。言从祇树赏，行玩菊丛秋。
御酒调甘露，天花拂彩旒。尧年将佛日，同此庆时休。

卷 104_12 【奉和幸安乐公主山庄应制】

李迥秀

诘旦重门闻警跸，传言太主奏山林。是日回輿罗万骑，
此时欢喜赐千金。鹭羽凤箫参乐曲，荻园竹径接帷阴。
手舞足蹈方无已，万年千岁奉薰琴。

卷 104_13 【夜宴安乐公主宅】

李迥秀

金榜岩峣云里开，玉箫参差天际回。
莫惊侧弁还归路，只为平阳歌舞催。

卷 104_14 【奉和九日幸临渭亭登高应制得亭字】

杨廉

远目瞰秦垌，重阳坐灞亭。既开黄菊酒，还降紫微星。
箫鼓谐仙曲，山河入画屏。幸兹陪宴喜，无以效丹青。

卷 104_15 【奉和九月九日登慈恩寺浮图应制】

杨廉

万乘临真境，重阳眺远空。慈云浮雁塔，定水映龙宫。
宝铎含飙响，仙轮带日红。天文将瑞色，辉焕满寰中。

卷 104_16 【奉和九日幸临渭亭登高应制得枝字】

韦安石

重九开秋节，得一动宸仪。金风飘菊蕊，玉露泫萸枝。

睿览八纮外，天文七曜披。临深应在即，居高岂忘危。

卷 104_17 【侍宴旋师喜捷应制】

韦安石

蜂蚁屯夷落，熊罴逐汉飞。忘躯百战后，屈指一年归。

厚眷纾天藻，深慈解御衣。兴酣歌舞出，朝野叹光辉。

卷 104_18 【梁王宅侍宴应制同用风字】

韦安石

梁园开胜景，轩驾动宸衷。早荷承湛露，修竹引薰风。

九酝倾钟石，百兽协丝桐。小臣陪宴镐，献寿奉维嵩。

卷 104_19 【奉和九日幸临渭亭登高应制得明字】

窦希玠

銮輿巡上苑，凤驾瞰层城。御座丹乌丽，宸居白鹤惊。
玉旗萦桂叶，金杯泛菊英。九晨陪圣膳，万岁奉承明。

卷 104_20 【奉和九日幸临渭亭登高应制得臣字】

陆景初

九秋光顺豫，重节霁良辰。登高识汉苑，问道侍轩臣。
菊花浮秬鬯，萸房插缙绅。圣化边陲谧，长洲鸿雁宾。

卷 104_21 【奉和九日幸临渭亭登高应制得日字】

郑南金

重阳玉律应，万乘金輿出。风起韵虞弦，云开吐尧日。
菊花浮圣酒，茱萸挂衰质。欲知恩煦多，顺动观秋实。

卷 104_22 【奉和九日幸临渭亭登高应制得直字】

李咸

重阳乘令序，四野开晴色。日月数初并，乾坤圣登极。
菊黄迎酒泛，松翠凌霜直。游海难为深，负山徒倦力。

卷 104_23 【奉和九日幸临渭亭登高应制得花字】

赵彦伯

九日报仙家，三秋转岁华。呼鹰下鸟路，戏马出龙沙。
簪挂丹萸蕊，杯浮紫菊花。所愿同微物，年年共辟邪。

卷 104_24 【从宴桃花园咏桃花应制（本赵彦昭诗）】

赵彦伯

红萼竞燃春苑曙，葶苈新吐御筵开。
长年愿奉西王宴，近侍惭无东朔才。

卷 104_25 【苑中遇雪应制】

赵彦伯

千钟圣酒御筵披，六出祥英乱绕枝。
即此神仙对琼圃，何烦辙迹向瑶池。

卷 104_26 【奉和九日幸临渭亭登高应制得樽字】

于经野

御气三秋节，登高九曲门。桂筵罗玉俎，菊醴溢芳樽。

遵渚归鸿度，承云舞鹤骖。微臣滥陪赏，空荷圣明恩。

卷 104_27【奉和九日幸临渭亭登高应制得还字】

卢怀慎

时和素秋节，宸豫紫机关。鹤似闻琴至，人疑宴镐还。
旷望临平野，潺湲俯暝湾。无因酬大德，空此愧崇班。

卷 104_28【奉和圣制龙池篇】

卢怀慎

代邸东南龙跃泉，清漪碧浪远浮天。楼台影就波中出，
日月光疑镜里悬。雁沼回流成舜海，龟书荐社应尧年。
大川既济惭为楫，报德空思奉细涓。

第一百零五卷

卷 105_1 【奉和九月九日登慈恩寺浮图应制】

辛替否

洪慈均动植，至德俯深玄。出豫从初地，登高适梵天。
白云飞御藻，慧日暖皇编。别有秋原藿，长倾雨露缘。

卷 105_2 【奉和九月九日登慈恩寺浮图应制】

王景

玉辇移中禁，珠梯览四禅。重阶清汉接，飞窦紫霄悬。
缀叶披天藻，吹花散御筵。无因銮跸暇，俱舞鹤林前。

卷 105_3 【奉和九月九日登慈恩寺浮图应制】

毕乾泰

鹦林花塔后，凤辇顺时游。重九昭皇庆，大千扬帝休。

耆闍妙法阐，王舍睿文流。至德覃无极，小臣歌讴酬。

卷 105_4 【奉和九月九日登慈恩寺浮图应制】

魏瞻

扈跸游玄地，陪仙瞰紫微。似迈铢衣劫，将同羽化飞。
雕戈秋日丽，宝剑晓霜霏。献觞乘菊序，长愿奉天晖。

卷 105_5 【奉和九月九日登慈恩寺浮图应制】

樊忱

净境重阳节，仙游万乘来。插萸登鹳岭，把菊坐蜂台。
十地祥云合，三天瑞景开。秋风词更远，窃抃乐康哉。

卷 105_6 【奉和九月九日登慈恩寺浮图应制】

孙佺

应节萸房满，初寒菊圃新。龙旗焕辰极，凤驾俨香闐。
莲井偏宜夏，梅梁更若春。一忻陪雁塔，还似得天身。

卷 105_7 【奉和九月九日登慈恩寺浮图应制】

李从远

九月从时豫，三乘为法开。中霄日天子，半座宝如来。
摘果珠盘献，攀莢玉辇回。愿将尘露点，遥奉光明台。

卷 105_8 【奉和九月九日登慈恩寺浮图应制】

周利用

山豫乘金节，飞文焕日宫。莢房开圣酒，杏苑被玄功。
塔向三天迥，禅收八解空。叨恩奉兰藉，终愧洽薰风。

卷 105_9 【奉和九月九日登慈恩寺浮图应制】

张景源

飞塔凌霄起，宸游一届焉。金壶新泛菊，宝座即披莲。
就日摇香辇，凭云出梵天。祥氛与佳色，相伴杂炉烟。

卷 105_10 【奉和九月九日登慈恩寺浮图应制】

李恒

宝地邻丹掖，香台瞰碧云。河山天外出，城阙树中分。

睿藻兰英秀，仙杯菊蕊薰。愿将今日乐，长奉圣明君。

卷 105_11 【奉和九月九日登慈恩寺浮图应制】

张锡

九秋霜景净，千门晓望通。仙游光御路，瑞塔迥凌空。
菊彩扬尧日，萸香绕舜风。天文丽辰象，窃抃仰层穹。

卷 105_12 【晦日宴高文学林亭】

张锡

雪尽铜驼路，花照石崇家。年光开柳色，池影泛云华。
赏洽情方远，春归景未赊。欲知多暇日，尊酒渍澄霞。

卷 105_13 【奉和九月九日登慈恩寺浮图应制】

解琬

瑞塔临初地，金舆幸上方。空边有清净，觉处无馨香。
雨霁微尘敛，风秋定水凉。兹辰采仙菊，荐寿庆重阳。

卷 105_14 【晦日宴高氏林亭】

解琬

主第簪裾出，王畿春照华。山亭一以眺，城阙带烟霞。
横堤列锦帐，傍浦驻香车。欢娱属晦节，酩酊未还家。

第一百零六卷

卷 106_1 【侍宴长宁公主东庄应制】

郑愔

公门袭汉环，主第称秦玉。池架祥鳣序，山吹鸣凤曲。
拂席萝薜垂，回舟芰荷触。平阳妙舞处，日暮清歌续。

卷 106_2 【采莲曲】

郑愔

锦楫沙棠舰，罗带石榴裙。绿潭采荷芰，清江日稍曛。
鱼鸟争唼喋，花叶相芬氲。不觉芳洲暮，菱歌处处闻。

卷 106_3 【夜游曲】

郑愔

汉室欢娱盛，魏国文雅遒。许史多暮宿，应陈从夜游。
西园宴公子，北里召王侯。讵似将军猎，空嗟亭尉留。

卷 106_4 【少年行】

郑愔

颍川豪横客，咸阳轻薄儿。田窦方贵幸，赵李新相知。
轩盖终朝集，笙竽此夜吹。黄金盈篋笥，白日忽西驰。

卷 106_5 【中宗降诞日长宁公主满月侍宴应制】

郑愔

春殿猗兰美，仙阶柏树荣。地逢芳节应，时睹圣人生。
月满增祥荚，天长发瑞灵。南山遥可献，常愿奉皇明。

卷 106_6 【奉和幸上官昭容院献诗四首】

郑愔

地轴楼居远，天台阙路赊。何如游帝宅，即此对仙家。
座拂金壶电，池摇玉酒霞。无云秦汉隔，别访武陵花。

尧茨姑射近，汉苑建章连。十五蓂知月，三千桃纪年。
鸾歌随凤吹，鹤舞向鹓弦。更觅琼妃伴，来过玉女泉。

宫掖贤才重，山林高尚难。不言辞辇地，更有结庐欢。

池栋清温燠，岩窗起沍寒。幽亭有仙桂，圣主万年看。

槎流天上转，茅宇禁中开。河鹊填桥至，山熊避槛来。
庭花采菖蓐，岩石步莓苔。愿奉輿图泰，长开锦翰裁。

卷 106_7 【送金城公主适西蕃应制】

郑愔

下嫁戎庭远，和亲汉礼优。笳声出虏塞，箫曲背秦楼。
贵主悲黄鹤，征人怨紫骝。皇情眷亿兆，割念俯怀柔。

卷 106_8 【奉和幸望春宫送朔方大总管张仁亶】

郑愔

御辔下都门，军麾出塞垣。长杨跨武骑，细柳接戎轩。
睿曲风云动，边威鼓吹喧。坐帷将阃外，俱是报明恩。

卷 106_9 【奉和九月九日登慈恩寺浮图应制】

郑愔

涌霄开宝塔，倒影驻仙輿。雁子乘堂处，龙王起藏初。
秋风圣主曲，佳气史官书。愿献重阳寿，承欢万岁馀。

卷 106_10 【铜雀妓】

郑愔

日斜漳浦望，风起邺台寒。玉座平生晚，金尊妓吹阑。
舞馀依帐泣，歌罢向陵看。萧索松风暮，愁烟入井阑。

卷 106_11 【胡笳曲】

郑愔

汉将留边朔，遥遥岁序深。谁堪牧马思，正是胡笳吟。
曲断关山月，声悲雨雪阴。传书问苏武，陵也独何心。

卷 106_12 【折杨柳】

郑愔

青柳映红颜，黄云蔽紫关。忽闻边使出，枝叶为君攀。
舞腰愁欲断，春心望不还。风花滚成雪，罗绮乱斑斑。

卷 106_13 【秋闺】

郑愔

征客向轮台，幽闺寂不开。音书秋雁断，机杼夜蛩催。

虚幌风吹叶，闲阶露湿苔。自怜愁思影，常共月裴回。

卷 106_14 【人日重宴大明宫恩赐彩缕人胜应制】

郑愔

琼殿含光映早轮，玉鸾严跸望初晨。池开冻水仙宫丽，
树发寒花禁苑新。佳气裴回笼细网，残霏淅沥染轻尘。
良时荷泽皆迎胜，穷谷晞阳犹未春。

卷 106_15 【奉和春日幸望春宫】

郑愔

晨跸凌高转翠旌，春楼望远背朱城。忽排花上游天苑，
却坐云边看帝京。百草香心初冒蝶，千林嫩叶始藏莺。
幸同葵藿倾阳早，愿比盘根应候荣。

卷 106_16 【奉和幸三会寺应制】

郑愔

鸟籀遗新阁，龙旂访古台。造书臣颉往，观迹帝羲来。
睿览山川匝，宸心宇宙该。梵音随驻辇，天步接乘杯。

旧苑经寒露，残池问劫灰。散花将捧日，俱喜圣慈开。

卷 106_17 【奉和幸大荐福寺（寺即中宗旧宅）】

郑愔

旧邸三乘辟，佳辰万骑留。兰图奉叶偈，芝盖拂花楼。
国会人王法，宫还天帝游。紫云成宝界，白水作禅流。
雁塔昌基远，鹦林睿藻抽。欣风大风曲，窃预小童讴。

卷 106_18 【同韦舍人早朝】

郑愔

瑞阙龙居峻，宸庭凤掖深。才良寄天綍，趋拜侣朝簪。
飞马看来影，喧车识驻音。重轩轻雾入，洞户落花侵。
闻有题新翰，依然想旧林。同声惭卞玉，谬此托韦金。

卷 106_19 【塞外三首】

郑愔

塞外萧条望，征人此路赊。边声乱朔马，秋色引胡笳。
遥嶂侵归日，长城带晚霞。断蓬飞古戍，连雁聚寒沙。

海暗云无叶，山春雪作花。丈夫期报主，万里独辞家。

荒垒三秋夕，穷郊万里平。海阴凝独树，日气下连营。
戎旆霜旋重，边裘夜更轻。将军犹转战，都尉不成名。
折柳悲春曲，吹笳断夜声。明年汉使返，须筑受降城。

阳鸟南飞夜，阴山北地寒。汉家征戍客，年岁在楼兰。
玉塞朔风起，金河秋月团。边声入鼓吹，霜气下旌竿。
海外归书断，天涯旅鬓残。子卿犹奉使，常向节旄看。

卷 106_20 【春怨】

郑愔

春朝物候妍，愁妇镜台前。风吹数蝶乱，露洗百花鲜。
试出褰罗幌，还来著锦筵。曲中愁夜夜，楼上别年年。
不及随萧史，高飞向紫烟。

卷 106_21 【贬降至汝州广城驿】

郑愔

近郊凭汝海，遐服指江干。尚忆趋朝贵，方知失路难。
曙宫平乐远，秋泽广城寒。岸苇新花白，山梨晚叶丹。
乡关千里暮，岁序四时阑。函塞云间别，旋门雾里看。

夙年追騄骥，暮节仰鹓鸾。疲弩劳垂耳，蹇腾讵矫翰。
将调梅铉实，不正李园冠。荆玉终无玷，随珠忽已弹。
晓装违巩洛，夕梦在长安。北上频伤阮，西征未学潘。
倾车无共辙，同派有殊澜。去去怀知己，何由报一餐。

卷 106_22 【哭郎著作】

郑愔

诗礼康成学，文章贾谊才。已年人得梦，庚日鸟为灾。
书草藏天阁，琴声入夜台。荒阶罗驳藓，虚座网浮埃。
白马宾徒散，青乌陇隧开。空怜门下客，怀旧几迟回。

卷 106_23 【咏黄莺儿】

郑愔

欲转声犹涩，将飞羽未调。高风不借便，何处得迁乔。

卷 106_24 【百舌】

郑愔

百舌鸣高树，弄音无常则。借问声何烦，末俗不尚默。

第一百零七卷

卷 107_1 【奉和圣制送张说上集贤学士赐宴（赋得迎字）】

源乾曜

盛业光书府，征人尽国英。丝纶贤得相，群俊学为名。
宠命垂天锡，崇恩发睿情。熏风清禁籞，文殿述皇明。
日霁庭阴出，池曛水气生。欢娱此无限，诗酒自相迎。

卷 107_2 【奉和御制乾曜与张说宋璟同日上官命宴都堂赐诗】

源乾曜

睿作超千古，湛恩育万人。递迁俱荷泽，同拜忽为邻。
道合徽音畅，芳辰景命新。鼓钟崇享礼，鹄鹭集朝伦。
窃位思官谤，凋容谢木春。惭多无以叙，拙备实难陈。
进绶怀三少，承光尽百身。自当归第日，何幸列宫臣。

卷 107_3 【奉和圣制送张尚书巡边】

源乾曜

匈奴迹河朔，汉地须戎旅。天子择英才，朝端出监抚。
流星下闾阖，宝钺专公辅。礼物生光辉，宸章备恩诩。
有征视矛戟，制胜唯樽俎。彼美何壮哉，桓桓擅斯举。
声华振台阁，功德标文武。奉国知命轻，忘家以身许。
安人在勤恤，保大殚襟腑。此外无异言，同情报明主。

卷 107_4 【禅社首乐章】

源乾曜

灵具醉，杳熙熙。灵将往，眇禋禋。愿明德，吐正词。
烂遗光，流祯祺。

卷 107_5 【奉和圣制送张说赴集贤院学士赐宴赋得虚字】

徐坚

崇文德化洽，新殿集贤初。庸菲参高选，首滥承明庐。
殊私光辅弼，荣送列簪裾。座引中厨饌，杯锡上尊馐。
翠叶浓丹苑，晴空卷碧虚。忝同文史地，愿草登封书。

卷 107_6 【奉和圣制送张说巡边】

徐坚

至德抚遐荒，神兵赴朔方。帝思元帅重，爰择股肱良。
累相承安世，深筹协子房。寄崇专斧钺，礼备设坛场。
鼙鼓喧雷电，戈剑凛风霜。四骝将戒道，十乘启先行。
圣锡加恒数，天文耀宠光。出郊开帐饮，寅饩盛离章。
雨濯梅林润，风清麦野凉。燕山应勒颂，麟阁伫名扬。

卷 107_7 【奉和送金城公主适西蕃应制】

徐坚

星汉下天孙，车服降殊蕃。匣中词易切，马上曲虚繁。
关塞移朱帐，风尘暗锦轩。箫声去日远，万里望河源。

卷 107_8 【饯许州宋司马赴任】

徐坚

旧许星车转，神京祖帐开。断烟伤别望，零雨送离杯。
辞燕依空绕，宾鸿入听哀。分襟与秋气，日夕共悲哉。

卷 107_9 【饯唐永昌】

徐坚

郎官出宰赴伊瀍，征传駸駸灞水前。
此时怅望新丰道，握手相看共黯然。

卷 107_10 【送考功武员外学士使嵩山置舍利塔歌】

徐坚

伊川别骑，灞岸分筵。对三春之花月，览千里之风烟。
望青山兮分地，见白云兮在天。寄愁心于樽酒，
怆离绪于清弦。共握手而相顾，各衔凄而黯然。

卷 107_11 【棹歌行】

徐坚

棹女饰银钩，新妆下翠楼。霜丝青桂楫，兰枻紫霞舟。
水落金陵曙，风起洞庭秋。扣舷过曲浦，飞帆越回流。
影入桃花浪，香飘杜若洲。洲长殊未返，萧散云霞晚。
日下大江平，烟生归岸远。岸远闻潮波，争途游戏多。
因声赵津女，来听采菱歌。

卷 107_12 【送武进郑明府】

徐坚

弦歌试宰日，城阙赏心违。北谢苍龙去，南随黄鹄飞。
夏云海中出，吴山江上微。毗谣岂云远，从此庆缙衣。

卷 107_13 【仪坤庙乐章】

徐坚

於穆清庙，肃雍严祀。合福受釐，介以繁祉。

卷 107_14 【祭汾阴乐章】

源光裕

方丘既膳，嘉飧载谧。斋敬毕诚，陶匏贵质。
秀毕丰荐，芳俎盈实。永永福流，其升如日。

第一百零八卷

卷 108_1 【奉和圣制送张说上集贤学士赐宴（赋得私字）】

李元纁

硕儒延凤沼，金马被鸿私。馥玉趋丹禁，笺花降紫墀。
衔恩倾旨酒，鼓舞咏康时。暂觐群书缉，逾昭盛业丕。
接筵欣有命，擷管愧无词。自惊一何幸，太阳还及葵。

卷 108_2 【绿墀怨】

李元纁

征马噪金珂，嫖姚向北河。绿苔行迹少，红粉泪痕多。
宝屋粘花絮，银筝覆网罗。别君如昨日，青海雁频过。

卷 108_3 【相思怨】

李元纁

望月思氛氲，朱衾懒更熏。春生翡翠帐，花点石榴裙。

燕语时惊妾，莺啼转忆君。交河一万里，仍隔数重云。

卷 108_4 【奉和圣制送张说上集贤学士赐宴（赋得升字）】

裴漼

问道图书盛，尊儒礼教兴。石渠因学广，金殿为贤升。
日月恩光照，风云宠命膺。谋谟言可范，舟楫事斯凭。
宴喜明时洽，光辉湛露凝。大哉尧作主，天下颂歌称。

卷 108_5 【奉和御制旋师喜捷】

裴漼

殊类骄无长，王师示有征。中军才受律，妖寇已亡精。
斩虏还遮塞，绥降更筑城。从来攻必克，天策振奇兵。

卷 108_6 【奉和御制平胡】

裴漼

玄漠圣恩通，由来书轨同。忽闻窥月满，相聚寇云中。
庙略占黄气，神兵出绛宫。将军行逐虏，使者亦和戎。
一举輶輶灭，再麾沙漠空。直将威禁暴，非用武为雄。

饮至明军礼，酬勋锡武功。干戈还载戢，文德在唐风。

卷 108_7 【奉和圣制龙池篇（第十章）】

裴漼

乾坤启圣吐龙泉，泉水年年胜一年。始看鱼跃方成海，
即睹飞龙利在天。洲渚遥将银汉接，楼台直与紫微连。
休气荣光恒不散，悬知此地是神仙。

卷 108_8 【奉和圣制送张说上集贤学士赐宴（赋得宾字）】

刘升

图书应明主，策府宴嘉宾。台曜临东壁，乾光自北辰。
网罗穷象系，述作究天人。圣酒千钟洽，仙厨百味陈。
成山徒可仰，涉海讵知津。幸逢文教盛，还睹颂声新。

卷 108_9 【奉和圣制送张说上集贤学士赐宴（赋得登字）】

萧嵩

帝曰简才能，旌贤在股肱。文章礼一变，礼乐道逾弘。
芸阁英华入，宾门鹓鹭登。恩筵过所望，圣泽实超恒。

夏叶开红药，馀花发紫藤。微臣亦何幸，叨此预文朋。

卷 108_10 【奉和御制左丞相说右丞相璟太子少傅乾曜同日
上官命宴都堂赐诗】

萧嵩

审官思共理，多士属惟唐。历选台庭旧，来熙帝业昌。
入朝师百辟，论道协三光。垂拱咨元老，亲贤辅少阳。
登庸崇礼送，宠德耀宸章。御酒飞觞洽，仙闱雅乐张。
荷恩思有报，陈力愧无良。愿罄公忠节，同心奉我皇。

卷 108_11 【奉和圣制送张说上集贤学士赐宴（赋得西字）】

韦抗

广庭临璧沼，多士侍金闺。英宰文儒叶，明君日月齐。
集贤光首拜，改殿发新题。早夏初移律，馀花尚拂溪。
壶觞接云上，经术引关西。圣德鸿名远，将陪玉检泥。

卷 108_12 【奉和圣制送张说上集贤学士赐宴（赋得催字）】

李嵩

偃武尧风接，崇文汉道恢。集贤更内殿，清选自中台。

佐命留侯业，词华博物才。天厨千品降，御酒百壶催。
鹓鹭方成列，神仙喜暂陪。复欣同拜首，叨此颂良哉。

卷 108_13 【奉和圣制送张说上集贤学士赐宴（赋得华字）】

韦述

修文中禁后，改字令名加。台座征人杰，书坊应国华。
赋诗开广宴，赐酒酌流霞。云散明金阙，池开照玉沙。
掖垣留宿鸟，温树落馀花。谬此天光及，衔恩醉日斜。

卷 108_14 【晚渡伊水】

韦述

悠悠涉伊水，伊水清见石。是时春向深，两岸草如积。
迢递望洲屿，逶迤亘津陌。新树落疏红，遥原上深碧。
回瞻洛阳苑，遽有长山隔。烟雾犹辨家，风尘已为客。
登陟多异趣，往来见行役。云起早已昏，鸟飞日将夕。
光阴逝不借，超然慕畴昔。远游亦何为，归来存竹帛。

卷 108_15 【春日山庄】

韦述

初岁开韶月，田家喜载阳。晚晴摇水态，迟景荡山光。

浦净渔舟远，花飞樵路香。自然成野趣，都使俗情忘。

卷 108_16 【广陵送别宋员外佐越郑舍人还京（一作张谔诗）】

韦述

朱绂临秦望，皇华赴洛桥。文章南渡越，书奏北归朝。
树入江云尽，城衔海月遥。秋风将客思，川上晚萧萧。

卷 108_17 【奉和圣制送张说上集贤学士赐宴（赋得今字）】

陆坚

圣主崇文教，层霄降德音。尊贤泽既厚，式宴宠逾深。
复有夔龙相，良哉简帝心。得人惟迈昔，多士谅推今。
书殿荣光大，儒门喜气临。顾惟诚滥吹，徒此接衣簪。

卷 108_18 【句】

陆坚

风移覃土宇，云上浹群臣。（千秋节应制，《海录碎事》）

卷 108_19 【奉和圣制送张说上集贤学士赐宴（赋得回字）】

程行谏

圣主崇文化，锵锵得盛才。相因归梦立，殿以集贤开。
象系微言阐，诗书至道该。尧尊承帝泽，禹膳自天来。
礼洽欢逾长，风恬暑更回。国朝将舜颂，同是一康哉。

卷 108_20 【奉和圣制送张说上集贤学士赐宴（赋得风字）】

褚琬

讲习延东观，趋陪盛北宫。惟师恢帝则，敷教叶天工。
宣室恩尝异，金华礼更崇。洞门清永日，华绶接微风。
蕙降尧厨翠，榴开舜酒红。文思光万宇，高议待升中。

卷 108_21 【奉和御制左丞相说右丞相璟太子少傅乾曜同日
上官命宴都堂赐诗】

裴光庭

乐贤闻往诰，褒德偶兹辰。端揆升元老，师谋择累仁。
紫庭崇让毕，粉署礼容陈。既荷恩荣旧，俱承宠命新。
天文悬瑞色，圣酒泛华茵。杂遝喧箫鼓，欢娱洽搢绅。

掖垣招近侍，虚薄侧清尘。共保坚贞节，常期雨露均。

卷 108_22 【奉和圣制左丞相说右丞相璟太子少傅乾曜同日
上官命宴都堂赐诗】

宇文融

申甫生周日，宣慈举舜年。何如偶昌运，比德迈前贤。
宠获元良密，荣瞻端揆迁。职优三事老，位在百僚先。
北极回宸渥，南宫饰御筵。飞文瑶札降，赐酒玉杯传。
谬列台衡重，俱承雨露偏。誓将同竭力，相与郊尘涓。

卷 108_23 【奉和圣制同二相已下群官乐游园宴】

崔沔

五日酺才毕，千年乐未央。复承天所赐，终宴国之阳。
地胜春逾好，恩深乐更张。落花飞广座，垂柳拂行觞。
庶尹陪三史，诸侯具万方。酒酣同扑跃，歌舞咏时康。

卷 108_24 【奉和圣制同二相已下群臣乐游园宴】

崔尚

春日照长安，皇恩宠庶官。合钱承罢宴，赐帛复追欢。

供帐凭高列，城池入迥宽。花催相国醉，鸟和乐人弹。
北阙云中见，南山树杪看。乐游宜缔赏，舞咏惜将阑。

卷 108_25 【奉和圣制同二相以下群官乐游园宴】

胡皓

五酺终宴集，三锡又欢娱。仙阜崇高异，神州眺览殊。
南山临皓雪，北阙对明珠。广座鹓鸿满，昌庭驷马趋。
绮罗含草树，丝竹吐郊衢。衔杯不能罢，歌舞乐唐虞。

卷 108_26 【奉和圣制送张尚书巡边】

胡皓

燕公为汉将，武德奉文思。利用经戎莽，英图叶圣谕。
塞沙制长策，穷石卷摇旗。万里要相贺，三边又在兹。
棱威方逐逐，谈笑坐怡怡。宠饯纷郊道，充厨竭御司。
尝醪企行迈，听乐罢涟洏。袞旒垂翰墨，纓蕤迭赋诗。
金山无积阻，玉树有华滋。请迨炎风暮，归旌候此时。

卷 108_27 【和宋之问寒食题临江驿】

胡皓

闻道山阴会，仍为火忌辰。途中甘弃日，江上苦伤春。

流水翻催泪，寒灰更伴人。丹心终不改，白发为谁新。

卷 108_28 【出峡】

胡皓

巴东三峡尽，旷望九江开。楚塞云中出，荆门水上来。
鱼龙潜啸雨，凫雁动成雷。南国秋风晚，客思几悠哉。

卷 108_29 【同蔡孚起居咏鹦鹉（一作裴漼诗）】

胡皓

鹦鹉殊姿致，鸾皇得比肩。常寻金殿里，每话玉阶前。
贾谊才方达，扬雄老未迁。能言既有地，何惜为闻天。

卷 108_30 【大漠行】

胡皓

单于犯蓟壖，虏骑略萧边。南山木叶飞下地，
北海蓬根乱上天。科斗连营太原道，鱼丽合阵武威川。
三军遥倚伏，万里相驰逐。旌旆悠悠静朔源，
鼙鼓喧喧动卢谷。穷徼出幽陵，吁嗟倦寝兴。

马蹄冻溜石，胡毳暖生冰。云沙泱泱天光闭，
河塞阴沉海色凝。崆峒北国谁能托，萧索边心常不乐。
近见行人畏白龙，遥闻公主愁黄鹤。阳春半，岐路间；
瑶台苑，玉门关。百花芳树红将歇，二月兰皋绿未还。
阵云不散鱼龙水，雨雪犹飞鸿鹄山。山嶂绵连那可极，
路远辛勤梦颜色。北堂萱草不寄来，东园桃李长相忆。
汉将纷纭攻战盈，胡寇萧条幽朔清。韩昌拜节偏知送，
郑吉驱旌坐见迎。火绝烟沉左西极，谷静山空右北平。
但得将军能百胜，不须天子筑长城。

第一百零九卷

卷 109_1 【朝退】

李適之

朱门长不闭，亲友恣相过。年今将半百，不乐复如何。

卷 109_2 【罢相作】

李適之

避贤初罢相，乐圣且衔杯。为问门前客，今朝几个来。

卷 109_3 【题汉州西湖】

房琯

高流缠峻隅，城下缅丘墟。决渠信浩荡，潭岛成江湖。
结宇依回渚，水中信可居。三伏气不蒸，四达暑自徂。
同人千里驾，邻国五马车。月出共登舟，风生随所如。

举麾指极浦，欲极更盘纡。缭绕各殊致，夜尽情有馀。
遭乱意不开，即理还暂祛。安得长晤语，使我忧更除。

卷 109_4 【咏方圆动静】

李泌

方如行义，圆如用智。动如逞才，静如遂意。

卷 109_5 【长歌行】

李泌

天覆吾，地载吾，天地生吾有意无。不然绝粒升天衢，
不然鸣珂游帝都。焉能不贵复不去，空作昂藏一丈夫。
一丈夫兮一丈夫，千生气志是良图。请君看取百年事，
业就扁舟泛五湖。

卷 109_6 【奉和圣制中和节曲江宴百僚】

李泌

风俗时有变，中和节惟新。轩车双阙下，宴会曲江滨。
金石何铿锵，簪纓亦纷纶。皇恩降自天，品物感知春。
慈恩匝寰瀛，歌咏同君臣。(缺一韵)。

卷 109_7 【奉和圣制，重阳赐会聊示所怀】

李泌

大唐造昌运，品物荷时成。乘秋逢令节，锡宴观群情。
俯临秦山川，高会汉公卿。（缺一韵）。
未追赤松子，且泛黄菊英。赓歌圣人作，海内同休明。

卷 109_8 【句】

李泌

青青东门柳，岁晏复憔悴。（见《邺侯家传》）

良弓摧折久，谁识是龙韬。（见《吟窗杂录》）

旋沫翻成碧玉池，添酥散出琉璃眼。（《赋茶》）

卷 109_9 【享太庙乐章·广运舞】

郭子仪

於赫皇祖，昭明有融。惟文之德，惟武之功。
河海静谧，车书混同。虔恭孝飨，穆穆玄风。

卷 109_10【享太庙乐章·保大舞】

郭子仪

於穆文考，圣神昭彰。箫勺群慝，含光远方。
万物茂遂，九夷宾王。愔愔云韶，德音不忘。

第一百一十卷

卷 110_1 【百子池】

张谓

旧闻百子汉家池，汉家渌水今逶迤。宫女厌镜笑窥池，
身前影后不相见，无数容华空自知。

卷 110_2 【东封山下宴群臣】

张谓

万里扈封峦，群公遇此欢。幔城连夜静，霜仗满空寒。
辇路宵烟合，旌门晓月残。明朝陪圣主，山下礼圆坛。

卷 110_3 【三日岐王宅】

张谓

玉女贵妃生，嫫媿始发声。金盆浴未了，綈子绣初成。
翡翠雕芳缦，真珠帖小纓。何时学健步，斗取落花轻。

卷 110_4 【满月】

张谓

社金流茂祉，庭玉表奇才。竹似因谈植，兰疑入梦栽。

乌将八子去，凤逐九雏来。今夜明珠色，当随满月开。

卷 110_5 【岐王山亭】

张谓

王家傍绿池，春色正相宜。岂有楼台好，兼看草树奇。

石榴天上叶，椰子日南枝。出入千门里，年年乐未移。

卷 110_6 【岐王席上咏美人】

张谓

半额画双蛾，盈盈烛下歌。玉杯寒意少，金屋夜情多。

香艳王分帖，裙娇敕赐罗。平阳莫相妒，唤出不如他。

卷 110_7 【还京（一作广陵送别宋员外佐越郑舍人还京一作韦述诗）】

张谔

朱绂临秦望，皇华赴洛桥。文章南渡越，书奏北归朝。
树入江云尽，城衔海月遥。秋风将客思，川上晚萧萧。

卷 110_8 【赠吏部孙员外济】

张谔

天子爱贤才，星郎入拜来。明光朝半下，建礼直初回。
名带含香发，文随绮幕开。披云自有镜，从此照仙台。

卷 110_9 【送李著作倅杭州】

张谔

辍史空三署，题舆佐一方。祖筵开霁景，征陌直朝光。
水陆风烟隔，秦吴道路长。伫闻敷善政，邦国咏惟康。

卷 110_10 【九日】

张谔

秋来林下不知春，一种佳游事也均。绛叶从朝飞著夜，

黄花开日未成旬。将曛陌树频惊鸟，半醉归途数问人。
城远登高并九日，茱萸凡作几年新。

卷 110_11 【延平门高斋亭子应岐王教】

张谔

花源药屿凤城西，翠幕纱窗莺乱啼。昨夜蒲萄初上架，
今朝杨柳半垂堤。片片仙云来渡水，双双燕子共衔泥。
请语东风催后骑，并将歌舞向前谿。

卷 110_12 【九日宴】

张谔

秋叶风吹黄飒飒，晴云日照白鳞鳞。
归来得问茱萸女，今日登高醉几人。

卷 110_13 【从军】

刘庭琦

朔风吹寒塞，胡沙千万里。陈云出岱山，孤月生海水。
决胜方求敌，衔恩本轻死。萧萧牧马鸣，中夜拔剑起。

卷 110_14 【奉和圣制瑞雪篇】

刘庭琦

紫宸飞雪晓裴回，层阁重门雪照开。九衢晶耀浮埃尽，
千品差池贽帛来。何处田中非种玉，谁家院里不生梅。
埋云翳景无穷已，因风落地吹还起。先过翡翠宝房中，
转入鸳鸯金殿里。美人含笑出联翩，艳逸相轻斗容止。
罗衣点著浑是花，玉手转来半成水。奕奕纷纷何所如，
顿忆杨园二月初。羞同班女高秋扇，欲照明王乙夜书。
姑射山中符圣寿，芙蓉阙下降神车。愿随睿泽流无限，
长报丰年贵有馀。

卷 110_15 【咏木槿树题武进文明府厅】

刘庭琦

物情良可见，人事不胜悲。莫恃朝荣好，君看暮落时。

卷 110_16 【铜雀台】

刘庭琦

铜台宫观委灰尘，魏主园林漳水滨。

即今西望犹堪思，况复当时歌舞人。

卷 110_17 【失白鹰】

郑繇

白锦文章乱，丹青羽翮齐。云中呼暂下，雪里放还迷。
梁苑惊池鹭，陈仓拂野鸡。不知寥廓外，何处独依栖。

卷 110_18 【经慈润题】

郑繇

岸与恩同广，波将慈共深。涓涓劳日夜，长似下流心。

第一百一十一卷

卷 111_1 【奉和御制平胡】

韩休

南牧正纷纷，长河起塞氛。玉符征选士，金钺拜将军。
叠鼓摇边吹，连旌暗朔云。祲星乘夜落，害气入朝分。

始见幽烽警，俄看烈火焚。功成奏凯乐，战罢策归勋。
盛德陈清庙，神谟属大君。叨荣逢偃羽，率舞咏时文。

卷 111_2 【奉和圣制送张说巡边】

韩休

一德光台象，三军掌夏卿。来威申庙略，出总叶师贞。
受钺辞金殿，凭轩去鼎城。曙光摇组甲，疏吹绕云旌。
左律方先凯，中鼙即训兵。定功彰武事，陈颂纪天声。
祖宴初留赏，宸章更宠行。车徒零雨送，林野夕阴生。
路极河流远，川长朔气平。东辕迟返旆，归奏谒承明。

卷 111_3 【祭汾阴乐章】

韩休

於穆浚哲，维清缉熙。肃事昭配，永言孝思。
涤濯静嘉，馨香在兹。神之听之，用受福釐。

卷 111_4 【征君宅】

许景先

征君昔嘉遁，抗迹遗俗尘。了心悟有物，乘化游无垠。
道丧历千载，复存颍阳真。上虞佳山水，晚岁耽隐沦。
内史既解绶，支公亦相亲。儒道匪远理，意胜聊自欣。
洄沿南谿夕，流浪东山春。石壁践丹景，金潭冒绿蘋。
探炼备海峤，赏心寓情人。奈何灵仙骨，锹翮瑶池津。
寥寥虚白宇，夙创招提因。家风缅多尚，玄德谢无邻。
谬陪金门彦，矫迹侍紫宸。皇恩竟已矣，遗烈庶不泯。

卷 111_5 【折柳篇】

许景先

春色东来度渭桥，青门垂柳百千条。长杨西连建章路，

汉家林苑纷无数。紫花始遍合欢枝，游丝半冒相思树。
春楼初日照南隅，柔条垂绿扫金铺。宝钗新梳倭堕髻，
锦带交垂连理襦。自怜柳塞淹戎幕，银烛长啼愁梦著。
芳树朝催玉管新，春风夜染罗衣薄。城头杨柳已如丝，
今年花落去年时。折芳远寄相思曲，为惜容华难再持。

卷 111_6 【奉和御制春台望】

许景先

睿德在青阳，高居视中县。秦城连凤阙，汉寝疏龙殿。
文物照光辉，郊畿郁葱蒨。千门望成锦，八水明如练。
复道晓光披，宸游出禁移。瑞气朝浮五云阁，
祥光夜吐万年枝。兰叶负龟初荐祉，桐花集凤更来仪。
秦汉生人凋力役，阿房甘泉构云碧。汾祠雍畤望通天，
玉堂宣室坐长年。鼓钟西接咸阳观，苑囿南通鄠杜田。
明主卑宫诫前失，辅德钦贤政惟一。昆虫不夭在春蒐，
稼穡常艰重农术。邦家已荷圣谟新，犹闻俭陋惜中人。
豫奉北辰齐七政，长歌东武抃千春。

卷 111_7 【阳春怨】

许景先

红树晓莺啼，春风暖翠闺。雕笼熏绣被，珠履踏金堤。
芍药花初吐，菖蒲叶正齐。藁砧当此日，行役向辽西。

卷 111_8 【奉和圣制送张尚书巡边】

许景先

文武承邦式，风云感国祯。王师亲赋政，庙略久论兵。
汉主知三杰，周官统六卿。四方分阃受，千里坐谋成。
介胄辞前殿，壶觞宿左营。赏延颁赐重，宸赠出车荣。
龙武三军气，鱼铃五校名。郊云驻旌羽，边吹引金钲。
训旅方称德，安人更克贞。伫看铭石罢，同听凯歌声。

卷 111_9 【咏史】

王丘

高洁非养正，盛名亦险艰。伟哉谢安石，携妓入东山。
云岩响金奏，空水滟朱颜。兰露滋香泽，松风鸣珮环。
歌声入空尽，舞影到池闲。杳眇同天上，繁华非代间。
卷舒混名迹，纵诞无忧患。何必苏门子，冥然闭清关。

卷 111_10 【奉和圣制答张说扈从南出鼠雀谷之作】

王丘

襟带三秦接，旂常万乘过。阳原淑气早，阴谷沍寒多。

花缚前茅仗，霜严后殿戈。代云开晋岭，江雁入汾河。
北土分尧俗，南风动舜歌。一闻天乐唱，恭逐万人和。

卷 111_11 【奉和圣制送张尚书巡边】

王丘

德业蕴时宗，幽符梦象通。台司计析父，师律总元戎。
出入敷能政，谋猷体至公。赠行光睿什，宴别感宸衷。
文炳高天曜，恩垂湛露融。建牙之塞表，鸣鼓接云中。
策密鬼神秘，威成剑骑雄。朔门正炎月，兵气已秋风。
肃杀从此始，方知胡运穷。

卷 111_12 【过贾六】

苏晋

主人病且闲，客来情弥适。一酌复一笑，不知日将夕。
昨来属欢游，于今尽成昔。努力持所趣，空名定何益。

卷 111_13 【奉和圣制送张说巡边】

苏晋

方汉比周年，兴王合在宣。亟闻降虏拜，复睹出师篇。

祈父万邦式，英猷三略传。算车申夏政，茂舍后戎田。
严问盟胡苑，军容济洛川。皇情怅关旆，诏饒列郊筵。
路接禁园草，池分御井莲。离声轸去角，居念断归蟬。
三捷岂云尔，七擒良信然。具僚诚寄望，奏凯秋风前。

卷 111_14 【奉和圣制送张说巡边】

崔禹锡

供帐何煌煌，公其抚朔方。群僚咸饒酌，明主降离章。
关塞重门下，郊岐禁苑傍。练兵宜雨洗，卧鼓候风凉。
炎景宁云憚，神谋肃所将。旌摇天月迴，骑入塞云长。
赫赫皇威振，油油圣泽滂。非惟按车甲，兼以正封疆。
叱咤阴山道，澄清瀚海阳。虏垣行决胜，台座伫为光。

卷 111_15 【恩敕尚书省僚宴昆明池应制（同用尧字）】

张嘉贞

灵沼初开汉，神池旧浴尧。昔人徒习武，明代此闻韶。
地脉山川胜，天恩雨露饶。时光牵利舸，春淑覆柔条。
芳酝醒千日，华笺落九霄。幸承欢賔重，不觉醉归遥。

卷 111_16 【奉和早登太行山中言志应制】

张嘉贞

明发扈山巅，飞龙高在天。山南平对巩，山北远通燕。
瞻彼冈峦峻，凭兹士马妍。九圻行若砥，万谷辘如川。
罗网开三面，闾阎问百年。泽将春雪比，文共晓星连。
俟后逢今圣，登台谢曩贤。唯馀事君节，不让古人先。

卷 111_17 【奉和圣制送张说巡边】

张嘉贞

天锡我宗盟，元戎付夏卿。多才兼将相，必勇独横行。
经纬称人杰，文章作代英。山川看是阵，草木想为兵。
不待河冰合，犹防塞月明。有谋当系丑，无战且绥氓。
阃外传三略，云中冀一平。感恩同义激，怅别屡魂惊。
直视前旌掣，遥闻后骑鸣。还期方定日，复此出郊迎。

卷 111_18 【句】

张嘉贞

河鱼未上冻，江蛰已闻雷。（见《纬略》）

卷 111_19 【奉和圣制送张说巡边】

卢从愿

上将发文昌，中军静朔方。占星引旌节，择日拜坛场。
礼乐临轩送，威声出塞扬。安边俟帷幄，制胜在岩廊。
作鼓将军气，投醪壮士觞。戒途遵六月，离赠动三光。
槐路清梅暑，衡皋起麦凉。时文仰雄伯，耀武震遐荒。
枉席知无战，兵戈示不忘。伫闻歌杖杜，凯入系名王。

卷 111_20 【祭汾阴乐章】

卢从愿

坤元载物，阳乐发生。播植资始，品汇咸亨。
列俎棋布，方坛砥平。神歆禋祀，后德惟明。

卷 111_21 【长门怨】

袁晖

早知君爱歇，本自无萦妒。谁使恩情深，今来反相误。
愁眠罗帐晓，泣坐金闺暮。独有梦中魂，犹言意如故。

卷 111_22 【铜雀妓】

袁晖

君爱本相饶，从来似舞腰。那堪攀玉座，肠断望陵朝。

怨著情无主，哀凝曲不调。况临松日暮，悲吹坐萧萧。

卷 111_23 【正月闺情】

袁晖

正月金闺里，微风绣户间。晓魂怜别梦，春思逼啼颜。

绕砌梅堪折，当轩树未攀。岁华庭北上，何日度阳关。

卷 111_24 【二月闺情】

袁晖

二月韶光好，春风香气多。园中花巧笑，林里鸟能歌。

有恨离琴瑟，无情著绮罗。更听春燕语，妾亦不如他。

卷 111_25 【三月闺情】

袁晖

三月春将尽，空房妾独居。蛾眉愁自结，鬓发没情梳。
□□□□□，□□□□□。□□□□□，□□□□□。

卷 111_26 【七月闺情】

袁晖

七月坐凉宵，金波满丽谯。容华芳意改，枕席怨情饶。
锦字沾愁泪，罗裙缓细腰。不如银汉女，岁岁鹊成桥。

卷 111_27 【奉和圣制答张说扈从南出雀鼠谷之作】

袁晖

魏国山河险，周王警蹕回。九旗云际出，万骑谷中来。
石路行将尽，烟郊望忽开。赏矜垂柳报，春畏落花催。
兴逸横汾什，恩褒作颂才。小臣瞻日月，延首咏康哉。

卷 111_28 【奉和圣制送张尚书巡边】

袁晖

出师宣九命，分阃用三台。始应幕中画，言从天上来。
丹青不独任，韬略遂双该。坐见威棱洽，弥彰事业恢。
旌旗晓云送，鞞鼓朔风催。虏气消残月，边声韵落梅。
羽书雄北地，龙漠寝南垓。宠战黄金尽，输诚白日回。
离章宸翰发，祖宴国门开。欲识恩华盛，平生文武材。

卷 111_29 【奉和圣制答张说扈从南出雀鼠谷之作】

王光庭

省俗恩将遍，巡方路稍回。寒随汾谷尽，春逐晋郊来。
云骑传行漏，烟旄引从台。惠风初应律，和气正调梅。
雅颂通宸咏，天文接曙台。灞陵桃李色，应待日华开。

卷 111_30 【奉和圣制送张说巡边】

王光庭

贤相德符充，朝推文武雄。海波先若镜，关草豫从风。
钺助将军勇，威成天子功。琼章九霄发，锡宴五衢通。

玉辘龙盘带，金装凤勒骢。虎貔纷儼儼，河洛振熊熊。
戈剑千霜白，旌旗万火红。示刑夷夏变，流惠鬼方同。
寇息军容偃，尘销朔野空。用师敷礼乐，非是为獯戎。

卷 111_31 【奉和圣制送张说巡边】

徐知仁

圣德膺三统，皇恩被八埏。大明均照物，小丑未宁边。
国相台衡重，元戎庙略宣。紫泥方受命，黄石乃推贤。
问罪阴山下，安人属国前。度关行照月，乘障坐消烟。
北阙纡宸藻，南桥列祖筵。耀威当夏日，杀气指秋天。
鞞鼓鼙鼙振，旌旗鸟兽悬。由来词翰手，今见勒燕然。

卷 111_32 【奉和敕赐公主镜】

席豫

令节颁龙镜，仙辉下凤台。含灵万象入，写照百花开。
色与皇明散，光随圣泽来。妍媸冰鉴里，从此愧非才。

卷 111_33 【江行纪事二首】

席豫

飘飘任舟楫，回合傍江津。后浦情犹在，前山赏更新。

树深烟雾霭，滩浅石磷磷。川路南行远，淹留惜此辰。
江汛春风势，山楼曙月辉。猿攀紫岩饮，鸟拂清潭飞。
古树崩沙岸，新苔覆石矶。津途赏无限，征客暂忘归。

卷 111_34 【奉和圣制答张说南出雀鼠谷】

席豫

鸣銮初幸代，旋盖欲横汾。山尽千旗出，郊平五校分。
前林已暄景，后壑尚寒氛。风送箫韶曲，花铺黼黻文。
盐梅推上宰，礼乐统中军。献赋纡天札，飘飘飞白云。

卷 111_35 【奉和圣制送张说巡边】

席豫

圣主重兵权，分符属大贤。中军仍执政，丞相复巡边。
翕习戎装动，张皇庙略宣。朝荣承睿札，野饯转行旃。
亭障东缘海，沙场北际天。春冬见岩雪，朝夕候烽烟。
已勒封山记，犹闻遣戍篇。五营将月合，八阵与云连。
经略图方远，怀柔道更全。归来画麟阁，蔼蔼武功传。

卷 111_36 【祭汾阴乐章】

韩思复

大乐和畅，殷荐明神。一降通感，八变必臻。

有求斯应，无德不亲。降灵醉止，休征万人。

卷 111_37 【祭汾阴乐章】

刘晔

大君出震，有事郊禋。斋戒既肃，馨香毕陈。
乐和礼备，候暖风春。恭惟降福，实赖明神。

第一百一十二卷

卷 112_1 【唐禅社首乐章·顺和】

贺知章

至哉含柔德，万物资以生。常顺称厚载，流谦通变盈。
圣心事能察，增广陈厥诚。黄祇僊如在，泰折俟咸亨。

卷 112_2 【唐禅社首乐章·太和】

贺知章

肃我成命，於昭黄祇。裘冕而祀，陟降在斯。
五音克备，八变聿施。缉熙肆靖，厥心匪离。

卷 112_3 【唐禅社首乐章·肃和】

贺知章

黄祇是祇，我其夙夜。夤畏诚絜，匪遑宁舍。
礼以琮玉，荐厥茅藉。念兹降康，胡宁克暇。

卷 112_4 【唐禅社首乐章·雍和】

贺知章

夙夜宥密，不敢宁宴。五齐既陈，八音在县。

粢盛以絜，房俎斯荐。惟德惟馨，尚兹克遍。

卷 112_5 【唐禅社首乐章·寿和】

贺知章

惟以明发，有怀载殷。乐盈而反，礼顺其禋。

立清以献，荐欲是亲。於穆不已，裒对斯臻。

卷 112_6 【唐禅社首乐章·福和】

贺知章

穆穆天子，告成岱宗。大裘如濡，执珽有颙。

乐以平志，礼以和容。上帝临我，云胡肃邕。

卷 112_7 【唐禅社首乐章·太和】

贺知章

昭昭有唐，天俾万国。列祖应命，四宗顺则。
申锡无疆，宗我同德。曾孙继绪，享神配极。

卷 112_8 【晓发】

贺知章

江皋闻曙钟，轻桡理还舫。海潮夜约约，川露晨溶溶。
始见沙上鸟，犹埋云外峰。故乡杳无际，明发怀朋从。

卷 112_9 【奉和御制春台望】

贺知章

青阳布王道，玄览陶真性。欣若天下春，高逾域中圣。
神皋类观赏，帝里如悬镜。缭绕八川浮，峩峩双阙映。
晓色遍昭阳，晴云卷建章。华滋的皪丹青树，
颢气氤氲金玉堂。尚有灵蛇下鄜畤，还征瑞宝入陈仓。
自昔秦奢汉穷武，后庭万馀宫百数。旗回五丈殿千门，
连绵南隄出西垣。广画螭螭夸窈窕，罗生玳瑁象昆仑。

乃眷天晴兴隐恤，古来土木良非一。荆临章观赵丛台。
何如尧阶将禹室。层栏窈窕下龙舆，清管逶迤半绮疏。
一听南风引鸾舞，长谣北极仰鹑居。

卷 112_10 【望人家桃李花】

贺知章

山源夜雨度仙家，朝发东园桃李花。桃花红兮李花白，
照灼城隅复南陌。南陌青楼十二重，春风桃李为谁容。
弃置千金轻不顾，踟蹰五马谢相逢。徒言南国容华晚，
遂叹西家飘落远。的皪长奉明光殿，氛氲半入披香苑。
苑中珍木元自奇，黄金作叶白银枝。千年万岁不凋落，
还将桃李更相宜。桃李从来露井傍，成蹊结影矜艳阳。
莫道春花不可树，会持仙实荐君王。

卷 112_11 【送人之军】

贺知章

常经绝脉塞，复见断肠流。送子成今别，令人起昔愁。
陇云晴半雨，边草夏先秋。万里长城寄，无贻汉国忧。

卷 112_12 【奉和圣制送张说上集贤学士赐宴赋得谟字】

贺知章

西学垂玄览，东堂发圣谟。天光烛武殿，时宰集鸿都。

枯朽沾皇泽，翺飞舞帝梧。迹同游汗漫，荣是出泥涂。
三叹承汤鼎，千欢接舜壶。微躯不可答，空欲咏依蒲。

卷 112_13 【奉和圣制送张说巡边】

贺知章

荒憬尽怀忠，梯航已自通。九攻虽不战，五月尚持戎。
遣戍征周牒，恢边重汉功。选车命元宰，授律取文雄。
胄出天弧上，谋成帝幄中。诏旂分夏物，专土锡唐弓。
帐宿伊川右，钲传晋苑东。饗人藉蕡实，乐正理丝桐。
岐陌涵馀雨，离川照晚虹。恭闻咏方叔，千载舞皇风。

卷 112_14 【题袁氏别业（一作偶游主人园）】

贺知章

主人不相识，偶坐为林泉。莫谩愁沽酒，囊中自有钱。

卷 112_15 【咏柳（一作柳枝词）】

贺知章

碧玉妆成一树高，万条垂下绿丝绦。
不知细叶谁裁出，二月春风似剪刀。

卷 112_16 【采莲曲】

贺知章

稽山罢雾郁嵯峨，镜水无风也自波。
莫言春度芳菲尽，别有中流采芰荷。

卷 112_17 【回乡偶书二首】

贺知章

少小离乡老大回，乡音难改鬓毛衰。
儿童相见不相识，笑问客从何处来。

离别家乡岁月多，近来人事半销磨。
唯有门前镜湖水，春风不改旧时波。

卷 112_18 【答朝士】

贺知章

銀鏤銀盤盛蛤蜊，鏡湖莼菜亂如絲。
鄉曲近來佳此味，遮渠不道是吳兒。

· 全唐诗 ·

卷 112_19 【句】

贺知章

落花真好些，一醉一回颠。（见《诗式》）

第一百一十三卷

卷 113_1 【敬酬张九龄当涂界留赠之作】

裴耀卿

茂先实王佐，仲举信时英。气睹冲天发，人将下榻迎。
珪符肃有命，江国远徂征。九派期方越，千钧或所轻。
高帆出风迥，孤屿入云平。遄迈嗟于役，离忧空自情。
饰簪陪早岁，接壤厕专城。旷别心弥轸，宏观义转倾。
徒然恨饥渴，况乃讽瑶琼。

卷 113_2 【酬张九龄使风见示（时为宣州刺史）】

裴耀卿

兹地五湖邻，艰哉万里人。惊飙翻是托，危浪亦相因。
宣室才华子，金闺讽议臣。承明有三入，去去速归轮。

卷 113_3 【赠张丞相】

宋鼎

汉上登飞幙，荆南历旧居。已尝临砌橘，更睹跃池鱼。

盛德继微渺，深衷能卷舒。义申蓬阁际，情切庙堂初。
郡挹文章美，人怀燮理馀。皇恩傥照亮，岂厌承明庐。

卷 113_4 【酬故人还山】

宋鼎

举棹乘春水，归山抚岁华。碧潭宵见月，红树晚开花。
肃穆轻风度，依微隐径斜。危亭暗松石，幽涧落云霞。
思鸟吟高树，游鱼戏浅沙。安知馀兴尽，相望紫烟赊。

卷 113_5 【和张荆州九龄晨出郡舍林下】

崔颂

优闲表政清，林薄赏秋成。江上悬晓月，往来亏复盈。
天云抗真意，郡阁晦高名。坐啸应无欲，宁辜济物情。

卷 113_6 【奉酬张洪州九龄江上见赠】

孙翊

受命谪封疆，逢君牧豫章。於焉审虞芮，复尔共舟航。
怅别秋阴尽，怀归客思长。江皋枉离赠，持此慰他乡。

卷 113_7 【古意赠孙翊】

徐仁友

南望缙氏岭，山居共涧阴。东西十数里，缅邈方寸心。

云日落广厦，莺花对孤琴。琴中多苦调，凄切谁复寻。

卷 113_8 【奉和姚令公驾幸温汤喜雪应制】

苏绾

汉主新丰邑，周王尚父师。云符沛童唱，雪应海神期。

林变惊春早，山明讶夕迟。况逢温液霈，恩重御裘诗。

卷 113_9 【咏月】

康庭芝

天使下西楼，光含万里秋。台前疑挂镜，帘外似悬钩。

张尹将眉学，班姬取扇俦。佳期应借问，为报在刀头。

卷 113_10 【山行见孤松成咏】

张宣明

孤松郁山椒，肃爽凌清霄。既挺千丈干，亦生百尺条。
青青恒一色，落落非一朝。大厦今已构，惜哉无人招。
寒霜十二月，枝叶独不凋。

卷 113_11 【使至三姓咽面】

张宣明

昔闻班家子，笔砚忽然投。一朝抚长剑，万里入荒陬。
岂不服艰险，只思清国雠。山川去何岁，霜露几逢秋。
玉塞已遐廓，铁关方阻修。东都日眇眇，西海此悠悠。
卒使功名建，长封万里侯。

卷 113_12 【新都南亭别郭大元振】

卢崇道

竹径女萝蹊，莲洲文石堤。静深入俗断，寻玩往还迷。
碧潭秀初月，素林惊夕栖。褰幌纳鸟侣，罢琴听猿啼。
佳辰改宿昔，胜寄在睽携。长怀赏心爱，如玉复如珪。

第一百一十四卷

卷 114_1 【登翹头山题俨公石壁】

包融

晨登翹头山，山曛黄雾起。却瞻迷向背，直下失城市。
嗽日衔东郊，朝光生邑里。扫除诸烟氛，照出众楼雉。
青为洞庭山，白是太湖水。苍茫远郊树，倏忽不相似。
万象以区别，森然共盈几。坐令开心胸，渐觉落尘滓。
北岩千馀仞，结庐谁家子。愿陪中峰游，朝暮白云里。

卷 114_2 【阮公啸台】

包融

荒台森荆杞，蒙笼无上路。传是古人迹，阮公长啸处。
至今清风来，时时动林树。逝者共已远，升攀想遗趣。
静然荒榛门，久之若有悟。灵光未歇灭，千载知仰慕。

卷 114_3 【酬忠公林亭】

包融

江外有真隐，寂居岁已侵。结庐近西术，种树久成阴。

人迹乍及户，车声遥隔林。自言解尘事，咫尺能辍尘。
为道岂庐霍，会静由吾心。方秋院木落，仰望日萧森。
持我兴来趣，采菊行相寻。尘念到门尽，远情对君深。
一谈入理窟，再索破幽襟。安得山中信，致书移尚禽。

卷 114_4 【送国子张主簿】

包融

湖岸缆初解，莺啼别离处。遥见舟中人，时时一回顾。
坐悲芳岁晚，花落青轩树。春梦随我心，悠扬逐君去。

卷 114_5 【和陈校书省中玩雪】

包融

芸阁朝来雪，飘飘正满空。褰开明月下，校理落花中。
色向怀铅白，光因翰简融。能令草玄者，回思入流风。

卷 114_6 【和崔会稽咏王兵曹厅前涌泉势城中字】

包融

茂德来征应，流泉入咏歌。含灵符上善，作字表中和。
有草恒垂露，无风欲偃波。为看人共水，清白定谁多。

卷 114_7 【赋得岸花临水发】

包融

笑笑傍溪花，丛丛逐岸斜。朝开川上日，夜发浦中霞。
照灼如临镜，葳蕤胜浣纱。春来武陵道，几树落仙家。

卷 114_13 【武陵桃源送人】

包融

武陵川径入幽遐，中有鸡犬秦人家。
先时见者为谁耶，源水今流桃复花。

卷 114_14 【和荐福寺英公新构禅堂】

丁仙芝

上人久弃世，中道自忘筌。寂照出群有，了心清众缘。
所以于此地，筑馆开青莲。果药罗砌下，烟虹垂户前。
咒中洒甘露，指处流香泉。禅远目无事，体清宵不眠。
枳闻庐山法，松入汉阳禅。一枕西山外，虚舟常浩然。

卷 114_15 【赠朱中书】

丁仙芝

十年种田滨五湖，十年遭涝尽为芜。频年井税常不足，
今年缙钱谁为输。东邻转谷五之利，西邻贩缦日已贵。
而我守道不迁业，谁能肯敢效此事。紫微侍郎白虎殿，
出入通籍回天眷。晨趋彩笔柏梁篇，昼出雕盘大官膳。
会应怜尔居素约，可即长年守贫贱。

卷 114_16 【戏赠姚侍御】

丁仙芝

繁霜晓幕鸣柏乌，待子兽炭然金炉。重门启锁紫髯胡。
新披骢马陇西驹，头戴獬豸急晨趋。明光殿前见天子，
今日应弹佞幸夫。

卷 114_17 【余杭醉歌赠吴山人】

丁仙芝

晓幕红襟燕，春城白项乌。只来梁上语，不向府中趋。
城头坎坎鼓声曙，满庭新种樱桃树。桃花昨夜撩乱开，

当轩发色映楼台。十千兑得馀杭酒，二月春城长命杯。
酒后留君待明月，还将明月送君回。

卷 114_18 【京中守岁】

丁仙芝

守岁多然烛，通宵莫掩扉。客愁当暗满，春色向明归。
玉斗巡初匝，银河落渐微。开正献岁酒，千里间庭闱。

卷 114_19 【渡扬子江】

丁仙芝

桂楫中流望，空波两岸明。林开扬子驿，山出润州城。
海尽边阴静，江寒朔吹生。更闻风叶下，淅沥度秋声。

卷 114_20 【长宁公主旧山池】

丁仙芝

平阳旧池馆，寂寞使人愁。座卷流黄簟，帘垂白玉钩。
庭闲花自落，门闭水空流。追想吹箫处，应随仙鹤游。

卷 114_21 【剡谿馆闻笛】

丁仙芝

夜久闻羌笛，寥寥虚客堂。山空响不散，谿静曲宜长。
草木生边气，城池泛夕凉。虚然异风出，仿佛宿平阳。

卷 114_22 【越裳贡白雉（一作孙昌胤诗）】

丁仙芝

圣哲承休运，伊夔列上台。覃恩丹徼远，入贡素羣来。
北阙欣初见，南枝顾未回。敛容残雪净，矫翼片云开。
驯扰将无惧，翻飞幸不猜。甘从上林里，饮啄自徘徊。

卷 114_23 【江南曲五首】

丁仙芝

长干斜路北，近浦是儿家。有意来相访，明朝出浣纱。
发向横塘口，船开值急流。知郎旧时意，且请拢船头。
昨暝逗南陵，风声波浪阻。入浦不逢人，归家谁信汝。

未晓已成妆，乘潮去茫茫。因从京口渡，使报邵陵王。

始下芙蓉楼，言发琅琊岸。急为打船开，恶许傍人见。

卷 114_24 【句】

丁仙芝

穷花常闭户，秋城闻捣衣。

树回早秋色，川长迟落晖。（见《吟窗杂录》）

卷 114_25 【石桥琪树】

蔡隐丘

山上天将近，人间路渐遥。谁当云里见，知欲渡仙桥。

卷 114_26 【句】

蔡隐丘

整巾千嶂耸，曳履百泉鸣。

卷 114_27 【奉和扈从温泉宫承恩赐浴】

蔡希周

天行云从指骊宫，浴日馀波锡诏同。彩殿氤氲拥香溜，
纱窗宛转闭和风。来将兰气冲皇泽，去引星文捧碧空。
自怜遇坎便能止，愿托仙槎路未通。

卷 114_28 【同家兄题渭南王公别业】

蔡希寂

好闲知在家，退迹何必深。不出人境外，萧条江海心。
轩车自来往，空名对清阴。川渚将钓玉，乡亭期散金。
素晖射流瀨，翠色绵森林。曾为诗书癖，宁惟耕稼任。
吾兄许微尚，枉道来相寻。朝庆老莱服，夕闲安道琴。
文章遥颂美，寤寐增所钦。既郁苍生望，明时岂陆沉。

卷 114_29 【登福先寺上方然公禅室】

蔡希寂

名都标佛刹，梵构临河干。举目上方峻，森森青翠攒。
步登诸劫尽，忽造浮云端。当暑敞扃闼，却嫌絺绌寒。
禅房最高顶，静者殊闲安。疏雨向空城，数峰帘外盘。

午钟振衣坐，招我同一餐。真味杂饴露，众香唯菹兰。
晚来恣偃俯，茶果仍留欢。

卷 114_30 【陕中作】

蔡希寂

西别秦关近，东行陕服长。川原馀让畔，歌吹忆遗棠。
河水流城下，山云起路傍。更怜栖泊处，池馆绕林篁。

卷 114_31 【洛阳客舍逢祖咏留宴】

蔡希寂

绵绵钟漏洛阳城，客舍贫居绝送迎。
逢君貰酒因成醉，醉后焉知世上情。

卷 114_32 【赠张敬微】

蔡希寂

大河东北望桃林，杂树冥冥结翠阴。
不知君作神仙尉，特讶行来云雾深。

卷 114_33【江风行（一作长干行）】

张潮

媚贫如珠玉，媚富如埃尘。贫时不忘旧，富日多宠新。
妾本富家女，与君为偶匹。惠好一何深，中门不曾出。

妾有绣衣裳，葳蕤金缕光。念君贫且贱，易此从远方。
远方三千里，思君心未已。日暮情更来，空望去时水。

孟夏麦始秀，江上多南风。商贾归欲尽，君今尚巴东。
巴东有巫山，窈窕神女颜。常恐游此方，果然不知还。

卷 114_34【襄阳行】

张潮

玉盘转明珠，君心无定准。昨见襄阳客，剩说襄阳好无尽。
襄汉水，岷山垂，汉水东流风北吹。只言一世长娇宠，
那悟今朝见别离。君渡清羌渚，知人独不语，
妾见鸟栖林，忆君相思深。莫作云间鸿，离声顾俦侣。
尚如匣中剑，分形会同处。是君妇，识君情，
怨君恨君为此行。下床一宿不可保，况乃万里襄阳城。
襄阳传近大堤北，君到襄阳莫回惑。大堤诸女儿，
怜钱不怜德。

卷 114_35 【采莲词】

张潮

朝出沙头日正红，晚来云起半江中。
赖逢邻女曾相识，并著莲舟不畏风。

卷 114_36 【江南行】

张潮

茨菰叶烂别西湾，莲子花开犹未还。
妾梦不离江水上，人传郎在凤凰山。

卷 114_37 【长干行（一作李白诗，一作李益诗）】

张潮

忆昔深闺里，烟尘不曾识。嫁与长干人，沙头候风色。
五月南风兴，思君下巴陵。八月西风起，想君发扬子。
去来悲如何，见少离别多。湘潭几日到，妾梦越风波。
昨夜狂风度，吹折江头树。淼淼暗无边，行人在何处。
北客真三公，朱衣满江中。薄暮来投宿，数朝不肯东。
好乘浮云骢，佳期兰渚东。鸳鸯绿浦上，翡翠锦屏中。

自怜十五馀，颜色桃花红。那作商人妇，愁水复愁风。

卷 114_38 【句】

张潮

寒林苞晚橘，风絮露垂杨。（《纪事》。又见周瑀诗中）

卷 114_39 【游栖霞寺】

张翥

跻险入幽林，翠微含竹殿。泉声无休歇，山色时隐见。

潮来杂风雨，梅落成霜霰。一从方外游，顿觉尘心变。

卷 114_40 【绝句】

张翥

茫茫烟水上，日暮阴云飞。孤坐正愁绪，湖南谁捣衣。

卷 114_41 【潘司马别业】

周瑒

门对青山近，汀牵绿草长。寒深包晚橘，风紧落垂杨。
湖畔闻渔唱，天边数雁行。萧然有高士，清思满书堂。

卷 114_42 【送潘三入京】

周瑒

故人嗟此别，相送出烟垞。柳色分官路，荷香入水亭。
离歌未尽曲，酌酒共忘形。把手河桥上，孤山日暮青。

卷 114_43 【临川山行】

周瑒

朝见青山雪，暮见青山云。云山无断绝，秋思日纷纷。

卷 114_44 【清谿馆作】

谈戴

指途清谿里，左右唯深林。云蔽望乡处，雨愁为客心。

遇人多物役，听鸟时幽音。何必沧浪水，庶兹浣尘襟。

卷 114_45 【句】

谈戴

清清江潭树，日夕增所思。

卷 114_46 【塞上】

殷遥

万里隄城在，三边虏气衰。沙填孤嶂角，烧断故关碑。
马色经寒惨，雕声带晚悲。将军正闲暇，留客换歌辞。

卷 114_47 【送友人下第归省（一作刘得仁诗）】

殷遥

君此卜行日，高堂应梦归。莫将和氏泪，滴著老莱衣。
岳雨连河细，田禽出麦飞。到家调膳后，吟好送斜晖。

卷 114_48 【送杜士瞻楚州覲省】

殷遥

风流与才思，俱似晋时人。淮月归心促，江花入兴新。

云深沧海暮，柳暗白门春。共道官犹小，怜君孝养亲。

卷 114_49 【友人山亭】

殷遥

故人虽薄宦，往往涉清溪。凿牖对山月，褰裳拂涧霓。
游鱼逆水上，宿鸟向风栖。一见桃花发，能令秦汉迷。

卷 114_50 【春晚山行】

殷遥

寂历青山晚，山行趣不稀。野花成子落，江燕引雏飞。
暗草薰苔径，晴杨扫石矶。俗人犹语此，余亦转忘归。

卷 114_51 【寄张徵古】

沈如筠

寂历远山意，微冥半空碧。绿萝无冬春，彩云竟朝夕。
张子海内奇，久为岩中客。圣君当梦想，安得老松石。

卷 114_52 【闺怨二首】

沈如筠

雁尽书难寄，愁多梦不成。愿随孤月影，流照伏波营。

陇底嗟长别，流襟一动君。何言幽咽所，更作死生分。

卷 114_53 【寄天台司马道士】

沈如筠

河洲花艳爓，庭树光彩蒨。白云天台山，可思不可见。

卷 114_54 【句】

沈如筠

思酸寒雁断，淅沥秋树空。

渔阳燕旧都，美女花不如。（见《吟窗杂录》）

卷 114_55 【咏黄莺（一作郑愔诗，又作郑缙）】

孙处玄

欲啖声犹涩，将飞羽未调。高风不借便，何处得迁乔。

卷 114_56 【失题】

孙处玄

汉家轻壮士，无状杀彭王。一遇风尘起，令谁守四方。

卷 114_57 【句】

孙处玄

残花与露落，坠叶随风翻。
日侧南涧幽，风凝北林暮。

卷 114_58 【折杨柳】

徐延寿

大道连国门，东西种杨柳。葳蕤君不见，袅娜垂来久。
缘枝栖暝禽，雄去雌独吟。馀花怨春尽，微月起秋阴。

坐望窗中蝶，起攀枝上叶。好风吹长条，婀娜何如妾。
妾见柳园新，高楼四五春。莫吹胡塞曲，愁杀陇头人。

卷 114_59【南州行】

徐延寿

摇艇至南国，国门连大江。中洲西边岸，数步一垂杨。
金钏越溪女，罗衣胡粉香。织缣春卷幔，采蕨暝提筐。
弄瑟娇垂幌，迎人笑下堂。河头浣衣处，无数紫鸳鸯。

卷 114_60【人日剪彩】

徐延寿

闺妇持刀坐，自怜裁剪新。叶催情缀色，花寄手成春。
帖燕留妆户，黏鸡待饷人。擎来问夫婿，何处不如真。

卷 114_61【南中感怀】

樊晃

南路蹉跎客未回，常嗟物候暗相催。
四时不变江头草，十月先开岭上梅。

· 全唐诗 ·

卷 114_62 【句】

樊晃

巧裁蝉鬓畏风吹，尽作蛾眉恐人妒。

第一百一十五卷

卷 115_1 【和户部杨员外伯成寓直】

李愔

落日弥纶地，公才画省郎。词惊起草笔，坐引护衣香。
双阙天河近，千门夕漏长。遥知台上宿，不独有文强。

卷 115_2 【同望幸新亭赐钱公宴】

李愔

感梦通玄化，覃恩降紫宸。赐钱开汉府，分帛醉尧人。
地隔朝宗庆，亭临卜洛新。行看广云雨，二月次东巡。

卷 115_3 【奉和圣制从蓬莱向兴庆阁道中留春雨中春望之作应制】

李愔

别馆春还淑气催，三宫路转凤凰台。云飞北阙轻阴散，

雨歇南山积翠来。御柳遥随天仗发，林花不待晓风开。
已知圣泽深无限，更喜年芳入睿才。

卷 115_4 【铜雀妓】

李邕

西陵望何及，弦管徒在兹。谁言死者乐，但令生者悲。
丈夫有馀志，儿女焉足私。扰扰多俗情，投迹互相师。
直节岂感激，荒淫乃凄其。颍水有许由，西山有伯夷。
颂声何寥寥，唯闻铜雀诗。君举良未易，永为后代嗤。

卷 115_5 【咏云】

李邕

彩云惊岁晚，缭绕孤山头。散作五般色，凝为一段愁。
影虽沉涧底，形在天际游。风动必飞去，不应长此留。

卷 115_6 【登历下古城员外孙新亭】

李邕

吾宗固神秀，体物写谋长。形制开古迹，曾冰延乐方。

太山雄地理，巨壑眇云庄。高兴汨烦促，永怀清典常。
含弘知四大，出入见三光。负郭喜粳稻，安时歌吉祥。

卷 115_7 【奉和初春幸太平公主南庄应制】

李邕

传闻银汉支机石，复见金舆出紫微。织女桥边乌鹊起，
仙人楼上凤凰飞。流风入座飘歌扇，瀑水侵阶溅舞衣。
今日还同犯牛斗，乘槎共逐海潮归。

卷 115_8 【奉使登终南山】

王湾

常爱南山游，因而尽原隰。数朝至林岭，百仞登崑崙。
石壮马径穷，苔色步缘入。物奇春状改，气远天香集。
虚洞策杖鸣，低云拂衣湿。倚岩见庐舍，入户欣拜揖。
问性矜勤劳，示心教澄习。玉英时共饭，芝草为余拾。
境绝人不行，潭深鸟空立。一乘从此授，九转兼是给。
辞处若轻飞，憩来唯吐吸。闲襟超已胜，回路倏而及。
烟色松上深，水流山下急。渐平逢车骑，向晚睨城邑。
峰在野趣繁，尘飘宦情涩。辛苦久为吏，劳生何妄执。
日暮怀此山，悠然赋斯什。

卷 115_9 【晚夏马嵬卿叔池亭即事寄京都一二知己】

王湾

忝职畿甸淹，滥陪时俊后。才轻策疲劣，势薄常驱走。
牵役劳风尘，秉心在岩薮。宗贤开别业，形胜代希偶。
竹绕清渭滨，泉流白渠口。逡巡期赏会，挥忽变星斗。
逮此乘务闲，因而访幽叟。入来殊景物，行复洗纷垢。
林静秋色多，潭深月光厚。盛香莲近拆，新味瓜初剖。
滞拙怀隐沦，书之寄良友。

卷 115_10 【丽正殿赐宴同勒天前烟年四韵应制】

王湾

金殿忝陪贤，琼羞忽降天。鼎罗仙掖里，觴拜琐闱前。
院逼青霄路，厨和紫禁烟。酒酣空忺舞，何以答昌年。

卷 115_11 【奉和贺监林月清酌】

王湾

华月当秋满，朝英假兴同。净林新霁入，规院小凉通。
碎影行筵里，摇花落酒中。消宵凝爽意，并此助文雄。

卷 115_12 【次北固山下】

王湾

客路青山外，行舟绿水前。潮平两岸阔，风正一帆悬。
海日生残夜，江春入旧年。乡书何处达，归雁洛阳边。

卷 115_13 【观搗箏（一作祖咏诗）】

王湾

虚室有秦箏，箏新月复清。弦多弄委曲，柱促语分明。
晓怨凝繁手，春娇入曼声。近来唯此乐，传得美人情。

卷 115_14 【晚春诣苏州敬赠武员外】

王湾

苏台忆季常，飞棹历江乡。持此功曹掾，初离华省郎。
贵门生礼乐，明代秉文章。嘉郡位先进，鸿儒名重扬。
爰从姻娅贬，岂失忠信防。万里行骥足，十年睽凤翔。
回迁翊元圣，入拜伋惟良。别业对南浦，群书满北堂。
意深投辖盛，才重接筵光。陋学叨铅简，弱龄许翰场。
神驰劳旧国，颜展别殊方。际晓杂氛散，残春众物芳。

烟和疏树满，雨续小谿长。旅拙感成慰，通贤顾不忘。
从来琴曲罢，开匣为君张。

卷 115_15 【秋夜寓直即事怀赠萧令公裴侍郎兼通简南省诸友人】

王湾

圣主万年兴，贤臣数载升。古灵传岳秀，宏量禀川澄。
畿甸举长策，风霜秉直绳。出车遥俗震，登阁满朝称。
赋简流亡辑，农安政理凭。还家新长幼，巡垄旧沟塍。
忠梗大勋立，寰瀛堕业惩。焚香兼御史，悬镜委中丞。
旗隼当朝立，台骢发郡乘。司徒汉家重，国典颍川征。
云路俄平入，台阶忽上凌。秉钧调造化，宣綍慰黎烝。
金省方秋作，瑶轩直夜凭。中书赠陈准，右相简王陵。
三杰贤更穆，百僚欢且兢。摇怀及宾友，计曲辨淄渑。
阊阖暝阴散，钩陈爽气凝。月深宫树转，河近禁楼冰。
卑吏夙驱策，微涓效斗升。望麾宵继火，书板曙怀蒸。
彼此虽流盼，规模转服膺。惠将霄汉隔，劳或岁时矜。
位重恩宁滥，才轻慑不胜。林峦甘独往，疵贱苦相仍。
敢忘衔花雀，思同附骥蝇。平生逐鸟雀，何日嗣苍鹰。

卷 115_16 【哭补阙亡友綦母学士】

王湾

明代资多士，儒林得异才。书从金殿出，人向玉墀来。

词学张平子，风仪褚彦回。崇仪希上德，近侍接元台。
曩契心期早，今游宴赏陪。屡迁君擢桂，分尉我从梅。
忽遇乘轺客，云倾构厦材。泣为洹水化，叹作泰山颓。
冀善初将慰，寻言半始猜。位联情易感，交密痛难裁。
远日寒旌暗，长风古挽哀。寰中无旧业，行处有新苔。
反哭魂犹寄，终丧子尚孩。葬田门吏给，坟木路人栽。
遽泄悲成往，俄传宠令回。玄经贻石室，朱绂耀泉台。
地古春长闭，天明夜不开。登山一临哭，挥泪满蒿莱。

卷 115_17 【闰月七日织女】

王湾

耿耿曙河微，神仙此夜稀。今年七月闰，应得两回归。

卷 115_18 【句】

王湾

月华照杵空随妾，风响传砧不到君。（见《河岳英灵集》）

卷 115_19 【应诏赋得除夜（一作王諲诗）】

史青

今岁今宵尽，明年明日催。寒随一夜去，春逐五更来。
气色空中改，容颜暗里回。风光人不觉，已著后园梅。

卷 115_20 【汴堤柳（一本作题河边枯柳）】

王泠然

隋家天子忆扬州，厌坐深宫傍海游。穿地凿山开御路，
鸣笳叠鼓泛清流。流从巩北分河口，直到淮南种官柳。
功成力尽人旋亡，代谢年移树空有。当时彩女侍君王，
绣帐旌门对柳行。青叶交垂连幔色，白花飞度染衣香。
今日摧残何用道，数里曾无一枝好。驿骑征帆损更多，
山精野魅藏应老。凉风八月露为霜，日夜孤舟入帝乡。
河畔时时闻木落，客中无不泪沾裳。

卷 115_21 【夜光篇】

王泠然

游人夜到汝阳间，夜色冥濛不解颜。谁家暗起寒山烧，
因此明中得见山。山头山下须臾满，历险缘深无暂断。
焦声散著群树鸣，炎气傍林一川暖。是时西北多海风，
吹上连天光更雄。浊烟熏月黑，高艳爇云红。
初谓炼丹仙灶里，还疑铸剑神谿中。划为飞电来照物，
乍作流星并上空。西山无草光已灭，东顶荧荧犹未绝。
沸汤空谷数道水，融盖阴崖几年雪。两京贫病若为居，
四壁皆成凿照馀。未得贵游同秉烛，唯将半影借披书。

卷 115_22 【古木卧平沙】

王泠然

古木卧平沙，摧残岁月赊。有根横水石，无叶拂烟霞。
春至苔为叶，冬来雪作花。不逢星汉使，谁辨是灵槎。

卷 115_23 【淮南寄舍弟】

王泠然

昔予从不调，经岁旅淮源。念尔长相失，何时返故园。
寄书迷处所，分袂隔凉温。远道俱为客，他乡共在原。
归情春伴雁，愁泣夜随猿。愧见高堂上，朝朝独倚门。

卷 115_24 【句】

王泠然

林狖欺童子，山精试老僧。（《山寺》）
陈兵剑阁山将动，饮马珠江水不流。（咏八阵图送人）
官微思倚玉，文浅怯投珠。（《赠张公子协律》）

第一百一十六卷

卷 116_1 【春江花月夜二首】

张子容

林花发岸口，气色动江新。此夜江中月，流光花上春。
分明石潭里，宜照浣纱人。
交甫怜瑶珮，仙妃难重期。沉沉绿江晚，惆怅碧云姿。
初逢花上月，言是弄珠时。

卷 116_2 【云阳驿陪崔使君邵道士夜宴】

张子容

一尉东南远，谁知此夜欢。诸侯倾皂盖，仙客整黄冠。
染翰灯花满，飞觞云气寒。欣承国土遇，更借美人看。

卷 116_3 【除夜乐城逢孟浩然】

张子容

远客襄阳郡，来过海岸家。樽开柏叶酒，灯发九枝花。

妙曲逢卢女，高才得孟嘉。东山行乐意，非是竞繁华。

卷 116_4 【送苏倩游天台】

张子容

灵异寻沧海，笙歌访翠微。江鸥迎共狎，云鹤待将飞。
琪树尝仙果，琼楼试羽衣。遥知神女问，独怪阮郎归。

卷 116_5 【泛永嘉江日暮回舟】

张子容

无云天欲暮，轻鹢大江清。归路烟中远，回舟月上行。
傍潭窥竹暗，出屿见沙明。更值微风起，乘流丝管声。

卷 116_6 【永嘉即事寄赣县袁少府瓘】

张子容

山绕楼台出，谿通里閤斜。曾为谢客郡，多有逐臣家。
海气朝成雨，江天晚作霞。题书报贾谊，此湿似长沙。

卷 116_7【乐城岁日赠孟浩然（一作王维诗）】

张子容

土地穷瓯越，风光肇建寅。插桃销瘴疠，移竹近阶墀。
半是吴风俗，仍为楚岁时。更逢习凿齿，言在汉川湄。

卷 116_8【永嘉作】

张子容

拙宦从江左，投荒更海边。山将孤屿近，水共恶谿连。
地湿梅多雨，潭蒸竹起烟。未应悲晚发，炎瘴苦华年。

卷 116_9【送孟八浩然归襄阳二首（下篇一作王维诗）】

张子容

东越相逢地，西亭送别津。风潮看解缆，云海去愁人。
乡在桃林岸，山连枫树春。因怀故园意，归与孟家邻。

杜门不欲出，久与世情疏。以此为长策，劝君归旧庐。
醉歌田舍酒，笑读古人书。好是一生事，无劳献子虚。

卷 116_10 【贬乐城尉日作】

张子容

窜谪边穷海，川原近恶谿。有时闻虎啸，无夜不猿啼。
地暖花长发，岩高日易低。故乡可忆处，遥指斗牛西。

卷 116_11 【自乐城赴永嘉枉路泛白湖寄松阳李少府】

张子容

西行碍浅石，北转入谿桥。树色烟轻重，湖光风动摇。
百花乱飞雪，万岭叠青霄。猿挂临潭筱，鸥迎出浦桡。
惟应赏心客，兹路不言遥。

卷 116_12 【九日陪润州邵使君登北固山】

张子容

五马向西椒，重阳坐丽谯。徐州带绿水，楚国在青霄。
张幕连江树，开筵接海潮。凌云词客语，回雪舞人娇。
梅福惭仙吏，羊公赏下僚。新丰酒旧美，况是菊花朝。

卷 116_13 【璧池望秋月】

张子容

凉夜窥清沼，池空水月秋。满轮沉玉镜，半魄落银钩。
蟾影摇轻浪，菱花渡浅流。漏移光渐洁，云敛色偏浮。
似璧悲三献，疑珠怯再投。能持千里意，来照楚乡愁。

卷 116_14 【长安早春（一作孟浩然诗）】

张子容

开国维东井，城池起北辰。咸歌太平日，共乐建寅春。
雪尽黄山树，冰开黑水津。草迎金埒马，花伴玉楼人。
鸿渐看无数，莺歌听欲频。何当桂枝擢，还及柳条新。

卷 116_15 【赠司勋萧郎中】

张子容

作相开黄阁，为郎奏赤墀。君臣道合体，父子贵同时。
国以推贤答，家无内举疑。凤池真水镜，兰省得华滋。
未睹风流日，先闻新赋诗。江山清谢朓，花木媚丘迟。
吏部来何暮，王言念在兹。丹青无不可，霖雨亦相期。

昔我投荒处，孤烟望岛夷。群鸥终日狎，落叶数年悲。
渔父留歌咏，江妃入兴词。今将献知己，相感勿吾欺。

卷 116_16 【巫山】

张子容

巫岭岩峣天际重，佳期宿昔愿相从。
朝云暮雨连天暗，神女知来第几峰。

卷 116_17 【除日】

张子容

腊月今知晦，流年此夕除。拾樵供岁火，帖牖作春书。
柳觉东风至，花疑小雪馀。忽逢双鲤赠，言是上冰鱼。

第一百一十七卷

卷 117_1 【清溪泛舟】

张旭

旅人倚征棹，薄暮起劳歌。笑揽清溪月，清辉不厌多。

卷 117_2 【桃花溪】

张旭

隐隐飞桥隔野烟，石矶西畔问渔船。
桃花尽日随流水，洞在清溪何处边。

卷 117_3 【山行留客】

张旭

山光物态弄春辉，莫为轻阴便拟归。
纵使晴明无雨色，入云深处亦沾衣。

卷 117_4 【春游值雨】

张旭

欲寻轩槛列清尊，江上烟云向晚昏。

须倩东风吹散雨，明朝却待入华园。

卷 117_5 【春草】

张旭

春草青青万里馀，边城落日见离居。

情知海上三年别，不寄云间一纸书。

卷 117_6 【柳】

张旭

濯濯烟条拂地垂，城边楼畔结春思。

请君细看风流意，未减灵和殿里时。

卷 117_7 【南山（一作贺朝清诗）】

贺朝

湖北雨初晴，湖南山尽见。岩岩石帆影，如得海风便。
仙穴茅山峰，彩云时一见。邀君共探此，异篆残几卷。

卷 117_8 【孤兴】

贺朝

晴日暖珠箔，夭桃色正新。红粉青镜中，娟娟可怜嚬。
君子在遐险，蕙心谁见珍。罗幕空掩昼，玉颜静移春。
江瑟语幽独，再三情未申。黄鹄千里翅，芳音迟所因。

卷 117_9 【从军行】

贺朝

朔胡乘月寇边城，军书插羽刺中京。天子金坛拜飞将，
单于玉塞振佳兵。骑射先鸣推任侠，龙韬决胜伫时英。
闻有河湟客，愔愔理帷帟。常山启霸图，汜水先天策，
衔珠浴铁向桑干，衅旗膏剑指乌丸。鸣鸡已报关山晓，
来雁遥传沙塞寒。直为甘心从苦节，陇头流水鸣呜咽。

边树萧萧不觉春，天山漠漠长飞雪。鱼丽阵接塞云平，
雁翼营通海月明。始看晋幕飞鹅入，旋闻齐垒啼乌声。
自从一戍燕支山，春光几度晋阳关。金河未转青丝骑，
玉箸应啼红粉颜。鸿归燕相续，池边芳草绿。
已见氛清细柳营，莫更春歌落梅曲。烽沉灶减静边亭，
海晏山空肃已宁。行望凤京旋凯捷，重来麟阁画丹青。

卷 117_10 【赋得游人久不归（一作刘孝孙诗，又作贺朝清）】

贺朝

乡关眇天末，引领怅怀归。羁旅久淫滞，物色屡芳菲。
稍觉出意尽，行看蓬鬓稀。如何千里外，伫立沾裳衣。

卷 117_11 【宿香山阁（一作贾彦璋诗）】

贺朝

暝上春山阁，梯云宿半空。轩窗闭潮海，枕席拂烟虹。
朱网防栖鸽，纱灯护夕虫。一闻鸡唱晓，已见日瞳瞳。

卷 117_12 【赠酒店胡姬】

贺朝

胡姬春酒店，弦管夜锵锵。红_{口羽}毛铺新月，貂裘坐薄霜。

玉盘初鲙鲤，金鼎正烹羊。上客无劳散，听歌乐世娘。

卷 117_13【赋得春莺送友人二首（一作刘孝孙诗后四句在前作一首）】

贺朝

翅掩飞莺舞，啼恼婕妤悲。料取金闺意，因君问所思。

流莺拂绣羽，二月上林期。待雪销金禁，衔花向玉墀。

卷 117_14【三日绿潭篇】

万齐融

春潭滉漾接隋宫，宫阙连延潭水东。蘋苔嫩色涵波绿，桃李新花照底红。垂菱布藻如妆镜，丽日晴天相照映。

素影沉沉对蝶飞，金沙砾砾窥鱼泳。佳人祓禊赏韶年，倾国倾城并可怜。拾翠总来芳树下，踏青争绕绿潭边。

公子王孙恣游玩，沙阳水曲情无厌。禽浮似挹羽觞杯，鳞跃疑投水心剑。金鞍玉勒骋轻肥，落絮红尘拥路飞。

绿水残霞催席散，画楼初月待人归。

卷 117_15 【仗剑行】

万齐融

昨夜星官动紫微，今年天子用武威。登车一呼风雷动，
遥震阴山撼巍巍。胡骄子，当见旄头蚀应死。
愿骑单马仗天威，按取长绳缚虏归。仗剑遥叱路傍子，
匈奴头血溅君衣。

卷 117_16 【赠别江头】

万齐融

东南飞鸟处，言是故乡天。江上风花晚，君行定几千。
计程频破月，数别屡开年。明岁浔阳水，相思寄采莲。

卷 117_17 【送陈七还广陵】

万齐融

风流谁代子，虽有旧无双。欢酒言相送，愁弦意不降。
落花馥河道，垂杨拂水窗。海潮与春梦，朝夕广陵江。

卷 117_18 【游春】

邢巨

海岳三峰古，春皇二月寒。绿潭渔子钓，红树美人攀。
弱蔓环沙屿，飞花点石关。溪山游未厌，琴酌弄晴湾。

卷 117_19 【游宣州琴溪同武平一作】

邢巨

灵溪非人迹，仙意素所秉。鳞岭森翠微，澄潭照秋景。

卷 117_20 【春江花月夜】

张若虚

春江潮水连海平，海上明月共潮生。滟滟随波千万里，
何处春江无月明。江流宛转绕芳甸，月照花林皆似霰。
空里流霜不觉飞，汀上白沙看不见。江天一色无纤尘，
皎皎空中孤月轮。江畔何人初见月，江月何年初照人。
人生代代无穷已，江月年年只相似。不知江月待何人，
但见长江送流水。白云一片去悠悠，青枫浦上不胜愁。
谁家今夜扁舟子，何处相思明月楼。可怜楼上月裴回，

应照离人妆镜台。玉户帘中卷不去，捣衣砧上拂还来。
此时相望不相闻，愿逐月华流照君。鸿雁长飞光不度，
鱼龙潜跃水成文。昨夜闲潭梦落花，可怜春半不还家。
江水流春去欲尽，江潭落月复西斜。斜月沉沉藏海雾，
碣石潇湘无限路。不知乘月几人归，落月摇情满江树。

卷 117_21 【代答闺梦还】

张若虚

关塞年华早，楼台别望违。试衫著暖气，开镜觅春晖。
燕入窥罗幕，蜂来上画衣。情催桃李艳，心寄管弦飞。
妆洗朝相待，风花暝不归。梦魂何处入，寂寂掩重扉。

卷 117_22 【洪州客舍寄柳博士芳】

薛业

去年燕巢主人屋，今年花发路傍枝。年年为客不到舍，
旧国存亡那得知。胡尘一起乱天下，何处春风无别离。

卷 117_23 【晚秋赠张折冲此公事制举】

薛业

都尉今无事，时清但闭关。夜霜戎马瘦，秋草射堂闲。
位以穿杨得，名因折桂还。冯唐真不遇，叹息鬓毛斑。

第一百一十八卷

卷 118_1 【和左司张员外自洛使入京中路先赴长安，逢立春日赠韦侍御等诸公】

孙逖

拜郎登省闼，奉使驰车乘。遥瞻使者星，便是郎官应。
台妙时相许，皇华德弥称。二陕听风谣，三秦望形胜。
此中睽益友，是日多诗兴。寒尽岁阴催，春归物华证。

卷 118_2 【和登会稽山】

孙逖

稽山碧湖上，势入东溟尽。烟景昼清明，九峰争隐嶙。
望中厌朱绂，俗内探玄牝。野老听鸣驹，山童拥行轸。
仙花寒未落，古蔓柔堪引。竹涧入山多，松崖向天近。
云从海天去，日就江村隕。能赋丘尝闻，和歌参不敏。
冥搜信冲漠，多士期标准。愿奉濯缨心，长谣反招隐。

卷 118_3 【送杨法曹按括州】

孙逖

东海天台山，南方缙云驿。溪澄问人隐，岩险烦登陟。
潭壑随星使，轩车绕春色。傥寻琪树人，为报长相忆。

卷 118_4 【葛山潭】

孙逖

圆潭写流月，晴明涵万象。仙翁何时还，绿水空荡漾。
凉哉草木腓，白露沾人衣。犹醉空山里，时闻笙鹤飞。

卷 118_5 【丹阳行】

孙逖

丹阳古郡洞庭阴，落日扁舟此路寻。传是东南旧都处，
金陵中断碧江深。在昔风尘起，京都乱如燬。
双阙戎虏间，千门战场里。传闻一马化为龙，
南渡衣冠亦愿从。石头横帝里，京口拒戎锋。
青枫林下回天辔，杜若洲前转国容。都门不见河阳树，
犂道唯闻建业钟。中原悠悠几千里，欲扫欃枪未云已。

英雄倾夺何纷然，一盛一衰如逝川。可怜宫观重江里，
金镜相传三百年。自从龙见圣人出，六合车书混为一。

昔年王气今何在，并向长安就尧日。荆榛古木闭荒阡，
共道繁华不复全。赤县唯馀江树月，黄图半入海人烟。
暮来山水登临遍，览古愁吟泪如霰。唯有空城多白云，
春风淡荡无人见。

卷 118_6 【山阴县西楼】

孙逖

都邑西楼芳树间，逶迤霁色绕江山。山月夜从公署出，
江云晚对讼庭还。谁知春色朝朝好，二月飞花满江草。
一见湖边杨柳风，遥忆青青洛阳道。

卷 118_7 【夜宿浙江】

孙逖

扁舟夜入江潭泊，露白风高气萧索。富春渚上潮未还，
天姥岑边月初落。烟水茫茫多苦辛，更闻江上越人吟。
洛阳城阙何时见，西北浮云朝暝深。

卷 118_8 【春日留别】

孙逖

春路透迤花柳前，孤舟晚泊就人烟。东山白云不可见，
西陵江月夜娟娟。春江夜尽潮声度，征帆遥从此中去。
越国山川看渐无，可怜愁思江南树。

卷 118_9 【奉和四月三日上阳水窗赐宴应制得春字】

孙逖

今日逢初夏，欢游续旧旬。气和先作雨，恩厚别成春。
凤吹临清洛，龙舆下紫宸。此中歌在藻，还见跃潜鳞。

卷 118_10 【奉和登会昌山应制】

孙逖

岩磴列云旗，吾君访道时。乾行万物睹，日驭六龙迟。
望远回天顾，登高动睿词。愿因山作寿，长保会昌期。

卷 118_11【正月十五日夜应制（一作沈佺期诗）】

孙逖

洛城三五夜，天子万年春。彩仗移双阙，琼筵会九宾。

舞成苍颉字，灯作法王轮。不觉东方日，遥垂御藻新。

卷 118_12【奉和御制登鸳鸯楼即目应制】

孙逖

玉辇下离宫，琼楼上半空。方巡五年狩，更辟四门聪。

井邑观秦野，山河念禹功。停銮留睿作，轩槛起南风。

卷 118_13【进船泛洛水应制（一作薛沅惑诗）】

孙逖

禁园纡睿览，仙棹叶时游。洛北风花树，江南彩画舟。

芳生兰蕙草，春入凤凰楼。兴尽离宫暮，烟光起夕流。

卷 118_14 【和常州崔使君寒食夜】

孙逖

闻道清明近，春庭向夕阑。行游昼不厌，风物夜宜看。

斗柄更初转，梅香暗里残。无劳秉华烛，清月在南端。

卷 118_15 【和韦兄春日南亭宴兄弟（兄在京）】

孙逖

台阁升高位，园林隔旧乡。忽闻歌棣萼，还比报琼芳。

门向宜春近，郊连御宿长。德星常有会，相望在文昌。

卷 118_16 【奉和崔司马游云门寺】

孙逖

系马清溪树，禅门春气浓。香台花下出，讲坐竹间逢。

觉路山童引，经行谷鸟从。更言穷寂灭，回策上南峰。

卷 118_17 【酬万八贺九云门下归溪中作】

孙逖

晚从灵境出，林壑曙云飞。稍觉清溪尽，回瞻画刹微。

独园馀兴在，孤棹宿心违。更忆登攀处，天香满袖归。

卷 118_18 【春初送吕补阙往西岳勒碑得云字】

孙逖

刻石记天文，朝推谷子云。筐中缄圣札，岩下揖神君。

语别梅初艳，为期草欲薰。往来春不尽，离思莫氛氲。

卷 118_19 【送越州裴参军充使入京】

孙逖

日落川径寒，离心苦未安。客愁西向尽，乡梦北归难。

霜果林中变，秋花水上残。明朝渡江后，云物向南看。

卷 118_20 【送周判官往台州】

孙逖

吾宗长作赋，登陆访天台。星使行看入，云仙意转催。

饮冰攀璀璨，驱传历莓苔。日暮东郊别，真情去不回。

卷 118_21 【送魏骑曹充宇文侍御判官分按山南】

孙逖

云雨阳台路，光华驿骑巡。劝农开梦土，恤隐惠荆人。

楼迥吟黄鹤，江长望白蘋。观风布明诏，更是汉南春。

卷 118_22 【送苏郎中绾出佐荆州】

孙逖

神仙久留滞，清切伫飞翻。忽佐南方牧，何时西掖垣。

高车自兰省，便道出荆门。不见河梁别，空销郢路魂。

卷 118_23 【冬末送魏起居赴京】

孙逖

大名将起魏，良史更逢迁。驿骑朝丹阙，关亭望紫烟。

西京春色近，东观物华偏。早赴王正月，挥毫记首年。

卷 118_24 【送李补阙摄御史充河西节度判官】

孙逖

昔年叨补袞，边地亦埋轮。官序惭先达，才名畏后人。

西戎虽献款，上策耻和亲。早赴前军幕，长清外域尘。

卷 118_25 【送赵评事摄御史监军岭南】

孙逖

议狱持邦典，临戎假宪威。风从闾阖去，霜入洞庭飞。

篁竹迎金鼓，楼船引绣衣。明年拜真月，南斗使星归。

卷 118_26 【送靳十五侍御使蜀】

孙逖

天使出霜台，行人择吏才。传车春色送，离兴夕阳催。

驿绕巴江转，关迎剑道开。西南一何幸，前后二龙来。

卷 118_27 【送李给事归徐州覲省】

孙逖

列位登青琐，还乡复彩衣。共言晨省日，便是昼游归。

春水经梁宋，晴山入海沂。莫愁东路远，四牡正駉駉。

卷 118_28 【送杜侍御赴上都】

孙逖

避马台中贵，登车岭外遥。还因贡赋礼，来谒大明朝。

地入商山路，乡连渭水桥。承恩返南越，尊酒重相邀。

卷 118_29 【送张环摄御史监南选】

孙逖

汉使得张纲，威名摄远方。恩沾柱下史，荣比选曹郎。

江带黔中阔，山连峡水长。莫愁炎暑地，秋至有严霜。

卷 118_30 【宴越府陈法曹西亭】

孙逖

公府西岩下，红亭间白云。雪梅初度腊，烟竹稍迎曛。

水木涵澄景，帘栊引霁氛。江南归思逼，春雁不堪闻。

卷 118_31 【同邢判官寻龙湫观归湖中】

孙逖

星使下仙京，云湖喜昼晴。更从探穴处，还作棹歌行。

丝管荷风入，帘帷竹气清。莫愁归路远，水月夜虚明。

卷 118_32 【寻龙湫】

孙逖

仙穴寻遗迹，轻舟爱水乡。溪流一曲尽，山路九峰长。

渔父歌金洞，江妃舞翠房。遥怜葛仙宅，真气共微茫。

卷 118_33 【宿云门寺阁】

孙逖

香阁东山下，烟花象外幽。悬灯千嶂夕，卷幔五湖秋。

画壁馀鸿雁，纱窗宿斗牛。更疑天路近，梦与白云游。

卷 118_34 【扬子江楼】

孙逖

扬子何年邑，雄图作楚关。江连二妃渚，云近八公山。

驿道青枫外，人烟绿屿间。晚来潮正满，数处落帆还。

卷 118_35【淮阴夜宿二首】

孙逖

水国南无畔，扁舟北未期。乡情淮上失，归梦郢中疑。
木落知寒近，山长见日迟。客行心绪乱，不及洛阳时。

永夕卧烟塘，萧条天一方。秋风淮水落，寒夜楚歌长。
宿莽非中土，鲈鱼岂我乡。孤舟行已倦，南越尚茫茫。

卷 118_36【下京口埭夜行】

孙逖

孤帆度绿氛，寒浦落红曛。江树朝来出，吴歌夜渐闻。
南溟接潮水，北斗近乡云。行役从兹去，归情入雁群。

卷 118_37【山行遇雨】

孙逖

骤雨昼氤氲，空天望不分。暗山唯觉电，穷海但生云。
涉涧猜行潦，缘崖畏宿氛。夜来江月霁，棹唱此中闻。

卷 118_38 【夜到润州】

孙逖

夜入丹阳郡，天高气象秋。海隅云汉转，江畔火星流。
城郭传金柝，闾阎闭绿洲。客行凡几夜，新月再如钩。

卷 118_39 【和常州崔使君咏后庭梅二首】

孙逖

闻唱梅花落，江南春意深。更传千里外，来入越人吟。
弱干红妆倚，繁香翠羽寻。庭中自公日，歌舞向芳阴。

梅院重门掩，遥遥歌吹边。庭深人不见，春至曲能传。
花落弹棋处，香来荐枕前。使君停五马，行乐此中偏。

卷 118_40 【同和咏楼前海石榴二首】

孙逖

客自新亭郡，朝来数物华。传君妓楼好，初落海榴花。

露色珠帘映，香风粉壁遮。更宜林下雨，日晚逐行车。

海上移珍木，楼前咏所思。遥闻下车日，正在落花时。
旧绿香行盖，新红洒步綦。从来寒不易，终见久逾滋。

卷 118_41 【故右丞相赠太师燕文贞公挽词二首】

孙逖

海内文章伯，朝端礼乐英。一言兴宝运，三入济群生。
命与才相偶，年将位不并。台星忽已坼，流恻轸皇情。
甲第三重戟，高门四列侯。已成冠盖里，更有凤凰楼。
人世方为乐，生涯遽若休。空馀掌纶地，传庆百千秋。

卷 118_42 【故陈州刺史赠兵部尚书韦公挽词】

孙逖

奕叶金章贵，连枝鼎位尊。台庭为凤穴，相府是鹄原。
世阅空悲命，泉幽不返魂。惟馀汉臣史，继术赞韦门。

卷 118_43 【故程将军妻南阳郡夫人樊氏挽歌】

孙逖

德配程休甫，名高鲁季姜。宠荣苍玉珮，宴梦郁金堂。

白日期偕老，幽泉忽悼亡。国风犹在咏，江汉近南阳。

卷 118_44 【和上巳连寒食有怀京洛】

孙逖

天津御柳碧遥遥，轩骑相从半下朝。行乐光辉寒食借，
太平歌舞晚春饶。红妆楼下东郊道，青草洲边南渡桥。
坐见司空扫西第，看君侍从落花朝。

卷 118_45 【和左司张员外自洛使入京中路先赴长安，逢立春日赠韦侍御等诸公】

孙逖

忽睹云间数雁回，更逢山上正花开。河边淑气迎芳草，
林下轻风待落梅。秋宪府中高唱入，春卿署里和歌来。
共言东阁招贤地，自有西征谢傅才。

卷 118_46 【和崔司马登称心山寺】

孙逖

郡府乘休日，王城访道初。觉花迎步履，香草藉行车。

倚阁观无际，寻山坐太虚。岩空迷禹迹，海静望秦馀。
翡翠巢珠网，鸛鸡间绮疏。地灵资净土，水若护真如。

宝树谁攀折，禅云自卷舒。晴分五湖势，烟合九夷居。
生灭纷无象，窥临已得鱼。尝闻宝刀赠，今日奉琼琚。

卷 118_47 【奉和李右相中书壁画山水】

孙逖

庙堂多暇日，山水契中情。欲写高深趣，还因藻绘成。
九江临户牖，三峡绕檐楹。花柳穷年发，烟云逐意生。

能令万里近，不觉四时行。气染荀香馥，光含乐镜清。
咏歌齐出处，图画表冲盈。自保千年遇，何论八载荣。

卷 118_48 【奉和李右相赏会昌林亭】

孙逖

贤相初陪跸，灵山本降神。作京雄近县，开阁宠平津。
地胜林亭好，时清宴赏频。百泉萦草木，万井布郊畛。
德与春和盛，功将造化邻。还嗤渭滨叟，岁晚独垂纶。

卷 118_49 【和左卫武仓曹卫中对雨创韵赠右卫李骑曹】

孙逖

林父同官意，宣尼久骑交。文场刊玉篆，武事掌金铙。
道合宜连茹，时清岂系匏。克勤居簿领，多暇屏譙。
美酒怀公宴，玄谈俟客嘲。薄云生北阙，飞雨自西郊。
院暑便清旷，庭芜觉渐苞。高门关讵闭，逸韵柱难胶。
枳棘鸾无叹，椅梧凤必巢。忽闻徵并作，观海愧堂坳。

卷 118_50 【送新罗法师还国】

孙逖

异域今无外，高僧代所稀。苦心归寂灭，宴坐得精微。
持钵何年至，传灯是日归。上卿挥别藻，中禁下禅衣。
海阔杯还度，云遥锡更飞。此行迷处所，何以慰虔祈。

卷 118_51 【送赵大夫护边（一作送赵都护赴安西）】

孙逖

外域分都护，中台命职方。欲传清庙略，先取剧曹郎。
已佩登坛印，犹怀伏奏香。百壶开祖饯，驷牡戒戎装。

青海连西掖，黄河带北凉。关山瞻汉月，戈剑宿胡霜。
体国才先著，论兵策复长。果持文武术，还继杜当阳。

卷 118_52 【立秋日题安昌寺北山亭】

孙逖

楼观倚长霄，登攀及霁朝。高如石门顶，胜拟赤城标。
天路云虹近，人寰气象遥。山围伯禹庙，江落伍胥潮。
徂暑迎秋薄，凉风是日飘。果林馀苦李，萍水覆甘蕉。
览古嗟夷漫，凌空爱沆寥。更闻金刹下，钟梵晚萧萧。

卷 118_53 【登越州城】

孙逖

越嶂绕层城，登临万象清。封圻沧海合，廛市碧湖明。
晓日渔歌满，芳春棹唱行。山风吹美箭，田雨润香粳。
代阅英灵尽，人闲吏隐并。赠言王逸少，已见曲池平。

卷 118_54 【江行有怀】

孙逖

秋水明川路，轻舟转石圻。霜多山橘熟，寒至浦禽稀。

飞席乘风势，回流荡日晖。昼行疑海若，夕梦识江妃。
野霁看吴尽，天长望洛非。不知何岁月，一似暮潮归。

卷 118_55 【长洲苑（吴黄武中，此地校猎）】

孙逖

吴王初鼎峙，羽猎骋雄才。辇道闾门出，军容茂苑来。
山从列嶂转，江自绕林回。剑骑缘汀入，旌门隔屿开。
合离纷若电，驰逐溢成雷。胜地虞人守，归舟汉女陪。
可怜夷漫处，犹在洞庭隈。山静吟猿父，城空应雉媒。
戎行委乔木，马迹尽黄埃。揽涕问遗老，繁华安在哉。

卷 118_56 【和咏廨署有樱桃】

孙逖

上林天禁里，芳树有红樱。江国今来见，君门春意生。
香从花绶转，色绕佩珠明。海鸟衔初实，吴姬扫落英。
切将稀取贵，羞与众同荣。为此堪攀折，芳蹊处处成。

卷 118_57 【同洛阳李少府观永乐公主入蕃】

孙逖

边地莺花少，年来未觉新。美人天上落，龙塞始应春。

卷 118_58 【途中口号】

孙逖

邺城东北望陵台，珠翠繁华去不回。
无复新妆艳红粉，空馀故垄满青苔。

卷 118_59 【晦日湖塘】

孙逖

吉日初成晦，方塘遍是春。落花迎二月，芳树历三旬。
公子能留客，巫阳好解神。夜还何虑暗，秉烛向城闉。

卷 118_60 【句】

孙逖

野烟出炉上，山花落镜中。（《庐山》。见《诗式》）

第一百一十九卷

卷 119_1 【从军行】

崔国辅

塞北胡霜下，营州索兵救。夜里偷道行，将军马亦瘦。
刀光照塞月，阵色明如昼。传闻贼满山，已共前锋斗。

卷 119_2 【杂诗】

崔国辅

逢著平乐儿，论交鞍马前。与酤一斗酒，恰用十千钱。
后余在关内，作事多迍邅。何肯相救援，徒闻宝剑篇。

卷 119_3 【古意】

崔国辅

红荷楚水曲，彪炳烁晨霞。未得两回摘，秋风吹却花。
时芳不待妾，玉珮无处夸。悔不盛年时，嫁与青楼家。

卷 119_4 【宿法华寺】

崔国辅

松雨时复滴，寺门清且凉。此心竟谁证，回憩支公床。
壁画感灵迹，龕经传异香。独游寄象外，忽忽归南昌。

卷 119_5 【题预章馆】

崔国辅

杨柳映春江，江南转佳丽。吴门绿波里，越国青山际。
游宦常往来，津亭暂临憩。驿前苍石没，浦外湖沙细。
向晚宴且久，孤舟罔然逝。云留西北客，气歇东南帝。
独有萋萋心，谁知怨芳岁。

卷 119_6 【石头滩作】

崔国辅

怅矣秋风时，余临石头濑。因高见远境，尽此数州内。
羽山数点青，海岸杂光碎。离离树木少，泚泚湖波大。
日暮千里帆，南飞落天外。须臾遂入夜，楚色有微霭。
寻远迹已穷，遗荣事多昧。一身犹未理，安得济时代。

且泛朝夕潮，荷衣蕙为带。

卷 119_7 【漂母岸】

崔国辅

泗水入淮处，南边古岸存。秦时有漂母，于此饭王孙。
王孙初未遇，寄食何足论。后为楚王来，黄金答母恩。
事迹遗在此，空伤千载魂。茫茫水中渚，上有一孤墩。
遥望不可到，苍苍烟树昏。几年崩冢色，每日落潮痕。
古地多堙圯，时哉不敢言。向夕泪沾裳，遂宿芦洲村。

卷 119_8 【对酒吟】

崔国辅

行行日将夕，荒村古冢无人迹。蒙笼荆棘一鸟吟，
屡唱提壶沽酒吃。古人不达酒不足，遗恨精灵传此曲。
寄言世上诸少年，平生且尽杯中醪。

卷 119_9 【奉和华清宫观行香应制】

崔国辅

天子蕊珠宫，楼台碧落通。豫游皆汗漫，斋处即崆峒。

云物三光里，君臣一气中。道言何所说，宝历自无穷。

卷 119_10 【七夕】

崔国辅

太守仙潢族，含情七夕多。扇风生玉漏，置水写银河。
阁下陈书籍，闺中曝绮罗。遥思汉武帝，青鸟几时过。

卷 119_11 【宿范浦】

崔国辅

月暗潮又落，西陵渡暂停。村烟和海雾，舟火乱江星。
路转定山绕，塘连范浦横。鸱夷近何去，空山临沧溟。

卷 119_12 【奉和圣制上巳祓禊应制】

崔国辅

元巳秦中节，吾君灞上游。鸣銮通禁苑，别馆绕芳洲。
鹓鹭千官列，鱼龙百戏浮。桃花春欲尽，谷雨夜来收。
庆向尧樽祝，欢从楚棹讴。逸诗何足对，宥作掩东周。

卷 119_13 【九日侍宴应制】

崔国辅

运偶千年圣，时传九日神。尧樽列钟鼓，汉阙辟钩陈。
金篆三清降，琼筵五老巡。始惊兰佩出，复咏柏梁新。
云雁楼前晚，霜花酒里春。欢娱无限极，书剑太平人。

卷 119_14 【杭州北郭戴氏荷池送侯愉】

崔国辅

秋近万物肃，况当临水时。折花赠归客，离绪断荷丝。
谁谓江国永，故人感在兹。道存过北郭，情极望东菑。
乔木故园意，鸣蝉穷巷悲。扁舟竟何待，中路每迟迟。

卷 119_15 【怨词二首】

崔国辅

妾有罗衣裳，秦王在时作。为舞春风多，秋来不堪著。
楼头桃李疏，池上芙蓉落。织锦犹未成，蛩声入罗幕。

卷 119_16 【古意二首】

崔国辅

玉笼薰绣裳，著罢眠洞房。不能春风里，吹却兰麝香。

种棘遮藤芜，畏人来采杀。比至狂夫还，看看几花发。

卷 119_17 【襄阳曲二首】

崔国辅

蕙草娇红萼，时光舞碧鸡。城中美年少，相见白铜鞮。

少年襄阳地，来往襄阳城。城中轻薄子，知妾解秦筝。

卷 119_18 【魏宫词】

崔国辅

朝日照红妆，拟上铜雀台。画眉犹未了，魏帝使人催。

卷 119_19【长信草（一作长信宫，一作婕妤怨）】

崔国辅

长信宫中草，年年愁处生。故侵珠履迹，不使玉阶行。

卷 119_20【长乐少年行（一作古意）】

崔国辅

遗却珊瑚鞭，白马骄不行。章台折杨柳，春日路傍情。

卷 119_21【湖南曲（一作古意）】

崔国辅

湖南送君去，湖北送君归。湖里鸳鸯鸟，双双他自飞。

卷 119_22【中流曲（一作古意）】

崔国辅

归时日尚早，更欲向芳洲。渡口水流急，回船不自由。

卷 119_23 【王孙游】

崔国辅

自与王孙别，频看黄鸟飞。应由春草误，著处不成归。

卷 119_24 【采莲曲】

崔国辅

玉溱花争发，金塘水乱流。相逢畏相失，并著采莲舟。

卷 119_25 【子夜冬歌】

崔国辅

寂寥抱冬心，裁罗又褰褰。夜久频挑灯，霜寒剪刀冷。

卷 119_26 【丽人曲】

崔国辅

红颜称绝代，欲并真无侣。独有镜中人，由来自相许。

卷 119_27 【小长干曲】

崔国辅

月暗送潮风，相寻路不通。菱歌唱不彻，知在此塘中。

卷 119_28 【王昭君（一作吟叹曲）】

崔国辅

汉使南还尽，胡中妾独存。紫台绵望绝，秋草不堪论。

卷 119_29 【秦女卷衣（一作妾薄命）】

崔国辅

虽入秦帝宫，不上秦帝床。夜夜玉窗里，与他卷衣裳。

卷 119_30 【今别离】

崔国辅

送别未能旋，相望连水口。船行欲映洲，几度急摇手。

卷 119_31 【卫艳词】

崔国辅

淇上桑叶青，青楼含白日。比时遥望君，车马城中出。

卷 119_32 【渭水西别李仑】

崔国辅

陇右长亭堠，山阴古塞秋。不知呜咽水，何事向西流。

卷 119_33 【古意】

崔国辅

净扫黄金阶，飞霜皎如雪。下帘弹箜篌，不忍见秋月。

卷 119_34 【送韩十四被鲁王推递往济南府】

崔国辅

西候情何极，南冠怨有馀。梁王虽好事，不察狱中书。

卷 119_35【白纈辞二首（前首一作《香风词》）】

崔国辅

洛阳梨花落如霰，河阳桃叶生复齐。
坐惜玉楼春欲尽，红绵粉絮裛妆啼。

董贤女弟在椒风，窈窕繁华贵后宫。
璧带金釭皆翡翠，一朝零落变成空。

卷 119_36【九日】

崔国辅

江边枫落菊花黄，少长登高一望乡。
九日陶家虽载酒，三年楚客已沾裳。

卷 119_37【王昭君】

崔国辅

一回望月一回悲，望月月移人不移。
何时得见汉朝使，为妾传书斩画师。

第一百二十卷

卷 120_1 【孤寝怨】

崔珪

征戍动经年，含情拂玳筵。花飞织锦处，月落捣衣边。
灯暗愁孤坐，床空怨独眠。自君辽海去，玉匣闭春弦。

卷 120_2 【题武陵草堂】

杨浚

草堂列仙楼，上在青山顶。户外窥数峰，阶前对双井。
雨来花尽湿，风度松初冷。登栈行不疲，入谿语弥静。
云能去尘服，兼欲事金鼎。正直心所存，谄谀长自省。
适知幽遁趣，已觉烦虑屏。更爱云林间，吾将卧南颖。

卷 120_3 【广武怀古】

杨浚

河水城下流，登城望弥愜。海云飞不断，岸草绿相接。

龙门无旧场，武牢有遗堞。扼喉兵易守，扞指计何捷。
天夺项氏谋，卒成汉家业。乡山遥可见，西顾泪盈睫。

卷 120_4 【赠李郎中】

杨浚

仙郎早朝退，直省卧南轩。院竹自成赏，阶庭寂不喧。
焚香开后阁，起草闭前门。礼乐风流美，光华星位尊。
荣兼朱绂贵，交乃布衣存。是日登龙客，无忘君子恩。

卷 120_5 【咏王大娘戴竿】

刘晏

楼前百戏竞争新，唯有长竿妙入神。
谁谓绮罗翻有力，犹自嫌轻更著人。

卷 120_6 【享太庙乐章】

刘晏

汉祚惟永，神功中兴。夙驱氛祲，天覆黎蒸。
三光再朗，庶绩其凝。重熙累叶，景命是膺。

卷 120_7 【鸿门行】

袁瓘

少年买意气，百金不辞费。学剑西入秦，结交北游魏。
秦魏多豪人，与代亦殊伦。由来不相识，皆是暗相亲。
宝马青丝辔，狐裘貂鼠服。晨过剧孟游，暮投咸阳宿。
然诺本云云，诸侯莫不闻。犹思百战术，更逐李将军。
始从灞陵下，遥遥度朔野。北风闻楚歌，南庭见胡马。
胡马秋正肥，相邀夜合围。战酣烽火灭，路断救兵稀。
白刃纵横逼，黄尘飞不息。虏骑血洒衣，单于泪沾臆。
献凯云台中，自言塞上雄。将军行失势，部曲遂无功。
新人不如旧，旧人不相救。万里长飘飘，十年计不就。
弃置难重论，驱马度鸿门。行看楚汉事，不觉风尘昏。
宝剑中夜抚，悲歌聊自舞。此曲不可终，曲终泪如雨。

卷 120_8 【惠文太子挽歌（睿宗之子岐，王范也开元十四年卒，赠太子）】

袁瓘

寒仗丹旄引，阴堂白日违。暗灯明象物，画水湿灵衣。
羽化淮王去，仙迎太子归。空馀燕衔士，朝夕向陵飞。

卷 120_9 【从军行】

李昂

汉家未得燕支山，征戍年年沙朔间。塞下长驱汗血马，
云中恒闭玉门关。阴山瀚海千万里，此日桑河冻流水。
稽洛川边胡骑来，渔阳戍里烽烟起。长途羽檄何相望，
天子按剑思北方。羽林练士拭金甲，将军校战出玉堂。
幽陵异域风烟改，亭障连连古今在。夜闻鸿雁南渡河，
晓望旌旗北临海。塞沙飞淅沥，遥裔连穷磧。
玄漠云平初合阵，西山月出闻鸣镝。城南百战多苦辛，
路傍死卧黄沙人。戎衣不脱随霜雪，汗马赍¹长被铁。
杨叶楼中不寄书，莲花剑上空流血。匈奴未灭不言家，
驱逐行行边徼赊。归心海外见明月，别思天边梦落花。
天边回望何悠悠，芳树无人渡陇头。春云不变阳关雪，
桑叶先知胡地秋。田畴不卖卢龙策，窦宪思勒燕然石。
麾兵静北垂，此日交河湄。欲令塞上无干戚，
会待单于系颈时。

卷 120_37 【赋戚夫人楚舞歌】

李昂

定陶城中是妾家，妾年二八颜如花。闺中歌舞未终曲，
天下死人如乱麻。汉王此地因征战，未出帘栊人已殁。

风花菡萏落辕门，云雨裴回入行殿。日夕悠悠非旧乡，
飘飘处处逐君王。闺门向里通归梦，银烛迎来在战场。
相从顾恩不雇己，何异浮萍寄深水。逐战曾迷只轮下，
随君几陷重围里。此时平楚复平齐，咸阳宫阙到关西。
珠帘夕殿闻钟磬，白日秋天忆鼓鼙。君王纵恣翻成误，
吕后由来有深妒。不奈君王容鬓衰，相存相顾能几时。
黄泉白骨不可报，雀钗翠羽从此辞。君楚歌兮妾楚舞，
脉脉相看两心苦。曲未终兮袂更扬，君流涕兮妾断肠。
已见储君归惠帝，徒留爱子付周昌。

卷 120_38 【句】

李昂

耳临清渭洗，心向白云闲。（《纪事》）

卷 120_39 【夏晚初霁南省寓直用馀字（时兼尚书郎节度判官）】

庾狄履温

薄宦因时泰，凉宵寓直初。沉沉仙阁闭，的的暗更徐。
霁色连空上，炎氛入夜除。星回南斗落，月度北窗虚。
待漏残灯照，含芳袭气馥。寐来冠不解，奏罢草仍书。
幕府惭良策，明曹愧散樗。命轻徒有报，义重更难疏。

燕厦欣成托，鹄行滥所如。晨趋当及早，复此戒朝车。

卷 120_40 【同皇甫兵曹天官寺浴室新成招友人赏会】

寇坦

温室欢初就，兰交托胜因。共听无漏法，兼濯有为尘。
水洁三空性，香沾四大身。清心多善友，颂德慰同人。

卷 120_41 【同张少府和库狄员外夏晚初霁南省寓直时兼充
节度判官之作】

寇坦

黄绶归休日，仙郎复奏馀。晏居当夏晚，寓直会晴初。
露散星文发，云披水镜虚。高才推独唱，嘉会喜连茹。
月色摇春闼，香烟霭暝庐。千门传夜警，万象照阶除。
少孺嘉能赋，文强阅赐书。兼曹谋未展，入幕志方摅。
为奉灵台帛，恭先待漏车。贞标不可仰，空此乐樵渔。

卷 120_42 【咏铜柱】

李休烈

天门街里倒天枢，火急先须御火珠。

·全唐诗·

计合一条丝线挽，何劳两县索人夫。